

Н) 7940  
39-

ҮЛМАС  
УМАРБЕКОВ  
ҚИЁМАТ  
ҚАРЗ







УЛМАС  
УМАРБЕКОВ


ҚИЁМАТ ҚАРЗ  
ХИКОЯЛАР

Ғафур Ғулом номидаги Адабиёт  
ва санъат нашриёти  
Тошкент — 1976

Y3  
Y-47

7940

HO 392



Y 70303-26  
852(06)-76 11-76

## ЮЛДУЗЛАР

Тунда машина ҳайдашнинг ўзига хос гашти бўлади. Ҳамма ёқ сув қўйгандек жимжит. Олис-олисларда чироқлар милтиллаб кўринади. Йўл юқорилаб борган сари кўкда гоҳ ёниб, гоҳ сўниб турган сон-саноқсиз юлдузлардан фарқ қилиб бўлмайди уларни. Юлдузлар... Юлдузлар... Юлдузлар порлаб турган тунда йўлинг сира тугамаса, қанча олис юрсанг, шунча яхши. Чарчоқ сезмайсан, роҳат билан нафас оласан, руҳинг енгил тортади, нималарнидир хиргойи қиласан.

Кун бўйи шағал ташиган Назирполвон қурилиш базасидан ҳаммадан кейин чиқди. Самосвалини муюлишдаги колонка олдида тўхтатиб, кўйлагини ечди, бошини водопроводнинг тагига тутиб, шалоплатиб ювинди. Кейин, қониб сув ичиб, кўйлаги билан артнди. Яқиндагина ўстирган ингичка, майин мўйловини силаб қўйди.

Кўп ўтмай, машина гувиллаб катта йўлга чиқдида, шаҳар томон елиб кетди.

Назирполвоннинг кайфи чоғ эди. Бугун ҳар кунгидан кўп ишлаган бўлса ҳам, чарчаганини сира сезмасди. Папирос тутатар экан, икки томондан лип-лип ўтиб турган кўм-кўк дарахтларга, кўкда кўзни қамаштирадиган даражада жимиirlаётган оқ сариқ юлдузларга суқ билан қараб қўярди. Бир маҳал нимадир эсига тушиб қолди, шоша-пиша кабина қутисини очди. Унда учи зар қоғоз билан ўралган беш юлдузли конъяк тебраниб ётарди. Назирполвон жилмайиб қўйди, ой шуъласида текис, оппоқ тишлари худди конъякнинг

зар қоғозидек ялтираб кетди. У қўлига шишани олиб, у ёқ-бу ёгини кўрди-да, яна жойига қўйди.

Бугун сўнгги бир йил ичида иккинчи марта қўлига ичимлік олиши. Биринчи марта қамоқдан чиққан куни олди. Унда ҳам ўзи эмас, дўсти Семён ичирган эди. «Кел, ошна,— деган эди у ўшандаг.— Бизниги юр. Бир ўтиришайлик. Бутун ғам-гуссаларингни кўнгилдан чиқариб ташлайсан». Назирполвон йўқ демади.

Уша куни дўстининг уйида қолди. Мана ҳозир ҳам шу уйга кетяпти. Бугун Семённинг тугилган куни. Кеч бўлса ҳам, бориб табрикламаса, кўнгли жойига тушмайди. Семён унга қандай яхшиликлар қилмади!

Машина юришини секинлатди. Назирполвон хаёл билан бўлиб, Қўргонтепадан ўтиб бораётганини энди пайқади. Педални босиб, газ берди. Ўчиб қолган папиросини ёндиromoқчи бўлган эди, олдинда икки кишининг қўл кўтариб турганини кўриб қолди. Тормозни босди.

— Ҳа, нима гап?— Назирполвон машинадан бошини чиқарди.

— Ака, илтимос,— ўрта бўйли йигит машинага яқинлашди.— Шу кишининг ҳожатини чиқариб юборинг. Кўкорол қурилиш трестига кетаётувдик, баллон ёрилиб қолди. Запас баллон олиб юрардим, бу гал жин уриб, эсимдан чиқибди.

Шу пайт йигитнинг олдида кичкина чамадон кўтарган бир аёл пайдо бўлди. Назирполвон унга энсаси қотиб қаради-да, йигитдан сўради:

— Шу кишими?

— Ҳа, илтимос, элтиб ташланг.

— Эртага ойлик тарқатмасам отпускачилардан баълога қоламан,— гапга аралашди аёл.

Назирполвон ўйланиб қолди. Йигитнинг ялиниб-ёлвориши, аёлнинг ёқимтой қўнгироқ овози шунга мажбур қилган эди. «Икки соатда бориб келаман,— хаёлидан ўтказди у.— Барибир Сёмка мени кутмайди-ку!»

— Майли, ўтириинг!

— Яшанг-э, ака. Ҳури опа, бу ёққа ўтинг.

Йигит бирпасда аёлни кабинага ўтқазиб, чамадони-ви олдига қўйди-да, ёнига ўзи ҳам жойлашди.

— Ҳа, сиз қаёққа?— сўради аёл ундан.

— Сизни қўйиб келаман.

— Қўйинг, ўзим кетавераман.

Йигит нима дейишини билмай қолди, Назирполвонга ғалати қараб қўйди-да:

— Ахир, ёлгиз ўзингиз... қандоқ бўларкин? — деди иккиланиб.

— Ҳечқиси йўқ, биринчи марта эмас-ку. Яхши қолинг!

Назирполвон машинани орқага бурди, йигит ҳамон жойидан жилмас, чамадоннинг бандини маҳкам ушлаганча жим ўтиарди. Бу Назирполвонни гижинтириди.

— Ишонмасангиз юринг, айланиб келасиз! — деди у заҳархандалик билан.

— Йўқ, ишонишга-ку ишонаман-а, лекин... — йигит аёлга ўгирилди. — Ҳай, майли, ўзингиз бораверинг. Эрталаб баллон юборишин, эсингиздан чиқиб қолмасин.

Аёл бошини қимирлатди. Йигит машинадан тушиши билан Назирполвон газ берди.

Яна ўша маълум ва таниш йўл... Ҳамма ёқ жимжит. Моторнинг бир оҳангда гуриллашидан бошқа ҳеч нарса қулоққа чалинмайди. Олдинда сон-саноқсиз юлдузлар... Назирполвон боя шаҳарга қайтаётганида, битта анжирдек юлдузни кўз остига олиб қўйган эди. Ўша юлдуз мана ҳозир ҳам шундай тўгрисида турибди, на нарига ўтади, на берига. Худди соқчидек у билан баробар боради. Қани энди шундай ҳаёт юлдузинг бўлса! Оғирингни енгил қилса, ўнқир-чўнқир кўчаларга тушиб қолиб адашиб юрганингда, секин қўлингдан ушлаб, катта кўчага олиб чиқса, йўлингни равшан қилиб турса!

Назирполвон папирос тутатиб, чуқур уҳ тортди. Кейин аёлга кўз қирини ташлади, секин бошини ҳам шу томонга бурди.

— Кассирмисиз?

— Ҳа, трестда ишлайман. Нима эди? — аёл Назирполвонга қаради.

— Ўзим шундай.

— Отпускага чиқадиганлар бор эди, банкда ушланиб қолдим. Йўлда баллон ёрилиб қолди.

Назирполвонни нимадир силтаб юборгандай бўлди. Кўзлари ўзидан-ўзи чамадонга қадалди.

— Кўпчликми отпускачилар? — сўради у бўғиқ овоз билан.

— Ўн киши.

— Ўн киши?!

Назирполвон шундай савол берди-ю, ўз овозидан ўзи қўрқиб кетди. У бу овозни таниди, танигани учун ҳам қўрқиб кетди. Бу Назирполвоннинг эмас, бундан икки йил бурунги Назир олифтанинг овози эди. Унинг бутун бадани жунжикиб кетди. Пешонасида совуқ тер ялтиради. Ўзидаги яшин тезлигига юз берган ўзгариши яшириш учунми, секин ёнига қаради-да, енги билан пешонасини артди.

Аёл эшикнинг бандига тирсагини тираб, парвосизгина ўтиради. Кўзлари йўлда, ёқут юлдузларда. Чарчаганми, ё уйқуси келяптими, баъзи-баъзида суюнчиқ-иша суюниб, чуқур нафас олиб қўяди.

Назирполвон енгил тортди. Сезмалти. Яхши бўлди сезмагани. Уни шайтон вассасага солаётгани маълум эди. Шунча-я? Чамадон тўла бўлса керак. Нима қиласа экан? Яхшиси, машинани тўхтатиб, тушириб юбориш керак. Нега? Беихтиёр келиб қолган бу савол Назирполвоннинг тишларини гижирлатиб юборди. Тўғри-да, нега тушириб юборади? Омад ҳар доим келавермайди-ку!

Назирполвон атрофга олазарак бўлиб қараб чиқди. Милт-милт қилиб турган юлдузлардан бошқа ҳеч нарса кўзга чалинмайди. Ҳозир темир йўлни кесиб ўтилади. Ундан сал нарироқда йўл қалин тутзорнинг ичига кириб кетади. Кўкоролга эса, эҳ-хе, ҳали қанча бор. Уша ёққа кўп қатнаган. Ҳар бир уй, дарахт унга маълум. Трест дарвозасининг олдидаги пивохонада шериклари билан роса пивохўрлик қилган. Трестдагиларнинг кўпини билади. Қамоқдан янги чиққанида Семён уни машинасида олиб борган эди. Тўртта-бешта шофёр йигитлар билан ярим кечагача чақчақлашиб ўтиришган. Шаҳарга қайтгаётганида биттаси, эрмак қилиб туринг, деб қанчаям пул узатган эди.

Ана, темир йўлдан ҳам ўтилди. Тутзор бошланди. Қоп-қоронғи. Назирполвон беихтиёр машинани тўхтатди. Ўчиб қолган папиросини тутатиб, устма-уст тортди. Шунча пул-а! Ҳазил гапми? Қурувчилар яхши топади. Назирполвон эшикни оҳиста очиб, пастга тушди. Қаёқдандир қўлида катта ключ пайдо бўлиб қолди. Уни

маҳкам сиқди-да, аёлга қаради. У ширин уйқуда эди. Половон бир оз ўйланиб туриб, зарб билан зинага оёғини қўйди, ключни кабинанинг пастки томонига улоқтириди. Нимадир тарақлаб кетди.

— А? Тинчликми? — аёл чўчиб уйғонди.

Назирполвон жавоб бермади.

— Нима, сизникиям бузилиб қолдими? — сўради аёл кўзларини ишқалаб.

— Ҳм... — деди половон ва истеҳзо билан жилмайди, буни аёл сезмади.

— Кўзим илинибди, — деди у енгил эснаб. — Йўлда ҳеч ухлайдиган одатим йўқ эди. Анча турамизми?

Назирполвон аёлнинг гапига эътибор бермай, пе-дални харсанг тош итаргандай, куч билан босди. Ма-шина бундан бир дақиқа олдин ҳукмрон бўлиб турган хавфли сукунатни бузиб, юриб кетди.

Анчагача иккови ҳам жим борди. Аёл орқага бо-шини ташлаб, нималарнидир ўйлаб борар, гоҳ-гоҳида жилмайиб қўярди. Назирполвон ҳам ўз ўйи билан банд. Аммо бу ўйлар боя шаҳарга қайтаётгандаги ўй-лар сингари қувноқ эмас, кўз остига олиб қўйган юл-дузи ҳамон унинг олдида кетаётган бўлса ҳам, бояги-дек унга ҳузур бағишлиамайди. Назирполвон унга караб ижирганиб қўйди, гўё кимдир баҳайбат қўли билан шу юлдузни осмондан узиб олиб, ёруғида унинг юрагини тимирскилаяпти.

— Менга каранг, — деди тўсатдан Назирполвон аёл-га, — мендан қўрқмайсизми?

— Нега қўрқай? — ҳайрон бўлди аёл, кейин кулиб юборди. — Нима, сиз қароқчимидингиз?

Назирполвон қулоқларигача қизариб кетганини сезди.

— Нега сўраяпсиз?

— Йўл олис... Аёл киши...

— Аёл киши ҳам одам-ку! Одам одамга ишониши керак!

Назирполвон ялт этиб унга қаради. Одам одамга ишонади... У бу ганини иккинчи одамдан эшитиши. Биринчи гапирган одам қамоқхона бошлигининг ёр-дамчиси, милиция начитани Қўсиров эди. Назирполвоннинг эсига тўладан келган, новча бу одам келдиг-ю, сўнгги йиллардаги бутун қилмишлари, тортган азоблари, ёлғизгина онасининг фарёди, бир хиллари ти-

шининг оқини кўрсатиб тиржайган, бир хилләри эса, жирканч, ачиниш билан уни кузатиб қолган танишбилишлари, ёр-биродарлари, худди ҳозир лип-лип ўтиб турган дараҳтлардек, кўз олдида пайдо бўла бошлади.

Назирполвон мактабни битирган йили отаси вафот этди. Қийинчилик кўрмай ўсган йигит бу оғир мусибатдан таҳликага тушиб қолди. Уйдаги йиги-сиғидан, онасининг юракларни эзib юборадиган нидоларидан узоқда, кечгача кўчама-кўча сандироқлаб юрадиган бўлиб қолди. Шу кезлари таниш-танишмас сирдош оғайнилар уни қўлтиқларига олишди, ўзларича юпятишди, ўйнатишди. Бир куни каёққадир бориб, шулар билан узоқ қолиб кетди. Ичишди, кулишди. Аллама-ҳалда кўзи соатга тушиб чўчиб кетди. Кетамапга тушиб қолди. Йўқ, дейишди. Уни раҳматли отаси бекорга полвон деб атамас эди, ҳақиқатан ҳам полвон эди. Йигит ёнида турган шерикларидан биттасини қулочкашлаб туширди. Тўполон бўлиб кетди. Назирполвон анчадан сўнг ҳушига келиб қараса, қоронғи бир хонада қўл-оёғи боғлиқ ётибди. Шу кундан бошлаб у, қўлтиқларига олган оғайнилари билан чинакам сирдош бўлиб қолди. Нималар қилмади улар билан бирга!

Маҳаллада Назир олифта деган ном чиқарди. Қопқора сочини жингалак-жингалак қилиб тараган, ингичка, илон изи нуска галстук тақиб, кифти кенг костюм кийган ўрта бўйли йигитга илгарилари ҳавас билан қараган одамлар энди уни кўришса, четлаб ўтадиган бўлиб қолишди. Маҳалланинг кексаси Холпаранг отанинг сандиққа солиб қўйган пули йўқолди. Яна аллакимнинг икки кийимлик кимхоби, тплла асбоблари Назир олифта кириб, ҳол-аҳвол сўраб чиққан куни ғойиб бўлди. Гувоҳлик бериш қийин бўлса ҳам, бу ишларни ҳамма полвондан кўрди. Буни пайҳаган Назирполвон бундай ишларни четроқ жойларда қилалигиган бўлди. Ўқиши ҳам эсдан чиқди, онаси ҳам. Тўғри, узоқ юриб келиб, унга қимматбаҳо совгалар бериб турди. Бироқ, ўртада гап йўқ, онанинг сўроқлари жавобсиз қолади. Қанча вақт ўтди шундан кейин, Назирполвон яхши билмайди, тугун ечилиди. Ярим кечада уни олиб кетишиди. Она бечора уйни бошига кўтариб юборди. Қўни-қўшни йигилди. Ҳамманинг юзида изтироб, бирор оғиз гапирмайди. Сўкишса ҳам, ўласи қилиб уришса ҳам майли эди ўшандада. Назирполвон

ўзи елкасини тутиб берарди, аммо бу жимжитлик, совуқ кўзлар... Назирполвон чидай олмади, кўзларидан тирқираб ёш чиқиб кетди. Қалби изтиробга тўлди.

Судда у қўлга тушган шерикларининг қанақаликларини жуда яхши билиб олди, билиб олди-ю, ўқинди. Бошқа нима ҳам қила олар эди? Уларнинг ҳаммаси пиво дўконини босиша Назирполвонни айлашди. Бироқ, суд уларга ҳам тегишли жазо берди. Назир олифта эса, уч йилга кесилди.

Эрининг вафотидан кейин мадордан қолган она учун бу — ўлганинг устига кўмган бўлди. Икки оғир дардни кўтаролмай, йил ўтмасдан қазо қилди.

Назирполвон бу хабарни ярим кечаси камера дарчасидан кўкда чарақлаб турган юлдузларга қараб ётганида эшитди. Капитан Қодировнинг ўзи кириб айтди. Назирполвон ётган жойидан туролмай қолди. Нимадир бўғзига келиб тикилди. Кейин худди гўдак боладек ҳўнграб юборди. Эртасига капитан уни чақирилди.

— Сенга энди жавоб,— деди уни ёнига ўтқазиб.— Қилган аҳмоқликларингга тегишли жазо олдинг. Отанг, онанг хотираси ҳурмати, тўғри юр!

Назирполвон гапиролмади. Қўзларини пирпиратиб, Қодировга анча вақт қараб турди-да, оёғига ўзини ташлади.

Ўша куни Назирполвон онасининг қабри ёнида кунни кеч қилди. Минг хил фикр миясини чулғаб олган эди. Уйга борсинми? Қариндош-уруг, қўни-қўшини қандай кутиб олар экан? Ё бошқа ёққа бош олиб кетсинми? Нима деган одам бўлади кетса?

Назирполвон ўрнидан турди-да, чигирткалар чириллаб, зим-зиё кечага сеҳрли тус бериб турган қоронги қабристондан чиқди. Битта-битта қадам ташлаб борар экан, уйига келиб қолганини сезмади. Эшик тирқишидан ичкарига қаради. Ҳовлида беш-олти киши ғивирлаб юрибди... Холпараг ота самовар қўяётган болага ниманидир қизишиб гапиряпти. Назирполвон эшикни очди, ҳамма унга ўгирилди. Ҳовлига жимлик чўқди. Аввалига Назирполвон нима дейишини билмай турди. Ниҳоят, зўрга тили танглайига ёпишиб:

— Мени кечиринглар... гуноҳкорман...— деёлди, холос.

Одамлар худди шу гапни кутиб туришгандек, ҳаракатга тушиб қолишиди.

— Ўтган ишга салавот,— деди унга қўлини узатиб Холпаранг ота.— Саломат келдингми, энди бу ёғига ҳушёр бўл.

Шу куни у ухлай олмади. Одамлар тарқалишгач, бир оз мизғиб олмоқчи бўлиб, ҳовлидаги сўрига чўзилди-ю, аммо кўзини юма олмади. Юраги ҳаприқиб, ўрнидан туриб кетди. Кўчада бирга коптоқ тенишиб ўсган ўртоги Семёничи учратиб қолди. Ишдан келаётган экан, қўярда-қўймай уйига олиб кетди. Кейинчалик ишга жойлаштириб қўйған ҳам шу бўлди...

Назирполвон чуқур хўрсиниб қўйди. Мана, Кўкоролга ҳам оз қолди. Яна чорак соатда етилади. Йўлда ҳамон жимжитлик ҳукмрон. Фақат бир марта Қўргон-тепада кетишаётганида битта «ГАЗ-69» «виз» этиб ўтиб кетди. Бошқа ҳеч нарса учрамади.

Назирполвон аёлни уйғотиб юбормаслик учун рулни чап қўли билан ушлаб бораради. Бечора, роса чарчаганга ўхшайди. «Йўлда ухлаш одатим йўқ эди»— деб тутзордан энди ўтилганда айтувди. Мана, бир соатча бўлди, кўз очмайди. Тутзор... Назирполвон сесканиб кетди. Нима қилмоқчи эди-я, боя? Агар ўшанда иш ўйлаганидай чиққанда, ҳозир қаерда бўларди? Қодиров, сенга ишонамиз, деган. Манави кассир хотин ҳам шундай деб уйқуни уряпти.

— Етиб қолдик, туинг, опа!— деди Назирполвон баланд овоз билан. Шундай деди-ю, руҳи енгиллашганини сезди, юзида табассум ўйнай бошлади.— Юлдузларни қаранг, чарақлаб ётибди-я.

Аёл секин бошини кўтарди. Кичкина думалоқ муштлари билан кўзларини ишқалади.

— Ростдан ҳам келиб қолибмиз-ку! Ўзим ҳам роса ухлабман шекилли!

Назирполвон кулди. Аёл ҳам унга қўшилди. Узоқдан трест базасининг дарвозаси кўринди.

— Қаерда тушасиз?

— Пулни базага ташлаб кетаман.

Назирполвон машинани шундай дарвоза олдида тўхтатди. Аёл ерга тушди.

— Раҳмат,— деди қўлини чўзиб.— Катта раҳмат. Сизни анча овора қилдим.

— Ҳечқиси йүқ,— Назирполвон уни дарвозагача кузатиб қўйди.— Дарров чиқарсиз-а, пойлаб тураман. Уйингизга олиб бориб қўяй.

— Раҳмат,— деди аёл жилмайиб ва база рўпара-сидаги тўрт қаватли бинони кўрсатди.— Мен шу ерда тураман. Яхшиси, ўзингиз қолинг.

Назирполвон кулди.

— Раҳмат, мен бир ўргимникига бормоқчиман. Хайр.

— Хайр, раҳмат.

Аёл ичкарига кириб кетди. Назирполвон анчагача орқасидан қараб қолди. Унинг кайфи чоғ эди. Папирос олиб тутатди-да, осмонга қаради. Ғуж-ғуж юлдузлар. Унинг юлдузи ана шундай тепасида порлаб турибди. Назирполвон ниманидир эслади, ўзича жилмайиб қўйди-да, кабинага чиқди.

Яна ўша таниш йўл. Анжирсурат юлдуз ҳамон тепасида чарақлайди. Юлдузлар... Юлдузлар... Юлдузлар порлаб турган тунда йўлинг сира тугамаса, қанча олис юрсанг, шунча яхши. Чарчамайсан, роҳат билан нафас оласан. Машинани ўз ҳолига қўйиб, ўй ўйлайсан ё нималарнидир хиргойи қилиб кетасан. Назирполвон ҳам ниманидир куйлаб борарди.

## Ҳ У С Н

-- Мана, сиз районда янги одамсиз. Ҳали қишлоғимиәдагиларнинг ҳаммаси билан танишиб чиққанингиз йўқ. Аммо лекин, Маъпиратимни таниб олган бўлсангиз керак. Уни, мен сизга айтсам, танимаган одам йўқ, областда. Область қаёқда? Бутун Ўзбекистонда деяверинг. Газеталардан номи тушмайди. Радиода ҳам икки гапнинг бирида уни тилга олиб туришади. Колхоз планни бу йipl ҳам қойиллатиб бажарувди, мужбирларнинг, вакилларнинг кети узилмай қолди. Қани айтинг, шундай қиз билан фажрланмай бўладими? Кечқурунлари ҳориб-чарчаб ишдан келади, топган-тутганимни олдига қўяман. Бир пиёла чойни чала-чулпа ичиб, шундай столнинг ёнига чўзилади-ю, донг қотади. Юмуқ кўзларига, чимирилган қошларига, алланималарни эслаб пичирлаган лабларига қараб дам қувонаман, дам дув этиб кўзимдан ёш келади. Рўмолимнинг учи билан юзимни бекитиб, йиглаб оламан. Нега йиглайман? Нега бўларди, шу болам билан тортган азобуқубатларимни эслаб йиглайман. Урушга қиргин келсин, урушга! Қанча одамнинг ёстигини қуритиб юборди. Мен ҳам куёвимдан ажраганман. Невара кўрмай ажраганман. Ўртоқларига энди повестка келганда ундан қорахат олдик. Не ҳасратда ўзи куёвли бўлувдим. Кўзингиз тушдими, тушмадими — билмадим, Маъпиратимнинг чап оёги калтароқ, шундай туққанман. Бола бечора шунинг устида қанча азоб тортмади? Ёшлигига эътибор қилмаган бўлса ҳам, эс-хуши тўлишганда одамови бўлиб қолди. Ўқишдан келади-ю, хона-

сига кириб кетади. Баъзидা ўпкаси тўлиб, йиглаਬ ҳам слади.

Кўпинча, ўртоқлари келиб-кетганда шунаقا бўлади. Ёшлик эмасми, ҳали кинога чақиришади, ҳали клубга олиб чиқмоқчи бўлишади. Маъпират бўлса жим. Жуда қўйишмаса, бошим оғрияпти, дейди. Ишқилиб, баҳона топиб уйда қолади-да. Буни кўриб юрагим эзилади, томогимдан ҳеч нарса ўтмайди. Кечалари уйқим қочиб, худодан нолийман.

— Э, худо! — дейман зардам қайнаб. — Уни шундоқ яратгандан кўра, кўзимни кўр қилсанг бўлмасмиди?!

Унинчини битириб, институтга кирди. Қувончи ичига сифмай кетди, мени бўлса ташвиш босди. Гуноҳ бўлса ҳам айтай, ким келин қилади, дейман-да. Бир йилнинг ичидаги беш-олтита ўргани эрга тегиб кетди. Маҳфузадагани бор эди, бирам кўхлик, бирам келишган. Кўпинча дарс тайёрлаб, бизникида қолиб кетарди. Шу ҳам эрга тегди. Раиснинг ўғлига тегди. Она бола бошлашиб тўйига бордик. Тумонат одам. Ҳовлига сифмайди. Қизнинг ўртоқлари қўшайвонли дангилла-ма уйни эгаллаган. Даствурхонга йўқ нарсани тўкиб ташлашибди. Бир маҳал шаҳардан чиқсан гажакдор ашулачи аёл дуторни чертиб «Тановор»ни бошлаб юборди. Торт-торт бўлиб кетди, ўйнамаган одам қолмади. Деразадан қараб турибман. Маъпиратим ҳам очилиб-сочилиб ўтирибди. «Э, худо, ишқилиб, битта-яримта эси паст ўйинга тортмасин-да» — дейман ичимда лабимни тишлаб. Йўқ, қўрқаним бежиз эмас экан. Маҳфузанинг ўзи ликиллаб келиб қўлидан тортса бўладими? Аъзойи баданим жимиirlаб кетди.

— Қўй, билмайман, билмайман, — дейди қизим шўрлик.

Қани энди Маҳфузада қулоқ солса?!

— Менинг тўйимда ўйнамасанг, кимникида ўйнайсан? Йўқ дема! — дейди ўртага тортиб.

Одамлар ҳам унинг тарафида.

— Бўла қолинг, йўқ деманг, куттириб қўйдингиз, — дейшишади ҳар чеккадан.

Маъпиратнинг бўлса юзи олов бўлиб кетибди. Сезиб турибман, жаҳли чиқиб кетяпти. Агар яна биттаси бир гап қилса, шартта чиқиб кетади-қўяди. Шу

гапни қилишди. Ким қилди дөңг? Етти яшаридан бирга құғырчоқ ўйнаб ўсган ўртоги Маҳфузада қилди.

— Мунча ноз қилмасаңг? — деди қошларини чи-мириб.— Сенга ким орзуманда эди, оёғингга қарайди?!

Тараша бўлиб қотиб қолдим. Ўзимга келиб, бундай қарасам, ҳовлида беш-олтита қиз Маъпиратни овутишяпти. Биттаси «хафа бўлманг» дейди. Биттаси «қолинг» дейди. Бир маҳал рўмол ёпиниб, Маҳфузанинг ўзи чиқди. Мени кечир, аҳмоқман, деди. Аҳмоқ ҳам гапми, пастсан, деб бетига тупурмоқчи эдиму, қизимдан уялдим.

Шу куни она-бала мижжа қоқмай чиқдик. Жонидан ҳам азиз кўрган ўртоги шундай дегандан кейин уйқу келадими, ўғлим? Деразанинг олдига чўкка тушиб алланималарни шивирлади. Мен бўлсам олдига боргани кўрқаман. Ўзингиз айтинг, шу топда уни қандай овута олардим? Шундай кун ўзимнинг бошимдан ҳам ўтган. Раҳматли Боқижон акангиз тўй куни гўшангада юзимга бир тарсаки туширган эди.

— Нега урасиз? — десам, даг-даг титраб:

— Юзингда холинг йўқ экан-ку, нега алдашади? — деса бўладими?!

Ҳали-ҳали эсимда, у кишига яхши кўринаман деб, бир-икки йил ўсмадан ҳол қўйиб юрганман. Шунақа жоҳил одамлар ҳам бўлар экан. Холим бўлди, нима-ю бўлмади нима? Кейинчалик кўнишиб кетди, яхшигина яшадик. Бечоранинг умри қисқа экан. Маъпирим етти ёшлигида у қазо қилиб кетди. Дадасига ўхшаган шунақа жоҳил одамлар энди йўқ дейсизми? Битта-иккита бўлса ҳам бор. Шунақанинг қўлига тушиб қолса борми, одам, ош ўрнига ҳар куни заҳар ютади-да. Лекин қизим, айланай, унақа бўлмади, дўст-душманнинг олдидаги қаддим букилмади. Маҳфузанинг тўйидан бир йил ўтар-ўтмас раисимиз Ҳакимжон уйга кириб қолди.

— Қани, хола, битта кўк чой дамланг,— деди айвонга ўтиб.

— Чой сиздан айлансин, ҳозир-да, болам,— дедим-у, ўчоқ бошига югурдим. Ҳакимжон ҳам билади-да, уйимда самовар доим шақиллаб қайнаб турмаса, кўнглим жайига тушмайди. Дарров чинни чойнакда бир чойнак чой дамлаб келиб, раиснинг олдига дастурхон ёздим. Нон синдирияпману, хаёлим бошқа ёқда. «Ҳеч бунақа одати йўқ эди Ҳакимжоннинг, доим типирчи-

лаб турарди. Нима гап топиб келган экан? — дейман ичимда.

— Хола, маслаҳат билан келдим олдингизга, — деди анчадан кейин. — Қизингизнинг бошини иккита қилиб қўйсак, нима дейсиз?

Нима дердим? Суюнишимни ҳам, суюнмасимни ҳам билмайман.

— Ҳа, ўйланиб қолдингиз?

Раис жилмайиб қўйди.

— Кошкийди, — дедим охири ўзимни босиб олиб.

— Маъпиратнинг ўзи нима деркин?

— Нима дерди, хўп дейди. Менга қаранг, бунақа йигит етти ухлаб тушингизга кирмаган.

Ҳакимжон ҳамма гапни айтиб берди. Институтда Маъпиратнинг ўзи билан ўқийдиган бир йигит бор экан. Шу бола ошиқ бўлиб қолибди қизимга. Мен сизга айтсан, ўрталарида муҳаббат пайдо бўлибди. Йигит охири дадасига айтибди. Дадаси Ҳакимжонни ўртага қўйибди. Бирор севиндим, бирор севиндим. «Яхши одамлар ҳам бор экан-ку, дунёда» дейман ичимда.

— Хўш, тўйни қачон қиласми? — сўраб қолди Ҳакимжон.

Ўйланиб қолдим. Ўйланмай бўладими?! Ҳамманинг ҳам ўзига яраша орзу-ҳаваси бор. Тўй қилсан, отаси йўқлигини билдирамай қилишим керак. Ўртоқларининг тўйидан яхши бўлса бўлспинки, ёмон бўлмасин.

— Қовун пишиғига қиласми, — дедим катъий қилиб.

Жавобим раисга ёқмади.

— Нима қиласиз чўзиб? Мен борман-ку, ёнингизда, — деди зарда билан. — Келаси якшанбага қиласми. Гап тамом. Ёшларни қийнаманг-да.

Нима ҳам дердим? Ҳакимжон раҳматли Боқижон акангиздан ҳам инжиқ. Хўп, дедим.

Энди мен сизга айтсан, шунағанги тўй бўлди, бу карнай-сурнайлар, бу саруполар... Ҳакимжон барака топкур, ўзи бош-қош бўлиб турди.

Аммо лекин, тўйдан кейин бир ҳафта ўтар-ўтмас, уруш деган касофат бошланиб, куёвимни, Шерзодимни ўз қаърига тортиб кетди. Она-бала бўтадек бўзлаб қолдик. Кўп ўтмай, Ҳакимжон билан ўғли Азимжонга ҳам баравар повестка келди. Маҳфузга ҳам эмизикли боласи билан ёлғиз қолди. Ҳакимжон урушга кетди-ю,

колхоздан ҳам путур кетди. Райондан биттасини юбо-ришувди, олти ойми, етти ойми ишлаб, колхозни қарз қилиб кетди. Ўрнига Худойқуловми, Облоқуловми дегани келди. Унинг ҳам дарди қорнидан нари ўтмади. Фермадан ўнта қўйни бозорга юбориб, кетидан ўзи ҳам кетди. Шу кетганича ҳали ҳам бедарак. Э, болам, не кунлар бошимизга тушмади! Маънират институтни ташлаб, далага чиқди. Хотин кишининг бошига бирон фалокат тушса, дарров гангуб қолади. Ўзини ўнглаб олгунча анча азоб чекади. Бизда ҳам худди шундай бўлди. Эркак зоти қиппилоқда қолмади десам бўлади ўшанда. Бор, йўқ эмас, лекин ҳаммаси яrim жон, хотиндан беш баттар нимжон. Худойқулов дараксиз кетгандан кейин ферма мудири бор эди, барзангидай йигит, билмадим, нима бало қилиб, урушга бормай қолган, шуни раис қилиб қўйишди. Оти қургур тилимнинг учida турибди. Нима эди? Ҳа, Сотиболди.

Сотиболди ҳам олдингилардай учар чиқиб қолди. Сўлақмондай йигит идорадан чиқмай ўтиrsa, хунук кўринар экан. Эртаю кеч пул санаш билан овора. Зиёфат, ошхўрлик, норинхўрлик. Бунинг устига, бузуқ экан. Бунн қаердан билдинг денг? Аҳвол ўзингизга маълум — оғир. Арпа нон, зогора нондан бошқа нарсанни халқ билмайди. Ҳафтада бир қозон қайнаса қайнайди, бўлмаса йўқ. Лекин бунга чидай олмагандар ҳам бўлди. Шуларнинг биттаси Маҳфузга эди. Эридан қорахат келди-ю, Сотиболдининг тузогига илинди-қўйди. Маъниратнинг жигибийрони чиққанини курсангиз ўшанда. Кўзига ҳеч нарса кўринмайди. «Паст-пастлигини қилди» — дейди нуқул. Бир куни чидолмай:

— Раис билан алоқангни ё қонунлаштири, ё қишилокдан чиқиб кет! — дебди.

Бу гап Маҳфузага таъсир қилганми ё қўрқанми, ис чиқариб, тўй қилишди. Маънират бормади. Қизим бормагандан кейин менга бало борми? Тўидан уч кун ўтди чамамда, райондан милиса келиб, Сотиболдининг уйини босди. Очофат ўлгур колхознинг неччи минг пулини йўқ қилиб юборган экан. Қесилиб кетди. Шундай хуснинг бино қўйган Маҳфузга нима бўлди? Эски тос, эски ҳаммом, итнинг кейинги оёғи бўлиб қолаверди. Ҳозир нон заводда историж эмш. Сотиболди қамалгандан кейин Маъниратни раис қилиб кўтаришди.

Ўзингиз ўйлаб кўринг, раислик осон ишми? Дастрлабки йиллар, айниқса, қийин бўлди. Бечора қиз ишни нимадан бошлашни билмайди денг.

— Районга боргин, маслаҳат беришсин,—дедим.

Борди, маслаҳат беришди. Аввало одамлардан ҳолаҳвол сўраб чиқинг, дейишибди. Шундай қилди. Молининг хашаги тамом бўлганга хашак берди, томидан чакка ўтганинг томини суватди. Тўғриси ҳам ўзи шу-да! Одамнинг дастрлаб уйидан кўнгли тўқ бўлиши керак. Уйи тинчми, қанча иш десангиз килаверади. Бизда ҳам шундай бўлди. Бир-икки йилда оёққа туриб олдик. Ҳозир бўлса, ўзингизнинг хабарингиз бор, районда бизнинг колхознинг олдига тушадиган колхоз йўқ. Аммо лекин, мен сизга бир сирни айтай. Қизим билан раис бўлмасдан олдин сира уришмасдик. Энди анча-мунча жаңжаллашиб турамиз. Қўлимда битта сиғир бор. Жонивор жуда серсут, қаймоги сузсангиз бир энлик келади. Бир куни фермага қирдан пичан ташишаётган экан, бирам ҳавасим келди, бир арава ташлаб кетинглар, дедим. Маъпиратнинг ўзи районда эди. Болалар ҳам сўзимни иккита қилмай ташлаб кетишли. Эсим бўлса шундай қиласманми? Кечқурун Маъпир келди. Эшикдан кириши билан кўзи бир гарам қилиб уйиб қўйилган пичанга тушди-ю, лабла, цўччайиб кетди:

— Пичан қаердан келди?— деди ўқрайиб.

— Қирдан келди. Нима эди?— дедим пинагимни бузмай.

— Уялмайсизми, ойн? Бу ахир колхознинг пичани-ку?

Индамадим. У ҳам индамади. Индамай овқатни едик. Эрталаб ҳали хўрз қичқирмасдан кимдир елкамни туртади. Туриб қарасам, Маъпир.

— Ҳа,— дедим.— Тинчликми?

— Тинчлик, манави пулни ӯлинг. Хашак керак бўлса бозорга тушинг. Ё правлениега ариза беринг.

Шундай деди-ю, тасир-тусир қилиб чиқиб кетди. Ярим соат ўтар-ўтмас кечаги болалар қовогидан қор ёғилиб, пичанини ташиб олиб кетишли. Бирам алам қилди. Шундай қилгани ҳам бир ҳисобда яхши. Ҳалқнинг мулки бўлгандаи кейин, ҳалқдаи сўраб олиш керак-да.

Хуллас, мен сизга айтсан, мен қизимни билмас

эканман, ё у ишга шўнғиб кетди-ю, ўзгарди-қўйди. Майли, қайси тўғри бўлса, шунга розиман. Чунки боламни энди, чўлоқман, деган гап қийнамайди. Уззукун одамларнинг орасида. Тунов куни қизиқ бўлди. Аълобуш деган қўшним бор. Қизим бўйга етганда, чўлоқ, уни ким оларди деб, устидан кулганини ўзим эшиганиман. Шу совчи юбориби. Мен сизга айтсам, бирам жаҳлим чиқди...

— Ҳа,— дедим,— қизим илгари керакмасди, энда, раис бўлгандан кейин керак бўйти-да? Аълобушга бориб айтинг, кўчада қолган қизим йўқ.

Шундай дедиму, дастурхоннинг устини ёпдим-қўйдим.

Кечқурун Маънир келганда айтиб берувдим, роса кулди, унга қўшилиб мен ҳам кулдим. Куладиган гап-да ўзи, айланай.

Лекин, мен сизга айтсам, Маънирим, баъзида иши камроқ бўлса, ё бирон нарсадан димиқиб келса раҳматли Шерзодининг суратига қараб ўтиради-да, йиғ лаб олади. Шундай пайтларда мен ҳам ўзимни тутиб туролмайман.

— Қани энди, куёвим бўлса-ю, иккаловининг роҳатини кўриб ўтирсам. Шунчалик ҳам бераҳм бўласанми, худо?— дейман ўпкам тўлиб.

Баъзида, бу ташвиш бир менинг бошимдамас-ку деб, ўзимни овутаман.

Яқинда чидай олмадим. Идорадан эртароқ қайтувди, юрагимга анчадан берп тутиб қўйган гапимни тўкиб ташладим:

— Болам,— дедим секин,— қачонгача ёлғиз юран? Шерзод акангнинг ҳурматини қилиб, шунча юрдинг, етар. Мени ҳам ўла. Бир оёғим ерда бўлса, бир оёғим гўрда. Невара кўрсам деган ниятим бор.

Биласизми, нима деди? Аввал бошимдан оёғимга ча бир разм солиб чиқди. Кейин лаблари титраб:

— Ойи, бу гапни бир гапирдингиз,— деди,— иккинчи гапирманг. Шерзод акам юрагимда. Уни олчб ташлай олмайман. Иннайкейин, нега ёлғиз бўлар эканиман?! Мана, Махфузани ёлғиз деса бўлади. Яна эрг тегибди. Үғли номусига чидолмай кетиб қолибди. Ана унга ачининг.

— Нима дердим? Ҳеч нарса демадим. Ўзи хурсандми, баҳтлими, шунисига мингдан-минг розиман.

Аммо лекин, бугун яна бир жанжаллашиб олдик. Аслида, шу жанжал баҳонаси билан олдингизга келганман.

Беш-олти кундан бери, биқиним санчади, дейди. Бугун ҳам идорага чиқиб ўтиrolмабди, уйга келиб ётиб олди. Овқатни вақтида емагандан кейин, уйқусида ҳаловат бўлмагандан кейин ҳар қандай темир биқин ҳам санчади-да!

— Дўхтирга қаратгин,— дедим.

— Вақт йўқ, ойи. Райкомга боришим керак. Эллиқта янги уй қурмоқчимиз. Шунинг планини кўрсатиб келаман,— деди.

Жаҳлим чиқиб кетди.

— Эртага кўрсатсанг осмон узилиб ерга тушадими?

— Тушади. Ваъда берганман. Райкомда ҳозир янги одам. Бормасам, уят бўлади,— деди.

Йўқ, бир амаллаб кўндиридим.

— Планингни менга бер, ташлаб келаман. Ўзи ўша ёқда ишим бор. Сен дўхтири чакир!— дедиму. бу ёққа югурдим.

Энди мен сизга айтсам, болам, янгисиз. Биз томонларга ҳам борарсиз. Шунда эсингизда бўлсин. Машпиrimни бир уришиб қўйинг. Сагал ўзига қарасин. Қарамаса, мана бугунгидай ётиб қолади. Ётиб қолса, қувончи йўқолади.

Отда қамчин ўйнатиб, далама-дала юрганини кўрганмисиз? Қиз бола бўлсаям шундай ўзига ҳусн бўлиб тушган. Ана шу ҳусни йўқолмасин дейман-да, болам.

## ХАЁТ ҚҰШИФИ

Марказий хирургия клиникасининг бош врачи Мирсидиқ Жалилов бир ҳафтадан бері Наманганда дам оларди. Шу ерлик ҳамкасби, уруш йиллари бир қисмда хизмат қылған қадрдан ошнаси: отпусканғнің бир гал бизнинг шаҳарда ўтказ, Наманган ҳам курорт жойлардан қолишимайды, деб чақыртириб келганды.

Мирсидиқ дүстининг таклифига рози бўлиб, яхши қылған экан, Абдуқодир уни қаёқларга олиб бормади, нималарни кўрсатмади! Куни кеча беш-олти киши бўлиб, истироҳат боғидаги оролчада ошхўрлик қилишди. Ўйин-кулги, асқия билан ўтириш ярим кечагача чўзилиб кетди. Кимдир ашула қилди. Ширин овози бор экан. Мирсидиқ берилиб эшилди.

— Яхши айтар экан,— деди қайтишаётганида.— Эртага уйга чақыриб, ўзимиз ўтиришсак!

Абдуқодир жавоб бермади.

— Ҳа, индамайсан? Сенга ёқмадими?

— Йўқ, ёқди, лекин, ашула эшилмоқчи бўлсанг, эртага сени Янгибозорга олиб бораман. Маъқулми?

— Ихтиёр сенда,— деди Мирсидиқ елкасини қисиб.— Қаёққа сургасанг, кетавераман.

Эртасига икки ошна Янгибозор қишлоғига қараб йўл олишди. Мирсидиқ бу қишлоқ қаерда ўзи, узоқми, яқинми — суриштирмади. Инжиқ, чўрткесар дўстининг одатини яхши биларди. Сўрагани билан барибир айтмайди, юраверсанг-чи, сени ёмон жойга бошламайман-ку, дейди, энсаси қотиб. Сўраб ҳам пима қилади. Отпускада, барибир эмасми, қаёққа борса?

Янгибозорга кечга яқин кириб боришиди. Қишлоқнинг қоқ ўртасидан кесиб ўтган асфальт кўча гавжум. Даладан қовун-тарвуз ортиб келаётган арава, машиналар гиз-гиз ўтиб турибди. Одамлар қаёққадир шошилишади.

Абдуқодир катта кўк дарвоза олдида тўхтаганда, бир тўп ёш-яланг, қаҳ-қаҳ уриб ўтиб кетди.

— Келдик,— деди у ошнасига.— Ашуланинг сарасини шу ерда эшитасан.

Улар ичкарига киришиди. Қенг ҳовлининг ўртасидаги баланд шийпон ёнида оқ яктак кийган бир мўйсафид гул қирқиб юарди.

— Ҳорманг, Дўсимбой ота!— деди Абдуқодир ўша томонга юриб.— Саломат бормисиз?

— Ие, ие, келинг, Абдуқодир ўглим,— мўйсафид гулларни шийпонга қўйиб, меҳмонлар билан кўриша кетди.— Бу нима деган гап ўзи? Жуда жим бўлиб кетдингиз? Қани, марҳамат.

Меҳмонлар шийпонга кўтарилишиди.

— Оббо, ўғлнм-эй, жуда соғинтириб қўйдингиз-ку, а?

— Хизматчилик, қўл тегмайди,— деди Абдуқодир кулиб.— Мана, отпускага чиқиб, бобойни бир зиёрат қилиб келайлик, деган эдик.

— Ҳа, баракалла, кам бўлманг, ўғлим.

— Хатамжон қанилар?

— Клубда. Қўшни райондан мусобақадошлар келган экан. Раис қўймай олиб кетди. Концерт беришар ёмиш. Ўзи кечагина қирдан қайтувди.

— Ҳа, қирда нима бор экан?

— Шу касбни орттирди-ю, ишқибозлари кўпайиб қолди. Қирда ҳам концерт бериб келди.

Дўсимбой ота бошидаги янги марғилон дўпписини олиб, тиззасига уриб, чангини қоққан бўлди, кўкрагига тушиб турган мошкичири соқолини тутамлаб, огир кўрсинди.

— Қаёққа борса ҳам майли, кўнглини тинчитиб юрса бўлгани.

— Ишқилиб, кайфияти тузукми?— сўради Абдуқодир.

— Шукур. Илгариги хафагарчилиги йўқ деса бўлади. Аммо ёлғиз қолса эзилади. Кечалари билан ухламай чиқади. Қўлига танбурни олиб, ашула қилгани-қилган.

Күнгилларни ўртаб юборади. Онаси шўрлик чўп бўлиб кетди. Ўртоқлари омон бўлсин, ёлғизлатишмайди. Клуб мудири қилиб қўйишиди. Кун бўйи ўша с尔да. Тўгарак тузиб, нималарнидир ўргатиб юрибди ёшларга. Мен ҳозир...

Дўсимбой ота ўрнидан турди. Абдуқодирнинг эътирозига қарамай, дастурхон ёза бошлади. Нимагадир ичкари уйга кириб кетганида ҳеч нарсага тушунолмай ўтирган Мирсидиқ сўради:

— Хатамжонга нима қилган?

Абдуқодир «тсс» деб бармоғини лабига қўйди.

— Кейин айтиб бераман. Бунинг тарихи узун. Бобойнинг олдида ҳеч нарсани сўрама. Ярасига туз сепган бўласан. Хатамжон шу кишининг ёлғиз ўғли.

— Зерикаб қолмадиларингми? Кампир тушмагур қиём қилувди, чумолидан беркитиб қўйган экан, зўрга топдим. Қани, нонга қаранглар.

Дўсимбой ота меҳмонларнинг рўпарасида чордана қуриб ўтиреди. Шу пайт узоқдан чирманданинг овози эшитилди.

— Бошланганга ўжшайди,— деди Дўсимбой ота Мирсидиқча чой узатар экан.— Олинг, ўғлим. Қиёмдан солинг.

— Биз ҳам клубга чиқсак,— деди Абдуқодир бир пиёладан чой ичилгач.— Анчадан бери Хатамжонни кўрганим йўқ. Бу ошнамиз ҳам ўғлингизнинг ашуласини эшиитмоқчи эди.

— Шундайми?— Дўсимбой ота меҳмонларга қараб чиқди.— Майли бўлмаса. Ҳолангиз ҳам ўша ёқда. Бирга қайтинглар, қўлбола ош қилиб турман.

Меҳмонлар қўзғалишиди. Ота уларни эшиккача кузатиб чиқди.

— Кутаман-а, Абдуқодир? Хатамжон билан албатта бирга қайтинглар:

— Раҳмат, раҳмат.

Мирсидиқ муюлишга етганда, шеригига ўгирилди.

— Қани, энди гапир, Хатамжонга нима қилган, ким ўзи?

Абдуқодир ўйланиб қолди. Бароқ қошлари чимирилди. Анчагача индамай борди-да, кейин деди:

— Хатамжон ҳам врач эди. Шу қишлоқнинг врачи эди. Бундан етти-саккиз йил муқаддам фалокат юз бериб, икки оёғидан ажраган...

Мирсидиқ бир сапчиб тушди. Абдуқодирнинг ҳам томогига бир нарса келиб тиқилди шекилли, гапиролмади. Икки ўртоқ бошларини эгганларича жим боришар экан, колхоз клубига етиб келишганини пайқашмади. Эшикни очишлари билан гулдурос қарсак садолари эшитилди. Кейин кимdir ашула бошлади. Клуб сув қуйгандек, жим бўлиб қолди.

— Хатамжон! — деди Абдуқодир шивирлаб. — Юр.

Улар залга киришди. Лиқ тўла одам. Саҳнада уч филдиракли кичкина аравачада бир йигит ўтириб кўйларди. Мирсидиқ аввал қандай ашула эканлигини аниқлай олмади. Саҳнага кўзи тушди-ю, юраги орқасига тортиб кетди. Уни шу топда қўшиқ эмас, йўқ, аравачада ўтирган яримта тана сеҳрлаб қўйган эди. Умрида йиғламаган одам, кўзларидан ёш чиқиб кетганини сезмай қолди. Шўртанг бир нарса лабига оқиб тушганда, ўзига келди. Ёшини артиб, ашулага қулоқ сола бошлади. Хатамжон «Ўн саккиз ёшимдадир»ни айтарди. Ҳа, Абдуқодир айтганича бор экан. Бу йигит гўё ашула айтиш учун яратилгандай эди...

Бирдан қарсак кўтарилиди. Абдуқодир дўстини тирсагидан ушлаб, олдинга бошлади. Кимdir меҳмонларни кўриб, иккита стул олиб келиб қўйди. Ёшгина бир қиз кенг атлас кўйлагини ҳилпиратиб, саҳнанинг ўртасига келди-да, ниманидир эълон қилди. «Гур» этиб кўтарилиган қарсакдан нималигини англаб бўлмади. Хатамжон аравачанинг филдиракларини итариб, олдинроқча чиқди, залга қандайдир илиқ бир назар билан жилмайиб боқди-да, янги қўшиқ бошлади.

Залга жимлик чўқди. Хатамжоннинг ниҳоятда ширали, тиниқ овози қўшиқ сўзларини киши юрагига қуийб, ҳаяжонга соларди:

Куйла, созим, куйла, тинма,  
Куйла, куй бу — шодлигим.  
Боғлару қирлар, адирлар  
Сенга жўрдир шодлигим.

Мирсидиқ қўшиқни тинглар экан, алланечук бўлиб кетди. Сўзлари танишдек туюлди. Қачон, кимдан эшитган экан бу қўшиқни? У дикқат билан Хатамжонга қаради. Қирра бурни ёнидаги мошдек холга кўзи тушди-ю, ҳанг-манг бўлиб қолди. Наҳотки.. наҳотки

ўша, бундан олти-етти йил илгари ўзи операция қилған йигит шу бўлса?! Мирсидиқ зарб билан шеригини туртди.

— Менга қара, Хатамжон Тошкентда даволангандими?

— Ҳа,— деди Абдуқодир саҳнадан кўзини узмай.

— Профессор Власов ҳам кўрган.

— Профессор Власов?

— Ҳа.

Мирсидиқ янглишмабди. Ву ўша, унинг ўзи операция қилған йигит. Хатам... Хатамжон Дўсимбоев... Ҳа, бу йигит унга таниш. Мирсидиқ ўйга толди. Унинг кўз олдида операция столи устида ётган йигирма уч-йигирма тўрт ёшлардаги нимжон йигит пайдо бўлди. Ушанда москвалик машҳур профессор Власов клиника ишлари билан танишаётган эди.

Кунларнинг бирида кечга яқин навбатчи врач янги касал қабул қилингани, аҳволи оғирлигини айтиб қолди. Биргалашиб касал ётган палатага кириши. Хатамжон иккала оёгини қиммирлатолмай ётарди. Мирсидиқ очиб кўриб, қўрқиб кетди, аммо сезидирмади.

— Нима бўлди?— сўради у ўзини босиб.

Хатамжон сўзлаб берди.

Бундан бир йил олдин қирда чўпонлардан бири оғир бетоб бўлиб қолибди. У бу хабарни эшишиб, ярим кечаси отда йўлга тушибди. Қишлоқдан чиққанида от инимадандир ҳуркиб, олиб қочибди. Хатамжон тўхтатаман деб жиловидан маҳкам тортган экан, от қоқилиб йиқилибди-ю, йигит унинг тагида қолибди. Ҳушига келиб қараса, ўтовда ётган эмиш. Врачнинг келмаганидан хавотир олиб, йўлга чиққан чўпонлар уни олиб кетишган экан. Хатамжон белида бир оз оғриқ сезибди, аммо эътибор бермай касални кўрибди, дори-дармон қилиб уйига қайтибди. Отдан йиқилганини ҳеч кимга айтмабди ҳам. Лекин эрталаб оғриқ зарбидан туролмай қолибди. Оғриқ шу-шу қолмас экан.

Мирсидиқ палатадан чиқиб, профессор Власов билан маслаҳатлашди. Беморнинг умуртқа суягини рентгенга солиб, операцияга тайёргарлик кўра бошлишди. Бироқ бу операциянинг фойда беришига Мирсидиқнинг ўзи ҳам ишонмас эди. Бемор жуда кеч мурожаат қилған экан. Шундай бўлса ҳам, операция қилниди. Профессор Власов ўзи бош бўлиб турди, аммо шундан

кейин бир ой ўтди, икки ой ўтди, бемор тузалмади. Унинг иккала оёғи аллақачон палаж бўлиб қолган эди. Буни bemornинг ўзи ҳам тушунди, кулча юзидаги кулги йўқолди, эрталабдан кечгача шифтга тикилиб ётадиган одат чиқарди.

Бир куни Мирсидиқ уни клиника bogига олиб чиқиши буюрди. Ўзи ҳам чиқди. У ёқ-бу ёқдан гапга солди, овутмоқчи бўлди, аммо bemor оғиз очмади. Унинг учун энди ҳамма нарса тугагандек, бутун орзу-умидлари пучга чиққандек, ҳаёт бу — фақат қийноқ, азобдан иборатдек туюларди. Шу алфозда бир неча ҳафта ўтди. Мирсидиқ bemor ётган палатага реppродуктор ўрнаттириб қўйди. Яхши концерт берилаетган бўлса, ўзи келиб бураб кетади. Аввал бу ҳам таъсир қилмади, бироқ, бориб-бориб у bemornинг қўшиқларни диққат билан әшитадиган бўлиб қолганини кўрди. Яна гапга солди. Аммо жавоб ололмади. Шундан бир неча кун ўтгач, коридордан ўтиб кетаётib, кимнингдир хиргойи қилаётганини әшитиб қолди. Қулоқ солди. Овоз Хатамжоннинг палатасидан келар эди. Мирсидиқ әшикни секин очди-ю, севиниб кетди. Хатамжон ярим овозда куйларди. Деворга суяниб әшита бошлади:

Куйла, созим, куйла, тинма,  
Энди сенсан шодлигим.  
Боглару қирлар, адирлар  
Сенга жўрдир, шодлигим...

— Э, кечирасиз доктор,— Хатамжон Мирсидиқни кўриб қолиб, докадек юзига қон югурди.— Хаёл билан бўлиб кўрмабман.

— Ҳечқиси йўқ — Мирсидиқ унинг ёнига ўтирди... Яхши қўшиқ экан. Қандай қўшиқ бу?

Хатамжон жиддийлашди, ингичка лаблари енгил титради.

— Ҳаёт қўшиғи...  
— Ҳаёт қўшиғи? Яхши ном.  
— Сизга ёқдими?  
— Жуда ҳам. «Куйла, созим, куйла, тинма... Энди сенсан шодлигим...» Яхши қўшиқ. Ким ёзган экан?

Хатамжон жилмайди.

— Биз томонларда деярли ҳамма қўшиқ тўқииди. Узим тўқидим.

— Жуда яхши. Бу қўшиқ ҳақиқатан ҳам спзнинг ҳаёт қўшифингиз бўлсин!

Мана, ҳозир Мирсидиқ шу қўшиқни иккинчи марта эшитиб ўтирибди. Тағин ўша нимжон йигитнинг ўзи айтятти. Мирсидиқ дикқат билан унга тикилди. Йўқ, унинг олдида бундан беш-олти йил илгариги яримта тана эмас, катта қалб, катта ҳаёт эгаси гўзал ҳаёт қўшигини куйларди. Бу қўшиқда на нолиш бор, на азоб, унда яшаш иштиёқи, пок муҳаббат, битмас-туганмас орзу ва қудрат бор эди!

Концерт тугаши билан Абдуқодир дўстини сақна-пинг орқасига бошлади. Ичкаридан иккита йигит аравачадаги Хатамжонни олиб чиқмоқда эди. Хатамжон сочидা битта ҳам қораси қолмаган жиккаккина бир кампирнинг қўлидан ушлаб олган.

— Ойи, қаранг, Абдуқодир акам! — деди у шу топда.

— Вой, бўйидан ўргилай, қани? — кампир шундай деб, гапини тугатгани ҳам йўқ эдики, ўғли билан қу-choқлашиб кўришаётган Абдуқодирни кўрди: — Сизнинг ҳам келадиган кунингиз бор экан-ку, болам, эсонмисиз-омонмисиз?

— Мирсидиқ aka!.. Доктор!..

Мирсидиқ ичидан тўлқинланиб келаётган ҳаяжон билан Хатамжоннинг қўлини сиқди.

Улар клубдан чиқишигдан, вақт алламаҳал бўлиб қолган, кўк бетини сон-саноқсиз юлдузлар қоплаб олган эди. Баланд қайрағоч тепасидаги ой худди болаларини қўриқлаб юрган она ўрдакдек, секин-секин сузиб бораради.

— Хўш, ишлар яхшими, Хатамжон? — сўради Мирсидиқ аравача ёнида битта-битта одим босиб боришар экан.

— Мана шу клубдаман. Музика тўгараги очганимиз. Яхши болалар. Улар билан ишлаб зерикмайсан киши.

— Анчадан бери ишлайпсизми?

— Ҳа, икки йил бўлиб қолди.

— Жуда яхши, жуда яхши.

Шу пайт узоқдан Дўсимбой ота кўринди.

— Ҳаяллаб қолдиларинг? — Дўсимбой ота меҳмонларни олдинга ўтказиб, ўғлига юзланди.

— Чарчамадингизми, ўғлим?

— Үглингиз чарчашни биладими? — гапга аралашди кампир.— Қўйиб берсангиз, эрталабгача клубда қолиб кетса! Яхшиям меҳмонлар бор экан.

— Чарчамадим, дада,—деди Хатамжон жилмайиб.

— Ундан бўлса, уйда ҳам хизмат қиласиз. Меҳмонлар атайлаб сизни деб келишган.

Меҳмондорчилик анчагача чўзилди. Тонг ёришгунча қўшиқ янгради. Эртасига кечқурунгина Хатамжон меҳмонларга рухсат берди. Икки ошна кечки салқин билан пиёда йўлга тушишди. Икковининг ҳам фикрини алланарсалар чулғаб олган эди. Йўлнинг ярмини босиб ўтишганда, Абдуқодир:

— Шу йўлдан икки йилча қатнадим,— деди.— Дори таъсир қилмади, лекин бориб-келишим таъсир қилди.

— Тўғри гапирдинг. Яхши гап, диққат-эътибор ҳар қандай доридан кучли экан.

Мирсидик дўстини қўлтиқлаб йўл бошлади. Қўп ўтмай, азим чинорлар ичидаги ғарқ бўлган шаҳарга кирпб келишди. Ёқимли ёз шабадаси эндигина қад кўтариб келаётган ёш ниҳолларни тебратар эди. Ҳамма ёқда гул: оқ, пушти, қизил, сариқ, қўйинг-чи, минг хил тусдаги гуллар очилиб-сочилиб ётиди.

Мирсидик кўчанинг икки бетидаги турнақатор фонарлар нурида эрон гиламидек товланиб ётган бу гулларга суқ билан тикилиб борар экан, бир шохи синган наъматакка кўзи тушиб қолди. Қайси бағри тош синдириди экан? У яқинроқ келиб қаради, йўқ, синибди-ю, узилмабди. Қуёшга томон бўй чўзиб қаддини ростлаб боряпти. Мирсидик жилмайиб қўйди. У, албатта ўсади, улғаяди. У очган гулнинг муаттар ҳиди кишилар чеҳрасига табассум, шодлик бахш этади, қалбларини равшан қиласи.

Икки дўст шаҳар кўчаларидан ўтиб боришар экан, юраклари қандайдир ўзларига номаълум қувонч, гурур билан лиммо-лим эди.

## КЎК ДАФТАРНИНГ СИРИ

Бу дафтарни мен тўқимачиларнинг маданият саройи олдидағи хиёбондан топиб олдим. Болаларнинг қишики каникули бошланган пайт эди. Шаҳарнинг барча майдонларидағи каби тўқимачилар хиёбонида ҳам катта арча ўрнатилиб, килма-хил ўйинчоқлар билан безатилган. Эртадан-кечгача атрофидан болалар аримайди. Ҳатто, кечқурун ишдан қайтаётганимда ҳам одам бўйи келадиган Қорбобонинг кўм-кўк кўзларига, ранго-ранг лампочкаларга маҳлиё бўлиб турган болаларни кўраман.

Дафтарни топиб олган куним ҳам хиёбон гавжум эди. Болалар бир-бирларини қувлашган, осмонни бошлирига кўтаргудай қичқиришган... Фақат тўрт-беш ёшлилар чамасидаги қизил қалпоқ кийгай бир болагина Қорбобонинг дам ёниб, дам ўчиб турган кўзларидан кўзини узмасди. Нега у менинг диққатимни ўзига тортди? Дум-думалоқ лўппи юзими, ё кичкина бурни ёнида ялтираб турган ёш томчисими, билмадим, ҳозир эслолмайман. Аммо унга анча тикилиб қолдим. Бола худди эртаклардаги Қорбобо музлатиб кетган гўдакдек, турган жойидан жилмасди. Тим ҳора кўзлари Қорбобода, аммо назаримда, у Қорбобони кўрмас, нималарнидир ўйларди. Бир маҳал қалин лаблари титраб кетди ва овози борича:

— Опа! — деб қичқириб юборди. — Қаттасиз, опа?

— Шўттаман, нима қилди, нима?

Кимдир югуриб келиб, боланинг юзидан «чўлп» этиб ўпди. — Нима қилди, нима?!

Бу ўн тўрт-ўн беш ёшлар чамасидаги қизча эди. Эгнида кўк нальто, бошида ойисининг рўмоли бўлса керак, икки учини қўлтиғидан ўтказиб орқасига бофлаб қўйибди.

— Совқотдингми? — сўради қиз боланинг қўллари ни ишқалаб.

— Ойимла қачон келалла? — бола унга қарамасди. — Сиздан сўравотман, ойимла қачон келалла?

— Боя кўриб келдик-ку? Дарров соғиндингми?

— Ойимла қачон келалла девобман, ойимла?!

Бола ҳўнгрәб йиглаб юборди. У йиги аралаш нималарнидир гапирав, аммо нималигини тушуниб бўлмасди. Опаси овутаман деб қанча уринмасин, бола йиғидан тинмасди. Қизчага раҳмим келиб кетди. У нима қилишини билмасди. Сезиб турибман, агар укасининг йифиси яна бир-икки минут чўзилса, ўзи ҳам қўшилиб йиглайдиган. Ўзимни тутиб туролмадим. Арчани айланиб, уларнинг олдига ўтдим.

— Ҳа-ҳа, акаси, нега йиглайсан? — дедим боланинг бошига ғўлимни қўйиб. — Бирор урдими?

— Ҳеч ким ургани йўқ, ўзи йиглавотди, — жавоб берди қизча менга бир қараб қўйиб.

— Ўғил бола ҳам йиглайдими? Сен ўғил боламисан, ё қиз боламисан?

— Ўғил боламан... — деди бола энтикиб.

— Отинг нима?

— Аҳад...

— Ў-хў... шунақа чиройли отинг бор экан-ку, йиглайсанми? Аҳадлар йигламайди.

Бола менга кўзини бир олайтириб қўйди, кейин тили билан лағларини артиб, опасига ўгирилди.

— Кетовузими?

— Кетовуз, кетовуз, ҳозир кетовуз, юр.

Опа-ука қўл ушлашиб, хиёбоннинг чап тарафидаги тўрт қаватли бино томон кетишди. Анчагача уларнинг орқасидан қареб хаёл суриб қолдим. Кўзларим олдидан уруш йиллари ота-онасиз етим қолган болалар, қаҳратон қишида оёқ яланг мактабга, ўзларидан ҳам катта сумка кўтариб бозорга юргурган қизчалар ўтди. Ҳозир яхши эсимда йўқ. Аммо Қорбобога хомуш тикилиб турган боланинг қиёфаси ҳали-ҳали кўз олдидан кетмайди. Нега у сўлғин эди? Онаси қаерда? Нима учун тенгкурларининг чеҳрасидан кулги аримайди-ку,

қизнинг овози дардли? Минг хил хаёлларга бориб, арча атрофидаги кумуш ранг скамейкалардан бирига ўтирудим-да, энди папирос чекмоқчи бўлган эдим, ёнимда ётган кўк муқовали дафтарга кўзим тушиб қолди. Дарров уни олиб атрофимга қарадим: ҳеч ким йўқ. Ким унугиб қолдириди экан? Ҳайрон бўлиб варақлай бошладим. Эскириб, учлари титилиб кетган дафтарнинг муқовасига чиройли ҳарфлар билан «Холида» деб ёзилган. Ичи ҳам қандайдир ёзувлар билан тўла. Сўнгги бир варағи бўш қолган, холос. Юрагимдаги гашликни йўқотиш ўйи билан секин ўқий бошиладим.

«Еттинчи сентябрь.

Кеча Руқия опамлар дарс пайтида: «Ҳамманглар кундалик дафтар тутсанглар, яхши бўларди. Кўрган-билганингизни, қилган ишларингизни ёзиб борардинглар. Владимир Ильич ҳам кундалик тутарди»— дедилар. Ҳамма «Ура» деб чапак чалиб юборди, мен ҳам чалдим. Уйга келганимда дарров ойимларга айтдим.

— Ойи-чи, ойи! Биз энди кундалик дафтар тутамиз.

Ойимлар ҳам хурсанд бўлиб кетдилар.

— Кундалик тутадиган бўлсанг, катта бўлиб қолибсан. Майли, тута қол,— дедилар.

Чой ҳам ичмасдан шкафдан янги дафтар олдим, муқовасига чиройли қилиб «Холида» деб ёзиб қўйдим. Кейин биринчи бетини очдим. Юрагим дук-дук ура бошлади. Нимани ёзсан экан? Руқия опамлар кун бўйи нима қилсанглар, шуни ёзинглар, деган эдилар. Бугун нима қилдим? Эрталаб туриб чой қўйдим. Аҳадни уйготиб ювингирдим, ойимлар ҳар куни дадамларга гўшт қовуриб берадилар. Бугун ҳам туришлари билан овқатга уннаётувдилар, қарашиб юбордим. Жаҳллари чиқди. Мени деб ўқишдан кечга қоласан, чойингни ич, дедилар. Кейин пешонамдан ўпиб қўйдилар. Мактабга кетаётганимда, дадамлар билан хайрлаша олмадим, ухлаб ётган эдилар. Ичиб келсалар доим шунақа, ҳаммадан кеч турадилар. Нега ичадилар? Афтиларига караб бўлмайди, ҳамма ёқлари чангтупроқ. Ҳамма нарса кўзларига бошқача кўринади. Кеча кечқурун келганиларида Аҳадни ўпаман деб қайнаб турган самоварга пешонасини босиб олдилар, лаб-

лари қип-қизарып пишиб кетди. Ажад йиглаб хүм бүлди.

Мактабда она тилидан яна «беш» олдим. Руқия опамлар елкамга қоқиб қўйдилар. Яхши қизим, оппоқ қизим, дедилар. Улар мени жудаям яхши кўрадилар. Фақат менимас, яхши ўқийдиганларнинг ҳаммасини яхши кўрадилар.

Ха, энг зарури эсимдан чиқибди. Раънонинг тоби йўқ. Уч кундан бери мактабга келмайди. Бугун ўқишдан чиққанимиздан кейин Мунира билан бориб кўриб келдик. Қаттиқ иситмалабди.

Шуларни ёзиб ўтирган эдим, эшикдан дадамларнинг товушлари эшитилиб қолди. Нега бақиряптилар?..»

Ўқишга берилиб кетиб, кун алламаҳал бўлиб қолганини унутибман. Боягина кўк бетини қоплаб турган сон-саноқсиз юлдузлар энди йўқ эди. Ҳамма ёқни қуюқ туман ўраб олган, икки қадам наридаги нарсани ҳам кўриб бўлмайди. Қорбонинг фақат кўзларигина милтиллаб турибди.

Ўқишининг иложи бўлмади. Дафтарни маҳкам ушлаганимча уйга қайтдим. Ойим, болалар меҳмонхонада телевизор кўриб ўтиришган экан, сездирмай жонамга ўтдиму, эшикни ичидан қулфлаб, гижимланган дафтарни ўқишига тушдим.

«Саккизинчи сентябрь.

Мактабдан келсам, ойим айвонда йиглаб ўтирибдилар. Бошларида пушти рўмоллари. Шу рўмолни жудаям яхши кўрадилар. Яхши кўрадилару, ёлғиз қолганирида ўрайдилар.

Мени кўриб дарров ўринларидан турдилар, апилтапил ёшларини артиб жилмайдилар, кейин қўлимдан портфелимни олдилар.

— Кечга қолдинг? Қачондан бери чой қўйиб, пойлаб ўтирибман.

— Мунира билан гаплашиб қолдик,— дедим жўрттага. Бўлмаса ўзим ўқиш тугаши билан уйга чопганман.

— Уканг ухлаб ётибди, тақир-туқур қилма тагин!

— Хўп,— дедиму, уйга кирдим.

Бечора ойим. Чой қўйдим девдилар, қўймаган эканлар, электр чойнак стол устида турибди. Ўзим қўйиб юбордим.

— Вой, қайнамабдими?!— дедилар ечинаётганимда кириб, кейин нимагадир қип-қизарыб кетдилар.

— Ҳозир қайнаб қолади. Қорним ҳам унча оч эмас,— дедим.

Нега ойим хафалар-а? Дадамлар кеча қаттиқ хафа қылганга ўхшайдилар. Рост-да, одам ҳам шунаңа қўполов бўладими?! Илгари бунақа эмас эдилар. Ойим касал бўлиб икки ой касалхонада ётиб чиқдилару, дадамлар ўзгардилар-қўйдилар. Кечадан бўлса оғизларидан боди кириб шоди чиқди, ёзишга уяламан.

Эшикдан киришлари билан:

— Мен бу уйда кимман? Ҳўжайинманми ё хизматкорманми?— дедилар ойимларга ўдағайлаб.

— Нима бўлди? Нега бундай деяпсиз?— сўрадилар ойим.

— «Нега бундай деяпсиз?..» Шу ҳам гап бўлдими?— дадамлар худди Аҳадга ўхшаб лабларини чўччайтирдилар, деразадан кўриб турибман.— Хотин деган эр келганда бундай кутиб олади. Мен келганда жўрттага ўзингни ўчоқбошига олиб қочасан.

— Овқатингиздан хабар олай девдим.

— Овқатмиш... Аҳад қани? Аҳадий! Аҳадичка!

Дадамлар ойимларни итариб ташлаб, уйга кирдилар. Мени кўриб, тўхтаб қолдилар.

— Салом,— дедим секин.

— Ҳа, шу ердамидинг?— Ниманидир ўйлаб жим қолдилар. Кейин ўқрайиб тикилдилар.

— Ойингга ўхшайсан. Нари тур. Аҳад! Аҳадидзе! Қаёқдасиз, ўғлим?

Аҳад келавермагач, диванга ёпбошладилар.

— Овқатингизни еб олинг,— ойим кириб столга бир кося лағмон қўйдилар.

Дадам индамадилар. Ойимлар, сен ганир, дегандай, мени туртиб қўйдилар.

— Дада, ошингиз совиб қолди,— дедим мен.

— Емайман, ойинг тайёрлаган овқатни емайман.

Шундай деб кўрсаткич бармоқларини пешоналарига бир-икки марта уриб қўйдилар. Ойимларнинг тишлари гижирлаб кетди. Ҳўрсиндилар, кейин секин коғсани кўтариб чиқиб кетдилар. Мен ҳам орқаларидан чиқдим. Қўзларида ўш йилтиради.

— Қўйинг, ойи, йингламанг,— дедим енгларидан тортиб.

Индамадилар.

— Бор, дарсингни қил,— дедилар анчадан кейин ва идиш-товоқларни юва бошладилар.

— Йигламайсизми?

— Йўқ, йигламайман. Бор, хонангга кир.

Шу пайт дадам чақириб қолдилар. Ойим косаларни шундай тогорага ташладилару, ичкарига отилдилар. Эшик очиқ қолди.

— Менга қара, сенда гапим бор...

Бу — дадамларнинг овозлари эди. Бироқ шундан кейин ҳеч нарса демадилар. Ойимларнинг ҳам овозлари эшитилмади. Қўлларини кўкракларига қўйиб стол ёнида турган бўлсалар керак. Дадамларнинг жаҳллари чиқса, доим шунача турадилар. Гапиромай қоладилар. Тавба, мунча қўрқадилар-а? Нима, ахир, одам эмасмилар? Мана, икки ой бўлибдики, юриш-туришлари галати. Бирор эшикни қаттиқроқ тақиллатса ҳам чўчиб тушадилар. Дадамлар билан иложи борича гаплашмасликка ҳаракат қиласидилар. Орапаридан нима гап ўтган, билмайман. Лекин гаплашсалар ҳам худди Аҳадга ўхшаб гаплашадилар, лаблари титтрайди, кўзлари олазарак бўлиб туради. Илгари бунача эмас әдилар. Доим кулиб турардилар. Дадам билан икковлари мени етаклашиб киноларга, театрларга боришганда ҳамманинг ҳаваси келарди. Қанчадан бери кинога бирга бормаймиз. Нуқул уйдалар. Кечқурун бўлса, дадам келганларидан кейин икковлари худди мушук-сичқонга ўхшаб қолишади. Шумшайиб ўтиришгани-ўтиришган.

Мана, ҳозир дадамлар бир нарса демоқчилару, лекин айттолмаяптилар. Бу фақат бугун эмас, бир неча кундан бери, тўғрироги, ойим касалхонадан чиқсанларидан бери шундай бўляпти. Нима демоқчи эканлар? Наҳотки айтиш шунчалик қийин бўлса? Заводда ишлари чатоқми? Ундей деса, яқинда яхши ишлаганлари учун мукофот олдилар-ку!

— Менга қара...— дедилар хўрсиниб.—Мен... мен... ўрнимни солиб бер.

Ойим елкаларини қисиб, ичкари уйга кириб кетдилар. Бечора ойим! Худди ёш болага ўхшаб қолдилар. Район доктори келганда, сиз кўп койинманг, оғир бўлинг. Қанча қувноқ бўлсангиз, шунча тез тузалиб кетасиз, деган эди. Қувноқ бўлиш қаёқда, кўзларидан

нуқул ёш томиб туради. Буғун ҳам шундай. Чой ичиб бўлганимиздан кейин, анча ўзларига келдилар. Уй вазифаларимни сўрадилар. Ўқиш дарсида ўрганган «Она» шеърини ўқиб бердим. Жилмайиб қўйдилар. Жилмайсалар бирам чироили бўлиб кетадилар. Лип этиб бориб юзларидаги чуқурчаларидан ўпиб олдим.

— Ойи, нега доим хафасиз? — дедим тиззалирига ўтириб, — касал бўлганизгами?

— Ҳа, касални ким яхши кўради?

— Дадамлар-чи? Нега улар ҳам хафалар?

— Даданг ҳам касал бўлганимга хафа-да. Айтяпман-ку, касални ким яхши кўради.

— Нега бўлмаса сизга жаҳл қиладилар?

— Хафа бўлганидан жаҳл қилади-да. Бунга сен эътибор берма. Катталарнинг ишига аралашиб яхши эмас. Ҳўпми?

Мен индамадим. Фақат:

— Ойи, биласизми, — дедим, — мен сизни касал бўлсангиз ҳам яхши кўраман, жудаям яхши кўраман.

— Менам!

Бу Аҳад эди. Уйғониб, эшикнинг тагида қўзларини ишқалаб турарди. Ойим унинг овозини эшитиб, кулиб юбордилар. Кейин иккаламизни маҳкам қучоқладилар...»

Мен ҳаяжондан ўрнимдан туролмай қолдим. Ўн уч-үн тўрт ёшдаги қизнинг сўzlари мени буткул сеҳрлаб қўйган эди. Ўзпмни ўзга бир дунёда ҳис қила бошладим. Кўз олдимда онасининг қайғу-ҳасратига шерик бўлган нимжон қизча, сочига бевакт оқ ораган сўлғин бир аёл пайдо бўлди. Кимлар улар? Қаерда яшайди? Тошбагир ота ким? Буларнинг ҳаммаси ҳали менга сир. Лекин, шубҳа йўқки, улар қандайдир катта бир кулфатни ўз бошларидан кечирмоқдалар. Шу кулфатдан уларнинг қандай қутулишларини ўзимча мулоҳаза қилиб, кўнгилни тинчтадиган бир холосага келдим-да, дафтарни яна варақлай бошладим. Лекин саҳифадан саҳифага ўтар эканман, вужудимни титроқ боса бошлади.

«Уттизинчи сентябрь.

Дадамдан уч кундан бери дарак йўқ. Ойимлар бизни ухлатадилару, ўзлари мижжа қоқмай чиқадилар. Дадам қаёқда қолишлари мумкин-а? Командировкага кетганмикинлар? Кетган бўлсалар, нега бизга айтма-

дилар? Аҳад йиглагани-йиглаган. Ярим кечада туриб олиб «дада, дада», дейди. Ойим иккаламиз уни овутгунча ўлиб бўлдик. Бирам дадасини яхши кўрадики... Мен ҳам яхши кўраман, лекин улар мени яхши кўрмайдилар. Нуқул, сен ойингнинг қизисан, деяверадилар. Анави куни Аҳадга туфли олиб келиб бердилар. Аҳад қўлларидан олиши билан:

— Менга-чи? — деб юборибман.

Бир ўқрайиб бердилар. Индамай ичкари уйга кириб кетдим.

— Кўзи ёмон қизингни,— дедилар кетишим билан ойимларга.

— Менинг қизим бўлса, сизнинг ҳам қизингиз,— ойим жаҳл билан гапирдилар. Уларнинг дадамлар билан биринчи марта шундай гаплашишлари эди.— Кўчадан олиб келганим йўқ. Қанча уришсангиз мени уришинг, болада нима гуноҳ? Қовоғингиздан қор ёғилиб келганда, кўзларини жавдиратиб пинжимга киришими? Билмадим, шу бола бўлмаса, ҳолим нима кечарди.

Мен, ҳозир дадам ойимларни урадилар, деб қўрқиб турувдим, йўқ урмадилар. Қўрқсан бўлсалар керакда. Ойимлар жуда қаттиқ гапирдилар. Мана, уч кундан бери дадам йўқлар. Шу уч куннинг ичида ойим чўп бўлиб қолдилар».

«Иккинчи октабрь.

Кеча ойим заводга бориб келдилар. У ерда ҳам йўқмишлар. Ишхонасидагилар, касал бўлиб қолган бўлса керак, деб ўйлашган экан. Уйда йўқликларини билиб, ҳайрон бўлиб қолишибди.

Ойим билан анчагача бир-биримизга қараб ўтиридик. Овқат қилиш ҳам эсимиздан чиқиб кетибди. Чой қўйиб юбордим. Тўртта тухумни самовар ичига солиб қўйдим. Доктор ойимларга яхши овқатланишни буюрган. Мен зўрламасам, ўзларига қарамайдилар.

Уйга берилган масалани ечолмадим. Вақт бўлмади. Аҳад билан қолсам, ҳеч нарса қилолмайман. Эртага Руқия опамларга нима дейман?»

«Учинчи октабрь.

Мендан сўрамадилар. Олдимга келиб, негадир пешонамдан ўпиб қўйдилар. Уйга келсам, ойим йўқлар. Ҳовлийнинг ўртасида Аҳад йиглаб ўтирибди. Овутиб, уйга олиб кирдим. Диванда бир хат ётибди. Ойим

Қаёққа кетдийкинлар? Хатни ўқий бошладим. Бу — ладамдан эди.

«Мени қидирманглар. Қайтиб бормайман. Мавжуда, мени тушун. Оғир касалликка умрбод мубтало бўлган киши билан ҳаёт қуриш учун сенга уйланганим йўқ. Болалар бўлса, болаларга муносабатимни ўзинг биласан, ўрнашиб олганимдан кейин Аҳадни олиб кетишим мумкин».

Йиглаб юбордим. Мени кўриб, Аҳад ҳам йиглади. Иккаламиз баравар йигладик. Кейин нима бўлганини билмайман. Бир маҳал қарасам каравотда ётибман. Тепамда Руқия опам билан қўшнимиз Хайри опамлар ўтиришибди. Аҳад хуррак отиб ухлаб ётиби.

— Ойимлар қанилар? — деб сўрадим.

— Шу ерда, ҳозир келади, — жавоб бердилар Хайри опам Руқия опамларга қараб туриб. — Поликлиникага кетган.

— Бу ёққа чиқайлик, сен ҳам ўрнингдан тур, — дедилар шунда Руқия опамлар.

Ҳаммамиз айвонга чиқдик. Руқия опамлар мени имладилар.

— Утири, гап бор.

Юрагим увушиб қолди. Нима гап экан? Ишқиilib, ойим тузук бўлсинлар-да!

— Хавотир олма. Ойинг тузук, — дедилар Руқия опам, кейин ўйланиб қолдилар. — Менга қара, — дедилар анчадан сўнг. — Сен катта қизсан. Ҳамма нарсага ақлинг етади. Гапларимни яхшилаб тушуниб ол. Ойинг... Ойинг касалхонада... Бир ойча ётса керак. Уй бошлиги энди ўзингсан. Оғир бўл. Мен келиб тураман, мана Хайри опанг ҳам шу ердалар, ҳабар олиб турадилар. Йигламайсанми?

Мен «йўқ» дедиму, уйдан чопиб чиқиб кетдим. Ҳужрага бекиниб олиб роса йиғладим. Руқия опамлар ҳам, Хайри опамлар ҳам мени қидиришмади. Анчадан кейин уйга кирсам, икковлари Аҳад билан ўйнаб ўтиришибди. Руқия опам мени кўриб жилмайдилар. Мен ҳам...»

Қундалик шу ерда тугаган эди. Дафтарнинг сўнгги бетларига ҳеч нарса ёзилмаган. Фақат охирида қалам қилин илова қилинган кичкина жумла бор эди, холос.

«Саккизинчи январь.

Ойим анча тузуклар. Руқия опамлар бугун ҳам

бизни олдиларига олиб бордилар. Бизларни кўриб, ойимнинг кўзларидан ёш чиқиб кетди. Яқинда чиқаман, дедилар. Анча гаплашиб ўтирик. Дадамларни сўрамадим. Нима қиласман сўраб? Ўзлари қийналиб ётибдилар-ку. Аҳад лунжини тўлдириб «дада» демоқчи бўлиб турувди, чимчилаб олдим. Лекин унга қийин бўлди. Нуқул йиглайди. Дадам бўлганларида йигламасди. Қаерда эканлар-а, ҳозир?»

Кундаликни ёпиб қўйиб анча ўйланиб қолдим. Миямда минг хил фикр. Саҳифалардаги қайгули сатрлар вужудимни ҳаяжонга солди. Дарчани қия очиб, чека бошладим. Ташқаридаги ёмғир шиваламоқда. Чироқ нурида бир-икки қор учқунлари худди кўзмун-коқдай ялтираб кўринди. Бу учқунлар арча ёнида боя мен кўрган қизча ва унинг укасини эслатиб юборди. Ҳа, ўша қиз шу кундалик муаллифи Холида эди. Бунга ҳеч шубҳа йўқ. Нима қилиш керак? Уларга қандай қилиб ёрдам берса бўлади. Бемеҳр отани тошиш керакми, йўқми?

Эрталаб ҳам шу хаёллардан бўшай олмадим. Нарибери нонушта қилиб, тўғри район маориф бўлимига бордим-да, Руқия опанинг қайси мактабда ишлашини суриштирдим. У ўзимизнинг райондаги қирқинчи мактабда ишлар экан. Ўша ёққа югурдим. Руқия опа ўрта ёшлардаги күштабиат аёл экан. Дафтарни узатдим.

— Кечирасиз,— дедим унинг ўзгариб кетганини кўриб.— Үқиб чиқдим. Ўқувчингиз жуда жиддий қиз экан.

— Ҳа, Холида тез катта бўлди,— деди Руқия опа жиддий оҳангда.— Отаси...

— Ҳозир қаерда у одам?

— Ҳеч ким билмайди,— Руқия опа бир оз жим қолди. Кейин қўлини бир силтади-да, гапида давом этди.— Тўгрисини айтсам, ҳеч ким билишни истамайди ҳам. Бундай одамнинг бўлганидан бўлмагани мъякул. Шундай змасми?

Мен бош силкаб қўйдим.

— Хотинининг касаллиги учун кетиб қолиши, ўзининг тинчлиги деб болаларидан, оиласидан юз ўгириши — ўтакетган тубанлик.

— Мавжудаҳон ҳозир тузукмилар?

— Ҳа, кеча бориб келдик. Яқинда чиқиб колади.

\* \* \*

\*

Орадан бир ҳафтача ўтган бўлса керак, шанба куни эди. Ишдан қайтаётиб, тўқимачилар хиёбонида аёл кишининг:

— Аҳаджон! — деган овозини эшишиб қолдим.

Ялт этиб фонтан томонга қарадим. Икки киши Қорбобони олиб ташлашаётган экан. Катта-кичик болалар қий-чув қилиб туришибди. Олдинги қаторда ўша мен кўрган Аҳад ҳам бор эди. У икки кўзини қийшайиб турган Қорбободан узмасди. Бир маҳал кимдир келиб қўлидан тортди. Бу Холида эди. Опа-ука етаклашиб болалар орасидан чиқишиди-да, катта сада тагидаги скамейкада ўтирган иккита аёл олдига боришиди. Уларнинг биттаси Руқия опа, иккинчиси эса, Мавжудахон эди. Уни пушти рўмолидан танидим. Юрагимни тасвирлаб бўлмайдиган қувонч туйғуси қоплаб олди. Битта-битта қадам ташлаб борар эканман, ранги сўлғин, лекин лабларида, юзида табассум порлаб турган аёлдан — Мавжудахондан кўзимни узолмасдим.

## АБДУЛЛА ҚОВУНЧИ

Севгининг кўзи кўр дейишади. Тўғри экан. Кўр бўлмаса, менга Абдулла қовунчи ёқиб қолармиди? Баъзида жўрлигим келганидан йиглайман. Баъзида, бор-е, худо олсин ўшани, бошқа йигит қуриб қолдими дейману, клубга чиқаман, қизлар билан ўйин-кулги қилиб, ўзимни овутаман. Аммо уйга қайтиб чирокни ўчираману, юрагим орқамга тортиб кетади, бир нима томогимга келиб тиқилгандай бўлади. У ёнимга агардариlamан, бу ёнимга агардариlamан, бўлмайди, кўз олдимдан кулиб турган башараси ўтаверади. Шунчалик ёқимтой бўладими одам дунёда? Қалин қора қошлари остидаги қўй кўзлари доим кулиб туради, гапирганида худди ашула айтяпти, дейсан киши! Фақат битта айби бор: ҳар ўн кунда сочини устарада олдириб туради. Бунинг устига уч тийинлик одеколондан септириб келади денг, одамнинг кўнгиллари айниб кетади. Бошқа йигитларга ўхшаб соч ўстирса, чиройли қилиб ёнигами, орқасигами ётқизиб тараб қўйса, қандай яхши. Йўқ, бундай қилмайди. Балки, шундай қилмагани тузукдир. Агар соч қўйса, ўртоқларига ўхшаб уча тутган кўйлак кийса борми, қизларнинг бошини айлантириб қўйинши ҳеч гап эмас. Айлантирганда ҳам майли эди, тинчроқ юрадим. Қишлоққа келган куниromoқ ўзига сеҳрлади-қўйди. Машинадан тўғри идоранинг олдида тушдим, чамадонимнинг устида бирпас ўтиредим. «Мана, яхши қиз, шу бугуидан бошлаб ойнингизнинг қарамоғидан чиқдингиз, ҳолингиз нима кечар экан?» — дедим ўзимча. Кейин ичкарига кирдим. Раиснинг

кабинетидан ғүнгир-ғүнгир товуш эшилларди. Кирнешимни ҳам, кирмасимни ҳам билмай, беихтиёр қулоқ сола бошладим.

— Ука, сенга минг марта айтдим,— дерди зарда билан йүгон овоз.— Менга қовун керак эмас, ҳа, пахта керак. Колхознинг обрўйини оширадиган ҳам, унинг юзини ерга қаратадиган ҳам — пахта. Буни этагини туғиб юрган бола ҳам билади-ю, сен билмайсан. Бошқа бир қарич ҳам ер бермайман.

— Атиги беш гектар, Сулаймон ака, хўп денг,— ялинганомуз ингичка овоз эштилди.— Учтепанинг пасти бекор ётибди, жуда бўлмаса шуни беринг, қовун ҳам керак-ку, ахир!

— Бермайман, дедим, бермайман. Тушингни сувга айт.

Хонага жимлик чўкди. Эшикни тақиллатиб ичкарига кирдим. Рўпарамда ноппа-нозандай йигит турарди. Кенг елка, баланд бўй... Мени кўриб уялди шекили, қип-қизариб кетди. Салом бердим. Раис келиб қўлимдан ушлади, кейин энсаси қотиб йигитга ишора қилди.

— Танишинг. Бригадир. Абдулла қовунчи. Қовундан бошқа дарди йўқ.

Абдулла қовунчига қарадим. Юрагим жиз этиб кетди. Нега? Үзим ҳам билмайман. Сулаймон ака менга бир олайиб қўйди-да, шоша-ниша Абдулла қовунчини чиқариб юборди. Жаҳл билан нималарни дир тушунтирди.

Тавба, нега шу колхозга келдим? Бошқа колхозлар ҳам агроном сўрашган эди-ку!

Қизлар кечқурунлари ётоқхонада ётганимизда севги ҳақида кўп гапиришарди. Аммо мен бир кўришдаёқ қўнгил қўйишимга сира ақлим етмас эди. Наҳотки, севиб қолган бўлсам?! Үзимни үзим алдаб, уни ўйламасликка ҳаракат қиласардиму, аммо бу қўлимдан келмасди. Қундузи ҳам уни ўйлайман, кечаси ҳам. Далага чиқсам, беихтиёр отни унинг бригадасига бураман. Үзини кўрмасам, қизларни гапга соламан, унинг кимлигини билиб олишга ҳаракат қиласман. Қелганимга бир ҳафта бўлдими-бўлмадими, билмадим, унинг тўғрисидаги ҳамма гапларни билиб олдим.

Абдуллажон ўн уч яшарлигига отаси фронтга кетибди, онаси билан ёлгиз қолибди. Ўқишдан келар

экану, далага, онасининг ёнига чопар экан. Ўйин нималигини билмас экан. Ҳали помидорнинг тагини чопган, ҳали пиёз ўтоқ қилган, кечалари онасининг йўқ, дейишига қарамасдан, чайлада қовун полизни қўриқлаб чиқар, эрталаб ўртоқлари билан почтага югурад экан. Орадан бир йил ўтибди. Шу бир йил ичida отасидан атиги иккита хат келибди. Биттасида: «Ўглим, арзанда, якаю ягона ўғлим, ҳали урушнинг охирни кўринмайди. Мен албатта душманни йўқ қилмагунча қайтмайман. Онангизга эҳтиёт бўлинг, уни сизга топширдим. Учтепанинг орқасидаги қовунлардан хабар олиб туринг. Оғилхонанинг бўготидаги эски телпакда галати қовун уруг бор. Фарғонадан олиб келганман. Кучингиз етса, шуни кўпайтиринг. Сизни соғинган отангиз — Ҳамидулла қовунчи» — деб ёзиди отаси. Иккинчисини... иккинчисини ўзи ёзмабди, рота командири ёзиди. Бу хат бутун қишлоқнинг тўс-тўполонини чиқариб юборибди. Бу — қорахат экан.

Абдуллажон шу хат келгандан кейин уч кун кўринмай кетибди. Тўртинчи куни саҳарда уйга қайтиб, отасининг кетмонини олибди-да, Учтепага қараб жўнабди. Шу-шу, бутун республикага донғи кетган қовунчини Ҳамидулла аканинг ўрнини унинг ўғли Абдуллажон эгаллабди. Отаси етиштиrolмаган қовунларни етиштирибди. Ҳақиқатан ҳам қовун полизга борсангиз, оғзингиз очилиб қолади. Сап-сариқ олтиндай чўгирлар, кўк беқасам тўн кийиб, қатор чўзилишиб ётган аинанасларни егани кўзингиз қиймайди. Ўтган йили Москвага виставкага бизнинг колхоз номидан Абдуллажон ўз қовунлари билан қатнашди. Жуда қизиқ бўлди. Кечқурун раис билан омборда қайси бригада қанча нарса топширганини текшириб ўтирувдик, дарвозадан Абдуллажон эшак арава ҳайдаб келиб қолди. Араванинг усти брезент билан ёпилган.

— Ҳа, қовунчи, бу нима қилиқ? — деди раис ҳайрон-бўлиб.

— Қовун олиб келдим, — Абдуллажон нимагадир илжайиб қўйди.

— Машина қуриб қолдими?

— Заха ейди.

— Заха еса, биттаси ейди, иккитаси ейди, тезроқ йигиштиришни ўйлаш керак, ука!

- Ўзи битта-да.
- Битта? Нима битта?
- Қовун битта.

Абдұллажон жилмайиб қўйди. Брезентни олган әди, оғзимиз очилиб қолди. Умрим бино бўлиб бунақа катта қовунни кўрмаганман. Аравани битта ўзи эгаллабди-қўйибди, десам лоф бўлмас. Сулаймон аканинг кўзларидан ёш чиқиб кетди.

— Яша, ўғлим! — деди Абдуллажонни пешонасидан ўпиб. — Сени билмаган эканман. Раҳматли отангдан ҳам ўтиб кетдинг.

— Энди ер берарсиз-а, раис? — дедим қулай пайтдан фойдаланиб.

— Ер? Ҳа, айтгандай... ер... — Сулаймон ака ўйланиб қолди, кейин қўлини бир силтади-да. — Майли; қанча керак? — деб сўради.

— Эллик гектар.

— Эллик гектар?! Ҳай, майли, олгин!

Раис шу заҳотиёқ районга телефон қилгани кетди. Абдуллажон ёнимга келиб:

— Раҳмат, — деди ва қўлимни шундай сиқдики, «дод» деб юборай дедим.

— Сизга... сизга раҳмат, — дедим зўрга қўлимни ишқалаб туриб. — Шундай қовун етишириш ҳазил иш эмас.

Шу пайт Сулаймон ака келиб қолди.

— Бўлди, — деди у Абдуллажоннинг елкасига қошиб. — Эртага райондан одамлар келишади. Москвага жўнайсан.

Ҳақиқатан ҳам раис айтгандай бўлди. Бир ҳафта ўтар-ўтмас Абдуллажон виставкага жўнади. У йўғида ўтказган ўн беш куним ўн беш йил бўлиб кетди. Шу кунлари уни севиб қолганинга чиппачин ишондим. Бироқ нима қилиш керак? Миқ этмайди. Фақат ишдан гаплашади. Бошқа йигитларга ўхшаб клубга чиқмайди, чиқса ҳам бир бурчакда ўтириб олиб, илжайгани-илжайган. Майли, қайтсан-чи, ўзим биламан нима қилишни! Институтда йигитлар: «Сенинг тилинг ёмон!» — дейишарди ҳазиллашиб. Шу тилимни ишга соламан. Аммо у қайтди ҳам, ишга тушди ҳам, лом-мим деб оғиз очолмадим. Қайтага илгарилари бемалол гаплашадиган одам, энди у билан ёлгиз қолсам, тилим танглайимга ёпишади-қолади. Москвадан қайт-

ган куни идорада анча ўтиридик. Бутун кўрган-билганинни гапириб берди. Худди сеҳрлаб қўйилган одамдай, ундан кўзимни узолмайман. Виставка дипломини олиб келибди. Озарбайжондаги қайси бир колхоз чўгиригининг уруғидан сўрабди. Хуллас, «Ўзбекистон павильони» кунда гуж-гуж одам әмиш. Ҳамма тарқалгач, у мени кузатиб қўймоқчи бўлди. Бирам севиниб кетдим!

— Овора бўлманг,— дедим жўрттага бепарволик билан.

— Овораси бор эканми? Юрииг!

Йўлга тушдик. Менга қишлоқнинг чеккасидан уй беришган. Катта кўчани қўйиб, чапга бурилдим. Шу ёқ сал узоқроқ.

— Чарчамаяпсизми?— сўради Абдуллажон ёнмазён борар эканмиз.

— Чарчаш қаёқда!— дедим кулиб.— Чарчашга қўл ҳам тегмайди.

— Рост айтасиз. Мен ҳам ишни жуда соғиниб қолдим. Ун беш кун иккала қўл чўнтақда юрса-я! Айтгандай, бизнинг бригадага ҳам бориб турибсизми? Ишлар қалай?

Устимдан бирор бир челак сув қуйгандай бўлиб кетди. Бошим айланди, тўхтаб қолдим.

— Ишлар яхши!— дедим хўрлигим келиб.— Бригадангизнинг ишлари яхши! Пиёс ўтоқ қилинди... кечки... кечки қовун чопиб қўйилди... гармдори сугорилди... Яна нимани гапириб берай?

— Мавжудаҳон, нима бўлди?— Абдуллажон ўзини йўқотиб қўйди.— Мендан хафа эмасмисиз?

— Йўқ, сиздан хафа эмасман,— дедим лабимни тишлаб.— Тишим оғриб қолди. Бу ёғига ўзим кетаман, раҳмат.

— Кузатиб қўяй? Ёлғиз ўзингиз...

— Раҳмат.

— Мавжудаҳон, ахир...

— Йўқ, йўқ,— дедим зарда билан.— Сиз ишингиздан қолманг.

Шундай дедиму кучим борича уйга югурдим. Келиб ечинмасдан ўзимни каравотга ташладим-да, тўйиб-тўйиб йигладим. Тавба, қандай одамларки, ишдан бошқа нарсани билмайди?!

Шу алфозда мана бир йил ўтди. Ўзимни ундан

әлиб қочганим сари унга интиламан. Аммо, Абдулла-жондан ҳеч қандай садо йўқ. Гаплашсак, бир-бири мизга қарамай гаплашамиз. Абдуллажон ҳам мендан ўзини олиб қочадиган бўлиб қолди. Саҳарда далага кетади, қоронги тушганда қайтади. Идорага ҳам чақирилганда келади.

Аламимни ишдан оладиган бўлдим. Куннинг иссиғига, совуғига қарамай, далама-дала юраман. Ҳатто, кечалари ўша ёқларда қолиб кетаман. Тўрт юз гектар янги ер очдик. Шуннинг ярмисига пахта экдик. Колганига мева кўчатлари ўтқазиб чиқдик. Абдулла қовунчига ўша ваъда қилинган эллик гектар ер берилди. Шу пайтгача уни бундай деб атамас эдим. Энди айтавераман. Бир куни, ҳатто мажлисда ҳам шундай деб юбордим.

Эҳ, нега ўғил бола эмасман-а! Шартта олдига борардим-да: «Яхши йигит, ростини айтинг, анави қиз сарғайиб кетди-ку, кўнглингиз борми-йўқми?»— деб сўрардим. Йўқ деса-чи? Узимнинг бу бемаъни хаёлимдан ўзим сесканиб кетдим. Йўқ, Абдуллажонсиз ҳаёт-ҳаёт бўлармиди? Қирдан жуда чарчаб келган бўлсам ҳам, ўрнимдан турдим, костюмимни елкамга ташлаб, кўчага чиқдим. Қоронги тун. Клубдан қандайдир музыка эшитиляпти. Дарё томонга юрдим. Ҳеч зоғ йўқ. Битта-битта қадам ташлаб, олмазордан ўтдим. Оёғим остида хазон ёқимли шитирлайди. Булут орасидан ой сузиб чиқди. Тўлқинланиб оқаётган дарё кумушдек ялтираб кетди. Яқинроқ бориб томоша қила бошлидим. Шу пайт, шу пайт...

— Мавжуда!— деб қолди таниш овоз.

Ялт этиб орқамга ўгирилдим: Абдуллажон!

— Салом!— дедим ҳовликиб, эрталаб кўришган бўлсак ҳам.

— Салом. Нима, уйқингиз келмаяптими?

— Ҳа,— дедим жилмайиб.— Сиз-чи?

— Менми? Мен...— Абдуллажон ҳам жилмайди.

— Кечаси сайр қиласиган одатим бор. Шундай бир айланиб келмасам, уйқу келмайди.

— Қачондан бери?

— Бир йилдан ошиб қолди.

— Ухлатадиган дори ичинг.

— Ичиб кўрдим, фойда бермаяпти.

— Бўлмаса...

— Мавжудаң!

— Лаббай?

— Биласизми?

— Нимани?

Абдуллажон ютинди.

— Юринг, ҳов анати ёққа бориб келамиз. Майлами?

— Майли,— дедим жүрттага эрингандай бўлиб, аммо ичимда «бор экансиз-ку, яхши йигит», деб қўйдим.

Биз анча сайд қилдик. Осма кўприқдан ўтиб, бедазор бўйлаб кетдик. Бир маҳал қовун полизга келиб қолибмиз. Абдуллажон битта қирқмани узиб чиқди. Этигининг қўнжидан пичоини олиб, шундай тегизган эди, жонивор «тарс» ёрилиб кетди. Совуқдан тишшим-тишумга тегмай турса ҳам, бир тилим олдим. Бирам ширип.

— Дунёда бундан ҳам ширип нарсалар бор,— деди Абдуллажон.

Ҳайрон қолдим. Гапига эмас, унинг журъатига ҳайрон қолдим. Аммо ўзимни эшитмаганга солиб, индамадим. Буни пайқади шекилли:

— Янаги йилга шу уруғдан кўпроқ экайлик,— деди қовун полизга суқ билан қараб.

— Аввал тажриба -қилиб кўрайлик,— дедим унга қўшилиб.— Кейин майли.

— Ердам берасиз-а?

— Албатта.

— Яхши чиқса, қиши билан бузилмай турадиган қовун бўлади-да.

— Туринг, кетдик. Кеч бўлиб қолди.

Йўлда Абдуллажон чурқ этмади. Мен ҳам жим бордим. Гапнинг нима кераги бор? Иккаламиз ҳам ўз хаёлимиз билан бандмиз. У нималарни ўйлаётганикин? Балки қовунларини ўйлаётгандир? Майли, ўйласа, ўйлайверсин! Ўий бор одамнинг юраги бор. Балки шунинг учун ҳам уни яхши кўргандирман. Мен-чи, мен уни ўйлаяпман. Ўйласам арзиди.

— Мавжуда,— деди Абдуллажон олмазорга етганимизда.

— Лаббай?

— Эртага... эртага ҳам чиқасизми?

У шу топда ёш болага ўхшаб кетди: күзлари жав-  
дир-жавдир қиласарди.

— Чиқайми? — дедим жилмайиб.

— Ҳа, албатта чиқинг.

Үйга қашдек учиб келдим. Келдиму, ечинмасдан  
ўзимни каравотга ташладим ва анчадан бери биринчи  
марта тинч, ором олиб ухладим.

## БАҲОР

Лола сайли жуда гаштли бўлди. Қуёш тепамизга келгунча икки қучоқ-икки қучоқдан лола териб қўйдик. Собиржоннинг севинчи ичига сиғмасди. Қасалдан яқинда турган бўлса ҳам, худди ёш боладек у ёқдан-бу ёққа сакраб чопар, кўм-кўк майсалар устига думаларди.

— Уриниб қоласан,— дедим охир пешонасидаги терни кўриб.

— Қасал бўлмагандекман,— деди у чўккалаб.— Фақат белим сал оғриди.

— Ўтири, чой ишиб оламиз.

Лолазор четида турган машинамиздан адёл билан термос олиб келдим. Шарқираб оқаётган жилга ёнига ўтиридик.

— Баҳорда, албатта у ёқ-бу ёққа чиқиш керак экан,— деди Собиржон пешонасидаги терни артар экан. Унинг чарчаганилиги сезилиб турарди.— Чиройли жойлар кўп, қараб тўймайсан киши.

Биз борган жой ҳақиқатан ҳам гўзал эди. Бир томони тог, бир томони кўм-кўк дала. Олисда кумушдек товланиб дарё оқмоқда. Лолазор эса, худди моҳир тўқувчи қўлида тўқилган чорсн қизил гиламга ўхшарди.

— Анави чўққига қара,— деди Собиржон завқ билан.— Худди оқ яктак кийиб от суриб кетаётган чаандозга ўхшайди. Шу ёққа бир чиқсам!

— Ҳозир эмас,— дедим мен. Уни буйрагидан операция қилишган эди.— Қейинчалик. Янаги йилга.

— Сен ҳам врачлардан баттарсан.

Собиржоннинг энсаси қотди. Эътибор бермадим. Аслида унинг завқига мен ҳам шерик эдим. Эрталаб лолазорга келганимиздаёқ, шу чўққига бир чиқсан, деб қўйган эдим.

— Врачларни менга пеш қилма,— дедим.— Менинг ҳам чиққим бор. Лекин узилиб қолишинг мумкин.

— Шу гапни кечадан бери эшитаман. Дадам тиниши билан ойим бошлайди. Мени ҳали ҳам касал деб ўйлашади шекилли.

Кулдим.

— Нега куласан?— сўради Собиржон.

— Узим, шундай. Ҳалп ҳам болалигинг қолмабди. Үзингдан бошқага ишонмайсан. Кел, яхшиси ёнбошла.

Собиржон индамай ёнимга чўзилди. Бошидаги адёл тагига термосни қўйдим. Шу пайт қарсиллаган милтиқ овози эшитилди.

— Нима?— деди Собиржон сакраб ўрнидан туриб. Биқинидаги чандиқ тортилиб кетди шекилли, инграб юборди.— Бирор милтиқ отди,— у биқинини ушлаб яна ётди.

— Ҳа, бирор милтиқ отди,— дедим унга қўшилиб.

Бирдан лолазорнинг ўргаси чайқалиб кетди. У ердан қўзимни узиб улгурмаган эдим, лолазорнинг этағи чайқалди, қалпоқдек оппоқ брр нарса сакраган бўлди, эрта очилган лолалар унинг зарбиданми, ё тогдан эсиб келаётган шабададанми танга-танга бўлиб тўкилди. Олисда ҳаллослаб чопиб кетаётган бир одам кўринди. Қўлидаги милтиқ тасмаси ерга тегай-тегай деб турарди. Машина ёнига етгач, шартта лолазор томонга югорди. Тасма лолаларни бир текисда синдириш кела бошлади. Бу, чопишига халақит берса ҳам, у парво қилмасди, аксинча, милтиқни силтаб-силтаб қўярди.

Бизнинг рўпарамизга келгач, у тўхтади. Қўнжи букиб қўйилган резинка этиги билан лолаларни топтай бошлади. Баъзан милтиқ учи билан у ер-бу ерни туртиб ҳам қўярди. У шу қадар берилиб ниманидир қидирардики, ҳатто бизни кўрмас, жигар ранг қорақўл теллаги остидан тиришиб турган пешонасидан юзларига оқиб тушаётган терни ҳам сезмасди.

— Бу нима қилиц?— сўради Собиржон бошини кутариб.

— Ким билади,— дедим,— бир нарса қидираётганга үхшайди.

— Шунача қидирадими?!

Собиржоннинг газабдан лаблари кўкариб кетди.

Менинг ҳам жаҳлим чиқа бошлади. Боягина биз сайр қилган, яшиаб турган жойнинг топталиб расвоси чиққан эди.

— Ҳо, ака, нима қиляпсиз? — қинчқирди Собиржон. Лекин кучи етмади, бўгилиб қолди. Кейин йўтал тутди, биқинини чангаллаганича менга суюнди.

Мен уни секин ётқизмоқчи бўлдим, лекин у ётмади. Лолазор томонга ўгирилди. Бироқ бояги одам йўқ эди. Атрофга қарадим. Ҳеч қаерда йўқ, гўё ер ёрилгану, тагига кириб кетгандай.

Ичимда севиндим, лекин кайфиятим бузилган эди. Боягина бутун вужудимни қоплаб турган хушчақчақликдан асар ҳам қолмади. Топталган лолазорга қадалиб қолдим. У худди бемаҳал қўзгалган довулдан кейин ер билан битта бўлиб ётган қулупнай доналарини ослатарди.

— Нима қилиб кетди-а? — деди титраб Собиржон.

Индамадим. Шу маҳал мени ҳам титроқ босди. Лолазор этагида ҳалиги одам турарди! У телпагини ечди. Қора наматдек бошидан гул этиб буг кўтирилди. Пиджагининг енги билан юз-кўзларини, нешонасини артди. Кейин телпагини икки қўли билан бостириб кийди. Бир қўлига милтигини, бир қўлига оппоқ бир нарсани олиб биз томонга юрди. Милтиқ тасмаси лолаларни яна чирт-чирт узиб кела бошлади.

Қўлларим ўз-ўзидан мушт бўлиб тугилди. Собиржон ҳам унга қараб турган экан:

— Бир боллаймизми? — деди.

— Бўлди,— дедим қатъий.— Лекин сен аралашмайсан.

— Нега? — Собиржон ҳайрон бўлди.

— Сен ётавер. Бир ҳузур қилай. Менга қўйиб бер.

Мақсадимни унга айтмадим. Хафа бўлади. Операцияси ҳали битмаган, иннайкейин, ўзи инқиллаб турибди. Биқинига тушириб қолса, тамом. Яна касалхонага жўнайди.

— Менга қўйиб бер. Бир ҳузур қилай, анчадан бери ўзи қўлим қичиб турибди.

— Нима қиласан? — еўради у.

— Одатдагидек. Чап қўл билан.

Собиржон тушунди, индамади. У ҳам бу усулни биларди. Институтда бирга ўрганганд эдик.

— Сен ётавер. Ма, чой ич.

Собиржон ёнбошлади. Адёл тагидан термосни олиб чой қуиб бердим.

Овчи рўпарамизга келиб тўхтади. У менга иккита келарди. Қўлидаги нарса эса, тумшуғи қонга бўялган оппоқ қуён эди.

— Чекишдан борми? — сўради у бепарворлик билан.

— Чеккингиз келдими? — дедим мен ва секин ўрнимдан турдим. — Чектирамиз ҳозир...

Собиржонни йўтал тутди. Орқамга ўгирилдим. Нимадир туфлигимга сачради. Собиржоннинг кўнгли ағдарилаётган эди. У икки букчайганича ариққа интиларди. Белидан қучоқладим. У ўзига келганида овчимиз ғойиб бўлган эди.

— Қуённи... қуённи кўрдингми? — деди Собиржон кўз ёшларини артар экан.

— Кўрдим, — дедим. — Жуда катта экан.

— Кўнглим ағдарилиб кетди, — деди у. — Тумшуғини кўрдиму шунаقا бўлди, мени кечир.

— Ҳечқиси йўқ, бўлади, — дедим мен.

— Кел, чой ичамиз, — деди Собиржон.

Термос қопқогини тўлатиб узатдим. Кейин ўзим ичдим.

— Кетамизми? — сўради Собиржон бир оздан сўнг.

— Кетамиз, — дедим мен.

Нарсаларимизни йигиштирдик. Машинага ўтирганимизда:

— Ҳар ҳолда бу ёққа чиққанимиз яхши бўлди, — деди Собиржон кулишга ҳаракат қилиб.

— Яхши бўлди, — дедим мен ҳам.

Йўлга тушдик.

Кун оға бошлаган эди. Машина испб кетди. Дала жойда шундай бўлади, Собиржоннинг пешонасини ҳатто тер қоплай бошлади. Ойнани туширдим. Гуши этиб муздек ҳаво юзга урилди. Тез кетаётган эканман, Собиржон энтикиб кетди.

— Ўпкам ёрилади, — деди кулиб.

— Ҳаво яхши. Тўйиб ол. Яна бу ерларга келамизми, йўқми!

— Келамиз,— деди Собиржон.— Келгуси якшанба яна келамиз. Тўйиб-тўйиб шимамиз бу ҳаволарни.

Қишлоққа кирдик. Икки томонимиздан баргак ёзган толлар липиллаб ўта бошлади. Пешайвонли сариқ бино олдидан ўтаётганимизда бир боғлам сиренъ кўтарган кичкина бир қизча бизга қўл силкиб қўйди.

— Тугруқхона,— деди Собиржон.— Ойисини кўргани келганга ўхшайди. Баҳорда туғилиш ҳам кайф-а?

— Кайф,— дедим унга қўшилиб.

Табиат билан баравар кўз очасан. Гўзалликдан бошқа нарсани кўрмайсан.

Унинг нима демоқчи эканлигига тушундим.

— Одамлар ҳар хил бўлади.

— Бу масалада бир хил бўлгани яхши эди,— деди Собиржон.— Гўзалликнинг фойдадан бошқа нимаси бор?!

— Сезяпсанми?— сўрадим ундан.

— Нимани?

— Бирор кабоб пиширяпти.

— Ҳа,— деди Собиржон мен томонга суқилиб. Унинг ойнаси берк эди.— Чойхонада бўлса керак.

— Чойхонада бўлса биттадан еб кетамиз.

— Менга тўғри келмайди,— деди Собиржон биқинига ишора қилиб.

Ёқимли ҳид борган сари яқинлашиб, димоқни қитиқлай бошлади.

— Писта кўмирга ўхшайди,— деди Собиржон ўзи томондаги ойнани тушириб.— Ҳа, писта кўмир.

Машина сой бўйидаги толзорга яқинлашди. Чойхона шу ерда эди.

— Тўхта,— деди Собиржон.— Биттадан еб кетамиз.

— Ихтиёering.

Машинани қишдан нураб чиққан супа ёнида тўхтатдим. Кабоб қўра шу супа устида эди.

— Жигар кабоб!— Собиржон иштаҳа билан лабларини ялаб қўйди.

Чойхонага кирдик. У бўм-бўш эди. Фақат тўрдаги сўрида тиззаси устидаги тўрт буқлоглик чопонига тирсакларини тираб бир чол чой ичиб ўтиради. У бир чойдан ҳўплаб, сўлиб қолган ялпиз ҳидларди.

## Сўрашдик.

— Тешавой, ҳа, Тешавой! — қичқирди чол чойхонанинг бурчагидаги эшикка қараб.— Меҳмонлар келди!

Кўп ўтмай, эшик очилиб, калта, оқ халат кийган йигит чиқди. У бир патнис гўшт кўтариб олган эди.

— Аввал меҳмонларга қарасанг-чи! — деди чол.

— Чиқдим-ку,— деди чойхоначи.— Бу киши ҳам тикилинич қилиб қолди.

— Лаббай? — ичкаридан кимдир чиқди.

Бу бояги овчи эди. Ўрнимдан туриб кетдим. Собиржон шошиб енгимдан тортди.

— Қўй, кайфиятини бузма,— деди ялингансиз мон.

— Лаббай,— деди яна овчи чойхоначига.

— Бир соатларда тайёр бўлади деяпман,— деди чойхоначи чолга кўз қисиб қўйиб.— Бир айланиб келинг.

Овчи бизга назар ташлаб, ташқарига чиқиб кетди. Орқасидан чойхоначи ҳам чиқди ва шу заҳотиёқ бир чойнак чой билан иккита пиёла кўтариб қайтиб келди.

— Кўк чой олиб келдим-а? — деди олдимизга уларни қўяркан.— Чўллаган бўлсаларинг керак.

Биз, майли дегандай, бошимизни қимиirlатдик.

— Нима дейди овчи? — сўради чол ялпизни мўйловига суркаб.

— Жаркоп,— деди чойхоначи.— Боя қуён отибди. Хўш, нима берай? Кабоб бор,— у бизга ўгирилди.

— Раҳмат, ҳеч нарса,— деди Собиржон шошиб.

— Ҳеч нарса,— дедим мен ҳам.— Яна битта чой беринг.

Кўз олдимга оғзи қонга бўялган оппоқ қуён, топталган лолазор келиб кетди.

— Меҳмонлари бор экан-да,— деди чол.

— Меҳмонлар нима қилади! — чойхоначи ёнимизга ўтирди.— Доим аҳволи шу. Хотини кетиб қолиб, баттар бўлди.

— Ким ўзи у одам? — сўради Собиржон.

— Шу ерлик,— деди чойхоначи энсаси қотиб.— Бизда ҳосилот бор эди. Узоқ йили қирда отдан йиқилиб ўлган. Ўшанинг ўғли.

— Мен ҳам эшитувдим хотини кетиб қолганини,—  
деди чол.— Қирда алланима қидириб юрган гиволог  
билан кетиб қолибдими?

Чойхоначи бошини қимирлатди.

— Оббо зангар-ей! Эпчил экан-да?

— Э, гап эпчилликдами?— чойхоначи ташқарига  
чиқиб, яна бир чойнак чой олиб келди.— Яхши дам  
сди, манавидан ичинглар.

Чой чиндан ҳам яхши бўлибди. Эскисини тўкиб  
ташлаб, янгисини пиёлаларга қўйдим.

— Кайф,— деди Собиржон бир ҳўплаб.

— Гап эпчилликда эмас,— чойхоначи гапида да-  
вом этди.— Яхши одамдан ким кетади? Неча йилдан  
бери танийман, оғзидан бир марта ҳам ширин гап  
эшитмабман-а! Тагин ҳам хотини фил экан. Бизни-  
килар шунақа бўлсак, бир кун ҳам турмайди. Қўлин-  
гизга чиптангизни бериб, «фишт-т» дейди. Тагин ҳам  
хотини фил экан.

Чойхоначи бошини сарак-сарак қилиб қўйди.

— Нима, гиволог билан анчадан бери дон олишиб  
юрар эканми?— сўради чол.

— Бунисини билмадим, пойлайдиган одатим йўқ.—  
Чойхоначи қошларини чимириб, биз томонга қараб  
қўйди. Кейин сирли оҳангда деди:— Годовоидан кейин  
«акамлар» бир ойча йўқ бўлиб кетдилар. Экспедиция  
энди иш бошлаган пайт эди. Ўшанда ўша новча гео-  
лог уйларига кириб юрувди. Илгаридан таниш  
екан-да.

— Э-э...— деди чол.

— Сувонқул аканинг кенжаси ҳам сой бўйида бир  
куни кечқурун кўрган экан. У уч кундан бери йўқ. Гео-  
лог ҳам йўқ.

— Яхши бўлмалти,— деди чол.— Яхши бўлмалти.

— Ўзидан кўрсинг!— деди қатъий қилиб чойхоначи  
ва тўгрими, дегандай, бизга қараб қўйди.

Хеч ким жавоб қилмади.

— Ўзидан кўрсинг,— деди ўрнидан туриб чойхона-  
чи яна.

— Соат неча бўлди, меҳмон?

— Олти.

— Чиқай, овқатини қилиб берай. Тўполонига то-  
қатим йўқ.— У чиқиб кетди. Биз ҳам турдик.

— Утирибсизлар-да,— деди чол.

- Раҳмат, борайлик,— деди Собиржон.— Хайр.
- Келиб туринглар.
- Раҳмат,— дедим мен.

Чойнак ёнига битта танга ташлаб ташқарига чиқдик. Кун совий бошлаган эди.

- Негадир жуда енгил тортиб кетдим,— деди Собиржон машинага ўтирганимизда.
- Баҳор-да, баҳор!— дедим мен.

Машина елдек учиди кетди. Ойналарни күттармадик. Оқшом туша бошлаган эди. Муздек шабада ўт-ўлан ҳидини димоққа уриб, юзимизни силаб борарди.

## ШИРИНСОЙ ОҚШОМЛАРИ

Шириңсой оқшомлари! Нақадар жозибадор, нақадар оромбахш!.. Қуёш қызил баҳмал сингари товланиб, ўзини азим чинорлар панасига олганда, бу оқшомлар күхна табиат күрки — тонгдан ҳам мусаффо бўлиб кетади. Гўё бутун қишлоққа атлас пояндоз солингандай... Кенг кўчалар ҳам, қатор оқ уйлар ҳам, олди гулзор колхоз клуби ҳам гоҳ сариқ, гоҳ қизгиш тусга кириб қишлоқ ҳуснига ҳусн қўшади. Бу ернинг одамлари-чи? Улар оромбахш оқшомлардан ҳам гўзал. Бу одамлар билан сұҳбатлашиб тўймайсан. Улар уддасидан чиқмаган иш йўқ. Шунинг учун ҳам лабларида доим табасум, кўзларида севинч, улар тонгни ҳам, тунни ҳам қўшиқ билан қарши олишади.

Қишлоқ қизларининг шўх, ўйноқи яллаларини эшилсанг, Шоҳимардоннинг шифобахш булоқларидан тўйиб-тўйиб сув ичгандек бўласан, губоринг тарқалиб, роҳатланасан.

Назира қишлоққа тушиб келган куннинг эртасига-еқ, қизлар уни ўртага олиб, қўшиқ айттиришган эди. Иўқ деганига қўйишмади. Шунда у қандайдир лапарни тутила-тутила айтиб, зўрга қутулган эди...

Ҳозир у икки қўлини иягига тираб, дераза ённида ўтиаркан, даладан қайтаётган қизларнинг яллаларини эшитиб, негадир шу воҳеани эслади. Ӯшандада бир чеккада дарахтга суюниб турган Қосимжон ҳам: «Иўқ, деманг, айта қолинг. Барибир қутулмайсиз» — деган эди. Қосимжон шундай демаганда, Назира қизларга қулоқ солмасди. Билмайман, деярди-қўярди. Лекин

нега Қосимжоннинг сўзини қайтара олмади? Яхши кўринмоқчимиди унга?

Назира бир хўрсиниб қўйди. Йўқ, яхши кўринаман деса, билмаган нарсасини айтармиди? Ишқилиб, нима бўлса ҳам лапар Қосимжонга ёқди. Қизларга қўшилиб чапак чалди. Кейин... Кейин... меҳмонхонагача кузатиб қўйди. Хайрлаша туриб, қўлинни маҳкам сиқди. Энди-чи? Энди бундай қилмайди... Кечқурунлари қолмайди. Қолса ҳам, энди барибир Назирага бунинг аҳамияти йўқ. У уйланяпти. Боя тўйга айтиб кетди. «Ўзингиз бош бўлинг», деди. Бош бўлинг, эмиш. Нимага? Ўзининг эшсиз севгисигами? Йўқ, у кетади, ҳа, кетади.

Назира деразани беркитди, сиқилиб кетди шекили, яна очди. Чуқур бир уҳ тортди, бошини кичкина қўллари устига қўйди.

Шу пайт кимдир дераза олдидан ўтиб кетди. Кетидан яна кимнингдир шарпаси эштилди. Кўп ўтмай, меҳмонхона қаршисидаги клуб одамлар билан тўлди. Кимдир дутор чала бошлади. Бу Шерали бўлса керак, Назира дарров англади. Шерали дутордан ҳеч ажралмайди. Ишга ҳам олиб боради. Бўш қолди дегунча, тингиллатгани-тингиллатган. Ана, кимдир ашула айтиб юборди. Ким бўлди экан? Бирам яхши айтяптики... Назира беихтиёр қулоқ солди.

Қуралай кўз йигитта  
Ишқим тушди.  
Туш кўрибман, тушимда  
Мени қучди.  
Мени қучма, топганинг  
Мен эмасман.  
Ваъдаси йўқ йигитни  
Ёр демасман.

«Ваъдаси йўқ йигитни ёр демасман»... Ваъда... Ваъда берганмиди? Шунчаки, келинг, бирга ишлаймиз, деган эди, холос. Биргина шу гапи билан келавердими?

Назира олдида турган Қосимжоннинг суратига тикилди ва беихтиёр хаёл суреб кетди.

Қосимжон институтни битираётганида, Назира тўртинчи курсда эди. Иккови бир-бирини яхши билса ҳам,

алоқалари салом-аликдан, ўқишиң ҳақидағи галлардан нари ўтмасди. Нима бўлди-ю, янги йилни бир жойда кутадиган бўлиб қолиши. Ўшандаги қора костюмини яхшилаб дазмоллаб, биринчи марта галстук таққан, қўнғир сочларини чап томонга төжис қилиб тараган Қосимжон Назираға жуда бошқача бўлиб кўринди. Қўл бериб кўришгандаги эса, юраги жиз этиб кетди. Утириш авжи қизиган пайти, Қосимжон ҳазил аралаш:

— Уйлансанам, Назира дақа қизга уйланаман,— деб юборди.

Йигитлар «дидинг дуруст», дегандай Назираға қараб қўйиши. Назира сесканиб кетди. Лекин ҳазил аралаш айтилган шу сўз икковини бир-бирига жуда яқин қилиб қўйди. Қосимжон қишлоғига кетадиган куни:

— Битириб, Ширинсойга боринг, бирга ишлаймиз,— деди.

Назира қанот пайдо қилиб, орқасидан учгудай бўлди. Ҳа, ўшандаги ўз ҳаётини Қосимжонсиз тасаввур қила олмади. Шунинг учун ҳам институтни битириши билан Ширинсойга йўл олди. Колхоз раиси меҳмондўст одам экан. Назира келиши билан уйига олиб кетди. Алоҳида уй беришгунча шу ерда туришни таклиф қилди. Чой ичиб ўтиришган эди, бир қиз келиб қолди.

— Танишиб қўй, Гулчеҳра,— деди Нурмат ака Назирани кўрсатиб,— бу киши янги зоотехнигимиз.

Қиз мулойим жилмайиб қўйди.

— Жуда яхши. Салом,— деди қўлини узатиб.

Икки қиз чой ичилиб бўлгунча апоқ-чапоқ бўлиб кетиши. Раиснинг эътирозига қарамай, Гулчеҳра янги дугонасини уйига олиб кетмоқчи бўлди.

— Нурмат ака, хўп дея қолинг. Иккаламиз гаплашиб ётамиз. Хўпми?

Назира уялинқираб ерга қаради.

— Мана кўрдингизми?— Гулчеҳра яна раисга ёпиши. Бир марта хўп десангиз нима қиласди? Қосимжон акам билан қирга юборинг, деб қанча ялиндим, юбормадингиз. Энди бунга ҳам йўқ дейсизми?

Назира Қосимжоннинг исмини эшитиши билан ялт этиб унга қаради-ю, қизариб кетди. Буни ўзи ҳам сезди шекилли, дастрўмоли билан секин юзини яширди.

— Хўп, хўп. Бунча қақилламасанг? — деди ниҳоят раис кулги аралаш.— Сенга йўқ деб бўлармиди? Мехмон рози бўлса, олиб кета қол. Сиз нима дейсиз, Назира?

— Майли,— деб розилик берди Назира. У Гулчеҳрадан Қосимжоннинг қачон келишини тезроқ билшига ошиқарди.

— Бўлмаса, буларни әртага ўзинг фермага олиб борарсан.

— Хўп бўлади. Қани, кетдик,— Гулчеҳра Назира ни қўлидан ушлаб ҳовлига олиб тушди. Шу маҳал қаердадир ит ҳуриди, товуқ қақиллади.

— Тавба,— деди Назира қош қорайганини кўриб,— далада кун жуда тез кеч бўларкан-а?

— Ёқмадими?— самимилик билан сўради Гулчеҳра.

— Йўқ, нега? Яқиндагина машинадан тушганимда кун тепамда эди. Бирпасда кеч бўлди-қўйди. Шунга айтяпман.

— Тўғри, ўрганмаган кишига шунаقا кўринади. Қосимжон акам ҳам янги келганларида шунаقا бўлувдилар.

Назиранинг юзига яна қизиллик югурди. Лекин бу гал ортиқ чидай олмади. Шериги қиз бўлгани учунми, ё ҳозир ўзини раиснинг уйидагидан дадилроқ сездими, сўради:

— Айтгандай, Қосимжон акангиз қирдан қачон келади?

— Эртага. Ана, уйга ҳам келдик.

Назира сўнгги гапни эшитмади. Эртага... Майли, әртага бўлса эртага! Қўпи кетиб, ози қолди. Қандай бўлиб кетган экан? Қандай кўришар экан? Ҳали ҳам аввалгидек камгап, мулойим, уятчанмикан?.. Е... У шундай хаёллар билан Гулчеҳранинг меҳмондўстлигига ҳам унча эътибор бермади. Икки чимдим ош еди-ю, бир ҳўплам чой ичди. Кейин Гулчеҳра солиб берган ўринга ёнбошлади.

«Мана, Қосимжон ака,— ўйлади Назира,— қишлоғингиздаман. Севинчим ичимга сифмаяпти. Сиз-чи? Сиз хурсанд бўлармиkinsиз?»

У кўзларини ширингина сузиб, юмшоқ пар ёстиқ-қа юзини қўйди.

Бегона жойда олдингга хилма-жил овқат қўйишса

ҳам, егандай бўлмайсан, кечаси қандай ухлаганингни билмайсан. Шунинг учун бўлса керак, Назира дугонасидан олдин гира-ширада уйгонди. Тиззаларини кўрпанинг устидан қучоқлаб, биринчи меҳнат кунининг қандай бўлишни, Қосимжон билан қандай учрашиши ўйлаб кетди. У ишдан қўрқмасди. Албатта, шундай катта колхозда зоотехник бўлиб ишлаш анча масъулиятли нарса, лекин бу уни чўчитмасди. Бироқ юрагига ғулғула солган нарса ҳам йўқ эмас... Қосимжон уни қандай қарши оларкин? Орзулари рўёбга чиқармикан?

Тонг ёришганда икки қиз фермага кириб келишди. Бу ерда аллақачон иш бошланган эди. Бирор хашак ташибган, бирор сигир суғорган. Катта ферма ҳовлисининг ўртасида иккита сут ташийдиган машина туриди. Ёнида қатор-қатор бидонлар... Назира алангжалаңг, ҳамма нарсага суқ билан қарайди.

— Назира! — кимдир тўсатдан чақириб қолди.

Назира бу овозни таниди, таниди-ю, юраги шув этиб кетди, турган жойида қотиб қолди.

— Салом. Кечирасиз, кеча қирда эдим, кутиб ололмадим.

Назира орзиқиб кутган кишиси олдига қанот пайдо қилиб учиб келган, юрагига яқин одами пайдо бўлиб қолганини, аввал унинг, кейин кулиб турган Гулчөхранинг қўлини сиққанини билмай қолди. Қосимжон уларни ўз кабинетига бошлаб кириб, диванга ўтқазганидагина Назира ўзига келди, бироқ ҳали ҳам бошини кўтара олмай, ер остидан Қосимжонга қарди.

— Тинч юрибсизми?

— Раҳмат. Э, бу ерда тинч юриб бўладими? Бир кун ҳам бошингиз галвадан чиқмайди. Иш-иш-иш.

— Қўйинг,— гапга аралашди Гулчөхра.— Бу кишини ҳалитдан чўчитманг.

— Назира қўрқадиганлардан эмас. Иннайкейин, шу ерда ишлайдиган бўлсалар, галва, ташвишларимизга шерик бўлсинлар-да!

Учовлари кулиб юборишиди. Шу пайт телефон жиринглаб қолди. Қосимжон трубкани олди.

— Лаббай. Салом, Нурмат ака. Ҳа, шу ерда ўтирибдилар.— Қосимжон Назирага қараб жилмайиқ ўйди,— ҳа, энди кўникиб кетарлар. Хўп, ҳозир.

Қосимжон трубкани қўйди.

— Раис сизга, салом, дедилар.

— Раҳмат.

— Мен ҳозир идорага бориб келаман, кейин ба-  
фуржа гаплаппамиз. Унгача Гулчехра билан фермани  
айланинглар. Янги аппаратларни кўринглар.

Қосимжон қандайдир папкани олиб чиқиб кетди.  
Назира енгил нафас олди. Унга Қосимжоннинг шу  
топда кетгани ёқди. Ферманинг ишлари билан яхши-  
лаб танишиб олади, бўлмаса, қулоғига гап киравми-  
ди? Лекин шу куни Қосимжондан дарак бўлмади. Гул-  
чехра билан фермани айланар экан, эшик томонга  
қараб-қараб олади. Қани энди келса! Узоқдан бир  
кўриниб кетса ҳам майли эди. Назирага ҳозир шу ҳам  
кифоя қиласди.

«Иши кўп,— деди ўзича, янги туғилган бузоқларни  
кўришаётганда,— бечора, тиниб-тинчимайдиганга ўх-  
шайди».

— Буларда ҳеч тиним йўқ,— қизишиб гапирди  
Гулчехра.— Сигирлардан ҳам кўра буларга кўп қарай-  
миз. Шундай қилмасангиз ҳам бўлмайди. Ҳаммаси  
зотли! Фермани шулар ҳисобига кенгайтирамиз. Қо-  
симжон акам ҳам ҳар куни икки маҳал шу ерга кириб  
кетмасалар, кўнгиллари жойига тушмайди. Раисни  
айтмайсизми? У киши ҳам шундай. Колхознинг бў-  
линмас фонди эмиш булар.

Назира беихтиёр жилмайди. Шундай ёнгинасида  
қулоқларини диккайтириб, оппоқ тилини чўзиб турган  
ола бузоқнинг бошидан силади.

«Иши кўп. Бинта «бўлинмас фонд»нинг ўзи қанча  
иш. Майли, қўлимдан келганича ёрдам бераман. Ле-  
кин нега келмаяпти? Кеч кирди. Бугун ҳам дараги  
йўқ...»

Кейин-чи? Кейин нима бўлди? Қосимжонни кунда  
кўрадиган бўлди. Ҳатто, кечалари фермада қолиб  
ҳам кетишди. Назира ўз ҳаётининг энг қувончли дав-  
ри ҳисобланган ана шу тўрт-беш ой ичida Қосимжон-  
нинг ҳақиқий кўмакчисига айланди. Сигирларнинг ра-  
циони икки марта кўпайтирилди. Электрчўпон,  
электроилкалар ҳам бир бўлимга қурилди. Назира  
колхозда ҳаммага яқин ва жонкуяр бўлиб қолди. Кол-  
хоз умумий мажлисларининг бирида раис ҳамманинг  
олдида унинг пешонасидан ўпди.

— Агар ўғлым бўлганида, ўзим келин қилардим.—  
деди ҳазил аралаш.

Залда кулги кўтарилди. Назира ер остидан ёнида  
ўтирган Қосимжонга қараб қўйди. Қосимжон сами-  
мийлик билан жилмайди.

Мажлисдан сўнг клубда одатдагидек ўйин-кулги  
бошланиб кетди. Гулчехра қўшиқ айтди. Яхшигина  
овози бор экан. Ферманинг шофёри Шерали дуторла  
унга жўр бўлди. Биринчи пок севги ҳақидаги юракдан  
айтилган бу қўшиқ Назирани тўлқинлантириб юборди.  
Қўшиқ тугаши билан эшикка чиқди.

Тун. Ширинсойнинг оромбахш туни. Кўкда сон-са-  
ноқсиз юлдузлар... Қайси бири сўниб, қайси бири ёна-  
тганини сезмайсан киши. Шулардан бири Назирани-  
ки. Ҳов, ана... Ҳаммасидан ёруғ, ҳаммасидан катта-  
Бироқ нега ёлғиз?

Эндини баргак ёзган толзордан майин шамол эс-  
ди. Назира ўша томонга юрди... Бир маҳал олдинда  
кимнингдир шарласи кўринди. Унинг ёнида яна би-  
ров борга ўхшайди? Ким экан булар? Назира юриши-  
ни ҳам, орқага қайтишини ҳам билмай, тўхтаб қолди.

— Энди қўйиб юбормайман,— дерди эркак ово-  
зи,— Гулчехра, ростини айтинг, қачонгача қнийнайсиз?

Назира бўшашиб, оёқлари мадорсиз чалишиб кет-  
ди. Бу Қосимжон эди.

«Қосимжон... Энди нима қилдим? Ишқилиб, ўзимни  
сездирмай... кетиш керак, билдиримай кетиш керак».

Назира зўрга уйга етиб келди. У ечинмасдан ўзи-  
ни совуқ каравотга ташлади-да, йиглаб юборди.

Эртасига эрталаб Қосимжон келди. У худди ёш  
боладек севинчини ичига сиғдира олмай, тўй ҳақида  
гапирди. Узингиз бош бўлинг, деди Назирага. Назира  
юрак йигисини бўғиб жилмайди...

— Рост, сиз ҳамма нарсанинг уддасидан чиқасиз.  
Бормасангиз, хафа бўламиз. Келишдик-а?

«Наҳотки, сезмаган бўлса? Наҳотки, севишимни  
билмаса?— ўйларди Назира, унинг гапларига қулоқ  
соларкан.— Билса шундай дермиди? Айб ўзимда. Не-  
га билдиримадим? Нега айтмадим? Ҳозир айтайми?»

— Қосимжон ака?

— Нима, борасизми?

Назира оғир хўрсинди.

— Ҳа, бораман...

Қосимжон чиқиб кетди.

— Кетиш керак,— деди ўзига келиб Назира.— Тез-роқ кетиш керак.

Бу сўз унда куч пайдо қилди. Ўрнидан туриб бор нарсасини тахлади.

«Кетиш керак, тезроқ кетиш керак!»

Бирпасда кийиниб, чамадонини кўтарди-да, кўчага чиқди. Шу маҳал клубда чироқ ёнди. Яна Шерали дуторини черта бошлади. Нега мунгли, боягидек қувноқ эмас? Ҳа, бу куйни Шералининг ўзи яхши кўради. Ёлғиз қолса, нуқул шуни чалади, Қизиқ, наҳотки у ҳам Назирага ўхшаса?..

Назира катта йўлга чиққунча ҳеч кимни учратмади. У енгил нафас олди. Марказга ҳали йироқ. Лекин ҳечқиси йўқ. Шу ердан кетиб олса, бўлди. Назира атрофга меҳр билан боқди. Қанчалик таниш жойлар!. Ярим йил ичиди бу ерлар худди түғилган қишлоғидек унга жуда азиз ва яқин бўлиб қолган эди. Нурмат акачи? Шерали-чи? Қизлар-чи? Уларни ташлаб кетаверадими? Лекин кетиши керак.

Унинг ўпкаси тўлди. Кўзларига яна ёш келди. Узини қанчалик босмасин, қуилиб келаётган бу ёшни тўхтата олмади. Шу алфозда қанча юрди, билмайди, қаршисидан келаётган машинанинг чироги кўзларини қамаштириб юборди. Машина унпнг ёнига келиб таққа тўхтади.

— Шу маҳалда қаёққа?— Назира ҳовлиқиб машинадан тушаётган кишининг Нурмат ака эканини билди. Билди-ю, нима дейишини билмай қолди.

— Қаёққа кетаяпсан, ҳой, менга қара?— сўради яна раис ва ҳеч нарсани билмагандай рўмолчасини узатди.— Ма, юзингни артиб ол. Қаёққа кетяпсан?

— Шаҳарга...— бўшашиб жавоб берди Назира ёшлиарини артаркан.

— Шундай дегин? Қани, машинага чиқ-чи!

Нурмат ака бир зумда чамадонини машинага солди ва Назирани ёнига ўтқазди-да, қишлоқ томон ҳайдаб кетди.

— Қаёққа олиб кетяпсиз, тўхтатинг!— Назира жонхолатда раиснинг қўлига ёпишдп.

— Қаёққа бўларди!— жилмайиб жавоб берди раис.— Шириносойга! Сен бизни ташлаб кетармидинг?

Назира жавоб бермади. Нурмат ака ҳам анчагача жим борди.

— Нега хафалигингни билмайман, лекин ғам ёмон нарса,— деди ниҳоят раис.— Уни енгмасанг, ҳаётинг бузиладп, орзуларинг пучга чиқади. Уни енгиш керак!

«Уни енгиш керак,— такрорлади раиснинг сўзини ичиди Назира ва шу топда қаттиқ чарчаганини сезди,— енгиш керак. Қандай қилиб?»

Ўзига-ўзи берган бу саволи жавобсиз қолди. Мудроқ босган кўзлари юмилиб, бошини секингина Нурмат аканинг елкасига қўйди. «Барибир кетаман. Лекин шундай елкага бош қўйиб ухлаш қандай яхши!..» У бундан бир неча йил муқаддам отаси фронтга кетадиган куни ана шундай ором олган эди. Лабидан табассум аримайдиган Нурмат ака, ҳозир унинг учун ўз отасидек азиз ва меҳрибон бўлиб кетди.

«Шуларни ташлаб кетаманми?— каёлидан ўтказди Назира.— Ўз қизидек бағрига олишди. Ёлгизлигимни билдиришмади. Наҳотки баҳт фақат севгида бўлса? Бу одамлар билан яшашнинг ўзи баҳт эмасми?!»

Машина колхоз идорасига яқинлашганда, клубдан яна қувноқ куй янграй бошлади. Назира анча енгил тортди. Бошини кўтариб, қулоқ сола бошлади. Бунча дилбар чалаётган ким экан? Шералимасми?

## ОЛТИН ЯПРОҚЛАР

Дам олиш күнларидан бири әди. Құчага чиқдим. Кеч куз бўлса ҳам ҳаво очиқ, қуёш чарақлаб турарди. Ҳамма ёқда япроқлар: оқ, сариқ, яшил япроқлар... Гўё қўчага чиқишингизни кимдир билгану йўлингизга гилам тўшаб қўйган.

Ҳар йил кузда, хазонрез пайтида менга шундай туюлади. Шунинг учун ҳам қўчага чиқаман, сердаражт хиёбонларни узоқ-узоқ айланаман.

Бугун ҳам шундай бўлди. Уйимиз рўпарасидаги қайнизорга ўтдим. Оёғингиз остида япроқлар, минг хил рангдаги япроқлар галати оҳанг қашф этиб шитирлайди. Әкимли ўрмон иси димогингизга урилади. Шимириб тўймайсан киши.

Бир оз айланиб, қайнизорни кесиб ўтган ариқча лабидаги скамейкага ўтиредим. Бирдан қайнизор қоронғилашди. Дарахтлар орасидан тушиб турган тангатанга шуълалар сўнди. Тепага қарадим. Қўқ бетини парча-парча қора булутлар қоплаб олган әди. Қўп ўтмай, қайнизорни тасир-тусир товушлар қоплаб, ёмғир қуя бошлади. Панжара девор орқасида алланнма дуп этиб ерга тушди. Шу топдаёқ қўрқув аралаш қу-қулаган хўрозди овози эшигилди. Чумчуқлар галаси чирқиллаганича, гур этиб бир дарахтдан иккинчисига ўтар, у ерда ҳам тинчимасдан, яна гур этиб учинчисига учуб қўнарди.

Ерда тангадек очиқ жой қолмади. Ҳаммасини хазон қоплади. Ёмғир зарбидан барглар дув-дув тўкиларди.

Мен бу манзарадан кўзимни узолмай, костюмимнинг ёқасини кўтариб олиб туравердим. Атрофим бирпасда халқоб-халқоб сув бўлиб кетди. Ёмгир япроқларни худди варрақ пирпирагандай пириллатар, кейин эса, бутун кучи билан ерга ёпишириб, мутлақо қимир этмайдиган қилиб қўярди. Ўз новдаларидан узилиб, ер билан теп-текис бўлган бу япроқларни кўриб, кўнглим бузилиб кетди. Ёмгир эса ҳамон ёғарди. Баъзи жойларда лойқа сувдан бошқа ҳеч нарсани кўриб бўлмасди.

Бир маҳал қайинзор ёришди. Ёмгир сийраклашди. Панжара девор томондан хўроз қичқирди ва бир-икки қу-қулаб, қанотларини қоқиб қўйди.

Ўзимдаги ёмгир томчиларини енгим билан сидириб, тепамга қарадим. Қарадиму, кўзларим камашиб кетди. Рўпарамдаги қайиннинг энг юзори шохидан бир нарса худди олтиндек товланиб турарди. Қўлимни соябон қилиб яхшилаб қарадим. Бу... оддий япроқ, сапсариқ қайнин япроги эди.

Унга, шу кичкина, енгилгина тебраниб турган япроққа тикилар эканман, бир воқеа эсимга тушиб кетди.

Эрта баҳор эди. Даладан келаётган эдим. Нима учун борганман у ёқقا, ҳозир эслолмайман. Анчагина йўл боспб, кўприк тузатаетган одамлар олдидан чиқиб қолдим. Сўрашиб, бўш ётган замбил устига ўтиридимда, папирос тутатдим.

— Ҳаво айнаяпти,— деди пахталик чопон кийган ўшгина йигит осмонга қараб.— Булутнинг авзойи бошқача.

Беихтиёр осмонга қарадим. Ҳақиқатан ҳам ҳаво айнамоқда эди. Бир папирос чеккулик вақт ўтмовдики, аллақаерда момақалдироқ гулдуради.

— Ана, айтмадимми?— деди ўша йигит, қаршисида хода йўнаётган чолга қараб.— Бўлди қила қолайлик. Иннайкейин...

У гапини тугатолмади, шаррос ёмгир қуийиб кетди. Яна момақалдироқ гулдуради. Йигит қўлидаги белкурагини ташлаб, чопиб кетди. Қолганлар ҳам унинг кетидан йўлга тушишди. Фақат чол парво қилмади. бир ходани йўниб бўлиб, иккинчиспни қўлига олди. Унинг кўм-кўк томирлари бўртиб чиқсан узун қўллари ниҳоятда тез ҳаракат қиласарди.

— Қўйинг, кейин қиласиз,— деди кимдир жаҳл билан.— Қочиб кетмайди-ку.

Чол индамади. Кўм-кўк кўзларини одамларга тикиб, жилмайди-да, яна муккасидан шуга тушиб кетди. Ёмғир зўрайиб жалага айланди, аммо у ўрнидан турмасди. Унинг ёнида мендан бошқа ҳеч ким қолмаган эди. Чидай олмадим:

— Ота, юрсангиз-чи!— дедим.

Шундай дедиму, ўзим одамлар кетган томонга югурдим. Улар бекинишган жой — эгаси ташлаб кетган чайла эди. Мен ҳам шу ёққа кирдим. Ҳаммамиз жим эдик. Ёмғир эса ҳамон ёғарди, гўё осмон тешилгандек. Бир маҳал кимдир ўрнидан туриб, ташқарига чиқди. Кўприк томонга бирпаст тикилиб турди-да, қайтиб кирди.

— Ишлайяпти,— деди секин ва ҳаммага бир-бир қараб, юрганича чайладан чиқиб кетди. Кўп ўтмай, чайлада мен билан пахталик кийган йигитдан бошқа ҳеч ким қолмади. Йигит кўзларини ердан узмасдан ўтиради. Мен ҳам ғалати бўлиб кетган эдим. Бир-бirimизга қарай олмай, ниҳоят ўрнимиздан турдик. Ташқарига чиққанимизда ёмғир ҳамон ёғар, аммо булутлар орасидан қуёш мўралаб турарди. Кўприкка яқинлашганимизда ҳеч ким бизга эътибор бермади. Йигит белкурагини олиб яна ишга тушиб кетди. Мен чолга тикилиб қолдим. Унинг қип-қизил юзида, пешонасида, қалин кул ранг мўйлови устида олтин доналари ялтиради. Булар терми ё ёмғир томчиларими, ажратиш қийин эди.

...Қайин дарахти учидаги кичкина япроқ менга шу чолни эслатиб юборган эди. Тепамга яна қарадим. Япроқ қуёш нурида олтиндек товланиб, енгил тебранганича кўкка дадил бўй чўзиб турарди.

## БАҲОР НАФАСИ

Тунги сменадан қайтардим. Кун ҳали эрта. Эндиғина ранг олиб келаётган баркашдек қуёш тоғлар ортидан күтарилемоқда эди. Күча жимжит. Онда-сонда пишқириб юк машиналари ўтиб қолади. «Гурр» этиб чумчуклар галаси ерга қўнади-ю, чирқиллаб яна кўздан гойиб бўлади. Қаердадир, тепада эрта кўчиб келиб, ёлғизлиқда қоронги тунни ўтказган булбулнинг ўқтин-ўқтин нолиши эштилади. Дам ачинасан, дам унинг мунгли ноласига қулоқ бериб, янги фаслнинг қанот ёзаётганига қувонасан киши. Қувонасану беихтиёр кўзларингни беғубор мовий осмонга тикасан, тонг ҳавосини ўпканг тўлгунча шимирасан. Ариқ бўйларидаги эндиғина барг ёзаётган толларга, баланд-паст деворлар орқасидаги меваларнинг оқ, пушти, қизил гулларига табассум билан қарайсан, чарчоқларинг унутилади.

Ҳар баҳор шундай. Ҳар баҳор шу манзара такрорланади. Ҳар баҳор дон талашган шу чумчуқлар галасини, худди шу пишқириб ўтган юк машинасини кўргандай, адашган булбулнинг айнан шундай ноласини эшитгандай бўласан, шулардан нимадир сенга кучлироқ таъсир қиласи-ю, яна бир ёш улгайганингга гумон қилиб қоласан. Ёшлигинг эсингга тушади, аллақачонлар унут бўлиб кетган воқеалар, юрагингнинг қаериадир бир умрга қулфлаб ташланган, бошқаларгина әмас, ҳатто ўзинг эсласанг қизарадиган ёшликининг шўхликлари эсингга тушиб, хаёл суриб кетасан.

Ҳар баҳор шундай, ҳар баҳор шу хаёллар қалбининг

ни қитиқлайды. Лекин... лекин ўша куни шундай бўлмади. Тўқимачилар хиёбонига қадам қўйганимда ни ма учундир бузилмай қолган пахса деворнинг тагида очилган лолақизғалдоқни кўриб қолдим. У қуёш нурида чўғдек ловиллаб турарди. Юрагим ҳаприқиб кетди. Бордиму шартта узиб олдим. Нега уздим—унинг гўзаллигига ҳавасим келганиданми, ё қўлим билан ушлаб, лабларимга теккизиб, баҳор нафасини ҳис қилгим келдими, билмайман. Узганимдан кейин раҳмим келиб кетди. Рангпар банди мўрт, бирпаста узилган еридан сув томиб, қорайди. Чанги тўклиб, бармоқларим олтин суви югуртирилгандек сарғайди. Аммо япроқлари тарап, шабадага парво қилмай, кулиб турарди. Афтидан, илдизлар бор кучларини тўйлаб, япроқларга берган... Нима қилишимни билмай, унга тикилиб қолдим. Бир маҳал:

— Амаки, нима қиляпсиз?— деган овоз эшилди.

Енимга қарасам, семиз портфель кўтариб олган бир қизча офтобдан юзини буришириб, менга қараб турибди.

— Нима қиляпсиз-а, амаки?— сўради у яна.

— Томоша қиляпман,— дедим.

— Нимани, лолақизғалдоқними?— сўради қизча.

— Лолақизғалдоқни.

— Яхшияканми?

— Жудаям.

— Мен ҳам кўрай?

— Ма.

Қизча портфелини оёқлари орасига қистириб, ҳовучини тутди. Бердим.

— Вуй, жудаям кичкинина-я!— деди қизча уни авайлаб пулларкан.— Қаердан олдингиз? Шу ердан узиб олдингизми?

— Ҳа,— дедим.

— Нима қилардингиз узиб?— деди қизча лолақизғалдоқдан кўзини узмай.— Ҳали катта бўларди...

— Қуриб қолмасин, деб уздим. Сенга берайми?

— Майли, беринг,— деди қизча.— Мен уни қуритмайман. Сувга солиб қўяман. Берасизми?

— Ола қол.

— Раҳмат, амаки.

Қизча чап қўлинини секин бўшатди-ю, портфелини

олди. Кейин ўнг кафтида банди қорайған лолақпизгал-доқни ушлаганича кетди. Унинг орқасидан қараб қолдим. Галина ҳам худди шундай, кичкина, оппоқ қўлларини чўзиб турган эди... Бунга анча бўлди. Биз иккита разведкачи—Владимир Казаков ва мен Курск ёнида қўршовда қолдик. Тунәди. Юракни эзадиган жимжитлик... Душман ҳам, биз ҳам ҳал қилувчи жангга тайёргарлик кўрмоқда эдик. Тонг отиши билан жанг бошланар эди. Ўрмондамиз. На шамол бор, на туи қўшларининг чинқириги. Баъзан гоҳ чапдан, гоҳ ўнг томондан немисча гаплар әшитилиб қолади, бошқа ҳеч нарса қулоққа чалинмайди. Тонгга яқин бир амаллаб ўрмондан чиқиб олдик. Таниш ёғоч чайла кўринди. Шундан икки юз метр нарида бизникилар. Олисдан траншеяларнинг деворлари билиниб турибди. Чайланинг орқасига эсон-омон ўтиб олсак, марра бизники. Бақтни бой бермай эмаклаб кетдик. Бир маҳал шериғим:

— Ўртоқ сержант! Қаранг!— деб қолди жонҳолатда.

Чайла томонга қарадим. Кичкина бир қиз чайланинг олдидаги ўтиради. Ғира-ширада унинг башараси яхши кўринмаса ҳам, жуда ёшлиги билиниб турарди.

— Нима қиласми?— сўради Казаков шошиб.

— Борайлик-чи,— дедим ҳаяжонимни яширишга ҳаракат қилиб.

Шеригимнинг ҳовлиқиб қолганини тушунардим. Агар қизча бизни кўриб қолиб, бақириб юборса борми, иш тамом, қўлга тушардик.

Ундан ўзимизни яшириб, эмаклаб кетдик. Чайлага етганимизни ҳам у сезмай қолди. Секин чақирдим:

— Ҳой қиз, кимсан?

Қизча бизга бошини ўғирди, лекин жойидан қимирламади.

— Галина,— деди бамайлихотир.

— Қаёқдан келдинг?

У ўрмонни кўрсатди.

— Нима қилиб ўтирибсан?

— Дадамнинг олдига кетяпман.

— Даданг қаерда?

— Урушда...

— Ойинг-чи?

— Фашистлар отиб ташлашди.

Юрагимни бир нарса тимдалаб кетди. Ёнимга ча-  
кирдим.

- Дадангнинг олдига олиб борайликми?
- Ҳа.
- Юр, бўлмаса. Эмаклашни биласанми?
- Биламан.
- Қани, юр.
- Амаки, тўхтанг.
- Ҳа, нима бўлди?
- Лолам қолиб кетди.
- Қанақа лола?
- Ҳув ана.

Галина чайладан сал нарини кўрсатди. Мина қў-  
пориб ташлаган тупроқ устида биттагина лола очи-  
лай-очилай деб турарди.

— Мен олиб келаман,— деди Казаков ва эмаклаб  
кетди. Бирпасда қайтиб ҳам келди.— Мана, юр энди  
тезроқ.

Галина икки қўлинини ҳовуч қилиб узатди. Шу пайт  
бир нарса «виз-з-з» этди-ю, Казаков инграб юборди.

— Нима қилди?— сўрадим шошиб.

— Үқ тегди шекилли, лаънати!— сўкинди у би-  
қинини ушлаб.

Ҳақиқатан ҳам ўқ теккан эди. Гимнастёркаси бир-  
пасда қонга бўялди.

— Сизлар кетаверинглар,— деди у инграб.— Мен  
юролмайман.

— Ҳазил қилма,— дедим жеркиб.— Кел, опич.

— Қўйинг, ўртоқ сержант. Фойдасиз.

— Опич деяпман!

Кўп ўтмай орқага қайтдик. Устимда Володя, ёним-  
да лоласини ушлаб олган Галина. Қирқ метрча юр-  
дим. Қизча ҳам чарчади, мен ҳам. Тер қуйиб кетди.  
Устим қондан жиққа ҳўл.

— Қўйинг, ўртоқ сержант. Оғирман. Иннайкейин,  
фойдасиз,— деди кучини тўплаб Володя.

— Нима деяпсан ўзи?— дедим.— Озгина қолди.  
Етиб оламиз.

— Етиб оламиз,— деди Галина. Унинг жуда ши-  
рин овози бор эди.— Сиз, ўламан деманг, эркаклар  
бунақа демайди.

Володя зўрга илжайди.

— Қаердан биласан сен?

- Дадам айтганлар.
- Даданг ботир одам экан,— дедим.
- Дадамлар қаҳрамонлар!— деди Галина.

Яна эмаклай бошладик. Кўп ўтмай тўплар гумбурлаб кетди. Бизниkilар ҳужумга ўтишди.

Володяни госпиталга ётқиздик. Галина ҳам ўша ерда қолди. Қайтар эканман, у орқамдан югуриб келиб енгимдан торти:

— Ўртоқ сержант, манави сизга!— деди банди чайналтган лолани узатиб.— Дадам лолани жуда яхши кўрардилар.

— Раҳмат,— дедим унинг узатилган оппоқ қўлчалирини ушлаб.— Олиб қўй, дадангни топганингда берасан.

— Дадамларни тополаманми?

— Топасан,— дедим.— Даданг ахир қаҳрамон-ку!

— Раҳмат, амаки.

Шу-шу уни кўрмадим. Урушнинг сўнгги йили Володядан хат олдим. Конвертни очсам, ичида қотирилган лола. «Галина бериб юборди,— деб ёзибди у.— Дадасини топса, янгисини ҳадя қиласмиш».

Билмадим, дадасини топдими-йўқми? Лекин ҳар вақт альбомни варақлаб, лолани кўрар эканман, Галинани эслайман. Унинг хайрлашаётганимиздаги чўзилган ориқ қўллари, ишонч билан боқсан йирик запгори кўзлари кўз олдимда гавдаланади.

Ушанда ҳам шундай бўлди. Хиёбондан кетяпману, хаёлим унда. Қаерда экан ҳозир? Нима қилаётган экан? Отасини топдимикин? Балки топгандир. Шундай нимжон нарса ҳаётта интилиб, ерни ёриб чиқиби-ку, у топмаганмикин?!

## МЕХР

Ҳар куни саҳарда, ҳали қуёш чиқмасдан сайр қилиш одатим бор. Кўчага чиқаман, анҳор лабида айланаман, кейин боққа ўтаман.

Эрта тонгда богнинг ҳусни ўзгача бўлади. Ҳаво муздек, бунинг устига тиниқ. Қушлар шоҳдан-шоҳга ўтиб сайрайди, гоҳ олисда, богнинг орқа томонида, гоҳ шундай тепангизда какку ку-кулайди. Читтак ўйнашиб оёқларингиз орасида ўрмалайди ё пир этиб юзингизни силаб ўтиб кетади.

Бўйм-бўш турган саҳналар, камалак тус скамейкалар эса чумчуқ галалари ихтиёрида. Гур-гур учиб, дон излашади.

Шундай тонгларнинг бирида бодга айланниб юрган ёдим, катта саданинг тагида ўзимга таниш чол — бое қоровулини кўриб қолдим. У супургига иягини тираб хомуш турарди.

Яқинроқ бордим. Алланарса жонҳолатда чирқилларди. Чолнинг қулоги шунда. Овоз гоҳ тинади, гоҳ кишини сескантириб чирқиллайди. Анча қулоқ солиб турдим. Чол ҳам жойидан қимирамасди. Кўзлари ўйчан. Бир маҳал супургисини ташлади-ю, саданинг орқасидаги экиннинг ичини чўккалагаб олиб тита бошлиди.

Қанча вақт титкилади, билмадим, ўрнидан турганди, қўлида ҳали шундоқ жиши қуш боласи бор эди. Жонивор кичкина тумшуқласини катта-катта очиб чирқилларди.

Чол алланарсалар деб қушчани эркалаган бўлди,

тили билан авайлаб оғзини очиб ҳўллади. Кейин садага қаради. Мен ҳам қарадим. Саданинг одам бўйи келадиган бутогида қандайдир қушнинг ини бор эди.

Чол шунга тикилиб қолди. Қушча ҳамон чирқилларди. Чол бир оз ўйланиб тургач, қўлини чўзиб уни инига қўйди. Қушчанинг овози тинди, чол жилмайдида, супургини елкасига ташлаб, бoggинг ичкарисига кириб кетди.

Мен унинг орқасидан қараб қолдим. Кўз олдимда хароба бўлган шаҳар, ёнгин, гумбур-гумбур товушлар, тупроққа қоришиб ётган аёл ва унинг совуқ кўкрагини таталаб, чинқириб йиғлаётган бола келди...

Балки мени ўша офатдан қутқариб олган, ном берган одам шу чолдир? Фақат у шинелда эди.

Беихтиёр томогимга бир нарса тикилиб ўтиб кетди, чолни қидира бошладим. Аммо тополмадим.

Шу пайт bog ёришиб кетди, олтин шуълаларини сочиб, қуёш чиқди. У ниҳоятда катта эди.

## ҲАЙКАЛ

Қрим йўлларида бўлганмисиз? Қатор тизма тоғлар орасидан ўтган паст-баланд бу йўллар кишининг баҳри дилини очади. Йўлнинг икки бетидаги қорамтири, оқ, қизил дарахтларнинг танга-танга барглари илиқ қуёш нуридан марвариддек товланади. Олисда эса, уфққа туташган зангори дengiz...

Ўтган йили шу томонга йўлим тушиб қолди. Тумшугини дengизга чўзиб турган Айиктоқча етганимизда шофёр, шу ерлик йигит, менга тоғнинг чўққисини кўрсатди. Чўққида қаққайиб турган бир дарахтдан бошқа ҳеч нарса кўрмадим.

— Яхшилаб қаранг,— деди шофёр бепарволик билан.— Дарахтнинг пастида ҳеч нарса кўрмаяпсизми?

Мен яна чўққига тикилдим. Дарахтнинг тагида бир нима фивиллади. Кейин бир оҳангда «тақ-туқ, тақ-туқ», деган овоз эшитилди.

— Тўхтатинг!— дедим шофёрга машина пастликка тушаётгандা.

Шофёр тўхтатди. Машинадан тушиб тепага қарадим. Ҳамон ўша овоз эшитиларди. Аммо, ҳеч кимни кўролмадим. Шофёр енгимдан тортиб, йўлнинг муълишига олиб чиқди.

— Ана, энди қаранг,— деди у қўлларини кўзига соябон қилиб.

Қарадим. Чўққида бир одам ҳафсала билан тош йўнарди. Лекин олисдан унинг афт-башарасини билиб

бўлмади. Мен, бу ким, нима қиляпти, деган маънода шофёрга қарадим.

У индамади. Қора бароқ қошларини чимириб, бир зум денгизда сузаб бораётган теплоходга қараб турди-да:

— Юринг! — деди ва машина томон тез-тез юриб кетди.

Биз анчагача жим бордик. Кўзим шофёрда.

Текис йўлга чиққанимизда, у папирос тутатди-ю, чуқур тортиб, деди:

— Бу йигит — етим. Фашистлар Қrimга бостириб киргандан у етти-саккиз яшар бола эди. Отаси бор эди, онаси, опаси ҳам бор эди. Лекин бир кечада ҳаммасидан ажради... ўзини эса, ўзини ўлиб ётган бир солдатнинг тагидан топишган. Қорачадан келган, кулча юз йигит эди солдат. Лекин тоҷикми, ўзбекми ё туркманми, ҳеч ким билмайди. Ростини айтсан, бунинг аҳамияти йўқ ҳозир. Йигит чўққида ўша солдатнинг ҳайкалини ишлаяпти...

Шофёр жимиб қолди. Мен ҳам ўйга толдим. Гурзуфга келганимизда:

— Ҳар куни эрталаб шу Айиктоғдан унинг «тақтуқ»и эшитилади, — деди у ва яна хаёл суриб кетди.

Орадан бир ой ўтди. Уйга қайтаётганимда Айиктоғнинг этагида шу воқеа эсимга тушиб, машинани тўхтатдим. Муюлишга чиқиб, чўққига қарадим. Кимдир ҳафсала билан «тақ-туқ» қилиб тош йўнарди. Бу ўша, шофёр айтган йигит эди. Лекин қанча тикилмай, у ишлаётган ҳайкални кўра олмадим. Чўққига анча тикилиб турдим-да, йўлга тушдим. Айиктоғ ортда қолиб кетди. Аммо қулогим тагида ҳайкалтарош йигитнинг бир оҳангдаги «тақ-туқ»и ҳамон жарангларди.

## ЧАРОС

Эрта тонг эди. Эндигниа күтарилган офтобиниң илиқ нурлари деразаларга тушиб, уйларни ёрита бошлаган эди. Ишга вактлироқ бориш, түгрироги, олтин куз ҳавосидан түйиб нафас олиш иштиёқида уйдан чиқдим. Бир оз этни жунжитадиган шабада эсарди. Кечаси ёмгир ёгиб ўтибди шекилли, асфальт тротуар нам.

Муюлишдан ўтиб катта күчага чиққанимда күк дарвоза олдида турган бир болага күзим тушиб қолди. Оёғида, дадасиники бўлса керак: катта калиш. Бир томонга қийшайиб кўаларига тушиб турган қалпоқ ҳам ўзиники эмас эди. Яқинроқ бордим. Бола кўзларини кўчага тикканча, иштаҳа билан қарс-қурс қилиб алланарса ерди. Ҳавасим келиб кетди.

— Нима еяпсан, ошна! — дедим ёнига яқинлашиб.

— Узум, — деди бола қалпоқ остидан кўзларини менга тикиб. Кейин қўйнидан бир нима олди. Бу — етилиб турган катта бир бош қора чарос эди. — Олинг.

У шундай деди-да, оғзини катта очиб илжайди. Сөвуқданми ё узумнинг рангиданми лаблари кўм-кўк кўкариб кеттан эди.

— Олинг, — деди бола яна. Лекин ўзи жавобимни кутмасдан бир гужум узумни оғзига ташлади-ю, биринки карсиллатиб ютиб юборди. Тамшаниб қўйдим. Йўлга тушдим. Аммо, йўлнинг ярмига етганимда боланинг қўлидаги чаросдан, шунаقا етилган тимқора чаросдан бирам егим келиб кетди! Қани энди бир бо-

ши бўлса-ю, худди шу боладек карс-курс сувини сачратиб есанг?!

Болалигимизда кўпинча шундай қилардик. Бизнинг қишлоқ боғ қишлоқ эди. Каттабоғ деб бекорга аташмаган. Қишлоқнинг орқа томонида, эс-эс биламан, катта узумзор бор эди. Атрофи пастак пахса девор билаи ўралган бу узумзорнинг юз хил рангдаги узумлари ҳамманинг ҳавасини келтирас, ўтган ҳам, кетган ҳам суқ билан қарамай иложи йўқ эди. Биз, болалар учун эса, узумзор сирли бир дунё эди. Ҳаммамиздинг уйимизда ҳусайними, бувакими ё бошқа хил узум исталганча бўлса ҳам, шу бօғдаги узумлардан кўзимизни узолмасдик. Ҳамманикода узумдан кўп барг бўлса, бу боғнинг ишкомларида барг деярли йўқ эди. Пўсти шилинган оппоқ тол пояларига оқ, қизил, сариқ, қора маржонлар гўё ғуж-ғуж қилиб осиб қўйилгандек эди.

Бир куни ўқишдан қайтаётиб, болалардан беш-олтита шўхроғимиз бир жойга йигилдик-да, ўғирлик қилишга қарор қилдик. Икки киши соқчилик қиладиган, қолганларимиз боққа тушадиган бўлдик.

Китоб-дафтарларни кичик болалардан бериб юбориб, пойлай бошладик. Кўчада ҳеч ким қолмади. Ҳамма ёқ жимжит. Секин деворга яқинлашдик-да, биттабитта боққа тушдик. Узум! Оғзимиз очилиб қолди. Бир чеккадан узиб кетавердик. Бир қўл билан юлиб қўйнимизга соламиз, бир қўл билан оғзимизга. Бир-пасда қўйнимиз тўлиб кетди. Қимdir чўнтакларига, дўпписига ҳам солиб олди. Энди кетамиз деб турган эдик, узоқдан:

— Ҳў-ҳў-ҳўй! Ким бор? — деган овоз эшитиб қолдик-ку!

Шерикларим тапира-тупурига олиб қочиб қолишиди. Мен бўлсам узумни кўп еб қўйганимданми, ё қаттиқ қўрқиб кетганимданми, қимирлолмай қолдим. Нима қилишимни билмай кўзимни чирт юмдим-да, жойимда туравердим. Қанча турдим, билмайман. Кўзимни очсам, рўпарамда қизил этик, оқ яктак кийиб, устидан кўк қиийиқни боғлаб олган баланд бўйли бир чол жилмайиб турибди. Қалтираб кетдим.

— Қўрқма, қўрқма, болам,— деди у майин товуш билан.— Узум керак экан, айтмайсанми, ўзим узиб берардим.

— Бундай муомалани мен спра кутмагандим, йиглаб юбордим. Күзимдан оққан ёшни артиш учун қўлимни кўтарган эдим, кўйлагим иштонбоғимдан чиқиб кетиб, қўйнимдаги узум ер билан битта бўлди. Аммо, чол эътибор бермади. Кўрган бўлса ҳам ўзини кўрмаганликка солиб мени юпата бошлади.

— Йиглама, нега йиглайсан, тентак,— деди у бoshимни силаб.— Бир бош олибсанлар, икки бош олибсанлар, нима бўпти? Қамайиб қоладими? Қара, бу узумларни! Қанча ахир. Ҳаммага етади. Қани, бу ёққа юр!

Чол қўлимдан ушлаб етаклаб кетди. Борнинг ўртасидаги ишкомга кирдим. Ишком тўла ёнгоқдек-ёнгоқдек келадиган қора чарос эди.

— Тузукми?— деди чол менга қараб ва қулиб қўйди. Кўкрагига тушиб турган қалин оппоқ соқоли силкиниб кетди.— Тузук бўлса, шундан узиб бераман.

У қийигига осиб қўйган пичогини қинидан суфуриб узум уза бошлади. Бирпаста яктагининг иккала бари тўлиб кетди.

— Мана, болам, ол. Ўртоқларингга ҳам олиб бор.

Мен апил-тапил узумни қўйнимга солиб, кўчага югурдим. Раҳмат айтиш ҳам эсимдан чиқибди. Эшик тагига етганимда орқамга бир қараб қўйдим. Чол менга тикилганича жилмайиб турарди.

Шу-шу, деярли ҳар куни боққа чарос егани кириб турадиган бўлиб қолдим. Аммо бу узоққа бормади. Шаҳарга кўчиб кетдик.

Мана, шундан бери қанча йил ўтиб кетди. Ҳозир қишлоқ қалай экан? Ўша машҳур узумзор-чи? Бормикан ҳали ҳам? Боғбон чол-чи? Бу хаёллар менга тинчлик бермай қолди.

Орадан икки-уч кун ўтмай, Каттабоққа қараб йўл олдим. Эски қишлоқ ўз ўрнида эди. Аммо ўзгариб кетибди. Чиройли уйлар, янги кўчалар тушибди. Ан-ҳор ёқалаб, қишлоқнинг орқа томонига ўтдиму севиниб кетдим. Уаумзор, ўша қадим узумзор, аввалгидай яшнаб турарди. Девор ҳам ўша девор, фақат текис қилиб суваб қўйилибди. Тагида уч-тўртта бола ёнгоқ ўйнаб ўтирибди. Боққа қарадим. Юз хил рангдаги узумлар оппоқ тол пояларига атайнин териб қўйилгандек гуж-гуж эди.

— Ошна,— дедим, болалардан биттасини чақи-

риб.— Менга қара, бу узумчи ота шу ердамиканлар ҳозир, билмайсанми?

Бола ғалати назар билан қаради-да, дүк аралаш сүради:

— Сиз кимлари бўласиз?

— Ҳеч кимлари. Ўзим шундай кўрай деб келдим.

— Узумчи бувам йўқлар. Бултур ўлганлар.

Сесканиб кетдим. Бутун вужудимни титроқ босди. Менга ҳайрон бўлиб тикилиб қолган болаларга эътибор бермай, секин орқамга қайта бошладим. Лекин юролмадим, тўхтаб қолдим. Қанча турдим, билмайман, бир маҳал орқамдан:

— Қани, ҳой болалар! Болалар-ов!— деган овоз эштилди.

Шартта узумзор томонга ўгирилдим. Деворнинг орқасида оппоқ яктагининг этагига тўлатиб узум солиб олган бир йигит жилмайиб турарди. Мен то ўзими ни ўнглаб олгунимча болалар этакни бўшатишди, йигит узумзор ичидаги бўлди.

— Ким бу?— сўрадим ҳалиги боладан боққа ишопра қилиб.

— Узумчи бувамнинг ўғиллари.

Юрагим ўйнаб кетди. Боф томонга югурдим. Деворга етганимда чақирмоқчи бўлиб оғиз жуфтладиму, лекин дарров айнадим. Оёғига қизил этик, яктак устидан кўк қийиқ боғлаб олган баланд бўй йигит ишкомлар орасидан битта-битта қадам ташлаб бораарди. Үнга тикилар эканман, ёшлигимнинг ширин хотираси — узумчи бобони кўргандек бўлиб кетдим.

## ҚИЕМАТ ҚАРЗ

Сарсонбой ота район марказига келганды, қүёшердан эндигина чүгири тилимидек күтарилган эдп. Ким билади, ҳали эрта бўлгани учунми ё совуқ тушиб, бозор-ўчар қиласидиганлар камайиб қолганиданми — одам сийрак, бозор кунлари бўладиган ғала-ғовур, тўполон йўқ. Чол ичидаги хурсанд бўлиб қўйди: «Ҳа, тузук, бу гал кечикмадим. Авжи бозор».

У шундай деб, отнинг жиловини тортди. Қулоқларини осилтириб тин олаётган тўриқ, худди шуни кутиб тургандек пастга, дарё томонга йўргалади. Бу жойларни у эгаси каби яхши билади. Улгайиб, устига эгар урилибдики, ҳар якшанба куни бутун Ҳисорни ошиб, шу ерга келади. Тор тахта кўприкнинг ёнига омонатгина қурилган чойхона этагида тўхтайди. Дарёнинг сел ювиб, бесёнақай кенгайган шу ери уруш йилларидан бери — кеч куздан эрта баҳоргача — бозор. Чор атрофдан йигилган йигитлар фронтга шу ердан жўнашган. Устунлари чириган чойхона ҳам ўша серташвиш йиллардан нишона...

Сарсонбой ота отини илгарилари шу устунлардан бирига боғлаб қўярди. Ўзи эса, ё бозор айланарди, ё пешингача чойхонада ўтиради. Бозор тугагач, пешин номозини ўқиб, изига қайтарди. Тўриқ узоқ вақтгача бунга кўниколмади, бир-икки марта, ҳатто тизгиннп узиб қочди, бутун бозор аҳлини сарсон қилди. Бир-икки марта эса, ярим йўлда тихирлик қилиб оёгини тираб туриб олди, бўлмади. Қамчи еди. Энди кўнишиб қолди. Сарсонбой ота энди уни боғламайди ҳам. От-

нинг ўзл шундай устун тагига келиб, уни тушишини кутади-да, кўзларини юмиб, кейинги бир оёғига дам берганича, жойидан қимирламай тураверади...

Бу гал ҳам шундай бўлди. Сарсонбой ота устун тагида отдан тушиб, чойхонага кириб кетди. Тўриқ оғир хўрсиниб, атрофига қаради. Кўпrik тагида бир тарғил сигир совуқдан туклари ҳурпайган бузоғини эринчоқлик билан яларди. Тўриқ унга қараб туриб, зерикиди. Эснади-да, кўзларини юмди.

Сарсонбой ота катта кўзи синган дераза ёнига чўккалади. Чойхона қурилибдики, шу жой уники. Бирор ўтирган бўлса ҳам у келгандан бўшатиб беради. Шу ердан бозор майдони яхши кўринади, кўприкдан ўтаетган бирор одам ҳам хато кетмайди, ҳаммаси кўздан ўтади.

— Ҳа, Сарсонбой, омонмисан? — деди чойхоначи чой келтириб қўяр экан. — Яна келибсан-да?

— Нима, сенга оғирлигим тушдими? — тўнгиллади Сарсонбой ота офтоб саргайтирган сийрак қошлини чимириб.

— Жизиллама. Азбаройи ачинганимдан гапираман. Кутгандан ёмон нарса йўқ.

Сарсонбой ота жавоб бермади. Унинг бугун гўё ниятига етадигандек кайфи чоғ эди, лекин ўртоғининг гапи билан кўнгли бузилди. Бир: «Сенинг нима ишинг бор? Чойингни сотсанг-чи!» — демоқчи ҳам бўлди, тили бормади. Мадумар аканинг гапида жон бор эди. Ўглидан қорахат келганидан кейин бечора ўн йил кутди. Хатсиз, хабарсиз хотини фарзанд доғида адо бўлай деди. Ўзи эса, чўп бўлиб қолди. Охири чидолмай аза очди. Эрмаги — чойхона.

Мадумар аканинг бугунги гапида чиндан ҳам жои бор эди. «Азбаройи ачинганимдан гапираман...» Нашотки, унинг аҳволи ачинарли бўлса?! Сарсонбой ота шундай ўйлади-ю, юрагини нимадир тимдалаб кетгандай бўлди. Лаблари титраб, тупроқдек саргайган соқоли тортилди. Нимадир томогига келиб тиқилди. Бўшашиб кетаётганини сезди-да, ўшқирди:

— Аҳмоқ, кутсам сени кутаманми? Сенга азроилдан бошқаси орзуманд эмас! Қаёқдан мулла бўлиб қолдингки, менга ўргатасан?!

— Жизиллама,— илжайди Мадумар ака.— Ҳар бозор башарангни кўрсам, кўнглим айнийдиган бўлиб

қолибди. Қир-пириңгда подангни боқиб юравермайсанми? Керак одам ўзи топиб олади сени. Тағин ўзинг биласан. Менга деса шу ерда ётиб ол. Йўлда якка ўзингсан, тагин ўлиб-нетиб қолмагин дейман-да, бетамиз!

— Улсам бир мусулмон топилар кўмгани,— деди ўзини босиб олиб Сарсонбой ота.— Сендан худо ўзи сақласин. Чойдан урган — кафандан ҳам уриб қоласан.

— Шундай демайсанми? Мана, янги дамладим. Ич заҳарингга!

Мадумар ака янги дамланган чойнакдан чой қуиб, ўртоғига узатди, одам кам бўлгани учун ўзи ҳам ёнига ўтири.

— Ҳеч гап эшитмадингми?— сўради жиддий оҳангда Сарсонбой ота.

— Эшитсам, шу заҳотиёқ сенга одам юборардим, эшитмадим...

Орага жимлик чўқди. Мадумар ака ўзини ноқулай сезиб, ичкиси келмаса ҳам хўриллатиб бир-икки чой ҳўплади.

— Зеби қалай? Юрибдими?

— Тузук,— деди Сарсонбой ота деразага бир қараб қўйиб.— Бугун зўрга юборди. Бу ёқса келишимни билиб, ярим кечада отни далага ҳайдабди.

— Сўкмадингми?— хавотирланиб сўради Мадумар ака.

— Йўқ, у шўрликка ҳам қийин. Энди сўкмайман.

— Сўкма. Бечоранинг сендан бошқа кими бор?

— Сўкмайман. Лекин...— Сарсонбой ота бирдан қиқир-қиқир кулиб юборди.

— Ҳа?— ҳайрон бўлди Мадумар ака.

— Сўкмайман-у, лекин отни ҳайдаб нима қиласи? Пиёда бўлса ҳам келишимни билади-ку! Бунинг устига тўриқ йўталимни эшитса, олдимга югуриб келади. Шуни билади, нима қиласи ҳайдаб?

— Ҳа, энди ачинади-да,— деди Мадумар ака ҳам кулишга ҳаракат қилиб.

— Мен ачинмайманми? Мен ҳам ачинаман унга. Ёлғизлик ёмон. Буни ўзинг ҳам биласан. Лекин начора? Қиёмат қарз бу. Қарз билан гўрга кирмоқчи эмасман. Тушуниши керак-да. Иннайкейин...

— Ассалому алайкум-м-м!..

Одамлар кирди. Гап узилди. Мадумар ака ўрнидан турди.

Күп ўтмай, бозорнинг одатдаги ташвиши, тўполон бошланди. Болаларнинг қий-чуви, сигир-бузоқларнинг маъраши билан даллолларнинг «Бор барака»си қўшилиб, яқинигинада осойишталик ҳукм сурган қақроқ дарёга баҳор тошқинидек жон кирди.

Сарсонбой ота яна деразага тикилди. Кўприк ўтган-кетганинг кўплигидан худди туядек лапангларди. Ўшанда ҳам шундай лапанглаб турган эди.

...Ўғлини кузатганда ҳам, Ҳайдаралини кузатганда ҳам...

Лекин унда одамлар бир томонга қараб юрган эдилар. Ўшалардан кўпи шу кўприкдан қайтиб ўтмади, бири ўлди, бири бедарак кетди. Ўглидан ярим йил ҳеч қандай хабар бўлмай, бирдан қорахат келди. Ўшанда у пода билан Узумлида эди. Қўйларни сойнинг нариги соҳилидаги ўтлари эндигина ниш урган ялангликка ҳайдаб, ўзи нураб-нураб деворларигина қолган Тошқалъя тагида ўтиради. Кун тик келганда тушлик қўймоқчи бўлиб, хуржундан сузма олганини билади, қишлоқ томондан аёл кишининг уввос солиб йирглагани эштилди. Йифи тогда акс-садо бериб, шундай қаттиқ жарангладики, Сарсонбой ота чўчиб кетди. Ўрнидан туриб, пастга қаради. Сочлари тўзғиган бир аёл сой ёқалаб, юзини юмдалаб келарди. Сарсонбой ота аввал танимади. Пастроқ тушди. Шунда унинг ҳаво ранг кўйлагидан таниди. Таниди-ю, юраги шир этиб кетди.

— Зеби! Мен бу ёқдаман. Зеби, ҳой! — деганича пастга отилди.

Зеби хола уни кўриб, ўзини тутолмай, ўкраб юборди.

— Нега бўкирасан?! Нима бўлди? — Сарсонбой ота уни билакларидан ушлаб тортқилади.

— Ғофур... Ғофуржон... — Зеби хола гапиролмади, ҳўнграганича қўлидаги қоғозни эрига узатди.

Сарсонбой ота кичкина кўк қоғоз парчасини кўриб, ҳаммасига тушунди. Мадумар ака ҳам ўглидан шундай хат олган эди... Сарсонбой ота ўқимади, қўл-оёғи муз бўлиб, турган жойида қотиб қолди. Худо унга бир фарзанд берган эди, шуни ҳам кўп кўрди.

Ҳайдарали эса, отасидан бир ой кейин жўнаганича,

бедарак кетди. Ўғлининг ўртогини ўзи районгача кузатиб борди. Кузатадиган унинг бирон кимсаси ҳам йўқ эди.

Жўнайдиган куни Ҳайдарави эшак аравага ортиб, иккита қўй олиб келди. Шунда Ғофурдан қорахат келганига йил бўлган эди.

— Амаки, шулар сизда турсин,— деди ийманиб.— Дадам қўйни яхши кўрар әдилар. Қайтганларида тўй-пўй қиласдик... Агар малол келмаса...

— Хўп, бўтам,— деди Сарсонбой ота.— Сурувнинг ичига қўшиб юбораман. Малол келадиган жойи йўқ.

Кўприк устида худди ўғлини кузатаётгандек Ҳайдарави билан хайрлаша туриб, бутун вужудини титроқ босди.

— Омон бўл, бўтам!— деди-ю, ёшланган кўзларини кўрсатмаслик учун хотини нималардир солиб берган тугунни юзига тутиб узатди.— Холанг берди, ол.

— Раҳмат.

— Имкони бўлса, Ғофурнинг мозорини бир зиёрат қилиб ўт. Исталинградда.

Шовқин-сурон ичидагитилган бу гапни Ҳайдарави эшитдими, йўқми, Сарсонбой ота билмайди, ҳар ҳолда, унинг бош қимирлатиб, нималардир деганини кўрди.

Мана, шунга йигирма йилдан ошиб кетди. Ҳайдарави на унинг ўғлини бориб кўрди, на ўзи бирор хабар юборди. Ташлаб кетган иккита қўйи қирқтадан ошибди. Бошқа қўйларга аралашиб кетмасин, келиб қолса топиш қийин бўлади, деб Сарсонбой ота ҳаммасининг бўйнига қизил латта бояглаб чиқди. Лекин келмади. Тирикми, ўлганми—ҳеч ким билмайди. Сарсонбой отанинг бормаган идораси, суриштиргаган одами қолмади. Фамилияси, адресини билмагандан кейин топиш осон бўлармиди?

— Сарсонбой, шу энди, ҳар қаёққа бориб, ўзингни сарсон қилма,— маслаҳат берди ошналардан бири.

— Шундай жаҳаннамдан омон қайтган одам қачонги иккита қўйни суриштириб келармиди?! Худога шукур, тўқчилик. Қўй керак бўлса, бозор тўла. Сен яхиси, бозорга бор. Танийсан-ку, тирик бўлса, шу ерда бўлса, кўриниш беради.

Бу гап Сарсонбой отага маъқул тушди. Шундан бери битта ҳам бозорни канда қилмай қатнайди. Бошқа кунлари қўй боқиб, тогма-тоғ, дарама-дара юради. Ҳориб-чарчаб, ҳафта охири уйига қайтади. Раис бир неча марта: «Бўлди энди, ота, шунча ишладингиз, етар. Энди, ёшлар ишласин!» — деди, лекин Сарсонбой ота қулоқ солмади. Қандай қилиб қулоқ солсин. Ҳайдаралининг қўйларини барибир боқиши керак-ку? Етти ёт бегона одамнинг подасини ким боқарди? Боқса ҳам қандай боқарди?

Лекин қарилик, қарилик экан... Илгарилари ҳафталаб оёқда турса ҳам чарчамасди, энди ярим кунда мадори қурийди, ўтиргиси келиб қолади. Бир куни Үзумлининг тепасида шундай ҳориб ўтирган эди, сойдан ўқ овози эшитилди. Тағин бирорта қўйни отиб қўйишмасин, деб пастга тушди.

Арчаларга чирмашиб кетган токининг тагида тўртбеш йигит харсангнинг устига шиша қўйиб отишарди. Чолни кўриб, биттаси гап отди.

— Бобой, бу нима, какликнинг ҳаммасини отиб, тузлаб қўйганимисизлар? Биттаям кўринмайди-ку?

— Каклик ови қишида бўлади-да, бўтам. Ов қилгани келувдингларми?

— Ҳа, бир бош огиб келувдик. Шу томонда каклик бўлади, дейишуви.

— Бўлади, кўп бўлади, лекин қишида бўлади.

— Бобой! — қичқирди арча тагида ўтирган бир йигит.— Қани, бу ёққа келинг. Манавидан бир ичиоб юборинг биз билан.

Йигит пиёлани тўлатиб, ароқ узатди.

— Ичмайман, бўтам,— деди жилмайиб Сарсонбой ота.— Ҳеч ичган эмасман.

— Бир ичиб кўринг. Кейин гап бор,— қистади йигит ва гандираклаб унинг олдига келди.— Олинг.

— Ичмайман, бўтам,— деди Сарсонбой ота пиёлани итариб.— Ҳар қанча гапингиз бўлса гапиринг, эшиштаман, лекин ичмайман.

— Майли, зўрлама отани! — деди милтиқ ўқлаётгандардан бири.

— Бўлмаса, ўзим олдим,— йигит пиёлани сипқириб, енгига уҳлади-да, деди.— Бобой! Ов баҳона бир дам олгани чиқувдик-да, бу ёққа. Қўйдан биттасини сотинг. Шу ерда у-бу қилиб кетайлик.

Сарсонбой ота бошини қуи солиб, жим қолди.  
Кейин хижолатлик билан жилмайди:

— Аттанг, бүтам, сотолмайман-ку. Меники эмас.  
Қишлоққа ўтсангиз, ҳар бир хонадондан топишингиз  
мумкин. Мен ўзим ҳам бераман. Булар омонат. Бўл-  
маса, қўй сизлардан айлансин!..

— Шундай денг?

— Ҳа, шундай, бўтам.

— Ҳозир биттасини ўзимиз тутиб олсак-чи?—  
йигит илжайди.

— Ундай қилмайсиз. Омонат дедим-ку, бўтам.

— Жуда зиқна экансиз-да!— йигит аччиғланди.—  
Битта қўй нима, одамдан ҳам азизми? Акбар?

— Нима дейсан?— деди йигитлардан бири.

— Юр, биттасини тутиб келайлик. Раисга ўзимиз  
жавобини берамиз.

Йигитлар тош қалъя томон йўл олишди.

— Тўхтанг!— қичқирди Сарсонбой ота.— Мусул-  
мон боласимисизлар, меники эмас, дедим-ку! Эгаси  
йўқ бу қўйларнинг. Урушда бедарак кетган, йигирма  
йилдан бери боқиб юрибман... Инсоф борми?

Йигитлар тўхтаб қолишли, кейин битта-битта орқа-  
га қайтишли.

— Кечиринг, ота, билмадик,— деди кимдир.

Сарсонбой ота индамади. Унинг рангида қон қол-  
маган, лаблари титради.

— Узр, бобой!

Сарсонбой ота яна чурқ этмади. Кейин оҳиста-  
оҳиста қадам ташлаб, қалъя томон кетди.

Шу воқеани Мадумар акага куюниб айтиб берга-  
нида, у анча ўйланиб қолди. Кейин деди:

— Хафа бўлма, бир гап айтаман.

— Ҳўш?

— Шу қўйларни колхозга бер, яхшиси. Ўзингни  
қийнама. Сенда бўлди нима-ю, колхозда бўлди нима.  
Колхоз еб кетармиди? Ҳайдаралинг келса, қайтариб  
беради.

Сарсонбой ота жавоб бермади.

Мана, ҳозир ҳам у бозорга тикилиб ўтирап экан,  
ўртогининг шу маслаҳати хаёлидан кўтарилилмас, лекин  
вима қилишини билмасди. Кун тиккага келганда бо-  
зорда одам сийраклашди. Моли сотилмаганлар, томо-  
шага чиққанлар қолди, холос. Сарсонбой отанинг эр-

талабки кайфи чоглиги йўқолди: Ҳайдарига ўхшаган бирорта одам бу гал ҳам учрамади.

«Наҳотки, ўлган бўлса?— бу даъшатли фикр чолнинг хаёлига келди-ю, қўрқиб кетди.— Йўқ, шунча ўлим бўлиши мумкин эмас. Бедарак кетганинг кўпи келди-ку, ажаб эмас, у ҳам келса. Тўй қилмоқчи эди. Баҳона билан мен ҳам тўй кўриб қолардим. Ўзим қилиб берардим, тўйини...»

У шундай хаёллар билан яна анча ўтиради. Бозор тугади. Деярли ҳамма тарқалди. Ошхона томондан павоннинг ҳиди кела бошлади. Аммо чол жойидан қимирламай ўтираверди.

— Сарсонбой!

Сарсонбой ота ўзига келиб, ўгирилди. Тепасида Мадумар aka турарди.

— Бўлди энди. Мен айтган ишни қил. Чўп бўлиб кетасан-ку, ахир бунақада.

Сарсонбой ота индамади. Маҳсисининг қўнжидан бир сўм чиқариб, лаганчага ташлади-да, ўрнидан турди.

— Кетасанми? Ош дамладим, еб кет.

— Келаси гал.— Сарсонбой ота каравотдан тушиб, эшикка йўл олди.— Хайр!

Эшикка чиқиб, нимадир эсига тушди шекилли, қайтди.

— Наҳотки, сен ҳам тушунмасанг?! Ўзим олиб қолганман, ўзим, ўз қўлим билан қайтаришим керак...

Мадумар aka жавоб қилмади. Фақат ўртоги чиқиб кетгандা:

— Зебига салом айтиб қўй!— деб қўя қолди.

Қиров босган тўриқ эгасини кўриб, қулоқларини чимириди. Эркаланиб, бошини бир-икки силтади-да, зинага яқинлашди. Сарсонбой ота эгарга чаққон миниб, жиловини қўлига олди:

— Кетдик.

Тўриқ таниш йўлдан илдам йўргалаб кетди. Унинг юришида ҳам эгасининг дилидаги каби бир умид бор эди.

## С О А Т

Биз кўпчиликмиз. Дадам, ойим, мен. Тўртта укам ҳам бор. Ойим билан дадам ишлашади. Мен ўқийман, иккита укам ҳам ўқийди. Шунинг учун ҳам ҳар бир хонада соат бор. Биттасида осма соат, биттасида будильник... Лекин ҳеч қайсимиз бу соатларга қарамаймиз. Ойимлар ўзлари юргизиб турсалар ҳам, қарамайдилар. Ҳаммамиз вақтни дадамлардан сўраймиз. Уларнинг қўл соатлари бор. Оддий, лекин катта соат. Билакларига зўрга сиғади. Будильника ўхшаб «жаранг-жулинг», «жаранг-жулинг» қилиб юради.

Бу соат бувамларники. Улар урушда ҳалок бўлганлар. Ўйга қорахат билан шу соат келган. Ўшанда дадам ҳам фронтда эдилар. Ойим қутичага солиб беркитиб қўйганлар. Дадам қайтиб келганларидан кейин ҳам анчагача кўрсатмаганлар. Мен туғилганимдан кейин кўрсатганлар. Шундан бери қўлларидан тушмайди.

Ишхонадан тақдим қилишган соатлари ҳам бор. Тақмайдилар. Шуни тақадилар.

Таниш-билишлари баъзан:

— Бошқасини тақинг, эскиб кетиби-ку! — дейишади.

Шунда:

— Бу оддий соат эмас, дадамларники,— дейидилар.

Яқинда мен техникумга кирдим.

— Мана,— дедилар шунда құлларидан ечиб,—  
кatta бўлиб қолдингиз. Сиз тақинг.

Энди уйда вақтни ҳамма мендан сўрайди. Дадам-  
ларнинг ўзлари ҳам мендан сўрайдилар. Минут, се-  
кундигача айтиб бераман соатимга қараб. У жудаям  
кatta. Билагимга зўрга сигади. Будильникка ўхшаб  
«жаранг-жулинг», «жаранг-жулинг» қилиб юради. Ра-  
қамларига доғ тушган. Лекин оддий эмас, дадамлар-  
ники.

## ДУТОР

У гира-ширада уйдан чиқарди. Құлида кетмөн со-  
пидек узун сопли эркаксупурги, челак. Чиқарди-ю,  
күчага разм соларди. Кечқурун қалин килиб сув се-  
пилған асфальт тротуарнинг нами тарқалған. Шарқи-  
раб оқаётган ариқ бетидаги қатор ёш чинорлар ора-  
сидан танга-танга нур тушиб турибди. Ҳамма ёң топ-  
тоза. Шундай бўлса ҳам у ер-бу ерга супурги уради,  
кейин катта күчага чиқаверишда бурчак бўлиб туш-  
ган беш қаватли уй томон юради.

Пенсияга чиққандан бери у шу ерларни супуриб-  
сидиради. Уйда ўтириб бўлармиди. Кампирнинг ўзига  
иш етмайди-ю, у нима қиласади? Яхшиям шу ишни бе-  
ришди. Тўғрироғи, ўзи сўраб олди. Бўлмаса юраги нақ  
ёрилиб кетарди.

Катта уйнинг олдидағи хиёбонни, йўлакларни то-  
залаб бўлгач, муюлишдаги дераза тагига келиб туради.  
Шу ерда у машқ эшитади, дутор машқини эшитади.  
Бир ойча бўлиб қолди, кимдир шу уйда ҳар куни са-  
ҳарда дутор чалади. Кўп эмас, уч-тўртта куй чалади.  
«Чор зарб»ни чалади, «Танавор»ни... Яна нималарни-  
дир чалади. Кейин дутор тинади. Тингунча у қулоқ  
солиб туради. Қўлида кетмөн сопидек узун сопли су-  
пурги, челак...

У ҳам чаларди, яхши чертарди дуторни. Айниқса,  
«Танавор»ни чертганда, юракларни сел қилиб юборар-  
ди. «Қўйинг, бўлди», дерди шунда кампир тушмагур  
енги уни билан кўзларини артиб. Мана энди ўн етти  
йилдан бери қўлига олмайди дуторни. Уйнинг тўрида,

ўғлиниг ҳошияли рамкадаги сурати тагида осиғлиқ турибди. Ҳар куни бир қараб құяды, лекин тегмайди. Юраги бетламайди тегишга. Уни мактабни битирганданда ўғлиға ҳадя қилған эди. Раҳматлик чалолмади, урушда йүқ бўлиб кетди. Шу-шу, деворда осиғлиқ. Ҳеч ким тегмайди — на кампири, на ўзи.

Дераза тагида чол машққа маст бўлиб ўғлини ўйларди. Тирик бўлганда у ҳам шунақа чалармиди?!

Бир куни хаёлга чўмиб ўтирганда катта уйдан бир йигит чиқди. Қўлида қизил духоба гилофли дутор. Чолни кўриб салом берди.

— Яхши чертаркансиз,— деди чол.— Лекин дуторингизнинг мазаси йўқ.

— Ҳа,— деди йигит,— қорни ёрилған эди, яхши тузатолмадим.

Эртасига у катта уйга эртароқ келди-да, деразани тақиллатди. Йигит чиқди.

— Кечирасиз, ўғлим, безовта қилдим,— деди чол.— Манавини чалинг-чи.

Бу ўша ўғлиға ҳадя қилған дутор эди.

Берди-ю, хиёбонга ўтиб кетди.

Кўп ўтмай «Танавор» жаранглади. Чол дераза ёнига келди. Машққа маст бўлиб туриб қолди. Қўлида узун сопли сунурги, челяк...

## БОБОЁНГОҚ

Гуломқодир ота айвоннинг бурчагидаги устунга суяниб ўтиради. Уч кундан бери у шундай, оқшом бўлдими, тамом, ўзи биринчи гиштини қўйган болохонали уйнинг олдидағи очиқ айвонга ўтириб олиб хаёл суради. Илгарилари бундай эмас эди, қоронги тушдими, бўлди, эшикни орқасидан занжирлаб чойхонага чиқиб кетарди. У ерда ошна-огайнилари, ўртоқлари билан гурунглашиб ярим кечада қайтарди. Фақат якшанба кунлари ҳеч қаёққа бормай, уйда бўларди. Интернатда ўқиётган невараси, ўн тўрт ёшга энди қадам қўйган Мамадалини кутиб ош дамлаб ўтиради. Мамадали ҳам бувасига ўхшаб паловни яхши кўради. Айниқса, пўстдумба солинганини. Гуломқодир ота буни билиб, ҳар шанбада бозор қилиб келади. Баъзизда Мамадали бундан хафа бўлиб қўяди.

— Нима қиласдингиз овора бўлиб? — дейди лабларини осилтириб. — Кошки бозор яқин бўлса!

— Э, болам-а, қари одамга овораси бор эканми, — жавоб қиласди Гуломқодир ота бепарвогина, лекин ичиде неварасининг мөхрибонлигидан журсанд бўлиб қўяди. — Бизнинг авлод ўзи ошхўр авлод. Даданг раҳматли иложи бўлса кунда ош қилдиарди. Ойинг ҳам. Балнисада ҳам ошдан бошқа нарса емасди.

Гуломқодир ота шундай дейди-ю, ўйлаб кетади. Қовоқлари бужмайиб осилиб тушган йирик кўзлари устидаги узун, лекин сийрак кул ранг қошлиари чимирилади. Лаблари бир-икки тортилиб, гапга тушиб кетади. Гуломқодир ота ўтмишни эслаб анча ўзини ранжити-

шини билса ҳам ўғли, келини ва кампирини галиришни яхши күрарди. Мамадали улар ҳақида жуда күп эшитган бўлса ҳам, бувасининг гапини бўлмайди. Диққат билан қулоқ солади. Ойисини у эс-эс билади. Уч ёшлигига касалхонада вафот этган. Оппоқ, тўладан келган хотин эди ойиси. Доим қулиб туарди. Бир марта у буваси билан касалхонага борганда — баҳормиди ўшанда — иккала қулогига қўшалоқ гилос тақиб қўйган. Дадасини эса кўрмаган, фақат уйнинг тўрида осиглиқ турган суратидан билади. Иннайкейин, Германиянинг қайси бир шаҳрида, номини айтишга тили келмайди, мина портлаб ҳалок бўлганини эшитган. Бунга анча бўлди. Шу-шу катта ҳовлида буваси иккалови туришади. Колхозда интернат очилганда Ҳаким ака уни олиб кетди. Кейин билса, Ҳаким ака дадасининг ўртоғи экан, бирга фронтда бўлишган экан, интернатда она тили ва адабиётдан дарс беради. Буваси уни яхши кўради. Ҳаким акангнинг айтганини қил, бўлмаса шартта қулогингни кесиб ташлайман, дейди кўпинча ҳазиллашиб. Тўгриси, илгари шундай дерди. Ҳозир Мамадали катта бўлиб қолган, бувасидан энди бунаقا гап эшитмайди. Энди бува билан невара teng одамдай гаплашишади. Буваси гапиради, Мамадали тинглайди. Шунинг учун ҳам у кўп нарсани билади. Билиб, дадасининг, ойиси ва бувисининг қандай одам бўлганликларидан фахрланиб қўяди. Бувиси буваси билан ёнма-ён от чопган, босмачилар билан олишган. Бир марта ҳатто битта барзангидай босмачини қўл-оёғини боғлаб тутиб келган. Бутун эскадроннинг оғзи очилиб қолган... Бувиси ана шунака одам ўтган.

Гуломқодир отанинг гапи қоронги тушганда ҳам тамом бўлмайди, шунда Мамадали секингина:

— Бува... — деб, юлдузларга ишора қиласи.

Гуломқодир ота милтиллаб бирин-кетин ёнаётган сарғиш юлдузларга қараб, аввал ҳеч нарсани тушумайди, кейин неварасига кўзи тушиб, интернат эсига келади. Гап узилади. Катта қизил пиёладаги совиб қолган кўк чойни йигитларга хос шаҳд билан симиради-да, неварасига тикилиб жилмайиб қўяди. Мамадали бувасининг шу жилмайишига ишқибоз. Жилмайганда кўзлари кичрайиб, икки чаккасида йирик-ирик учта чизиқ пайдо бўлади. Йўгон даҳанини қоп-

лаб турган күкимтири соқоли ёйилиб, серсавлат бўлиб кетади.

Ғуломқодир ота шу жилмайганича, бир-икки йўталиб:

— Қани, дўхтир, даптариznи кўрсатинг-чи,—дейди.

Нега «дўхтир» дейди, Мамадали билмайди. Дарров папкасидан дневнигини олиб кўрсатади. Ғуломқодир ота ундаги қатор бешларни кўриб, жиддийлашади, чаккасидағи чизиқлар йўқолади, соқоли жойига тушади. Эҳтиётлик билан дафтарни хонтахтага қўйиб, эски алифбеда шошмасдан қўл қўяди. Узининг исмига узоқ тикилиб, дафтарни ёпади-да, неварасига қайтаради.

— Баракалла,— дейди вазмилилк билан,— бара-калла.

Бобо билан невара шундан кейин интернатга йўл олишади. У ердан қайтиб, вақт ҳали эрта бўлса ҳам Ғуломқодир ота чойхонага бормайди, тўгри уйга киради-да, ҳозиргина невараси ўтирган жойга ўтириб, мириқиб чой ичади, эртасига қиласиган ишларнинг режасини тузади. Колхознинг ўн гектарлик ёнгоқзори унинг қарамогида. Эртадан кечгача ўша ёқда бўлади. Кечқурунлари ўртоқлари олиб кетишади ё чойхонага чиқади. Уч кундан бери эса ҳеч қаёққа бормайди, факат уйда. Қишлоқ советининг раиси келиб кетгандан бери шундай бўлиб қолди.

Гап шундаки, Ғуломқодир отанинг уйи бузиладиган бўлди. Қумариқ билан Қорасув қишлоқлари бирлашиб, ўртадан катта кўча ўтар экан. Кўча шундай Ғуломқодир отанинг уйини кесиб чиқар экан. Ота уйнинг бузилишига қарши эмасди. Қишлоқ обод бўлса, катта-катта кўчалар тушса, ким қаршилик қиласди. Бунинг устига ҳукумат йўлнинг устига, қишлоқ марказига уй қуриб берсал! Ғуломқодир ота қишлоқ советининг раисига ҳеч нарса демади. Фақат маъқул дегандай бошини энгаштириб, соқолини тутамлаб қўйди. Лекин ёлғиз қолди-ю, бир нарса юрагини чимчилаб кетди. Меваларни нима қиласди? Шундай ташлаб кетавадими? Ўн туп олма, ўн туп гилос, ўрик, шафтолилар нима бўлади? Ёнгоқ-чи, ёнгоқни нима қиласди? Кун қизиб кетган саратон пайтлари терак бўйи кела-диган шу бобоёнгоқнинг остидаги супада у дам оларди. Кузда эса учига япалоқ тунука қоқилган хода билан қоқиб, неварасининг ўртоқларига бир этак-бир

этак улашиб чиқарди. Қишлоқда шу ёнғоққа суқ билан қарамага одам йўқ эди. Қулочга сифмайдиган танаси, бўйи, ҳосилининг таърифи ён-атрофдаги қишлоқларда ҳам достон бўлиб кетган эди. Ҳаммадан ҳам унинг тарихи қизиқ эди.

Гуломқодир ота босмачиларга қарши кураш йиллари қизил эскадронга командирлик қилган. Оҳангарон, Қўйкон, Фаргона томонларда Шермат, Омонқул қўрбошиларнинг додини берган. Йигирма биринчи йили шахсан ўртоқ Фрунзенинг ўзи унинг қўлини сикиб, «Қизил Байроқ» ордени топширган. Кейинчалик Бектемир, Пскент, Паркент тарафда икки қанотли самолётда қочган инглиз офицерини қорабайир отида қувиб асир олган қизил командир Гулом Қўйконбоев отряди билан бирга Али қўрбошига қарши жанг қилган. Ҳовлисидаги бобоёнғоқни шу йиллари ўтқазган.

Бир куни у Алининг одамларини қувиб ўз қишлоғидан ўтиб кетаётганда, кўча лабида қонга бўялиб ётган чолни кўриб қолади. Шартта отини тўхтатиб тушади-да, унинг ёнига боради. Чолнинг афт-башарасини таниб бўлмасди. Ҳамма ёги қон, лой. Бир кўзи оқиб тушган. Афтидан, отнинг думига боғлаб судрашганга ўхшайди. Қўлида эса ингичка бир таёқча бор эди. Худди бир қимматбаҳо буюмдай маҳкам чанглаб олибди.

Гуломқодир ота узоқ тикилиб туриб уни танийди. Бу одам қишлоқ мутаваллиси Саидазим деҳқон эди. Қўлидаги таёқча эса эндини ниш урган ёнғоқ кўчати эди.

Гуломқодир ота икки йигитга деҳқоннинг жонсиз мурдасини топшириб, унинг қўлидан кўчатни секингина бўшатиб олади-да, ўзи билан олиб кетади. Жангдан кейин, босмачилар ўт қўйиб кетган уйига тушиб, ҳовлининг ўртасига ўтқазиб қўяди.

Бобоёнғоқнинг тарихи ана шундай. Колхознинг ёнғоқзори ҳам асосан шу ёнғоқнинг уругидан. Гуломқодир ота босмачилар тугатилгач, колхозда қолиб, ўзи ўтқазган. Колхоз даромадининг талай қисмини ҳозир шу ёнғоқзор ташкил этади. Биронта одам йўқки, колхозга келганда бориб кўрмаган бўлсин. Колхоз раиси Абдужалил ака ҳам хоҳ районда бўлсин, хоҳ областда бўлсин, гап колхоз устида кетса, ёнғоқзорни тилга олмасдан ўтмайди.

Мана шундай гапларнинг сабабчиси бобоёнгоқ энди қирқиб ташланади. Ўрнига кўча тушади.

Ғуломқодир ота ер остидан унга қараб қўйди. Ёнгоқнинг бутун ҳовлига соя ташлаб турган япалоқ барглари кечки шамолдан худди қуроқнинг қўшпир-пирагидай ёқимли шитирларди. Ғуломқодир ота анчагача шу овозга маҳлиё бўлиб ўтириди. У бу овозни кунда эшитса ҳам, қулоқ солиб тўймасди. Кўм-кўк, нимранг, сарғиш барглар кунда ингичка оҳанг кашф этиб шитирларди. Баъзида улар отага ёшлигини, кўча чангитиб от чопган, қилич ўйнатиб юрган навқирон йигитлик йилларини эслатиб юборарди. Баъзида эса унинг ҳозирги тинч, сокин ҳаётини кўз олдига келтириб, майин шабадада оҳанрабо «сайқал»дек тебранарди. Бундай пайтларда Ғуломқодир ота ўзининг анча кексайиб қолганини ҳам, илгариги қуввати йўқлигини ҳам унтарди. Йирик қорамтири қўлларидағи ҳисобсиз чизиқларга тикилиб, кўнгли тўлишарди-да, «ҳа, ҳали кўп ишга ярайсан, чол», деб қўярди.

Қош қорая бошлади. Шабада совиди. Ғуломқодир ота ҳамон жойидан қимиirlамасди. Ёнгоқнинг айвон тарновига чўзилиб келган ингичка шохидан иккита чумчуқ «пир» этиб ерга тушди. Чиқ-чириқлаб ўчоқ ёнидаги қум уюмига яқинлашди. У ёқ-бу ёқса бир-икки қараб слиб, ҳафсала билан чўмила бошлади.

«Ёмгир ёғади,— деди ичиди ота буни кўриб.— Чўмилишини қара, сув кўрмаган одамга ўхшайди-я!»

Битта чумчуқ қанотларини ёзиб сакрай бошлади. Иккинчиси узала тушиб ётиб олди.

«Бозорга бориш керак,— хаёлидан ўтказди Ғуломқодир ота.— Айтгандай, бугун кун нима ўзи? Жумами, шанбами?»

У қишлоқ советининг раиси келган кунни эслади. Сешанбада келган эди. Демак, бугун жума. Эртага бозорга тушса бўлар экан.

— Келмаса бўларди шу ҳафта,— деди овозини чиқариб.

Шундай деди-ю, ўзининг овозидан ўзи чўчиб кетди. Атрофга аланглаб қараб чиқди. Ҳовли жимжит. Фақат ариқда бир бақа завқ билан қурилларди.

— Тавба, ўзимдан ўзим чўчийдиган бўб қопманми?— ота ранжиб гапирди. Илгари бунақа одатим йўқ эди, шекилли. Ҳа... келмаса бўларди. Мамадали

тушмагур жуда зийрак. Мени кўриб анча ўксинади. Яхиси, ўзим бориб кела қолай. Ҳали кун узоқ.

Гуломқодир ота шундай деб ўрнидан турди, ҳовлига бир-икки разм солиб, ёнғоқнинг тагига борди, бир-пас тикилиб турди-да, ўзининг бўйнидек тўр боғлаб кетган танасига шапиллатиб уриб қўйди.

— Ҳа, жонивор, қаримайсан-а, қаримайсан, илигинг бақувват. Майли, яшаб қол. Неча кунлигинг бор экан ҳали.

Аллақаерда чигиртка чириллади, қурбақасининг қурқури авжига чиқди. Қуёш бўзариб, пахса деворнинг орқасига беркинди. Шамол ёнғоқча бирдан ёпирилиб, аллақаердан пиёздорнинг ҳидини олиб келиб димоққа урди.

— Шунаقا, ошна. Неча кунлигинг қолди, билмайсан.

Гуломқодир ота оғир хўрсиниб, эшик томон юрди. Интернатга етганда ўзидан ўзи тўхтаб қолди.

«Нима қиласман кириб, безовта қилиб? — деди ичидা.— Наҳотки тушунмаса, хабари бор-ку!»

Шу фикр ўзига маъқул тушди шекилли, орқасига қайтди. Қишлоқ марказига етганда чойхонада чироқ кўринди. Ота бунга эътибор бермади, битта-битта қадам ташлаб, уйи томонга йўл олди...

Эрталаб, ҳали хўроз қичқирмасдан ўрнидан турганда, кўк бетини булут қоплаган, ҳатто ёмғир бир-икки томчилаган ҳам эди. Ота ҳовлига тушиб ариқ лабида ювинди-да, самоварга ўт ташлаб юборди.

— Майли, ёғсин, меваларнинг танаси яйрайди. Ё тўғримасми?

У энди ўзи билан ўзи овоз чиқариб гаплашишга кўнишиб қолган эди.

— Тўғри. Сув бўлади-ю, зиён қиласими? Ҳали сарatonга эрта. Энди ўрик думбул бўлди. Ёнғоқ-чи, ёнғоқ ҳали шундоқ сут.

Гуломқодир ота шундай деди-ю, ичини алланарса тимдалаб кетгандай бўлди. Самоварнинг ёнида туриб, ўйлаб кетди.

— Чакки бўлди, чакки. Увол кетади.

У оппоқ якtagи ёмғирдан ивиб кетаётганига ҳам, карнайи агдарилиб, самовар ўчиб қолганига ҳам парво қилмасди. Кўзлари олмадан ўрикка, олчадан шафтолига ўтиб, беихтиёр ёнғоқча тушарди. Назаридан ён-

гоқ күшхонанинг ҳидини сезиб, бўғилиб-бўғилиб маъраган сигирдай йигларди. Ёмгирининг ёнгоқ баргларини тебратиб, бир оҳангда шитирлатиши яна нимани эслатиши мумкин?

Ғуломқодир ота сесканиб кетди.

— Ё тавба, бу нима кўргилик ўзи? Бунчалик бўш эмасдим-ку!..

Шу пайт кимдир уни чақириб қолди. Ота ўзига келиб эшик томон юрди. Абдужалил ака билан қишлоқ советининг раиси экан.

— Тузукмисиз? Кечак чойхонада кўринмадингиз?

— деди Абдужалил ака унга қўл узатиб.— Янгийўлдан Сайфи қизиқ келган экан, ярим кечагача ҳанга-малашиб ўтиридик. Ё тоб йўқми?

— Йўқ, отдайман.— Ғуломқодир ота базўр жилмайиб гапирди.— Қани, ичкарига.

— Хўш, бу янги уйга қачон кўчасиз?— сўради қишлоқ советининг раиси айвонга кўтарилишганда.— Ё уй ёқмадими?

— Нега? Уй яхши. Қачон десангиз ўтаверамиз. Икки қишига бундан ортиқ яна нима керак?

Ғуломқодир ота кулиб қўйди.

— Ундаи бўлса, ҳали одам юборайлик. Қеракли нарсаларни кўчиришсан.

— Дараҳтларни нима қиласиз?— гапга аралашди Абдужалил ака.— уларни кўчириб бўлмайди-ку!

— Қирқилади-да,— чолнинг ўрнига жавоб қилди қишлоқ советининг раиси.— Бу ахир проблемамас-ку.

— Нима?!— сўради Ғуломқодир ота унинг сўнгти сўзига тушунмасдан.

— Бу қийин масала эмас, деяиман. Баҳона билан қишига ўтинли бўлиб қоласиз.

Гуломқодир ота сесканиб кетди. Эндиғина ёзмоқчи бўлиб турган дастурхони қўлида тахлоглигича қолди. У нима дейишини билмасди. Ранги ўчиб, лаблари титарди.

— Ёмғир ҳам тинди,— деди Абдужалил ака ўрнидан қўзгалиб.— Бу йил мева йили бўлди-да, ўзиям.

Ота индамади.

— Ҳай, биз турдик. Ҳали кўришармиз-а, боғда ота?

Абдужалил ака шундай деди-да, ўрнидан туриб эшикка юрди. Кетидан қишлоқ советининг раиси турди.

— Одамлар келишганды ишни даражтлардан бошлай қолишин. Бу ёнғоқни ағдариш ҳам ҳазил өмас.

— Йўқ.

— Лаббай?

— Йўқ, одам керакмас.— Гуломқодир ота қишлоқ советининг раисига әшикни кўрсатиб гапирди.— Марҳамат. Узим қирқиб бераман.

— Йўғ-э, қўйинг...

— Қўйингги бор эканми, ўзим қирқаман. Вассалом. Утинни тўғри сизникига олиб бориб ташлайман!

— Йўғ-э, тўхтанг. Нима деяпсиз ўзи? Абдужалил ака, бу ёққа қаранг!— Бироқ Абдужалил ака қарамади. У аллақачон кетиб қолган эди.— Ахир мен сизнинг фойдангизни ўйлаб гапирияпман. Тушунинг.

— Тушундим, тушундим. Хайр.

Гуломқодир ота әшикни шартта ёпиб орқасига қайтди. Унинг бутун вужуди титрарди.

— Утин эмиш! Узингни ўтин қилиш керак!

У янада аччиқроқ бир гапни айтмоқчи бўлиб, оғиз жуфтлаганди-ю, лекин тилига ҳеч нарса келмади.

— Тавба!— деди алам билан, бироқ бу сўз қишлоқ советининг раисига қаратилганмиди, ўзигами, билиб бўлмасди.

Айвонга келиб, устуннинг ёнида турган бир коса яхна чойни охиригача симириди-да, мўйловини енги билан артиб ёнғоққа қараб қўйди. Кейин тез-тез юриб кўчага чиқди. Кўча жимжит. Ҳеч зор йўқ. Фақат иштончан бир бола тротуарнинг ўртасига ўтириб олиб «ҳаммопиш» ўйнарди. Гуломқодир отани кўриб, бола оғзини катта очиб илжайди. Узоқдан, ёнғоқзор томондан том баравар беда ортган ҳўқиз арава кўринди. Ота шу томонга юрди. Бугун шанбалиги, бозорга бориши кераклиги хаёлидан кўтарилган эди.

Кечқурун у уйга қайтганда чеҳраси анча очиқ эди. «Бог аро қўйсан қадам»ни ярим овозда хиргойи қилиб, гўшт тўғради. Ўчоққа олов ёқа туриб, нимадир эсига тушиб кетди-да, овозини барада қўйиб кулди.

— Оббо Абдужалил тушмагур-эй!! Енғоқ жиннисиз, дейди-я. Узинг-чи, хўш, ўзинг нима жиннисисан? Улоқ чопаман деб, иккита тўриқни уч йилдан бери боқтириб ётганингни билмайманми? Ҳар бир киши

бир нарсага ихлосманд бўлади. Мен ёнғоқни яхши кўраман. Бунга раҳматли Сайдазим ака, мана шу ёнғоқ сабабчи бўлган.

Гуломқодир ота девдек қулочини ёзиб турган бобо-ёнғоққа қаради-ю, дарров кўзини олди. Нимагадир икки қулогининг учи қизариб кетганини сези.

— Ҳа, мана шу ёнғоқ сабабчи бўлган...

У шундан кейин қандай қилиб овқат пиширганини билмади. Пишганда эса томогидан ўтмади.

— Мамадали бўлганда ҳозир яхши бўларди,— деди хўрсиниб каравотга чўзилар экан.— Иккаламиз гаплашиб ётардик. Нега энди менинг ҳовлимдан кўча ўтаркан? Жуда ҳозир зарурмиди, шу?! Ўтинмиш-а, ўтин!

Ота ҳовлига назар ташлади. Қоп-қоронги тун, ҳовлида ҳеч нарса кўринмасди. Деворда қандайдир чўзинчоқ шарпалар сузиг юрарди. Бу баргларнинг сояси, ёнғоқ баргларнинг сояси. Ота уларга тикилиб-тиклиб, кўзи илинганини сезмай қолди.

Эрталаб нимадандир чўчиб барвақт уйғонди. Бопши ғувилларди. Анчагача каравотда оёқларини осилтириб ўтириди. Алланарсаларни ўзича шивирлади. Кейин, одатicha, ариқ лабида ювениб, ҳужрага кирди. Бу ерда унинг дурадгорлик асбоблари туарди. Асбоблар ҳужра деворларига қатор қилиб, бир текисда қоқилган михларга осиглиқ эди.

Гуломқодир ота қўлларра билан тешани олиб ёнғоқнинг тагига келди. Юраги дук-дук ура бошлади. Ҳаво салқин, шабада эсиб турган бўлса ҳам, пешонасида тер йилтиради.

— Мамадали келгунча бир ёқлик қилиб қўяй. Тагин бувам битта дарахтният кесолмади, бўш экан, демасин.

У шундай деди-ю, аррани ёнғоқнинг метин бўлиб кетган танасига солди, бироқ тортолмади, қўли титраб арра тушиб кетди.

Гуломқодир ота ичиде севиниб қўйганини пайқади.

— Йўқ, лозим бўлгандан кейин кесиш керак. Бу нима деган гап ўзи? Ҳар ким ўзи эккан нарсани ўзи кесолмаса, қаерга кўча тушади-ю, қаерга иморат қурилади. Қорасувгаям ҳозир ёнғоқ зарурми, кўча зарурми? Албатта, кўча. Кесиш керак.

У қўлига яна аррани олди.

— Оббо чол-эй, мунча ивирсийсан? Солсанг-чи, сол. Нега қўлинг титрайди? Сол!

Шу пайт қандай куч билан аррани улоқтириб юборганини ўзи сезмай қолди. Ғуломқодир ота ҳансираф у ёқ-бу ёқса аланглаб қаради-да, уйдан чиқиб кетди. Тўғри идорага борди. Абдужалил ака қишлоқ советининг раиси билан қандайдир қоғозни кўриб ўтиради.

Ғуломқодир отага кўзи тушиб қишлоқ советининг раиси секингина:

— Келинг,— деди-ю, қўл узатишини ҳам, узатмаслигини ҳам билмай, қизариб кетди.

— Абдужалил!— деди ота саломлашишни унутиб.

— Машина бер, кўчаман.

Орадан ярим соат ўтар-ўтмас, беш-олти киши отанинг юкларини машинага жойлаб, янги уйга олиб кетишиди. Ҳувиллаган ҳовлида отанинг ўзи ёлғиз қолди. У қандайдир гуноҳкор назар билан бобоёнгоқقا тикилиб, айвоннинг бурчагида ўтиради. Шу алпозда у қанча ўтириди, билмайди. Бир маҳал олдида жилмайиб турган неварасини кўрди-ю, севинчданми, ё хўрлиги келганиданми, кўзларида ёш йилтираб кетди.

— Келдингизми, ўглим,— деди у юзини якtagи ичига яшириб.— Сизни кутиб ўтирибман. Ошни энди янги уйда қиласиз-да, а? Кўрганмисиз?

— Анча бўлган,— деди Мамадали гўё сири очилгандай уялинқираб.— Абдужалил акам кўрсатганлар. Шунаقا ҳам чиройлики!..

— Қани, бошланг бўлмаса.

Мамадалининг гапи тўғри чиқди. Янги уй ҳақиқатан ҳам чиройли эди. Катта ҳовли, тўрт хонали уйнинг олдида баланд айвон.

Ғуломқодир ота янги ўчоқда ош дамлар экан, эски уй томондан бульдозернинг овозини эшитиб, кўнгли яна бузилди, руҳи тушиб кетди. Аммо дарров ўзини тутиб, неварасига сездирмаслик учун ўзи севган «Боғ аро қўйсам қадам»ни хиргойи қила бошлади. Бульдозернинг овози эса тун бўйи тинмади.

Орадан бир ҳафта ўтгач, Мамадали бувасини янги кўчага бошлаб борди. Ғуломқодир ота ўша томонга бормасликни қанчалик истамасин, неварасининг раъйини қайтаролмади. Кўчани бирпасда ўтказишибди, ҳатто тош ҳам ётқизишибди.

Үйга яқинлашар әкан, юраги увуша бошлади. Ана, ұз ғана анави жойда айвон бор эди. Энди йүқ, теп-текис бўлиб кетибди. Ариқдан ҳам асар қолмабди. Ий-е, янғи ариқ қазилибдими?

Гуломқодир ота ариқ кетган томонга разм солди. Шу пайт... Шу пайт қай кўз билан кўрсинки, кўчанинг лабида бир дараҳт, ўзига таниш баҳайбат дараҳт савлат тўкиб турарди. Тагида ҳаво ранг скамейка. Нега илгари кўрмади. Бу ахир ёнгоқ-ку! Уша ўзи ўт-қазган бобоёнғоқ!

Гуломқодир ота нима қилишини, нима дейишини билмасди. Кўзларида ёш йилтиарди. У энди буни яширмасди. Мамадалини маҳкам бағрига босиб:

— Раҳмат, раҳмат,— дерди.

Мамадали бу сўзлар кимларга қаратилганини яхши биларди.

## КҮПРИК

Қишлоққа ҳали олис әди. Улар анча юриб қўйиншаганига қарамай, унинг қораси кўринмасди. Атроф бийдек дала. Одам зоти йўқ. Илиқ баҳор нафаси уфуриб турган бўлса ҳам, на ерда бирор жонивор кўринади, на осмонда. Бутун борлиқ ҳамон қиши уйқусида. Фақаг у ер-бу ерда шудгор қилинганд карталар четида ёш йигитнинг соқолидек яккам-дуккам туртиб чиқиб турган майнин ўт-ўлан ўлик чўлда ҳаёт энди куртак ота бошлаганидан дарак бериб турарди. Аммо бу ўт-ўлан ҳам олатароқ, пастқам жойларда унаётганидан, кўзга тезда илғанмас рангпар, дилчўкар чўл манзарасига ҳали айтарлик қувонч келтирмаган, чумчуқ боласидек ҳали жиш, қанот ёзмаган эди.

Кўни билан бир-икки ҳафтадан сўнг бу ерлар бутунлай ўзгариб кетиши, чўл бети келинчак уйидек минг гуллик туркман гиламлари, чўғдек қип-қизил палаклар билан ясаниб олишини йўловчилар билишарди. Лекин билиш бошқа, кўриш бошқа. Шунинг учун ҳозир кетма-кет оғир қадам ташлаб борншар экан, иккалови ҳам ўз хаёллари билан банд эди.

— Қоронғига қолиб кетсак-а? — деди бир маҳал орқароқда келаётган ёш йигит нимадандир хавотирланиб.

— Қўрқяпсанми?! — сўради киноя билан шериги.

— Йўғ-э! — кулпшга ҳаракат қилди йигит ва уялинқираб шеригининг тер ялтираб турган йўғон, тарам-тарам гарданига кўз қирини ташлаб қўйди.

— Оз қолди,— деди шериги ва олдинда түяниңг ўркачидек сарғайиб турган тепаликка ишора қилди.— Шу тепаликдан ўтсак бўлди, у ёги бир чақиримча...

Йигит индамади. Кўнглида у шеригидан норози эди. Эрталаб шаҳардан чиқишаётганда ҳамма кам-кўстини тўғрилаб олмайдими? Қандай шофёрки, олис йўл олдидан машинасини бир кўздан кечирмаса? Машина ҳам аксига олиб бирон гавжумроқ жойда бузилмай, қоқ чўлнинг ўртасида таққа тўхтади. Прокладка топишса-ку, майли, топишмаса нима бўлади? Йигит шуларни ўйлар экан, баттар хуноб бўларди.

— Хуноб бўлма!

Йигит чўчиб тушди. Шериги гўё унинг хаёлларини уқиб олгандай гапирди.

— Хуноб бўлма,— деди у яна.— Уйингга албатта бугун етасан. Жуда бўлмаса, биронта машинага ўтиказиб юбораман.

Йигит қизариб кетди ва илжайди.

— Хуноб бўлаётганим йўқ.

— Фойдаси йўқ,— деди шериги.— Бунинг устига мени биласан. Мен билан ҳеч шунаقا бўлмасди. Билмадим, нима бўлди? Қарибдимми, ҳайронман. Радиатор тўладек кўринган эди.

— Қишлоқда прокладка топилармикин?— сўради Йигит иложи борича мулоийимлик билан.

— Ҳа. Колхоз гаражида бўлиши керак.

— Келганимисиз?

— Узоқ йили қишида бир кун тунаб кетганман шу қишлоқда.

Йигит «Нега?» деб сўрамади, шеригининг ўзи ҳам айтмади. У йигитни тинчтган бўлса ҳам, ўзи тинч эмас эди. У ростини гапирди. Шу маҳалгача у билан бундай хунук воқеа содир бўлмаган эди. Урушдан қайтгандан бери шофёрлик қиласи, машинаси доим эгарланган отдек ҳар қандай олис йўлга шай турарди. Нима бало бўлди бугун? Е чиндан ҳам қариб, эси кирди-чиқди бўлиб қолдими? Агар шундай бўлса иш чатоқ, бошқа бир енгилроқ ишга ўтиш керак бўлади. Анчадан бери гаражнинг ўзида ишлашни таклиф қилиб келишяпти, шунга ўтадими?.. Утса, яхши эмас, кўчага ўрганган одам, бир жойда диққинафас бўлиб кетади. У хўрсинди, кейин нохуш фикрларни ҳайдаш мақсадида, қошигача тушиб турган қулоқчинини кў-

тариб, олдинга тикилди. Муздек шабада гуп этиб тер босган пешонасига урилди. У кафти билан пешонасини сидирар әкан, йўлни мўлжаллади. Тепаликка оз қолибди. Демак, етишди, деган гап. Бир соатларда қайтишса, қоронгигача трестга кириб боришади.

— Келиб қолдик,— деди у овозини чиқариб.

— Йўлни яхши билар экансиз-а, Самад ака!— деди йигит.— Адашмаяпсиз. Бўлмаса, бир марта келгансиз. Мен тополмасдим.

Йигитнинг бу гапи уни қувонтирди.

— Ҳа, энди шофёр бўлгандан кейин йўл билиш керак-да. Йўл билмаган шофёр — шофёрги! Мен шу пайтгача ҳеч адашмаганман. Бир марта кўрдимми, тамом, ҳар қандай йўл миямга пресс бўлади-қолади.

— Фақат шу прокладка чатоқ бўлди-да,— деди сеқин йигит мийигида кулиб.

— Лаббай?

— Зўр экансиз,— деди йигит баланд овоз билан.

— Ҳа, энди тузук.

Улар тепаликка кўтарилишди. Олдинда дарахтзор қорайиб кўринди.

— Айтмадимми!— деди Самад ака.— Мана шу ўрикзорнинг орқаси қишлоқ. Энди тинчидингми?

Йигит илжайди. Яна йўлга тушишди. Кўп ўтмай тепалик орқада қолиб кетди. Ўрикзорга етай деб қолишганда, бирдан олдиларида катта ариқ кўринди.

— Ий-е!— ҳайрон бўлди Самад ака.— Ариқ йўқ эди-ку?

Йигит кифтларини учирди.

— Ариқ йўқ эди илгари,— деди яна Самад ака.

— Янги қазишгандир-да,— деди йигит парвосизлик билан.— Бир йилда ҳозир шаҳар қуриб юборишяпти-ку!

Улар ариққа этиб келишди. Бу — ҳатлаб ўтиб бўлмайдиган, ҳайқириб сув оқаётган расмана канал эди.

— Ҳа, дуруст,— деди Самад ака лойқа сувга тикилиб.— Энди бу ерларни таниб бўлмай қолади.

Йигит унинг гапини эшитмади. У атрофга олазарак бўлиб қааради.

— Самад ака!— деди бир маҳал.— Бундан қандай ўтамиз?

— Лаббай?

— Қандай ўтамиз, деяпман, кўприк йўқ-ку? — деди йигит.

— Дарвоқе,— Самад ака каналга янгитдан разм солиб чиқди.— Кўприк йўқ. Яқинда қазишибди-да.

— Яқинда қазиши ҳам кўприк бўлиши керак эди-ку,— деди ташвишланиб йигит.— Узлик-ўзи қандай ўтишади?

— Ўтишмайди бу ердан, нариги ёқда йўл бор.

— Энди нима қиласиз?

— Хуноб бўлма,— деди Самад ака.— Иложини топармиз. Сен ўнгга юр, мен чапга юрай. Ўтадиган жой чиқиб қолар...

— Кўриниб турибди-ку, кўприк йўқ,— деди қизишиб йигит.

— Кўрайлик аввал.

Йигит нималарнидир ғўлдираганича канал ёқалаб ўнг томонга кетди. Самад ака ҳам йўлга тушди. Юз қадамча юрди. Кўприкдан асар йўқ. Кечиб ўтишга тўғри келади, қарор қилди у. Шу топ йигитнинг овози эшитилди:

— Бу ёққа келинг! Бу ердан ўтамиз!..

Самад ака орқасига қайрилди. Йигитнинг олдига келганда канал устига кўндаланг тушиб ётган дарахтни кўрди. Каналнинг бир ёғи ўпирилиб, дарахтнинг қип-қизил илдизлари қовжираб ётарди. Самад ака унинг қора танасидан ўриклигини билди.

— Мана шунинг устидан ўтсак бўлади,— деди йигит қувонч билан.

У шеригининг жавобини кутмай, ўрикнинг устига оёгини қўйди ва дорбоздек қўлларини ёзив, каналдан ўта бошлади. Ўртага етгаида, бир томонга оғиб, йиқилай деди-ю, ўзини ушлаб олди, кейин силтаниб, каналнинг нариги бетига сакради.

— Қойилми? — Йигит ўзида йўқ шод эди.— Самад ака!

Йигит шеригига қаради-ю, ҳайрон бўлиб қолди. Самад ака, йўғонлиги қўёнгон арава шотисидек ўрикка кўзларини тикканича, қимир этмас, мошкичири мўйлови, қалин, ажин босган лаблари титрарди.

— Самад ака! — деди йигит унинг жим турганини ўзича тушуниб.— Қўрқяпсизми? Нега индамайсиз?

Самад ака бошини кўтарди.

— Лаббай,— деди бўғиқ овозда.

— Утмайсизми?

— Ҳозир.

У шундай деб ўрикка оёқ қўйди. Лекин қўлларини ёзмади. Битта-битта қадам босиб, каналнинг ўртасига этиб келди. Йигит уни кузатар экан, ҳозиргина ундач кулганидан ичидан ачинди.

— Тузук экансиз-ку! — деди ҳавас билан.

Лекин шу пайт кутилмаган ҳодиса юз берди. Самад ака тўхтаб қолди. Кўзи тинди шекилли, бошини кўтарди, аммо бу фойда бермади, тебрана бошлади. Қўлларини ёзган эди, мувозанатни йўқотди ва шалоп этиб сувга ағдарилди.

— Самад ака! — қичқириб юборди йигит ва югуриб бориб лапанглаб қиргоқча интилаётган шеригининг қўлидан торта бошлади.

Самад ака унинг ёрдамида бир амаллаб қиргоқча чиққанида, ҳамма ёғи жиққа ҳўл, қўллари ва тиззалири лой эди, плашининг енглари, этакларидан шариллаб лойқа сув оқарди. У ўзига бошдан-оёқ бир қараб чиқди-да, энсаси қотиб кулиб қўйди.

— Ечининг! — буюрди унинг қимир этмай турганини кўрган йигит.

Самад ака бош қимирлатиб, канал лабига борди, қўлларини ювиб, ечина бошлади. Унинг баҳтига кун илиқ, қуёшнинг ботишига ҳали анча бор эди. У битта иштонда қолиб, йигит билан кийимларини сиқиб, ерга ёйди, кейин йигит ёзиб берган енгил пальто устига ўтириб, оғир хўрсинди. Яна мўйлови, лаблари титрай бошлади. Йигит унинг бу авзойини кўриб, қўрқиб кетди.

— Самад ака! Сизга нима бўлди? — сўради у шеригининг олдига чўккалаб.

— Эслаб кетдим... — деди Самад ака.

— Нимани?

— Худди шунаقا кўприкни...

Самад ака жимиб қолди. Йигит ҳеч нарсага тушупломай, анграйиб турарди.

— Папиросингдан ол,— деди бир маҳал Самад ака.

Йигит ҳозиржавоблик билан унга «Беломор» узатди, шошиб гугурт чақди. Самад ака папиросни устмай қаттиқ тортиб, оғиз-бурни аралаш қуюқ тутун чиқарди-да, деди:

— Қирқ иккинчи йил эди. Қиши. Бизни Украина-нинг Мартовая қишлоғига олиб боришиди. Мудофаа ли-нияси шу ердан ўтарди. Совуқ қаттиқ. Тупласанг, тупугинг қотади, қор тиззага чиқади. Қишлоқнинг ёнидан Шимолий Доңецкнинг бир ирмоги ўтган эди. Катта эмас, шу каналдек келади, балки бундан кичикроқ ҳамdir. Полкнинг хўжалик қисми шу ирмоқнинг бериги томонида, биз эса нариги томонида жойлашган ёдик. Ирмоқ музлаб қолган, бети қалин қор эди. Шу-нинг учун бемалол, истаган жойимиздан ўтиб юраве-гардик. Февралнинг охирларида кун, кутимаганди, исиб кетди. Қор эрий бошлади. Лекин эригани қандай дейсан, ер устида билинмайди, шакарга ўхшаб ялти-ради.Faқат ирмоқда билинарди. Уч-тўрт кун ичиди унинг ўртасида қора ипдек ингичка чизиқ пайдо бўлди. Кейин кенгайиб, жилдираган сув кўринди. Ўтиш хавфли бўлиб қолди. Худди боягидек биронта кўприк-пўприк бормикин, деб у ёқ-бу ёқни текширдик. Биз турган жойдан юз қадамча нарида кимдир ирмоқ ус-тига кўндаланг тушиб ётган бир нарсани кўриб қолди. Бу ходами, тахтами, қор тагида бўлганидан билиб бўлмади. Лекин бақувват, устига чиқиб бир-икки теп-дик. Икки кишилаб у ёқдан-бу ёққа ўтиб кўрдик. Йўқ, бақувват, синмади. Шу ердан ўтиб турадиган бўлдик. Шу ердан овқат таший бошладик, шу ердан музни ёриб, сув оладиган бўлдик. Лекин полкнинг отлиқ отряди бор эди, шу отряднинг отларидан биттаси ҳам унинг устидан ўтмади. Қадам қўяди-ю, ўтмайди. Ур-санг ҳам, сўксанг ҳам ўтмайди. Бир қадам босиб тўх-тайди, кейин тисарилиб, ёнидан сакраб ўтади. Албат-та, бунга ҳеч ким эътибор бермади, сабабини кейин билдик...

— Нима экан? — сабрсизлик билан сўради йи-гит.

— Ҳозир,— деди Самад aka ва шошмасдан зиҳи-гача чекилган папиросини ерга эзғилаб ботирди-да, гапида давом этди:

— Бир куни овқат кечикиб қолди. Командир мени чақириб, хабар олиб келишини буюрди. Йўлга тушдим. Ирмоқча етиб келганимда, сув ичгим келиб қолди. Чанқаганимдан эмас, сувнинг тиниқлигидан ичгим келиб кетди. Кўприкчамизнинг ўртасига келиб эн-гашганимни биламан, шалоп этиб кўприк-пўприк би-

лан сувга тушиб кетдим. Белимгача жиққа ҳұл бўлди. Лекин мени бу чўчитмади, мен, хари оқиб кетиб, кўп-риксиз қолишимиздан қўрқдим. Ҳақиқатан ҳам у оқиб кетаётган эди. Шалоплаб кетидан чопдим, бир учидан ушлаб олиб қирғоққа сурман, қани энди сурилса?! Муз-да, сирпанади. Ҳай, бир амаллаб олиб чиқдим. Шу пайт юрагим қинидан чиқиб кетаёзди. Биз кўприк қилиб юрган нарса — одамнинг мурдаси эди.

— Одамниңг мурдаси?!-- ҳайрат ичидан сўради йигит.

— Ҳа.

Йигит сесканиб кетди.

— Одамниңг мурдаси эди,— давом этди Самад ака.— Додлаб юбордим. Дарров беш-олти солдат югуриб келди. Нима бўлди, деб сўрашади, жавоб беролмайман. Тишим-тишимга тегмай, дағ-дағ титрайман. Ниҳоят, ўзимни тутиб олиб ўликка ишора қилдим. Ҳеч ким аввал ҳеч нарса пайқамади, чунки мурданинг ҳамма ёгини муз қоплаган, фақат олдинга чўзилган қўлларининг кўрсаткич бармоқлари муз ичидан чиқиб турарди.

— Одам!.. Кўприк!..— делим зўрга тилим танглайимга ёпишиб.

— Қанақа кўприк? Қанақа одам?— ҳамон тушумай сўрашди солдатлар.

— Анави кўприк... одам экан!— дедим мен, кейин энгашиб ўликнинг бармоқларини кўрсатдим.

Шунда уларга ҳамма нарса аён бўлди.

— Оловга олиб бориш керак,— маслаҳат қилди кимдир.

— Нима қиласиз ҳамма ёқни саситиб?— деди яна кимдир.

— Сасиса ҳам одам-ку!— жеркиб бердп бошқа бир солдат.— Қани, кўтарларинг!

Солдатлар мурдани кўтариб овқат пиширадиган арава ёнига олиб боришиді. Дарров мени ертўлага тушриб янгитдан кийинтиришди. Чиққанимда, мурданинг атрофи одамга тўлиб кетган эди. Туртиниб-суртиниб ўртага ўтиб олдим. Музни эритишибди. Мурда ёшгина йигит экан. Новча, қирра бурун, қора соч. У худди қаттиқ чарчаб яқиндагина уйқуга кетган одамни эслатарди. Ўлкам тўлиб кетди. Беихтиёр кўзимда пай-

до бўлган ёшли енгим билан беркитиб артар эканман, йиглаб юбормаслик учун, ёнимдагилардан сўрадим:

— Бизникими?

— Ёқасини кўрмаяпсанми?

Шундагина унинг шинели ёқасидаги сержантлик белгисини пайқадим.

— Ким экан?

— Вилиб бўлмади. Қоғозлари ивиб кетибди,— деди ёнимдаги солдатлардан бири.

Уша куни унинг соҳолларини қириб, белигача қорайиб кетган ярадор оёқларини яхшилаб ўраб, қишлоқ четидаги тепаликка кўмдик. Қабри ёнида ўттиз киши ўн мартадан ўқ уздик. Унга бу ҳам камлик қиласарди. У фақат тириклигига эмас, ўлгандан кейин ҳам хизмат қилди, бизга кўприк бўлди... Папиросдан ол!

Самад ака яна устма-уст папирос тортиб, жимиб қолди. Йигит ҳам жим эди. Унинг юзида қон қолмаган эди. Шу алфозда улар анча ўтиришди.

— Унга нима бўлган экан?— ниҳоят сўради йигит.

— Ким билади,— деди Самад ака ўйланиб.— Урушда нималар бўлмайди?! Назаримда, ярадор бўлган, анча жойгача судралиб келган, ҳолдан тойиб, ирмоқдан ўтолмаган. Шундай қўллари қиргоқча етгану, жони узилган, муалаб қотиб қолган... Ҳай, кетдикми?

Йигит жавоб бермади. Самад ака ўрнидан туриб ҳали нам кийимларини кийди. Яна папирос чекди-да:

— Қани юр,— деди ва йигитнинг туришини кутмай, ўйлга тушди.

Йигит зўрга қўзғалди.

Улар кетма-кет оғир қадам ташлаб боришар экан, кош қорайиб, ўрикзор орқасида милтиллаб чироқлар кўрина бошлагапини ҳам, орқада, йўл устида юқ ортилган машиналари қолиб кетганини ҳам ўйлашмас, икковининг хаёли бир нарса билан, номаълум солдат билан банд эди.

## ГУЛ СОТУВЧИ ҚИЗ

Мен тез-тез Тошкентга келиб тураман. Ҳар келганимда у менга ўзгача, янги бир шаҳардай туюлади. Ҳар келганимда ҳали мен билмаган, ёки била олмаган гўзаллигини кўз-кўз қиласди, саҳий багрини кенг очиб, олис йўлдан келган фарзандини қучорига олаётган отадай, мени меҳр ва табассум билан қаршилайди. Бу меҳр ва табассумни мен олов тафтли қуёшнинг сербарг дараҳтлар орасидан тушиб турган найза нурларида, илиқ шабада ўйнатиб турган косадек-косадек атиргулларнинг ёқимли ҳидларида ҳис қиласман. Қанчалик зарур бўлмасин, ишимни ташлаб, камалак тус скамейкаларда бир дақиқа бўлса ҳам ўтиргим, худди шундай камалак тус йўловчиларга қараб хаёл сургим келади. Кўпинча шундай қиласман ҳам. Революция хиёбонидаги бир-бирига туташ уч фонтан ёнига ўтириб, атрофни томоша қиласман. Хиёбон кундуз ҳам, тун ҳам тинч, осойишта. Шу ерда ҳамма нарса сеҳрли олам оғушида. Дараҳтларнинг кўплиги ё хиёбоннинг ўзига хос фазилатими — йўловчилар шу ерга кирганди ярим овозда гаплашадилар, ярим овозда куладилар, бошқа кўчаларда қулоқни кар қилувчи игнапошина туфлиларнинг тақ-туқи бу ерда эшитилмайди. Эшитилмайди. Эшитилса ҳам пастки пардалардаги музика садосидек сеҳрли, кишини аллаловчи ёқимли куйдек эшитилади. Фонтан сувларининг бир оҳангдаги жилдираши хаёлга чўмдиради. Кўчаларда машиналарнинг кети узилмайди: бири ёғоч ташиган, бири ғишт, бири тупроқ. Радио эртадан-кечгача тинмай қурувчиларни мадҳ этади. Қурилиш шовқини, ташвиши ҳамманинг

бошида, ҳамманинг уйи, идорасида... Лекин хиёбон тинч, ҳамма нарса сеҳрли олам оғушида. Хиёбоннинг ўзига хос фазилатими ё улкан чодирлардек тизилиб турган баҳайбат дараҳтларнинг кўплигиданми — кўчаларнинг гала-говури бу ерга мутлақо бегона, одамларнинг юриши ҳам бошқача — оғир, сервиқор. Афтидан, шу ерга қадам қўйиш билан ҳамма шаҳар ташвишини, ўз ташвишини унутади. Серсоя дараҳтлар шоҳларида бир-бирларига маҳлиё бўлиб сайраган қушлар, баргларнинг шитир-шитири, минг жил шакл, минг жил рангдаги туфлиларнинг бир оҳангдаги енгил тақ-туқи ҳаммани ўзга оламга, сокин ҳаёт қўйнига олиб киради.

Шу одамларга қараб, шаҳарнинг келажагини ўйлайман. Улар кўхна Самарқанд обрӯ ва дөвруғи, Истамбул гўзаллигига тенг шаҳарга мансуб дейман. Шундай бўлишига ишонаман ҳам. Чунки уларнинг ҳар бир қадамида қатъият, ҳар бир сўзида ғайрат сезилиб туради. Шулардан бирини танийман. Унинг овози баъзи-баъзида хиёбонда эшитилиб қолади, у гул сотади. Хиёбоннинг чап биқинидаги кичкина, ҳашамдор гул дўйконида ишлайди. Исми Гўзал. Лекин исми жисмига монанд тушмаган. У билан мен ўтган йили танишганман.

Кеч куз эди, қайнарбулоқлик дўстим «Помир тоғларининг сейсмик прогнози» деган темада диссертация ёқладиган бўлиб қолди. Темани қаранг?! Қурама тоғларини ўрганиб қўя қолса нима қилар экан?! Агар шундай қилганда, Тошкент кулфати анча камайган бўлармиди? Қачон ер қимирилашини одамлар олдиндан билиб, тайёргарлигини кўриб қўярмиди?! Ҳай, майли. Ӯшанда Қўқондан келдим. Ҳанча қидирмай, ҳеч қаердан бир даста гул тополмадим. Қимдир шу гул дўйконни эслатди, кирдим. Прилавка ортида ёши ўтиб қолган бир қиз берилиб китоб ўқиб ўтиради. Кирганимни сезмади. Атрофимга қарадим. Қатта-кичик тувакларда ҳар хил гуллар... Лекин биттаси ҳам гулдаста бўладиган эмас. Нима қилиш керак. Қайтиб кетмоқчи бўлиб, эшикка юзландим. Қейин қандайдир умидда ортимга ўгирилиб, прилавкага тирсагимни қўйдим.

— Яхши қиз...

Аммо қиз мени эшитмади. Янги варақни очиб,

жилмайди-да, яна ўқишга тушиб кетди. Эгилиб китобнинг муқовасига қарадим: Тургенев: «Баҳор тошқини». Шуни кўришим билан қиз эрга тегмаган бўлса керак, деган фикр миямга келди. Лекин бунинг менга мутлақо қизизи йўқлигини билганимдан, секин йўталдим. Қиз яна эшитмади. Кичкина юзига адашиб омонатгина ёпишириб қўйилган катта букри бурнини шўлқ этиб тортди-да, ўқишда давом этди.

— Қизиқ китоб экан-а? — дедим овозимни озгина кўтариб.

— Қиз еб қўйгудек бўлиб ўгирилди ва дағал овоз билан сўради:

— Сизга нима керак?

Бундай муомаладан жаҳлим чиқса ҳам, ўзимни тутишга ҳаракат қилдим. Шундай қилмасам ниятимга етмаслигим табий.

— Синглим, менга гул керак эди...

— Ана гул, олаверинг! — қиз тувакларга ишора қилиб, яна китобга тикилди.

— Бунақа гул эмас, менга букет керак...

— Букет йўқ,— чўрт кесди қиз бош кўтармай.

Нима қилиш керак? Ўйланиб қолдим. Шунда миямга лоп этиб бир фикр келди. Агар шу дўкондан гулсиз кетишимни билсан, бу қўпол қизни муомалага ўргатиб кетаман. Дўконга ит кирдими, одам кирдими, унга барибирга ўхшайди. Лекин аввал илтимос қилиб кўриш керак. Прилавкага суюниб, секин гап бошлидим.

— Тургеневнинг «Ася»си ҳам жуда ўқимишли...

— Ўқиганмисиз? — қиз ялт этиб менга ўгирилди.

— Ўқимасам, шундай дейманми?

— Бу ҳам жуда яхши экан. Ташлагим келмаяпти.

— Кўриниб турибди. Одам кирганини ҳам сезмадингиз.

— Кечирасиз,— қиз уялинқираб жилмайди-да, китобни ёпиб, ўрнидан турди.— Келинг, нима керак эди?

— Гул керак, битта букет...

— Букет? — қиз ҳайрон бўлиб менга тикилди.— Соб бўлган-ку...

— Битта топиб беринг. Кичкина бўлса ҳам майли!..

Қиз ўйланиб қолди. Унинг кўзларигина чиройли эди. Иирик, қўнгир, сал ғамгинроқ... Бу кўзларга ти-

килиб, узун, ингичка бўйни сўлиб, гули тўқилган наъматакни эслатувчи қалин лабларини, чекка суяклари бўртиб чиққан юзини кўрмагандек бўлиб кетдим. Унинг бутун гўзаллиги, киши эътиборини беихтиёр тортадиган иссиқлиги шу йўчан, сал ғамгин кўзларида эди. Ота-онаси, назаримда, шу кўзларга қараб, исмини Гўзал қўйган бўлса керак. Лекин буни мен кейинчалик билдим. Ўшанда эса бу ҳақда мутлақо ўйламаган эдим, фикр-зикрим гулдастада ва илтижо билан қизга тикилиб турар эдим. Қиз жим эди.

— Уртогим бугун диссертация ёқлади. Қўёндан келдим. Бир амаллаб битта...

— Тўхтанг-чи! — деди қиз гапимни бўлиб. — Мен ҳозир...

У ичкарига кириб кетди. Кўнглим тинчиди. Топиб чиқади, ўйладим ўзимча. Чиндан ҳам кўп ўтмай, қиз кичкина бир гулдаста кўтариб чиқди.

— Кечирасиз, тузузигига иложим йўқ.

— Бундан яхшиси бўлмайди! — дедим топилганига шукур қилиб. — Раҳмат!

Кейин гулдастани апил-тапил газетага ўраб, дўкондан чиқдим. Қандайлигига қараганим ҳам йўқ.

Орадан кўп вақт ўтмай Гўзалга яна ишм тушиб қолди. Энди гулчамбар деб олдига кирдим. Кейинчалик Тошкентга нима иш билан тушмай, Революция хиёбонидан ўтсам, албатта у билан кўришадиган, бирпас у ёқ-бу ёқдан гаплашиб ўтирадиган бўлдим.

Бир кўрган таниш, икки кўрган билиш, дейишади. Биз ҳам анча-мунча қалинлашиб қолдик.

Гўзал асли қўёнлик экан. Отаси фронтга кетганда у олти ёшли қизча экан, ёлғиз фарзанд экан. Мактабга кирганда отасидан қорахат келибди. Онаси дарров аза тутиб, йиги-сиги қилибди. Ҳатто маҳаллага ош берибди. Бундай очиқ қўлликдан баъзилар хурсанд бўлса, баъзилар куюнибди. Бир кампир кўчада Гўзалнинг бошини силаб:

— Ишқилиб, сен бечора тинч бўлгин. Еганинг ош бўлсин! — дебди.

Бу гапнинг маъносига Гўзал аввал тушунмабди. Бир куни мактабдан келса, равонда шоп мўйлов бир киши ёнбошлаб ётганини кўрибди. Онаси унинг оёқларини уқалаб ўтирган экан. Иккалови ҳам қизни кўришмабди. Гўзал нима қилишини билмай остона ол-

дида туриб қолибди. Бир маҳал бегона киши онасининг билагидан ушлаб, бағрига тортибди. Онаси хаҳолаб кулибди. Гўзал нима қилишаётганини яхши англамаса ҳам, ёмон воқеа содир бўлаётганлигига ақли етибди. Ўпкаси тўлиб:

— Ая! — деб бақириб юборибди.

Онаси сапчиб ўрнидан турибди. Қизини кўриб, қулоқларигача қизариб кетибди. Кейин ўзига келиб, лаблари оқара бошлабди. Жаҳли чиқса, доим шундай бўлар экан.

— Вой! Кела қолдингми дарров? — дебди қизи томон юриб. — Чиқ, амакинг билан сўраш. Сенга конфет олиб келибдилар.

Гўзал беихтиёр бегона кишига қарабди. У ёнбошлиганича кўзларипи олайтириб ўтирас экан. Гўзал қўрқиб кетибди. Ўзини тутолмай ҳўнграб йиглаб юборибди-да, кўчага отилибди.

— Ҳой қиз, ҳой жувонмарг! Қаёққа! — деб қолаверибди онаси ортидан.

Шу куни Гўзал қош қорайгунча кўчама-кўча санқибди, йиглабди. Қорни очиб уйига қайтибди, аммо кирмабди. Равондаги манзара, бегона эркак кўз олдига келиб, киргиси келмабди. Эшикни қия очиб, ҳовлига мўралабди. Ҳеч ким кўринмабди. Оёқ учida йўлакка кириб, уйга қарабди. Уйда ҳам ҳеч ким кўринмабди. Оҳиста юриб, дераза тагига келибди. Келибди-ю, гилам устида ёнма-ён ўтирган бегона киши билан онасини кўрибди. Улар тўрдаги деворга қараб, нималарнидир гаплашишар экан. Бир маҳал онаси уҳ тортибди-да:

— Нима бўлса ҳам ўгай ўгайлигини қиларкан-да. Отасидан қорахат келди-ю, ўзгарди-қўйди. — дебди.

— Қўйинг, шуни ҳам ташвишини қиласизми! — дебди шоп мўйлов киши. — Энди ўзимизнинг боламиз бўлади.

У шундай деб ўрнидан турибди тўрга бориб, девордаги катта, тилла суви юритилган рамкадаги суратни олиб, кейин деразага яқинлашиб, ҳовлига улоқтирибди. Суратнинг ойнаси чил-чил бўлибди. Гўзал хўрлиги келиб, йиглаб юборибди. Лекин овоз чиқармабди. Сурат — отасининг сурати экан. уни ердан олиб, маҳкам бағрига босибди-да, қоронги тушганига қарамай, яна кўчага чиқиб кетибди. Шу кетганича уйга қайтиб

бормабди. Отасининг суратини бағрига босганича бирорвга ялиниб, бирорни алдаб, поездга минибди. Етти кунми, саккиз кун деганда, не-не азоб-машаққат билан Тошкентта келиб тушибди. Бегона шаҳар, бегона одамлар уни ёмон чўчитибди. Лекин буларнинг ҳаммаси отасининг йилини кутмаган ўгай она, унинг шоп мўйлов ўйнаши олдида ҳолва эди. Гўзал кўчада бошини силаб, унга ачинган кампирнинг ташвишига энди тушунибди. Демак, у ўгай! Ўгай нималигини у яхши биларди. Лекин ўзи шу аҳволга тушишини хаёлига ҳам келтирмаган эди. Отаси сир тутган, онаси эса ё чўчиған ё лозим топмаган.

Вокзалда Гўзал тумонат одам, йифи-сиги, қий-чув ичидага қаёққа боришини, нима қилишини билмай, трамвай йўлидан кетаверибди. Юриб-юриб Госпиталь бозорига келиб қолибди. Шунда у қорни очлигини, ниҳоятда чўллаганини эслабди. Лекин бир тийин пули йўқ. Нима қилиш керак? Кундуз-ку бир амаллаб ўтар, жечаси нима қиласи? Қаёққа боради? Шу хаёллар билан бозорга кирибди. Бу ерда ҳамма нарса бор. Лекин бир бурда нонни қаердан олади, ким беради? У мева растасидан ўтаётуб, кичкина боланинг: «Кимга нон! Иссик нон!»— деган овозини эшитиб қолибди. Қидириб уни топибди. Ўзи тенги бола экан. Қўлида кир дастурхонга ўроғлиқ уй нони. Гўзал югуриб унинг олдига борибди. Лекин нима қила оларди! Сўрасинми? Ялинсинми? Бола унга парво қилмай растама-растга айланарди. Гўзал ортидан ютиниб юраверибди. Харидор қўлида нон кўрганида, ичаклари буралиб, кўз олди қонғилашиб кетаётгандек бўлар экан.

Охири чидай олмабди.

— Эй бола, бир бурда нонингдан бер!— дебди беихтиёр қўлини чўзиб.

— Бор, бор! Туёгингни шиқиллат!— дебди бола.— Синдириб бўладими бу нонни?! Неча пул туришини биласанми?!

Гўзал индамабди. Бечора битта нон неча пул туришини қаердан билсин? Лекин нимадандир умидвор бўлиб шу юзига сепкил тошган боланинг кетидан қолмабди. Бола эса тинмасдан: «Кимга нон! Иссик нон! Жиззали нон!», деб қичқирад экан. Ниҳоят, Гўзал чарчабди. Растанинг устунига суяниб, кўзларини юмибди. Бир маҳал кимдир жонҳолатда қичқириб юборибди.

Гўзал кўзини очса, бир милиционер нон сотувчи болани судраб кетаётган эмиш. Бола чинқирап, милиционерни тепар ва тишлар экан. Шу пайт боланинг қўлтигидан дастурхон тушиб, кулчалар сочилиб кетибди. Томоша қилиб турганлар худди шуни кутиб туришгандек, думалаб кетаётган кулчаларга ўзларини отишибди. Бола эса даҳшат ичидা:

— Жўра ака, амакижон, энди сотмайман! Қўйиб юборинг! — деб қичқирапмиш.

Гўзал ўйлаб ўтирумай, одамларни ёриб ўтиб, нонларни дастурхонга ўрай бошлабди. Лекин атиги тўрттами, бешта нонни олиб улгурибди. Улар ҳам синган, оёқ остида эзилганлари экан. Дастурхонни тезлик билан бағрига босибди-да, милиционер кетидан кетибди. Бозорнинг бурчагида милиция будкаси бор экан. Милиционер болани шу ерга олиб кирибди. Гўзал эшик тагида қолибди. Бир соатлар чамаси вақт ўтгач, бола чиқибди. Икки кўзи, қовоқлари шишиб кетибди бечоранинг.

— Эй бола! Нонингни ол,— дебди Гўзал унинг қаршисига бориб.

Бола шошиб дастурхонни олибди. Нонни сабабди.

— Ўнта олдирибман,— дебди жилмайишга интилиб, кейин уввос солиб йиглаб юборибди.

— Қўй, йиглама,— юпатибди Гўзал.— Ўзингни қўйиб юборишиди, шунга суюнсанг-чи!

Бола индамабди. Кейин иккалови бозордан чиқишибди. Гўзал қаёққа боришини билмай, трамвай йўлига етишганда, тўхтабди.

— Ҳа,— дебди бола.— Юрмайсанми?

— Қаёққа?

— Қаёққа бўларди! Бизникига-да! Юр. Нон ейсанми? Ма!

Бола битта эзилган нонни Гўзалга узатибди.

— Тез ема. Тиқилиб қолади.

Шу куни Гўзал шу сепкил юзли бола — Миразизларнида қолибди. Онаси жуда яхши хотин экан. Дарҳол иссиқ овқат берибди, ювинтирибди. Мана, йигирма уч йилдан бўён шу уйда. Шу уйнинг аччиғи, чучугига шерик бўлиб яшаб келаётган экан.

— Икки йилдан бери шу дўконда ишлайман. Ойимларнинг ўринларида ишлайпман. У киши пенсияга

чиққанлар. Лекин кетмоқчиман...— деди бир куни, гап орасида Гүзал.

— Нега?

— Қызылар уялтиришяпти.

Гүзал жилмайишга ҳаракат қилиб, хўрсинди. Мен ҳеч нарсага тушунмадим. Қейин, сўрашга мажбур бўлдим.

— Қари қиз бўлиб қолдинг, дейишяпти. Ҳеч кимга ёқмасам, нима қилай?

Гүзал илтижо билан менга тикилди. Унинг сажий кўзларида ёш пайдо бўлди.

— Қўйинг, хафа бўлманг,— дедим раҳмим келиб.

— Бахт эрта турмуш қуришда эмас-ку! Менинг бир танишим бор, қирқ бешга кирганда турмуш қурган.

— Ростданми?— болалардек севиниб сўради Гўзал.

— Ҳа. Мана, шундай ёнингизда ишлайди. Университетда.

— Ҳеч ким таъна қилмаганмикин уларни?

— Яхши одам таъна қилмайди...

— Тўғри айтдингиз... Иннайкейин... Яхши кўрмасдан турмуш қуриб бўладими?! Ойим шундай дейдилар.

— Ойингиз тушунган одам экан.

— Жуда ҳам. Тошкентга келиб қолганимдан мингдан-минг розиман...

Биринчи ер қимиirlаган куни мен яна Тошкентга келган эдим. Вайрон бўлган кўчалар, уйларни кўриб, кўнгилни ёзиш учун гул дўконига кирдим. Гўзал севиниб кетди.

— Келганингиз жуда яхши бўлди.

— Уй тинчми?— сўрадим гапини бўлиб.

— Қаёқда! Бир томони аганаб тушди.

У бу гапни шундай хурсандчилик билан айтдики, ҳайрон қолдим.

— Шунга хурсандмисиз?— дедим киноя билан.

— Тўй қиласпмиз!..

— Тўй?

— Ҳа. Келаси шанба куни. Эртага ЗАГСга борамиз. Бирга боринг, илтимос.

Гўзал шошиб, оғзи тўлиб гапиради. Унинг қувончи менга ҳам ўтди. Завқ билан унга қарадим. Шодлик, бахтли келажак орзуси одамни қанчалик ўзгартиб юбориши мумкинлигини шунда ўз кўзим билан кўр-

дим. Гўзал чаккалари, ясси пешонасидаги ажинлари йўқолиб, юзига қон югуриб, тўлишиб, очилган атиргулни эслатарди. Энг муҳими — кўзларидаги ғамгинлик аломатларидан асар ҳам қолмаган эди.

— Табриклайман,— дедим, иссиқ қўлини самимий сиқиб.

— Раҳмат. Борасизми эртага?

— Уртоқларингиз борса яхши эмасми?  
Гўзал жавоб бермади.

— Агар сиз борсанги... дадамларни кўргандек бў-  
ламан,— деди охири эштилар-эштилмас.

— Хўп, бораман,— дедим.

Эртасига эрталаб, яхшироқ кийиниб гул дўконига келдим. Дўкон лиқ тўла одам эди. Гўзал мени кўришин билан югуриб олдимга келди. Эгнида оқ крепдешин кўйлак, битта қилиб ўрилган қалин сочи белига тушиб турарди.

— Танишинг!— деди қўлимдан тортиб ва прилав-  
кага суяниб турган иккита йигит ёнига бошлаб борди.

— Миразиз! Бу йигит эса куёвингиз, Комил.

Биз сўрашдик. Куёв хушбичимгина, яхши кийин-  
ган, кулча юз йилгит экан. Университетда сиртдан ўқиркан, лекин қаерда ишлашини айтмади, мен ҳам ботниб сўрамадим.

Кўп ўтмай йўлга тушдик. Гўзал куёв билан мени қўлтиқлаб олган эди. Икки гапнинг бирида кўчани бошига кўтариб куларди. Унга қўшилиб биз ҳам кулардик. Йўловчилар ҳайрон бўлиб бизни кузатиб қолишаради. Биз эса, парво қилмасдик. Қулогимиз остида уй бузажтан экскаваторларнинг гумбури, самосваларнинг шовқини эмас, Гўзалнинг кулгиси жаранглаб турарди.

ЗАГСга кирдик. Келин билан куёв ҳужжатни тўла-  
та бошлашди.

— Гўзал, адресингиз қанақа эди?— сўради бир маҳал куёв.

Гўзал айтди. Кўп ўтмай бир ҳафтадан сўнг келиш шарти билан кўчага чиқдик. Келин билан куёвни табриклидик. Комил ҳаммамизни ресторонга таклиф қилди. Бу таклифдан Гўзал илгаридан хабардор бўлса ҳам, «ура» деб қарсак чалиб юборди.

— Шампанское бўладими? Кавоб-чи?

— Ҳаммаси бўлади,— деди Комил кулиб.

— Мороженое ҳамми?

— Бўлмасам-чи!

Гўзал худди ёш болага ўхшарди. Комил билан Миразизнинг қўлларига осилиб сакрарди ва ҳахолаб куларди. Бир маҳал нимадир эсига тушди шекилли тўхтади.

— Боя адресни нега сўрадингиз, Комил ака?

Комил ғалати бўлиб кетди, кейин жилмайди.

— Сизникида тураман.

— Сизларники-чи? Бизларники бузилиб кетди-ку!

— Шунинг учун ҳам сизларникида турамиз,— деди хотиржамлик билан Комил.

— Нега?— ҳайрон бўлди Гўзал.

Биз ҳам ҳеч нарсага тушунмай, Комилга тикилиб қолган эдик. Кечагина Гўзал Комилларнинг катта уйи борлигини, у ўша уйга кўчиб боришини, бунинг устига, бу уй зарар кўрмаганини айтган эди.

— Нега?— яна сўради Гўзал.

Комил, шуни ҳам тушунмайди, дегандек бизга қараб қўйди-да, деди:

— Ортиқча уй беришса, зиён қиласадими?

Гўзал турган жойида қотиб қолди. Менинг ҳам юрагнимни нимадир тимдалаб кетгандек бўлди. Миразизга қарадим. У бошини этганича жим турарди. Шу пайт нимадир шарақ этди. Ялт этиб Гўзалга қарадим. Унинг ранги докадек оқариб кетган эди. Комил эса юзини беркитиб олиб, атрофга олазарак бўлиб қарарди.

— Гўзал!— деди Миразиз жаҳл билан нима бўлганига тушунолмай, аммо Гўзал қарамади.

Бирдан у ҳўнграб юборди-да, хиёбои ичига югуриб кетди. Миразиз ортидан югурди.

— Гўзал! Тўхта! Гўзал!

Комил эса жойидан қимирламади.

Орадан бир ярим ой ўтди. Шу вақт ичидан мен учтўрт марта Ташкентга келдим. Аммо гул дўконида Гўзални кўрмадим. «Қаёққадир акаси билан кетган, қачон қайтади, билмаймиз», дейишди сўраганимда.

Қаёққа кетган экан? Тинчмикан? Шуларни ўйлаб, хиёбонда ўтирас эканман, одамларни синчилаб кузатардим. Зора шулар ичидан учратиб қолсам, деб умид қиласдим. Аммо ундан дарак йўқ эди.

Бир куни кечки пайт, ишларимни битириб, хиё-

бонга келдим. Фонтан ёнига ўтириб гул дўконига қараб қўйдим. Боргим келар, лекин «Йўқ» деган гапни эшитгим келмасди.

Ҳаво ниҳоятда дим эди. Фонтан ёнида иккита чумчук ҳансираб қумга думалаб ётарди. Рўпарадаги скамейкада ўрта ёшли семиз бир одам юзига газета қўйиб ухларди. Баъзи-баъзида унинг хурраги эшитилмаса, хиёбон сув қўйгандек жимжит эди.

Жазира маисицининг бу ёқимсиз манзараси менга яна Гўзални эслатди. Қаёққа кетдийкин?.. Тинчмикин?.. Шу хаёл билан секин ўрнимдан турдим. Фонтанин бир айландим-да, постамент ёнига келдим.

Шу пайт баланд қўнғироқ овоз жаёлимни бўлиб юборди.

— Кимга гул! Атиргул! Янги гул!

Бу — Гўзал эди. Унинг овози эди. Назаримда, бу овоздан қушлар ҳам, хиёбон ҳам жонланиб кетгандек бўлди. Кимдир шарақлаб кулди. Кимдир тарақлатиб қаёққадир югорди.

— Гўзал! — дедим севинчимни яширмай ва хиёбоннинг сеҳрли тинчлигини бузиб гул дўкони томон чопиб кетдим.

## КУЗ ҲАВОСИ

Саври хола Революция хиёбонидан битта-битта юриб борарди, шошмасди. Шошиб нима қилади? Уйда болалари йиглаятими ё биронта иши чала қоляптими? Ҳамма иши жойида, болалар йўқ. Болаларни худо унга кўп кўрган. Нима қилади шошиб? Иннақейин, ҳали кун эрта. Офтоб энди икки терак бўйи кўтарилиди. Эрталабки муздек шабада ҳали илигани йўқ, лекин тапти босилган, этни жунжитмайди. Шудринг тушган япроқларнинг учларида мунчоқдек-мунчоқдек кумуш исиргалар пайдо бўлибди. Офтоб кўп қизиқ нарса-да. У бўлмаганда шу исиргалар бўлармиди?! Қушлар ҳам гала-гала бўлиб офтобда дарахтларга ёнишиб олибди. Илгари йўлнинг устида кам кўринарди, чуғур-чуғурлар хиёбоннинг пастки томонларидан эши-тиларди. Мана энди бу ёқда, очиқда. Одамлар ҳам шундай. Дарахт соясидан қочиб юришибди. Хиёбонда одам кам. Ҳамма ишда. Борлари бозор-ўчар қилиб юрганлар, ё бўлмаса унга ўхшаб ишдан қайтаётгандар. Лекин у ўзининг ишлаганигини сезмасди. Ишлаган одам чарчайди, мадори қурийди. Унинг сира мадори қуrimайди. Тағин кампир нарса. Уч кам етмишга кирди. Ҳа, бу йил товуқ йили бўлса шу ёшга кирган бўлади. Наҳотки, иш шунаقا бўлса?! Е Соти-болди тушмагур уни шунаقا ишга қўйиб қўйдими? Эрталаб келади, супуради-сидиради. Баъзи хоналарнинг полини ювади. Деразаларни артади. Хизматчи-лар келганда ҳамма ёқ чиннидек тоза, саришта. Бўлди, шу билан иш тамом. Мана, икки ой бўпти ишлайди.

ганига, аҳвол доим шунақа. Лекин суроштиргани уялади. Суроштириши унга норози бўлаётгандай туюлди. Шунинг учун ишхонасининг аниқ номини ҳам билмайди. Ҳамма хоналар баланд-баланд қийшиқ столлар билан тўлиб кетган. Хизматчилар типпа-тик туриб шу столлардаги катта-катта қоғозларга нималарнидир чишишади, нималигини у билмайди. Сотиболдининг хонаси алоҳида, эшигининг тагида доим битта жувося ўтиради. Лекин жувонни у кам кўради. Эрталаб келганида ишни аввал шу хонадан бошлайди-да. У пайтда ҳеч ким бўлмайди. Сотиболди ҳам бўлмайди. Бу ерни супуриб-сидириб, бошқа ёққа ўтганидагина келади. Биринчи куни Сотиболди анчагача тепасида қараб турди. Кейин:

— Ҳорманг. Чарчамадингизми? — деб сўради.  
Саври хола кулди.

— Нега чарчарканман, болам! Шу ҳам иш бўлтими?

— Билганга иш бўлмасаям, билмаганга иш,— деди шунда Сотиболди.— Сиздан олдин нечтаси келиб кетди.

Саври хола индамади. Лекин бу гапдан кейин бирон нарса қилгиси келди, ҳозиргина артган жойларига янгитдан латта уриб чиқди. Йиш тамом бўлгач, Сотиболдининг ўзи эшиккача кузатиб қўйди.

— Адашмайсизми? — деб сўради хайрлаша туриб.

— Нега адашарканман, болам? Хиёбондан ўтсан бўлди. Катта кўча билан тўғри уйимга бораман,— деди кампир ва кўчани кесиб ўтиб, хиёбонга кирди.

Хиёбон ёзда яхши эди, гавжум бўларди. Қаёққа қарама одам, бўш жой йўқ ўтиришга. Эрталаб ҳам шунақа, кундузи ҳам, кечқурун ҳам. Энди бунақа эмас. Ҳамма ёқ ҳувиллаб ётибди. Скамейкалар бўм-бўш. Тагин қанақанги скамейкалар!.. Ўтиранг, ўтирганинг билинмайди, ётгандайсан. Бўёқлари ҳам турли-турли: оқ, сариқ, қизил, кўк... Бамисоли Ҳазрат Алиниңг ёйлари дейсан. Кампир шу скамейкаларда бирпас-бирпас ўтган-кетганга қараб ўтиради. Кейин хиёбонни айланарди. Нима йўқ унда. Дунёда бор даражтлар, гуллар таг-туғи билан кўчирилгану шу ёққа олиб келинган. Айниқса, қўгиричоқ уйдек кичкина, жимжимадор уйнинг атрофи чиройлик. Гўё шу уйга келин тушадигану ерга палақдан пояндоз ясад қўйишган. Кампир шу томонда

күпроқ юради, кейин катта күчага чиңиб, пиёда уйига кетади. У пиёда юришни яхши күради, иннайкейин күникиб ҳам қолган. Шу ёшга кириб, ҳали бирон марта машина ёки трамвайга тушган эмас. Раҳматли эри Усмон ака агар бирон жойга бирга боришадиган бўлса роса хуноб бўларди. Жонингга жабр қилиб нима қиласан, деб сўкарди. Бу ҳам кор қилмагач, ҳукуматда қасдинг борми, нега у чиқариб қўйган трамвайга чиқмайсан, деб қўрқитарди. Лекин фойда бермасди. Саври хола унинг гапларига парво қилмай, сабабини билмаса ҳам, пиёда кетаверарди. Мана, жонига жабр қилмай эллик ёшида Усмон ака оламдан ўтиб кетди. Касал бўлгани йўқ. Майиб бўлгани йўқ. Кечқурун шавла еб ўтириб — раҳматли шавлани яхши кўрарди, — мудроқ босяпти, бирпас мизғиб олай, деб шундай танчанинг ёнига ёнбошлади. Шу ётганича турмай қўя қолди. Раҳматли паст бўйли — Саври холанинг елкасидан келарди — жиккаккина, мўмин-қобил одам эди. Шунчалик мўмин эдики, кўпинча уйда бор-йўқлиги ҳам билинмасди. Бечоранинг ўлими ҳам ўзига ўхшаб билинмай ўтиб кетди. Саври хола кўп қайғурмади. Юракда изи қолмаганидан кейин қийин экан. У ҳатто эрининг юз-кўзи қандай бўлганини ҳам эслолмайди. Лекин ҳар ҳайитда мозорбошига бориб, қабрини зиёрат қилиб келади. Уйидан Минор анчагина олис, айланма бўлса ҳам, пиёда боради. Пиёда юришга нима етсин?! Кўрмаганингни кўрасан, билмаганингни биласан. Сотиболди ишга киритиб қўйиб, кўчага чиқадиган бўлди-ю, дарди енгиллашди. Урушда бедарак кетганлар кўп экан, битта унинг ўғли эмас экан. Аза очиб бекор қилиби. Буни Сотиболди ҳам айтди. Қўйинг, боши омон бўлиб кириб келиб қолса, нима деган одам бўласиз, деди. Қулоқ солмади. Тилаб олган ўғлининг дарди бошқача бўлар экан. Омон бўлса келади, умри тугаган бўлса жанозасиз ётмасин, деди. Лекин ўшанда тўғри қилибдими, ё нотўғри қилдими, ҳали ҳам билолмайди. Кўчага чиқиб, биттаси йигирма бир йил деганда келганини эшитди. Бердиалининг кетганига қанча бўлти? Энди ўн етти йил! Ажаб эмас келиб қолса. Кўпинча кечқурунлари бир капгир ош қилиб, чимчилаб еб ўтирганда жаёл қургур минг ёққа олиб кетади-ю, Бердиали иккита қовуни қўлтиқлаб кириб келаётгандай бўлади. Нега албатта қовун қўл-

тиқлаб келади — Саври хола билмайди. Лекин бир нарса доим эсида. Бердиали қаёқдан келмасин, ўқишиданми, бошқа ёқданми, барибир, ишқилиб бир нарса күтариб келарди. Жұнашидан бир күн олдин ҳам шундай қилган әди. Хаёли урушда-ю, бир сумка шафтоли олиб келибди. Шунинг учунми, хаёлидан Бердиали ўтса, қўлида қовун билан ўтади. Қовун миясига ўрнашиб қолган. Ўтади-ю, бир неча күн кулиб турган қиёфаси кўз олдидан кетмай қолади. У чиройли куларди. Болалигидан шундай. Қулганда чап юзида кулгич пайдо бўларди. Ҳамма шу кулгичга ишқибоз әди. Бирпас кўчага чиқдими, чап юзи қизарib қайтиб келарди. Қўни-қўшнилар ўпаверишарди. Саври холанинг ўзи ҳам уни ҳол-жонига қўймасди. Бўлар-бўлмасга кулдириб, ўпаверарди. Жўнаётган куни ҳам вокзалда Саври хола уни шу кулгичидан ўпган әди.

Бу сўнгги ўпич унинг хотирасидан сира чиқмайди. Уни зслаганда, беихтиёр кўзлари ёшланади. Бунинг устига ёлғизлиги қўшилиб, бир дарди ўн бўлади.

Яхшиям Сотиболди бор экан. Аза тутгандан бери тинч қўймай, охири, ишхонасига киритиб қўйди. Биринчи куни ўзи машинада олиб кетди. Революция хиёбонини ўшанда кўрди. Кўрди-ю, пиёда юргиси, шу хиёбондан ўтгиси, умрида кўрмаган танаси бир қулочбир қулоч келадиган дарахтларни ҳуснини кўз-кўз қилиб турган хилма-хил гулларни томоша қилгиси келиб қолди. Қайтишда шундай қилди, хиёбонга йўл солди. Мана, икки ойдан бери шу йўлдан юради. Боришдаям, келишдаям. Бунга пиёда юришни яхши кўришидан ташқари, бошқа сабаб ҳам бор. У шу йўлдан юриб Собиржон билан танишиб қолди. Собиржон катта кўчада ямоқчилик қиласди. Дўкони бор. Нопнозандай йигитсан, нега ямоқчилик қиласан, бўй-бастингта яраша иш қиласанг бўлмайдими, деб кўпинча сўрамоқчи бўлади Саври хола, лекин сўрай олмайди, уялади. Иннайкейин, унинг нима иши бор? Ҳар кимнинг ўз ихтиёри, кўнгли тусаган ишни қиласвади. Сирасини айтганда, Собиржон қўли гул йигит. Қосиблик гўё унинг учун яратилган дейсиз. Қорайиб тарамтарам бўлиб кетган бақувват қўлларида бигиз, игна ўйнаб туради. Унинг хушмуомалалигини айтмайсивми?! Ҳар кўрганида қўлини кўксига қўйиб салом беради, ҳол-аҳвол сўрайди.

— Ассалому алайкум, кампир,— дейди.— Йўл бўлсин?

— Уйга болам, уйга,— дейди Саври хола қадамини секинлатиб, кейин магурлик билан қўшиб қўяди.

— Ишдан келяпман.

— Чарчагандирсиз бўлмаса,— дейди Собиржон ишини қўйиб.— Бирпас ўтириб чой ичиб кетинг. Селон чой. Янги дамлаганман.

Саври хола уйдан кўнгли тўқ бўлса, рози бўлади. Уйдан эса кўпинча кўнгли тўқ. Овқатга анча бор. Ҳовли шипшийдам. Утиради. Собиржон кичкина курсича қўйиб беради. Ана шунда, ишда озгина чарчагани билинади. Лекин бир-икки пиёла аччиқ цейлон чойидан ичиб, танаси яйрайди. Буни бутун баданига иссиқ тарқаб, пешонасидаги уч-тўртта қалин чизиқларнинг остида, қирра бурни учида тер томчилари пайдо бўлганидан билади-да, тургиси келмай қолади. Шунаقا пайларни баъзан оқшомгача шу ерда қолиб кетади. Собиржоннинг ишига маҳлиё бўлиб, гапларига қулоқ солиб ўтираверади. Собиржонда гап кўп, тагин бирам маънили. Дунёда нима гап, подшолар нима қилишяпти, нима дейишяпти. Америка яна қанақа найранг қилмоқчи — ҳаммасидан хабардор. Ҳаммасини эринмасдан гапириб беради. Жуда гап тополмай қолса, қўлидаги ямаётган нарсасидан маъно чиқариб гапиради.

— Манави ботинкага қаранг,— дейди,— кўряпсизми, таги туяниинг кўзидаи тешилиб кетибди. Пошнаси ҳам қолмаган. Эгаси қанақа одам, биласизми?

Саври хола бошини сарак-сарак қилиб, йўқ, дейди.

Собиржон гапида давом этади:

— Бу одам ўлгудек меҳнаткаш. Иш бўлса бўлди унга. Елиб-югураверади. Узини ўйламайди. Оёғига тош-пош ботгандан қараб қўяди. Усти бутун. Яна парво қилмай кетаверади. Ечиб тагини қарашга вақти йўқ.

Собиржон унга тагдўзи қоқиб, ён-верини яхшилаб текислайди-да, бошқа бир туфлинин қўлига олади.

— Бунга нима дейсиз?— сўрайди кампирдан кўзларини айёrona сузиб.

Саври хола туфлининг ямоқ-ямоқ бўлиб кетганини кўриб:

— Бечора, жуда камбагал бўлса керак,— дейди.

Собиржон жилмаяди. Анчагача жавоб бермай туфлига қараб туради-да:

— Йүқ, хола, топмадингиз,— дейди.— Бунга қаранг. Бутун жойи қолмабди, ҳаммаси ямоқ бўлиб кетибди. Шундоқ бўлсаям яна яматгани олиб келибди. Энди, тозалигига қаранг. Гард юқмаган-а! Ким шунақа кияди? Ўлгудек зиқна, хасис одам шунақа кияди. Ўзиниям ўн йил кийган бўлса керак. Қамбағал шунақа киядими?! Уники ёзгаям, қишигаям, лойгаям, сувгаям битта. Худо пошшо, деб кияверади. Соб бўлгунча кияди. Яматмайди. Яматгани борса оёқ планг қолади. Шунинг учун кияверади. Соб бўлганда, ташлаб, янгинини олади. Тўғри эмасми?

Саври хола тўғри, дегандай бош қимирлатади. «Шунча ақлинг билан битта катта идорани тебратишинг мумкин, бу ерда нима қилиб ўтирибсан», демоқчи ҳам бўлади-ю, демайди. Ўғлини эслаб кетади. «Шундоқ ўтирса ҳам катта давлат эди», дейди ичидава томогига нимадир келиб тиқилади. Яна бирпас ўтирса кўзи ёшга тўлишини билиб:

— Умринг узоқ бўлсин, болам,— деб фотиҳа ўқиди-да, ўрнидан туради.— Қўлинг дард кўрмасин!

— Раҳмат, хола,— дейди Собиржон.— Яхши боринг.

Саври хола йўл-йўлакай ўзинн тутиб олади. Жуда хаёлга берилиб кетса, уйга келиб, дарров овқатга унайди. Баъзан бу ҳам фойда бермайди, ёш қуйилиб келаверади. Шунда қуруқ чойни қулт-қулт ютиб, тонг отишни кутади. Ҳуроз қичқирганда кўнгли анча жойига тушади. Ишхонада, кейин Собиржоннинг олдидаги овунишини билади. Лекин уч кундан бери дўкон берк. Собиржон йўқ. Биринчи куни унча парво қилмади. Шундай бўлса ҳам дўкон берклигини кўриб, юраги увущиб кетди. Бирпас, келиб қолар, деган хаёл билан кутди. Йўқ, келмади. Иккинчи куни ҳам шундай бўлди. Собиржонга жуда ўрганиб қолган экан. Зарур нарсасини йўқотиб қўйган одамдек карахт бўлиб уйига қайтди. Овқат татимади. Кечаси билан ҳам ухломай чиқди. Нима бўлдийкин? У ёқ-бу ёқка кетиб қолдимикин? Ундей бўлса айтарди. Иннайкейин, қаёқка боради? Ҳеч кими йўқ. Нима бўлдийкин?

Саври хола битта-битта юриб борарди, шошмасди. Шошиб нима қилади? Уйда болалари кутяптими ё биронта иши чала қолганми? Ҳамма иши жойида. Иннайкейин, ҳали кун эрта. Офтоб энди тиккага ке-

либди. Универмагга ҳам кириб чиқса бўлади. Бугун ойлик олди. Арзимаган ишгаям анча пул беришаркан. Илгари пенсиянинг тийини ҳам ҳисоблик эди. Энди бунақа эмас. Универмагта кириб чиқса бўлади. Битта маҳси олиш керак. Қиши ҳам келиб қолди.

Саври хола шу хаёллар билан ўзини чалғитишга уринди. Лекин, барибир, фикр-зикри Собиржонда эди. Охири чарчади шекилли, ўзига ихтиёр бериб юборди. Қадамлари бирдан тезлашди. Универмаг қолиб кетди. Катта кўчага чиқиб, театрга етганда эса қадамлари баттар тезлашди. У энди бутун вужуди билан олдинга интиларди. Қўзлари йўлда эди, лекин ҳеч нарсани кўрмасди. Лаблари нималарнидир шивирлар, лекин нималигини ўзи билмасди.

Йўловчилар ҳам ҳайрон эди. Қора духоба нимчасининг тугмачаларини ечиб, қўлларини қаттиқ-қаттиқ силтаганича, тротуарнинг ўртасидан ҳеч кимга парво қилмай кетаётган бу кумуш соч кампирни кўриб, баъзилар тўхтаб орқасидан қараб қолишарди. Олдиндагилар эса худди солдат этигининг темир нагалидек асфальтга тапиллаб тушаётган овозни эшитиб орқаларига ўгирилишар ва кекса аёлнинг зарб билан келаётганини кўриб, шошганларича йўл беришарди.

Кўп ўтмай олисдан Собиржоннинг дўкони кўринди. Саври хола тўхтади. У ҳансираради. Нимчасини ечиб қўлига олди. Шу билан дам олган бўлди-да, яна жадал юриб кетди. Шунча ҳаракат қилса ҳам дўконнинг очиқ-ёпиқлигини билолмади, қадамини яна тезлаштириди. Бир чақиримча юриб, дўконга етди. У очиқ эди! Кампир овозининг борича:

— Собиржон! — деб юборди.

Деразадан кимдир мўралади.

— Лаббай, хола??!

Саври хола уни кўрди-ю, бўшашиб кетди. Бу — Собиржон эмас эди.

— Собиржон қани? — сўради у бор кучини йигиб. Лекин овози чиқмади.

— Лаббай? — дўкон эшиги очилди, ичкарида шоп мўйлов бир киши ўтиради.

— Келинг, кампир, — деди у ва курсига ишора қилди. — Ўтиринг.

Саври хола худди шуни кутиб тургандай шилқ

этеб курсига ўтириди. Унинг бутун мадори қуриган, рангида ранг қолмаган эди.

— Собиржон қани? — сўради у бир оз ўзини босиб олгач.

— Собиржонми? — деди шоп мўйлов киши. — У кампирга парво қилмасдан, қўлидаги этикка нагал қоқиш билан банд эди. — Собиржоннинг тоби йўқ. Етиби.

— Нима қилди? — шошиб сўради Саври хола. — Қаерда?

— Уйда, — этикдан кўзини узмай жавоб берди шоп мўйлов киши. — Уйида ётиби. Нима қилганини билмайман. Ўрнига бориб тур, дейишди, келдим.

Саври хола секин турди. Бутун бадани қақшарди. Оёқлари зўрга қимирларди.

— Ҳа, кампир, ўтирибсиз-да, — деди ямоқчи. — Собиржонда нима ишингиз бор эди? Мен қилиб берай?!

Саври хола индамади. Битта-битта қадам босиб уйи томон юриб кетди. У шошмасди. Қўлида нимчаси судралиб бораради. Нима қилади шошиб? Уйида нима, болалари борми йиглайдиган? Йўқ. Болаларни худо унга кўп кўрган. Шошиб нима қилади? Кун ҳам ҳали кеч эмас. Энди қиём бўлибди. Ана, муздек шабада эса бошлади. Ҳаво совиди. Терлагани учунми, Саври хола буни дарров сезди. Нимчасини кийиб олди. Офтоб кўп яхши нарса-да. Қурт-қумурсқаям, жонивор ҳам, одам ҳам офтобга интилади. Усиз нима бўларди?

Саври хола уйига келиб, айвонга чўккалади. Анча ўтириди. Кейин самоварга озгина сув солиб, ўт ёқди. Цейлон чой ичгиси келди. Собиржон бир пачкасини қўярда-қўймай бериб юборган эди. Таҳорат олиб, юз-қўлини ювгунча самовар қайнаб чиқди. Аччиқ қилиб дамлади. Шу топ бир нарса эсига тушиб қолди. Нимчаси устидан апил-тапил камзул кийди-да, эшикка отилди. Тўғри дўконга келди. Дўкон берк эди. Кампир ўйланиб қолди. У нима қилишини билмасди. Кейин нимадир эсига тушиб, дўкон орқасидаги уч қаватли бинонинг ҳовлисига кирди. Ҳовлида йўл-йўл камзулшим кийган, қўқон дўппили бир киши гилдирак сими ни тўғрилаётган боланинг тепасида томоша қилиб турарди.

— Айланай, — деди Саври хола унга рўпара келиб. — Собиржоннинг уйини билмайсизми?

- Собиржон? — сўради қўқон дўппили киши.—  
Қайси Собиржон?
- Ямоқчи йигит.
- Танимайман,— деди у, гап тамом, дегандай яна  
болага қараб.— Ямоқчига ишим тушмаган.
- Мен биламан,— деди бола шу пайт ўрнидан  
туриб.— Бир марта халталарини кўтаришиб олиб бор-  
ганман. Кўрсатиб қўйами?
- Бўйингга қоқай!— Саври хола севиниб кетди.
- Майли,— деди бола бурнини шўлқ этиб тор-  
тиб.— Фақат машинада борамиз.
- Машинада? Қанақа машинада?
- Мана кўрмаяпсизми!— деди бола филдирак би-  
лан симини кўрсатиб.— Мен олдинда кетаман. Орқам-  
дан сиз юрасиз. Қўрқманг, олдинга кетиб қолсам, қай-  
тиб келаман. Майлими?
- Майли, болам, майли,— деди Саври хола.
- Шундай қилиб, у умрида иккинчи марта машинага  
«тушди». Лекин бу гал эътиroz билдирамай тушди.  
Бола филдирагини филдиратиб ҳовлидан чиқди.
- Бип, бип, кетдик! Юринг!
- Собиржоннинг уйи олис эмас экан. Бирпаста етиш-  
ди.
- Мана,— деди бола кичкина қизил эшикни кўр-  
сатиб,— шу ерда турадилар. Кираверинг. Мен кетдим.  
Бип, бип!
- Бўйингга қоқай, ойинг роҳатингни кўрсин!
- Саври хола ичкарига кирди. Торгина ҳовлида ҳеч  
ким йўқ эди. Тўрда эшик кўринди. Шу ёққа юрди.  
Юраги дукиллаб ура бошлади. Эшикка яқинлашиб, се-  
кин тақиллатди.
- Ким? Кираверинг!
- Бу Собиржон эди. Кампир овозидан дарров таниди.  
Таниди-ю, энтикиб кетди. Эшикни очиб, ичкарига кир-  
ди.
- Собиржон эшикка қараганича, каравотда ёнбошлаб  
ётарди.
- Ие! Хола! Келинг!— деди қаддини ростлаб, ле-  
кин турмади.
- Келдим,— деди Саври хола. У ўзини энди анча  
босиб олган эди.— Нима қилди, болам? Тузукмисан?
- Эски ярам қўзиди,— деди Собиржон.
- Қанақа яра?

— Оёгим...

— Оёгингга нима қилган, болам? — ҳавотирланиб сўради Саври хола каравотга яқинлашиб.

— Оёгимгами? — деди Собиржон ўйланиб. — Оёгим...оёгим йўқ.

— А?! — Саври хола қотиб қолди.

Собиржон ҳам жим эди. У нимадандир уялиб, кўзларини юмиб олган эди. Бир маҳал у жилмайди, кўзларини очиб, Саври холага қаради. Қампирнинг юзкўзи ёш эди.

— Қўйинг, йигламанг, фойдаси йўқ. Урушнинг оқибати бу. Йигламанг. Яхшиси, ишингиздан гапиринг. Қалай, хурсандмисиз?

Саври хола жавоб бермади. У Собиржоннинг оёқ томонидаги юпқа кўрпани чангаллаганича қотиб қолган эди. Бирдан у қаттиқ ютинди, серажин юзи тортилиб, ёш боладек ҳўнграб йиглаб юборди.

— Болам, болажоним! Оти қурсин урушнинг, оти қурсин! — дерди йиги аралаш.

Шу куни Саври хола алламаҳалгача Собиржонни кида қолиб кетди. Кўчага чиққанида қош қорайиб қолган эди. Уйи томон борар экан, у шошиларди. Нега шошилмасин? Бутун ишлари чала. Собиржонга иссиқ овқат қилмаса бўладими? Ўзига ўхшаб у ҳам ошни яхши кўтар экан. Йўл-йўлакай Сотиболдиникига кириши керак ҳали. Кўрпа-ёстигини, кампир нарса, олиб кела олармиди? Иннайкейин, кун бирам яхши! Эрталабки юзни ачитадиган муздек шабада йўқ.

Жоннинг роҳати, куз ҳавоси кўп қизиқ-да. Айнаб колмасин тагин? Шошиш керак.

## СОВФА

— Мен тайёрман. Тайёрмисиз? — сўради Валижон.

— Тайёрман, болам. Ёз! — деди Шаҳодат ҳола.

Лекин нимадан бошлишни билмай, ўйланиб қолди. У сира ўғлига хат ёзмаган эдп. Эрига ёзар эди. Раҳматли Раҳмонқул aka арабча ўқишни биларди. Иннайкейин, унинг ёзувини яхши кўрарди. «Шаҳодат, зерзабарини хўп келтирасан-да. Пулемётдай ўқийман хатингни!» — дерди ҳар ёзганида.

Ўғли арабчани билмайдп. Ўзининг эса янги алифбega уқуви йўқ. Уқуви бўлганда қўшнисининг ўғлини чақириб ўтирасди, ўзи ёзарди. Ёзадиган гапи кўп әди. Мана, бир йил бўлдики, ўғлидан хат олмайди, ном-нишонсиз кетди. Ўқиб юрган пайтларида тузук эди, ҳафтада, жуда бўлмаса ойда бир ёзиб турарди. Ишга кирди-ю, бедарак кетди. Аммо ишга кирганда ўн беш сўм пул юборди! Эрта куз эди ўшанда. Авжи долзарб пайт. Бутун қишлоқ, тирик жон борки, дала-да. Шаҳодат ҳола колхоз боғчасида тушликдан кейин болаларни эндигина ухлатиб ўтирган эди, ҳовлини бошига кўтариб Қоравой почтачи келиб қолди.

— Шовқининг қурсин, намунча бақирасан? — деди бўғилиб Шаҳодат ҳола. — Болла ухлавотти! Нима дейсан?

— Сизга пул қелди, пул! — деди почталъон оғзининг таноби қочиб.

— Қанақа пул? Қатдан? — ҳайрон бўлди Шаҳодат ҳола.

— Қанақа пул бўларди? Қогоз пул-да! — деди почтальон.— Нахт ўн беш сўм! Ўғлингиз юборибди.

— Ўғлингиз юборибди? Вой, ўғлимдан айланай!— Шаҳодат хола севиниб кетди, болалар эсидан чиқди, шангиллаб гапира бошлади.— Вой, болагинам-а! Пул юбориб нима қиласкан! Хат-пат ҳам борми?

— Э, хола!— почтальоннинг жаҳли чиқди.— Хатни нима қиласиз?! Пул юборибди, бўлди-да. Ночор одам пул юборадими! Пул сўрайди. Хўш, ҳозир оласизми? Ё эртага почтахонадан оласизми?

Шаҳодат хола ўйланиб қолди. Нима қилиш керак? Ҳозир олиб қолса, ҳеч ким билмайди. Билса яхши бўларди. Айниқса, Қумри отин билан Аълобуш билса яхши бўларди. Гўё иккаловининг фарзанди фарзанду бошқаларники фарзанд эмас. Боладан гап очилдими, тамом, бири бирига гап бермай эртани кеч қилишади, кечни эрта. «Холпошшам тушмагур... бало-да, бало!..» деб отин бошласа, билгинки, кетидан Аълобуш туради: «Собиржонимни айтмайсизми, тасаддуқ!» «Тасаддуқ» демай кет иккаловинг ҳам!

— Эртага почтахонадан ола қолай?!

— Ўзим ҳам шундай дерсиз, деб турувдим,— почтальон тиржайди.— Бутун қишлоқ билсин, дейсиз-да! Дуруст, дуруст. Аълобуш кеннойим ҳам ҳеч уйда олмайдилар, бориб оладилар.

Эртасига эрталаб Шаҳодат хола янги кавуш-маҳсиенини, Қумри отин билан бирга ўзоқ йили тиктирган қора духоба камзулини кийиб кўчага чиқди. Ҳали эрта эди. Ҳеч ким йўқ. Фақат муюлишда раис шоғёрининг эшигини тақиллатиб турарди. «Ичпбди-да яна,— хаёлидан ўтказди Шаҳодат хола.— Раис энди еб қўяди». Шу пайт димогига гуп этиб иссиқ ноннинг ҳиди урилди. Осмонга қаради. Аълобушнинг мўрисидан тутун чиқиб турарди. Шаҳодат хола шу ёққа юрди.

— Аълобуш! Ҳой, Аълобуш! — деди эшикни қия очиб.— Аълобуш-увв!

Аввал жавоб бўлмади. Кейин:

— Ҳувв, тасаддуқ, ҳув-в-в! — деган чўзиқ овоз эшитилди.

Бу Аълобуш эди. Шаҳодат хола жилмайиб қўяди. Кўп ўтмай бир сават буғи чиқиб турган кулча кўтариб йўлакда Аълобушнинг ўзи кўринди.

— Эшикда нима қилиб турибсиз, тасаддуқ? — деди Аълобуш Шаҳодат холага бошдан-оёқ қараб чиқиб.— Ичкарига киринг. Чойим тайёр.

— Шошиб турибман, раҳмат,— деди Шаҳодат хола.

— Ҳа, йўл бўлсин, тасаддуқ? — сўради Аълобуш, янги кавуш-маҳсига кўз қирини ташлаб.

Шаҳодат хола худди шуни кутиб турган эди.

— Пўштага кетяпман, айланай,— деди бепарволик билан.

— Ҳа, тинчликми, тасаддуқ? — сўради Аълобуш.

— Адҳамжон пул юбориби,— деди Шаҳодат хола.— Шуни олиб келмоқчиман.

— Вой, тасаддуғ-эй, эй,вой, тасаддуғ-эй! Ҳў-ўп болаларимиз бор-да, тасаддуқ! — деди Аълобуш.— Собиржонимни айтмайсизми, тунов куни хатида, ойи, мандалини посилка қилсан нима дейсиз, депти. Йўқ, дедим, тасаддуқ, йўқ, дедим. Ўзинг киявер, дедим. Маскопда ярашади бунақа кийимлар, дедим.

— Мандалини нима экан, айланай? — сўради Шаҳодат хола, кулгидан ўзини зўрга тийиб.

— Нима бўларди, тасаддуқ, алламбало материя бўлса керак-да!

Шаҳодат хола энди ўзини тутиб туролмади. Мендариннинг нималигини айтиб юборай деди-ю, лекин айтмади, ўртоғини хафа қилгиси келмади. Фақат тўйиб-тўйиб кулди.

— Нега куляпсиз, тасаддуқ? — сўради Аълобуш.

— Болаларнинг қилган ишига кулмай бўладими?

— Тўғри айтасиз.

Аълобуш қўшнисига қўшилиб кулди.

— Хўп, мен борай бўлмаса,— деди Шаҳодат хола ва кўчага чиқди. Чиқди-ю, қуруқдан-қуруқ кетаётганидан тортинди. Мақтангани кирган экан, деб ўйламасин тагин Аълобуш! Орқасига қайтди.

— Айтгандай, Аълобуш! Эсим қурсин, нега кирдинг ҳам демайсиз. Бир қатим оқ ипингиз борми? Бувинисанинг кенжаси фартуғини йиртиб қўйибди. Тикай десам, ипим тамом бўлибди.

— Бир қатим эмас, бир галтак олинг, тасаддуқ. Ип сиздан айлансин!

Почта Қумри отиннинг уйидан икки ҳовли нари эди. Шаҳодат хола кирай деди-ю, боғчага кеч қолиши-

ни ўйлаб, кирмади. Киреб ҳам нима қилади?! Аъло-  
буш билди — бутун қишлоқ билди деган гап!

Почтада дарров иши битди. Тахи бузилмаган ўн  
сўмлик билан беш сўмликни қўлига олар экан, кўзла-  
рида ёш йилтираб кетди. Пичирлаб ўғлини дуо қилди.  
Пулни чўнтағига солишини ҳам, солмасликни ҳам бил-  
май, қўлида ушлаганча кўчага чиқди. Тўлиб турган  
юраги бўшашиб кетди — йиглаб юборди. Унинг бирин-  
чи марта шундай йиглаши эди. Раҳматли эридан қол-  
ган дард ҳам, ўзининг тортган ҳамма қайғу-аламлари  
ҳам, ўғлининг мана шундай обрўга эришиб, пул юбо-  
риши ҳам шу йигида акс этар эди.

— Шаҳодатхон, ҳо, Шаҳодатхон! Кўчанинг ўрта-  
сида нима қилиб турибсиз?

Шаҳодат хола шоша-пиша рўмол учи билан кўз-  
ларини артди, ёнига қаради.

Икки қўлини белига тираб, эшик олдида Қумри  
отин турарди.

Шаҳодат хола ўзини босиб олиб, шу томонга юрди.  
Пулни чўнтағига солмоқчи эди, солмади. «Отин ҳам  
билиб қўйисин!» — деди ичида.

— Ассалому алайкум! Эрталаб иўштада нима қи-  
либ юрибсиз? Адҳамжонга пул юборяпсизми? Бола  
тушмагурга ҳалиям пул юборасизми-а?

— Йўқ, отин,— Шаҳодат хола жилмайди.— Мен  
юбораётганим йўқ, Адҳамингизнинг ўзидаған пул келиб-  
ди. Шуни олиб келяпман!

— Шундоқ денг,вой, умрингдан барака топкур-  
эй.— Қумри отин қўлини ёзиб дуо қилди.— Марта-  
баси баланд бўлсин, топгани тугаллик билан ўтсин.  
Омин! Шундоқ денг?!

— Шундоқ, айланай, шундоқ.

Шаҳодат хола уйига қандай етиб келганини бил-  
мади. Келди-ю, пулни кечагина ўқиб ўтирган «Юсуф  
ва Зулайҳо»нинг ўртасига солиб, токчага қўйиб қўйди.  
Ўн сўмлиги ҳали ҳам тахи бузилмай турибди. Беш  
сўмликни ишлатиб юборди. Ишлатмоқчи эмас эди,  
Адҳамжон келганда икковини ҳам ўзига бермоқчи  
эди. Пулга зор бўлмаса нима қилади ишлатиб? Бунинг  
устига яқинда пенсия бера бошлиши. Пулга зор эмас.  
Лекин ишлатиб юборди. Қоравой почтачи уйланганда  
тўёна олди-ю, миёнчага етишмай қолди. Шунда ишла-  
тиб юборди. Ўн сўмлиги турибди. Жуда ўксиб кетганда

токчадан китоби билан олиб қараб ўтиради. Кечачи долмади. Почтага борди. Қоравой ёлғиз ўтирган экан.

— Йўқми? — сўради унга термилиб.

— Йўғ-а, хола, йўқ,— деди Қоравой айборд оҳангда.— Мен ҳам тушунолмай қолдим. У ёқ-бу ёққа кетиб қолган бўлса керак-да...— У шундай деди-ю, яхши баҳона топгандай, шу гапга маҳкам ёпишиб олди.— Ҳа, у ёқ-бу ёққа кетган! Инженер деган гап ҳозир жуда зарур гап, хола. Инженер ҳамма ёқда керак. Бирон ёққа жўнатишган. Келиб қолади. Мана кўрасиз, ё хат келади, ё ўзи келиб қолади.

Шаҳодат хола уйига қайтди. Кўнгли хира эди. Зора Қоравойнинг айтгани келса?! У эринибгина овқатга уннади. Пиёс билан гўштни қовуриб бўлиб, нима қилишини билмай ўйланиб қолди. Кейин, бўлганича бўлар, деб бир товоқ сув солиб ёпиб қўйди.

Шу пайт кимдир эшик томондан:

— Хола, кирсам майлим? — деб қичқирди.

— Бўлмаса-чи, киравер,— деди Шаҳодат хола.

Бу Бувинисанинг тўнғичи — Валижон эди.

— Кел, болам, кел,— деди Шаҳодат хола.— Ҳа, ипма дейсан?

— Хола, мени мактабимдан юборишли, йўқ... ўзим келдим. Анақа...— Валижон тутилиб қолди.

— Ҳа, қанақа? Гапиравер,— деди Шаҳодат хола.

— Биласизми, яқинда... Саккизинчи Март,— деди Валижон ўйланиб-ўйланиб.— Шунга... шунга совға қилмоқчидик. Мен... аниқа... қанақа совға қилишимни билмайман.

Валижон бурнини шўлқ этиб тортди-да, Шаҳодат холага қараб жавдирай бошлади.

— Тузукроқ гапир, болам, нима қилмоқчисан, қанақа совға?

— Сизга совға,— деди Валижон.

— Менга? — ҳайрон бўлди Шаҳодат хола.

— Сизга. Учинчи «Б» дагилар ҳамма хотинларни бўлиб олишиди. Мен ойим билан сизни танладим. Укам сизни яхши кўради. Нуқул боғчадан келганда «бувимга бояман» деб йиғлайди.

Шаҳодат хола жилмайди.

— Шунинг учун менга совға қилмоқчимисан?

— Ҳа,— деди Валижон.— Лекин нима қилишимни билмаяпман. Ўзингиз айтиб бера қолинг.

Шаҳодат хола кулиб юборди. Кўнгли бирдан ёришиб кетди. Валижонни бағрига босди.

— Раҳмат, болам, раҳмат,— деди у Валижонни ўпаркан.— Менга совға керакмас. Ҳамма совғани ойингта қилгин. Ойингта керак совға. Сенларни боқаман деб бечора тиним билмайди.

— Ойимларга тайёрлаб қўйдим,— деди Валижон.

— Бўлмаса, қўя қол. Менга керакмас.

— Айта қолинг!

Валижон йиғлагудай бўлиб туради. Кампир ўйланниб қолди.

— Нима совға қилсанг экан?

Кўп ўйлади. Ниҳоят топди:

— Ёзувинг кўҳликми?— сўради у.

— Доим беш оламан!— деди Валижон.

— Бўлмаса Адҳам акангга битта хат ёзиб берасан.

— Хат?— Валижоннинг лаблари чўччайди.

— Мен айтиб тураман, сен ёзасан. Бу жуда ғалати хат. Ана шу менга совғанг бўлади. Бўптими?

— Бўпти!— деди Валижон.

— Ёзмаймизми?— сўради Валижон зерикиб.

— Ёзамиз, болам, ёзамиз,— деди Шаҳодат хола ўпкаси тўлиб ва секин гапира бошлади.

У шунчалик секин гапирадики, Валижонга бир марта ҳам қайта сўрашга тўғри келмади. Қош қорайгандага хат тайёр бўлди.

— Қани, ўқиб бер-чи,— деди Шаҳодат хола.

Валижон салмоқлаб ўқий бошлади:

«Ассалому алайкум, Адҳамжон, ўғилгинам! Эсонмисан, омонмисан? Тинчмисан? Юборган пулингни олиб, бошим осмонга етди. Раҳмат. Раҳматли дадангнинг ўрнини босиб турғанилгингдан бениҳоя хурсандман. Ишқилиб, умринг узоқ, мартабанг баланд бўлсин. Ниятингга ет.

Ўғлим, болажоним, кўнглимни ғаш қилиб турған бир гапни айтсам, хафа бўлма, ҳар ҳолда онангман. Мана, йил бўлиб қолди, сендан хат олмаяпман. Узинг' ҳам келмайсан. Биламан, ишинг кўп, вақтинг йўқ. Лекин икки энлик бўлса ҳам хат ёзсанг, шу менга кифоя. Соғлиғингни, ўйнаб-кулиб юрганингни билсам, бас.

Мендан ақвол сўрасанг, ақволим яхши. Ҳали ҳам бөгчада болалар билан бағ-буғлашиб ётибман. Кечак мозор бошига бориб, дадангнинг мозоринни суваб келдим. Раҳматли орзу-ҳавасингни кўролмай кетди. Тунов куни Собиржондан хат келган экан, сени сўрабди. Яхши, дедим. Ишқилиб, қаерда бўлсанг ҳам омон бўй.

Сени соғиниб кутгувчи ойинг  
*Шаҳодат*.

Валижон хатни шу куниёқ почта қутисига ташлади.

Орадан бир ҳафта ўтди. Шаҳодат хола бөгчадан келиб, айвонда кўрпа қавиб ўтиради. Қўчадан шангиллаб Аълобуш ўтиб қолди. Қўп ўтмай ўзи кириб келди. Қўлида посилка қути.

— Тасаддуқ! Собиржонингиздан посилка келди,— деди у айвонга чиқиб ва бирдан кулиб юборди.

— Ҳа, тинчликми? — сўради Шаҳодат хола.

— Тинчлик, тасаддуқ, тинчлик!.. — у кулгидан ўзини тўхтатолмай зўрга гапиради: — Малдалини тушмагур кийимлик эмас экан, тасаддуқ, ейдиган нарса экан, ейдиган! Нима экан, деб сабрим чидамай пўштада очдим. Бундоқ қарасам малдалин! Олинг, мазасини кўринг тасаддуқ.

У бир ҳовуч мандаринни Шаҳодат холанинг этағига ташлади.

— Бирам мазали, бирам мазали! Масконда йўқ нарса бор экан, тасаддуқ, йўқ нарса бор экан.

Шаҳодат хола зўр-базўр илжайди.

— Умридан барака топсин Собиржон.

— Илойим айтганингиз келсин, тасаддуқ. Ҳўп, мен чиқай, овқатим кечикиб кетди. Чиқинг, тасаддуқ, чақчақлашиб ўтирамиз, чиқинг.

Аълобуш яна шангиллаб чиқиб кетди.

Шаҳодат хола мандариндан биттасини арчиб оғзига солди. Лекин ўтмади. Чайналиб қолди. Қўзлари ёшга тўлди. Миясига қуяилиб келаётган оғир фикрларни ҳайдамоқчи бўлиб ўрнидан турди. Ҳовлига тушиб оғзидагини тупуриб ташлади. Үчоқ бошига бориб, қайтиб келди. Айвон устунига суюнди.

— Яна кўз ёшими-а? — деди шу пайт кимдир.

Шаҳодат хола чўчиб орқасига ўгирилди.

Йўлакда оғзи қулогига етиб Қоравой турарди.

— Қани, дарров кўзингизни артиб олинг-чи!  
— Хўп, болам, хўп.

Шаҳодат хола енги билан кўзларини артиб, жилмайган бўлди.

— Мана бу бошқа гап,— деди Қоравой.— Энди манави хатни олинг.

Шаҳодат холанинг юраги ўйнаб кетди.

— Ўғлимданми?

— Ҳа, ўғлингиздан.

— Вой, болам-эй, болажоним-эй!— Шаҳодат хола гуллик конвертдаги хатни бағрига босиб йиғлаб юборди.

— Ия-ия! Бу қанақаси бўлди?— деди Қоравой кулиб.— Хат келмасаям йиги, келсаям йиги экан-да?  
Ўқиб берайми?

Шаҳодат хола бош иргади.

— Бу ёққа беринг.

Қоравой конвертни очди-ю, ҳайрон бўлиб қолди.  
Хатни у ёқ-бу ёққа айлантириб кўрди, конвертни янгитдан қараб чиқди. Кейин ўйланиб қолди.

— Ўқимайсанми?!— деди Шаҳодат хола енгидан тортиб.— Адҳамдан эканми?

— Ҳа, ҳа, ўғлингиздан... Адҳамдан...— деди Қоравой хатдан кўзини узмай.

— Ўқи бўлмаса!

— Ҳозир... мана... эшитинг,— Қоравой Шаҳодат холага бир қараб қўйди-да, ўқий бошлади.— «Ассалому алайкум, ойижон. Сизни согинтириб қўйганим учун мени кечиринг. Узоққа кетиб қолувдим. Ойижон, сизни жуда согиндим. Аҳволларингиз тузукми? Хатингизни олиб жуда курсанд бўлдим. Ўзингизни уринтирманг. Менинг ишларим яхши. Яқинда учрашиб қоламиз.

Ойижон! Сизни хотин-қизларнинг халқаро байрами — Саккизинчи Март билан табриклайман. Хатингизни согиниб кутувчи ўғлингиз — Адҳам».

— Болам, болажоним!

Шаҳодат хола кўзини дарё қилиб хатни Қоравойнинг қўлидан олди-да, бағрига босганича уйга кириб кетди.

Қоравой ҳеч нарсага тушунмай жойида туриб қолган эди.

Хатни Валижон ёзганидан у ҳам хабарсиз эди.

## ЙУЛДА

Тошкент — Наманган поезді йўлга чиққанда, қош қорая бошлаган эди. Боягина кўзга ташланиб турган паст-баланд иморатлар, дараҳтлар аста-секин қоронғилик ичига ғарқ бўла бошлади. Шаҳардан чиқилганда эса, ҳеч нарса кўринмай кетди. Фақат олисларда тўп-тўп бўлиб чироқлар милтпллар ва вагон деразаси ортида семафорларнинг кўм-кўк кўзлари липиллаб ўтиб туради.

Олис сафарга чиққанингда атрофингдаги одамлар билан тезроқ танишиб, бирпасда қадрдан бўлиб кетсан ва кўпинча ҳаммадан, ҳатто энг яқин дўстларингдан ҳам сир тутган нарсаларни уялмай-нетмай айтиб берасан, бу ҳам етмагандай, сирли, нозик, фақат ўзингга, жуда бўлмаганда, дўстингга тегишли бўлган орзу-ларингни ўртага ташлаб, бегона одамлардан маслаҳат сўрайсан. Хуллас, бошқа пайтда иззат-нафсингга тегадиган анча-мунча гаплар билан ўзингни овутиб, сафарни кўнгилли ўtkазишга ҳаракат қиласан.

Бизнинг купеда ҳам шундай бўлди. Поезд бир станция йўл босар-босмас, ҳаммамиз танишиб олдик. Ҳамроҳларимнинг биттаси ёши элликлардан ўтиб қолган банк инспектори экан. Қора қундуз ёқали, кўкимтири пальто кийиб олган бу одам асли наманганлик бўлиб, ҳисобот ишлари билан марказга тушган экан. У вагонга чиққанидан бери қора майиз ейишу кўк чой ичиш билан овора эди. Айтишига қараганда, майиз билан чой ҳар қандай дори-дармондан афзал эмиш.

— Ота-боболаримиз бунинг сирини яхши билиш-

ган,— дерди у гап орасида.— Ёзда нонуштадан узумни канды қилишмаган, қишида майизни. Шунинг учун-да, касал нималигини билишмаган. Мана, мен ўзим ҳам шу ёшга келиб, ҳалигача бирон марта докторга мурожаат қилганим йўқ. Ўишонмайсизми?

Унинг гапларига ишонмай бўлмасди. Қип-қизил мағиздек юзлари, оқ оралай бошлаган соч-соқолидан соглом, бақувват одамнинг нафаси уфуриб турарди.

Иккинчи ҳамроҳимиз биринчисидан бир оз кексароқ, қотмадан келган, кўз ости қовоқлари салқиб тушган... Чекса керак, мошкичири мўйлови саргайиб кетган эди. Бу одам шаҳар архивида ишлар экан. Тошкентга қариндошларини кўргани келаётган экан. Учинчи ҳамроҳ билан фақат салом-алик қилдик, холос. Чарчаган эканми, поезд юриши биланоқ, бир оз мизгиб оламан, узр, деб тепага чиқиб олган эди.

Поезд қандайдир бир станцияга келиб тўхтади. Банк инспектори термосини қўлтиқлаб физиллаганича пастга тушиб кетди. Мен ҳам ўрнимдан турдим. Пастга тушайми, тушмайми, деб бирпас деразадан ташқарига қараб турдим. Станция кичкина бўлса керак, иккичу жойдагина чироқ ёниб турибди. Бошқа ҳеч нарса кўринмайди. Тушишга аҳд қилиб, энди эшик томон юрувдимки:

— Улгурмайсиз,— деб қолди хирилдок овоз билан мўйловли ҳамроҳим.— Бу ерда поезд кўп тўхтамайди.

Ҳақиқатан ҳам шундай бўлди. У гапни тугатиши билан қўнгироқ чалинди. Поезд бир силтаниб, секин қўзгалди. Банк инспектори ҳовлиқиб кириб келди. Унинг юзида севинч барқ уриб турарди.

— Сал бўлмаса қолиб кетардим-а!— деди у ҳафасини ростлар экан.— Йўлда иссиқ чой бўлмаса қийин. Айниқса, мендача чойхўрларга!— У катта оғзини тўлдириб кулиб қўйди.— Пиёладан буг чиқиб турмаса, чой ичгандай бўлмайман, гапимдан адашиб кетавераман. Ҳозир янгитдан дамлаймиз. Қани, марҳамат қилинглар!

У менга рўпарасидаги бўш жойни кўрсатиб, пальтосини еча бошлади. Кейин, киссасидан бир сиқим майиз олиб столга сочди-да, чой дамлай бошлади. У бу ишни шундай ҳафсала билан қилдики, гўё чой дамлаш ҳаёт-мамот масаласини ҳал қиладигандек ту-

юлди. Дамлаб бўлиб оғир хўрсинди, ҳаммага бир-бир қараб чиқди. Ундан кўзимизни узмай турганимизга қаноат ҳосил қилгач:

— Қани, олинглар,— деди майизга ишора қилиб ва термоснинг кумуш ранг қалпоғига чой қуайиб биринчи ўзи ича бошлади.— Асил чой бўлибди.

Биз кулиб қўйдик.

— Қани, қарасинлар, тақсир,— деди кўп ўтмай у ва термос қопқоғини янгитдан тўлдириб ёнидаги мўйсафидга узатди.— Бу, ошнамиз дейман, роса уйқуни уряптилар-ку, а?!

Беихтиёр тепага қарадим. Юқори полкадан енгил хуррак товуши эштиларди.

— Ҳар кимнинг табиати ҳар хил экан-да,— инспектор жилмайиб қўйди.— Йўлда ухлаш у ёқда турсин, мен кўзимни ҳам юмолмайман.

— Мен ҳам шундай,— унинг гапини қувватлади архивчи,— ўзимни мажбур қилсан ҳам бўлмайди. Йўл азоби — гўр азоби, дейишади-ку, аммо йўл қанчалик оғир бўлса ҳам уйқу келмайди. Ишхонада-чи? Қандай ҳужжатни текширма — қизиқми, қизиқмасми, барибир тушдан кейин эсноқ босаверади. Ҳа... ҳар кимнинг табиати ҳар хил. Гўё минг йиллик архив дейсиз. Қаёғидан кириб ўқиманг, тушуниб тагига етолмайсиз.

— Йўлда гаплашиб кетганга нима етсин?— инспектор яна оғзини катта очиб жилмайди.— Баъзилар вагонга чиқдими, тамом, ё ўзини уйқуга уради, ё бирор нарса ўқишига тушиб кетади. Зарурми шу, нозарурми, чўт қоқиб кўрмайди. Ишқилиб, биропта нарса устида кўз югуртириб турса бўлгани. Ҳа, айтгандай, янги газета олиб чиқдим, талабгорлар бўлса, марҳамат.

У қўлини чўзиб, купе эшиги ёнига осиб қўйган пальтоси чўнтагидан тўрт буқлоғлиқ газета олди.

— Газета ўқисам, аввало тўртинчи бетини кўриб чиқаман. Қизиқ-а? Ҳамма ҳам шундаймикин? Тағин қаерини денг? Эълонларини. Қўйди-чиқдилар ёзилган ерини. Нега шундай, ўзим ҳам тушунолмайман. Айтгандай, бу газетада ҳам бир-иккита қўйди-чиқди бор.

Инспектор чойни қандай жиддийлик билан дамлаган бўлса, газетани ҳам шундай жиддийлик билан ўқий бошлади. Унинг бургутники каби ўйноқи кўзлали эълондан эълонга ўтар, лаблари худди майиз чай-

наётгандай нималарнидир шивирларди. Бир маңал қошлари чимирилиб кетди, пешонаси тириши. Лекин дарров аввалги ҳолига қайтди.

— Тавба, ҳозирги ёшларга ҳайронман-да,— у юзини буриштириб, битта эълонни чертиб қўйди.— Мана бу йигит бултур уйланган эди, ажралишга тушиб қолибди. Тўйида бўлганман. Хотинини кўрганман. Суқсурдай жувон эди. Нимаси ёқмайдикан?..

— Характерлари тўғри келмагандир-да,— сўз қотди мўйсафид архивчи.

— Характер? Характер нима ўзи?— инспектор қизишиб гапира бошлади.— Характер деб, мен феъл-атвор, одоб, тарбия, иззат-икромни тушунаман. Шундай эмасми?

У ўз гапини тасдиқлаш учун менга бир қараб қўйди. Жим ўтирганимни ўзича тушуниб, гапини давом эттириди:

— Шундай экан, характерлари тўғри келмади, деган гап — биттаси одобли, биттаси одобсиз, деган гап бўлади, менимча. Демак, бу йигит хотинини одобсизга чиқарган. Мен бунга қўшилмайман. Одамнинг қанақалигини бир кўрищаёқ билиб олиш мумкин. Тўй куниёқ бу жувон менга ёқиб қолган эди. Киройи келин қилсанг, шунақасини қилсанг-да, деб ўйлагандим ўзимча. Шу қиз энди беодоб бўлиб қолдими?! Йўқ, бунга қўшилиб бўлмайди. Шунча ёшга кириб, одам ажратиши билсак керак, ахир!

Инспектор жаҳл билан купени айланади. Лекин жойнинг торлигидан баттар жаҳли чиқиб, мўйсафиднинг ёнига ўтириди.

— Мен сизга ростини айтсам, ҳозирги ёшларнинг, умуман, мазаси йўқ. Айниқса, йигитларнинг. Булар ўзларига шунақанги бино қўйган, шунақанги катта оғиз, маҳмаданаки, бунақаларни бизнинг давримизда кидириб топиб бўлмасди. Кийим танлаш, овқат танлаш, ўйин-кулги тушимизга ҳам кирмасди. Оилавий ҳаёт биз учун қандайдир сирли, муқаддас дунё эди. Ҳозир-чи, кечқурун топишиб, эрталаб ЗАГСдан ўтиб келишяпти.

— Бунчалик эмас,— деди истеҳзо билан архивчи.— ЗАГСда, бир ой ўйлаб келинг, дейишади.

— Боринг, шундай дейишсин ҳам. Бир ой нима деган гап? Бир ой ичида иккита бутун бошлиқ одам

бир-бирини ўрганиб, бир-бирига күнгил қўйиши мумкинми? Албатта, йўқ. Ақл бовар қилмайди бунга. Лекин ҳозирги ёшларга шу муддат ҳам кўп. Бир ойнинг ичидаги бир неча марта қўйди-чиқди бўлишлари мумкин.

— Ҳамма ёшлар ҳам шундай эмас.

Биз ялт этиб тепага қарадик. Тўртинчи ҳамроҳимиз ўнг ёнига ёнбошлаганича, бизга тикилиб ётарди. Ўйғонганига анча бўлган бўлса керак, қийик кўзларни тетик, суяги йўғон юзига қизиллик юргурган эди.

— Ҳамма ёшлар ҳам шунақа эмас,— деди у яна дона-дона қилиб.

Инспектор, яхши овқат пайтида эшик тақиллаоб иштаҳаси бўғилган одамдек, ўрнидан бир қўзгалиб қўйди. Кейин бизга кўзларини жавдиратиб, тепа томонга юзини бурди.

Мўйсафид архивчи бепарволик билан папирос туата бошлади.

Мен инспектордан кўзимни узмасам ҳам, қулогим тепада эди.

Купега бир зум сукунат чўкди.

— Ёшларнинг кўпчилиги ҳозир биз катталар қиломаган ишларни қиляпти,— деди ниҳоят жимликни бузиб юқори полкадаги йўловчи.— Қурилишларда — ёшлар, қўриқ ерларда — ёшлар. Олий математика, физиканинг биз тушунмайдиган сеҳрли участкаларида ҳам ёшлар. Яна нимани истайсиз?

Инспектор кулиб қўйди.

— Сиз мени тушунмадингиз. Мен ёшларниг фаолияти ҳақида гапираётганим йўқ. Бу ҳакда баҳс бойлаш ҳақиқатдан кўз юмиш бўлар эди. Мана, менинг бошлигим ҳам худди сиз айтган ёшлардан. Эндиғина йигирма саккизга кирди. Агар у ҳозирги гайрати билан ишлайверса, билмадим, уч-тўрт йилда нима ишларни қилмасикин?! Мен бу ҳақда эмас, ёшларнинг ҳаёти ҳақида, уларнинг маънавий, ахлоқий томонлари; оиласвий турмуш масалаларига бўлган муносабатлари ҳақида гапиряпман. Соддароқ қилиб айтганда, мен ёшларнинг муҳаббат, вафо каби нозик фазилатларга қараши ҳақида гапиряпман. Бу масалаларда уларни енгилтак деб ҳисоблайман. Мана, ўзингиз қаранг-а, ёшгина йигит, яхши касб эгаси бўлган одам уйланганига бир йил бўлар-бўлмас, хотинидан ажрал-

моқчи. Уйланмасдан плгари қаёқда эди эси? Бир йил туарар-турмас ажралар экан, нега уйланади?!

— Бунақалар жуда ҳам оз. Улар севги нималигини билишмайды. Ҳали ҳақиқий севги келмасдан туриб ё уни ўтказиб юбориб, ишқ-муҳаббат ҳақида лоф уришади. Натижада ҳсётлари бузилади. Бошқаларнинг ҳаётини ҳам бузишади. Лекин... лекин, биласизми, илгарилари...

— Илгарилари биз севги нималигини билмасдик,— гапни бўлди архивчи.— Бунақа сўзларни қаригани мизда эшитяпмиз. Мен кампиirimни никоҳ куни гўшангада кўрганман.

— Ажрашмаганмисиз, ишқилиб?— кулги аралаш сўради инспектор.

— Нега ажрашар эканман яхши бўлгандан кеини,— ғуурур билан жавоб қилди у.— Қирқ йилдан бери яшаб келяпмиз.

— Баракалла. Кўрдингизми?— инспекторга жон кирди.— Илгари бунақа қўйди-чиқдилар кам эди ёшлар орасида.

— Балки шундайdir. Лекин сиз битта эълонга қараб баҳо берманг. Ёшлар биз кексаларга қараганда, ҳаётни яхши тушунади. Чунки уларнинг кўз олдида шундай воқеалар содир бўляптиki, бу воқеаларнинг ҳар бири катта тарих. Бизнинг илгариги бир йилимиз ҳосирги ёшларнинг бир кунига ҳам teng келмайди. Буларнинг ҳаммаси, шубҳасиз, ёшларнинг ички дунёсига таъсир қиляпти. Кўп нарсаларни ўйлашга мажбур қиляпти, ёшлар жиддийлашиб кетяпти. Агар хўп десаларинг, мен бир воқеани айтиб бераман.

Ҳаммамиз рози бўлдик.

Ҳикоячимиз ўрнидан туриб пастга туша бошлади. Шу маҳал дераза ортида чироқлар кўриниб кетди. Поезд юришини секинлатди.

— Станцияга келиб қолдик шекилли?— деди инспектор ихтиёrsиз равишда термосга қўл чўзиб.— Ҳа, станцияга келибмиз. Қаер экан?

— Билиб бўлмаяпти,— деди архивчи янгитдан папирос тутатиб.

— Бунинг аҳамияти йўқ. Доғ сув бўлса, бўлди.— Инспектор шундай деб эшик томон юрар экан, ҳикоячимизга қараб жилмайди.— Янги чой билан эшитадиган бўлдик-да энди, а?

Поезд тұхтаганда, мен ҳам тамбурга чиқдым. Эшикни очишим билан юзимга гуп этиб муздек ҳаво урилди. Беихтиёр орқамга тисарилдим, эшикни ёпдим-да, деразадан осмонга қарадим. Ҳаво очилибди, у ер-бу ерда юлдузлар чарақлаб турибди. Икки соат чамаси булатлар орасыда яшириниб юрган кулчадек ой сезилмас нур сочялти.

— Шундақа станцияларнинг садағаси кетсанг арзиди-да! — Термосини күтариб вагонга инспектор чиқди. Совуқдан қизариб кетган юзларида ҳар доимгидек севинч барқ уриб турарди.— Дағ сув бор экан. Қани, юринг!

Унинг кетидан күпсега кирдим. Күп ўтмай яна йўлга тушдик. Инспектор яхшилаб чой дамлаб, ҳаммамизга бир сиқим-бир сиқимдан майиз улашиб чиққач, тепадаги ҳамроҳимиз ўз ҳикоясини бошлади.

— Мен, қурувчи-инженерман. Тошкентдаги Олмазор массивида бўлган бўлсаларингиз керак. Шу массивдаги янги тида қурилаётган кўп қаватли тураржой биноларини биз қурганмиз. Илгарилари Олмазор номига мос тушмаган қуп-қуруқ дашт әди. Сув йўқ, дарахт йўқ. Битта-яримта машина ўтиб қолса, ёзда тупроққа, қишида лойга ботарди. Сўнгги икки йил ичида массив ўзгарди-қўйди. Биринчи бино қад кўтариши билан кўпчилик қурувчилар бутун сезон бўйин ўз ерда яшаб ишлашга аҳд қилишди. Бинонинг қўёш кам тушадиган томонига палаткалар тикиб яшай бошлидик.

Мен кўп қурилишларда бўлганман. Мирзачўлда ҳам, Оҳангаронда ҳам. Лекин Олмазорнинг нимасидир мени ўзига ром қилиб қўйган әди. Балки ишнинг кўп ва тезкорлигидир? Билмадим. Ҳар ҳолда қандайдир янгича куч ва ҳаяжон билан мен ҳам ишга киришиб кетдим. Комплекс бригадасига бошлиқ қилиб қўйинди. Бути қарангки, ҳаммаси ёшлар. Аввал ранжидим. Худди бояги сиз айтган гап миямдан ўтди. Ҳатто бошлиқларга тўполон қилиб кирдим. Кулишди. Оёғимни тираб туриб олувдим, майли, бошқа бригадаларни кўр, истаган одамингни ол, дейишди. Лекин олмадим. Бундай қарасам, қолган бригадаларда ҳам деярли ёшлар экан. Бунинг устига, бекорга ранжиган эканман, мени шошириб қўйиши. Ҳаммаси эмас, албатта, лекин кўпчилиги. Прогул деган гап йўқ, брак йўқ. Айт-

гапнингзни қилишади. Қурилишда бундан мұхимроқ яна нима бўлиши мумкин? Қирқ саккиз квартирали гишт уйни биринчи гал роппа-роса бир ярим ойда битказдик. Бу, албатта, катта ютуқ. Ишлар, умуман, яхши эди, болаларнинг димоги чоғ. Улар хурсанд бўлгандан кейин, менинг ҳам дўппим яримта эди. Бошқармада Олмазорнинг орқа томонига тушадиган бинони бермоқчи бўлишувди, кўнмадим. Бу ерда анчагина қийналишга тўгри келарди. Чунки иморат пастликка қурилиши керак эдп. Бу, пойдеворни чуқур қазиш деган сўз. Лекин йигитлар гайрати жўшиб кетганиданми ё бу қпийинчиликни қийинчлик санашмаганиданми, олаверинг, қурамиз, деб қолишиди. Олдим. Кейин билсам, буларнинг гапида ҳам жон бор экан. Олмазорнинг орқа томонида катта ариқ бўлиб, ёнверида озми-кўпми дарахтлар бор экан. Ёшлик-да, иш оғир бўлса ҳам майли, лекин кўнгил чоғ бўлсин.

Шундай қилиб, яна ишга тушиб кетдик. Иккита бульдозер ерни текислай бошлади, иккита кўтарма кран келтирилди. То уларни ўрнатгунча, йигитларнинг бўшлари палаткаларни кўчириш билан овора бўлишиди. Езниг ўрталари эди ўшанда. Жазира маиси то-моқни қурилади, кўйлак-шим тердан баданга сирачдай ёпишиб кетган... Иморатни қуриб битиргандан кейин гашти катта-ю, азоби ҳам чакки эмас. Ахир, ўйлаб кўринг, уйнингизда битта чўпни у ердан-бу ерга олиб қўйиш учун неча марта эгиласиз-турасиз! Бу иморатку! Тағин қанақаси денг! Ёшликада эътибор бермас экансан киши. Аммо улгайганинг сари меҳнатнинг қадрига етар экансан. Айниқса, ҳар бир гиштида ўзингдан бир нима қолган бинони кўрсанг, шундай бўлар экан.

Ана шу пайтлари бригадамизда янги бир йигит пайдо бўлиб қолди. Бошқармада, институтга киролмабди, бирон ишга қўй, отаси илтимос қилиб келди, дейишиди. Нима дердим, хўп, дедим. Лекин уни кўрдиму, энсам қотиб кетди. Нега десангиз, у ҳали юзига офтоб тегмаган нозик йигитлардан эди. Жуссаси ҳам кичкина, қурилишдаги йигитларга мутлақо ўхшамайди. Мактабни битиргану, институтга ариза берган, лекин киролмаган. Ҳаётидаги биринчи кўрган қийинчилиги ҳам шу бўлса керак. Лекин нима қиласиз? Ишга

келгандан кейин биронта иш берасиз да. Аввал бошим қотди. Нима ишга қўйиши билмадим. Охири, ўйлаб ўйлаб сим қирқадиган станокка қўйиб қўйдим. Била-сизларми, йўқми, бетон плиталарни пойдеворга ётқизилганда орасига сим тиқиб кетилади. Биринчидан, бу, плиталарни бир-бири билан улади. Иккинчидан, гишт тераётганда кўз адашмайди. Шундай қилиб десангиз, йигитча ишга тушиб кетди. Лекин роса бизни хуноб қилди. Иш бошлаган кунидаёқ ундан шикоят устига шикоят ёғилиб кетди.

Аввал мен кулдим-қўйдим. Беш панжа баравар эмас, бир кун олдин-бир кун кейин ўрганиб кетар, деб ўйладим. Лекин мен ўйлаганча бўлмади. Бир куни туш пайти ҳаммамиз овқатланиб бўлиб ариқнинг лабида ўтирган эдик, слесаримиз Фатхилла деган йигит Сир боғлам сим кўтариб келиб қолди. Қовоғи солиқ, кўзларидан ўт чақнайди. Уни ҳеч қачон бунақа аҳволда кўрмагандим. Фатхилла бригадамиздаги энг қувноқ, шўх йигитлардан эди. Ҳатто, ўзи билан ўқийдиган бир қизни талашиб, ўртоқларидан биттасини пичоқлаб қўйгани учун институтдан ҳайдалган, қамалиб ҳам чиққан. Қамоқдан ҳунарли бўлиб келиб, қурилишларда ишлаб юрган. Оҳангаронда менинг бригадамга тушиб қолди. Шу-шу қаёққа борсам, мен билан бирга. Ана шу йигитнинг авзойини кўриб, ҳайрон қолдим.

— Ҳа, нима бўлди? — сўрадим ундан.

Фатхилла жавоб ўрнига қўлидаги симларни оғим тагига ташлади. Кейин, рўпарамга ўтириб, «чирс» этиб тупурди-да, ер остидан менга тикилди.

— Бу ойимқизни қаердан тоиднингиз?

Ҳамма кулиб юборди.

— Нега куласанлар? — деди Фатхилла дўқ аралаш тишларини қисирлатиб. Болалар жим бўлишгач, у яна менга қаради. — Қилгап ишини кўринг! Ахир кўр одам ҳам бунақа қирқмайди-ку!

Мен оғим тагида ёйилиб ётган симларга қарадим. Фатхилланинг жаҳли чиққанича бор экан: симларнинг ҳаммаси ҳар хил қирқилган эди.

— Ўлчаб бермаганимдаям майли эди, билмаган-да, дер эдим, — куониб гапирди Фатхилла. — Эрталаб келишлари билан қўлларига метрни тутқаздим. Уч метр уч метр қилиб қирқасиз, дедим. Бу ҳам етмагандай,

биттасини ўзим қирқиб ўлчов қилиб бердим. Складга бориб келгунимча ҳаммасини расво қилибди-қўйибди!

— Ўзига кўрсатдингми?

— Кўрсатиш ҳам гапми? Бурнига тиқиб олай дедиму ўзимдан чўчидим.— Йигитлардан биттаси, пиқир-пиқир кула бошлади, лекин Фатхиллага кўзи тушиши билан кулгиси оғзида қолди.— Иннайкейин, Усмон ака, жон ака, ростини айтсан, менга шогирд керак эмас. Ана, Восиққа беринг, ғишт теришни ўргатсин.

— Нима? Нима дединг?!— оёқларини сувга солиб ўтирган Восиқ Фатхиллага ўқрайди. Фатхилла бутун қурилишда фақат ундан ҳайиқарди. Ораларида нима ўтган, билмайман, лекин камгап, оғир табиатли, тўладан келган бу йигитнинг гапларини Фатхилла нимагадир ҳеч маҳал иккита қилолмасди. Биласизми, баъзан шундай одамлар бўлади-ки, улар сени нималари биландир ўзларига сеҳрлаб оладилар, уларни хафа қилгинг келмайди. Ё бўлмаса, доим уларнинг айтганларини бажо келтиринг келади. Восиқ ҳам нима биландир Фатхиллани ўзига сеҳрлаб олган эди. Унинг шу, нима дединг, сўзининг ўзидаёқ Фатхилла гангид қолди.

— Ҳазил-ку бу, ҳазилни тушунмайсанми?— деди гулдираб.

— Хўп, бу иккинчи масала,— дедим мен.— Ўзи қани?

— Ўшатда,— энсаси қотиб гапирди Фатхилла.— Ойиси бир халта варақи сомса бериб юборган экан, кавшаб ўтирибди.

— Қани, чақир-чи!

— Мен бормайман, кўргани тоқатим йўқ.

— Сомса евотган бўлса, Парпи борсин,— деди кулиб Восиқ.

Парпи пакана, бақалоқ йигит. Унга яхши овқат бўлса бўлди, бошқа ҳеч нарса билан иши бўлмасди. Дам олиш кунлари қурилиш чойхонасида ош қилишадиган бўлса, ярми ҳазил-ярми чин қабилида унга алоҳида лаганда уюб бериларди. Шундай бўлса ҳам, ўзиникини еб бўлиб, бизнинг лаганга қўл чўзарди. Шанда ҳам сомсанинг дарагини эшитиб:

— Майли, борсам бора қолай,— деб дик этиб ўринидан турди.

— Жа бўлмаса, халтаси бизга қолсни,— деди кимдир.

— Хомтама бўлма, очофат, ойимқизга ўзим тую қилиб бераман.

Кўп ўтмай Парни икки лунжини сомсага тўлдирганча ойимқизни, яъни Шавкатни — унинг асли исми шундай эди, бошлаб келди. Бечорани кўрдиму раҳмим келиб кетди. Ҳеч кимга қаролмайди, икки юзи шолғомдай қизариб кетибди. Битта-битта юриб ёнимга келди-ю, нима қилишини билмайди: дам лабини тишлайди, дам оёги билан ер чизади.

— Ҳа, ишлар чатоқми? — дедим уни хижолатликдан чиқариш учун.

— Ҳа, чатоқ,— деди секин лаби-лабига тегмай.

— Нима қиласан әнди?

— Билмадим.

— Варақи ейдилар,— деди кимдир.

Гур этиб кулги кўтарилилди.

— Жўналарниг!

Жаҳлим чиққанини сезишибди шекилли, йигитлар ўринларидан туришди. Улар кевиши билан.

— Ҳўш, нима қиласан әнди? — деб сўрадим яна.

— Ҳайронман. Сим қирқишиям билмаганимдан кейин, яна нима қилардим...

Унинг лаблари титрай бошлади. Ҳозиргина унн уришмоқчи бўлган одам, юпатишга тушиб кетдим.

— Ҳечқиси йўқ, ўрганиб кетасан, қунт керак. Мен ёшлигимда сендан баттар әдим. Диққат қилсанг, ҳаммасини ўрганаверасан.

Шавкат бошини эгганча жим турарди. Назаримда, ҳамма гални тушунгандай бўлди, аммо эртасига ақлага сифмайдиган ҳодиса юз берди. Шавкат ишлаётган станок чўрт иккига бўлинниб кетибди. Қандай қилиб, нима сабабдан — ҳеч ким билмасди. Уни ўзи ҳам тушунириб беролмади. Кейин билсак, Фатхилланинг қовига дош беролмай, станокка етти-саккизта симни қаторлаштириб қўйиб, болға билан ураверибди. Эҳтиёт қилмаса, тош ҳам синади-да, ахир! — Усмон ака совиб қолган чойини бир кўтаришда симириб, бўш идишни банк инспекторига узатди-да, ҳаммага бир-бир қараб чиқди.— Ана шунақа, эҳтиёт қилмаса тош

ҳам синади. Лекин ҳар бир кишининг ҳаётида уни ё тубанликка туширадиган ё қўкларга кўтариб мартабасини баланд қиласидиган бир нарса бўлади. Шахсан менга, уруш шундай нарса бўлди. Урушга бориб келиб ҳаётга бошқача кўз билан қарайдиган бўлдим. Ўтмишни гапиришнинг ҳожати йўқ, ростини айтсам, урушдан одам бўлиб қайтдим. Шавкатнинг ҳаётида эса, шундай бурилиш ясайдиган нарса муҳаббат бўлди. Гап шундаки, бизнинг бригадамизга ўша кезлари янги бир кранчи қиз келди. Бу техникумни битирган, Маҳфузা исмли ёшгина, кўхлик қиз эди.

— Қиз дейсанми? — ҳайрон бўлиб сўради архивчи. — Кранчи-а?

— Ҳа, ҳа! Кранчи қиз! — гапида давом этди Усмон ака. — Мен ҳам сизга ўхшаб жуда ҳайрон бўлдим. Ун беш йиллик иш давримда аёл кишидан кранчи чиқканини кўрмаганман. Албатта, ўзбеклардан. Биласизку, бизда негадир, бундай ишларга панжа орасидан қарашади. Тўғрироги, қарашарди. Ҳозир бундай эмас. Мен яқинда бульдозер ҳайдайтган ўзбек қизларини кўрдим. Ваҳоланки, бундан оғирроқ иш йўқ... Маҳфузা жуда аломат қиз эди.

— Аломат эди? — унинг гапини бўлдим мен нимадандир чўчиб. — Унга бирон нарса бўлдими?

— Айтиб бераман, ҳалн йўл олис. Қани, домла, чойдан қуйинг-чи! — Усмон ака инспекторга ўгирилиб, ютиниб қўйди. Термос қопқоғидаги буғи кўтарилиб турган чойдан босиб бир-икки ҳўплагач, яна менга юзланди. — Мен сизга боя уни кўхлик дедим. Балки бир оз ошириб юборгандирман. У унча чиройлик эмасди. Лекин нимасидир, сал чўзиқроқ рангпар юзига омонатгина ўрнатилиб қўйилган кичкина думалоқ бурними ва тийрак, қўнгир кўзларими, ё бўлмаса, ўнг кулгичи устидаги мошдек ҳолими, билмадим, ишқилиб, алланимаси ўзига маҳлиё қиласиди. Жуссаси ҳам айтарли эмас: кўпчилик қизларнидек елкалари бир оз эгилиб тушган, бўйни ингичка, лекин қўллари... бунаقا қўлларни мен учратмаганиман. Ҳам нозик, ҳам бақувват бу келишган қўллар унга ҳусн бўлиб тушган эди. Менга у биринчи кўришимдаёқ ёқиб қолди. Эрталаб ишга келганида ҳамма билан таништирдим. Йигитларга аввал хуш келмади шекилли, истар-истамас кўришишди. Парпи бўлса ҳатто:

— Ишимиз журжун экан-да энди,— деб түнгиллаб қўйди.

— Хуржун ҳам гапми, сассиқалаф!— деди кимдир.

— Парпи! Энди қоринни сиқиброқ боягайсан-да, ука,— гап қистирди Фатхилла.

— Нега?— Парпининг кўзлари йириклишиб кетди.

— Нега бўларди? Ғишт пойлаб саргайганингдан кейин муллажиринг камаяди-да!

— Бас қилинглар,— деди Восиқ жаҳлим чиқаётганини кўриб.— Кетдик. Яхши қиз, борарсиз-а?

Маҳфузা индамади.

— Хафа бўлма, қизим,— дедим мен.— Қизлар билан ишлашмаган, билишмайди-да. Ёмон болалар эмас, кўнигиб кетасан.

— Мен ҳам шундай ўйляяпман,— деди Маҳфузা жилмайиб.— Унинг овози жуда ширали эди.— Бораверайми?

— Ҳа.

Маҳфузা кетди. Анчагача орқасидан қараб қолдим. Ростини айтсам, ўзим ҳам чўчиған эдим. Еш бўлса, бунинг устига қиз бола, эплай олармикин?..

Ўйим нотўгри чиқди. Кечқурун палаткага йигилганимизда гап фақат шу ҳақда кетди. Парпи билан Восиқнинг боши осмонда эди.

— Беш мингта-я, қойил!

— Йўқ, сен қарагин ўзинг, чарчадим демайди-я. Тағин, яна олиб берайми, дегани қизиқ.

— Ишқилиб, кўз тегмасин. Лекин эрталаб бекорга хафа қилдиларинг.

— Ким?— Восиқ Парпига ўқрайди.— Ўзинг-ку бошлаган, пакана.

— Мен нима дедим? Айтдим-қўйдим-да...— Парпининг лаблари осилди.— Фатхилла-ку, сасиган.

— Ўзи қани, ўзи?— сўради Фатхилла.

— Кетди. Ширинда турар экан.

— Ширинда? Яқин экан-ку,— Фатхилла илжайди.— Лекин ўзи ҳам ёмон эмас-а, Восиқ?

— Тузук.

— Тузук ҳам гапми! Лабларига эътибор бердингми? Худди пишган олчанинг ўзи. Биласанми, мен уни танийман.

— Танийсан?— ҳайрон бўлди Восиқ.

— Ҳа.

- Нега айтмадинг?
- Нима кераги бор? — Фатхилла яна илжайди.
- Ҳа, нима?
- Шундай, ўзим. Ёшлигим эсимга тушиб кетди.  
Эҳ... Агар истасам, әртагаёқ шу қиз меники бўлади.
- Юракдан урдими дейман-а? — домино тераётган Парпи пиқ-пиқ кулди.
- Жигимга тегма, пакана,— зарда билан гапирди Фатхилла.— Юракдан урадигани ҳали онасининг қорнида.
- Нега бунақа дейсан бўлмаса?
- Ўзим, шундай. Эрмак учун-да,— Фатхилла яна илжайди. Ҳеч ким индамади. Унинг баъзан шунақа жиннилиги тутиб туришини, қўпол ҳазил қилишини билганим учун мен ҳам индамадим. Шундай бўлса ҳам овқатланиб бўлиб, домино ўйнагани ўтирганимизда бир оғиз гап ташлаб қўйдим:
- Ўйлаб гапир. Ҳазил ҳам эви билан,— дедим. Ўшанда мен чиндан ҳам ҳазил деб ўйлаган эдим. Фатхилла менга бир қараб қўйди-ю, жавоб бермади. Ўйнинга берилиб кетганимдан жавоб ҳам кутмадим. Кўп ўтмай у яна шу гапни бошлади.
- Восиқ, ишонасанми?
- Йўқ.
- Истасам, бир кунда қўлга оламан.
- Ололмайсан. Анча пишиқقا ўхшайди.
- Сен уни билмайсан-да. Қанчадан ўйнайсан?
- Қанчадан эмас, нимадан дегин.
- Ҳўп, нимадан?
- Бир литр билан битта ошдан.
- F ’пти, фақат ҳозир эмас.
- Майли. Кўчгунимизгача.
- Бўпти.
- Бу ахир пастлик-ку!

Ҳаммамиз бирданига бошимизни кўтардик. Бу — Шавкат эди.

— Бу ахир пастлик-ку! — деди у яна баланд овоз билан. Унинг муштлари тугилган, ингичка лаблари титрар, ранги қув ўчиб кетган эди.

Палаткага бирдан жимлик чўқди. Шавкатнинг журъатидан ҳамма ҳайрон қолган эди. Ростини айтсам, мен ҳам ундан буни кутмаган эдим. Шунинг учун бўлса керак, анчагача индамай қолдим. Бошқалар ҳам

шундай. Бир маҳал Фатхилла бир лунжи билан илжайди, кейин секин ўрнидан турди. Ҳаммамизнинг кўзимиз унда. Лекин биттамиз ҳам қимир этолмаймиз.

— Қайтаринг-чи, ойимқиз, нима дедингиз? — деди у бўғиқ овозда.— Яна бир марта эшитай.

— Қайтаришим мумкин! — аввалгидай шаҳд билан гапирди Шавкат.— Сиз қиз болани ҳақорат қилдингиз. Бу — пастлик!

Фатхилланинг тишлари қисирлаб кетди. Косадай мушт баланд кўтарилиди. Мен ўрнимдан туриб кетдим. Бироқ кечиккан эдим. Фатхилла билан Шавкатнинг ўртасида Восиқ пайдо бўлган эди. У менга қараб жилмайган бўлди-да:

— Ётсак-а энди, кеч бўлиб қолди,— деди ва Фатхиллага каравотни ишора қилди.

Йигитлар секин-секин тарқалиши. Фатхилла ҳам жойига бориб ётди. Шавкат эса ҳамон жойидан қимирламасди. Мен ҳам ётдим. Ҳозир бирон нарса дейиш бефойда эди. Аммо кўзим Шавкатда. Ундан курсанд эдим. У анчагача қимир этмай турди, кейин югуриб палаткадан чиқиб кетди. Кўзимга уйқу келмади. Битта менми десам, Парпи ҳам уйғоқ экан. Қўлида китоб, лекин ўқимаяпти. Чамамда ярим соатча вақт ўтди. Шавкатдан дарак йўқ эди. Бир маҳал Парпи секин ўрнидан турди, Фатхилла томонга қараб қўйди-да, эшикка чиқиб кетди. Кўп ўтмай қайтиб келди. Палатканинг ўртасида бирпас хаёл сурин тургач, Восиқнинг ёнига бориб, уни турта бошлади. Лекин ҳеч уйгота олмади. Иттифоқо, кўзи менга тушиб қолди, олдимга келди.

— Усмон ака,— деди шивирлаб.— Йиглаб ўтирибди!

— Қаерда?

— Ариқ бўйида.

— Ҷақирдингми?

— Йўқ, олдига борганим йўқ.

— Борма. Ўзи келади.

— Келмаса-чи?

— Келади. Қаёққа борарди?!

Парпи жойига бориб ётди. Уйқу бутунлай қочган эди. Ҳамма ёқ жимжит. Фақат аҳён-аҳёнда қурбақа қуриллагани, ит вовиллагани қулоққа чалинади. Па-

латканинг очиқ эшигндан осмонга қарадим. Ҳаво очиқ. Юлдузлар чараклаб турибди. Олисда, жуда баландда тўлин ой сузиб бормоқда. Бир маҳал у тўсатдан хираланди. Чўчиб қарадим. Бир парча олатароқ булут унга ёпишиб қолгандай эди. Қаердан пайдо бўлди экан, ўйлаб тагига етолмайман. Ростини айтсан, табиат сирларига унча тушунмайман, қизиқишим ҳам йўқ. Лекин ўшанда беҳузур бўлиб кетдим. Үрнимдан даст туриб, кўнгли озор чеккан болани бағримга босгим, ўрнига олиб келиб ётқизгим келиб кетди. Ўзи келиб қолмаганда шундай қилишим турган гап эди. Келди-ю, Парпининг ёнидаги каравотига чўзилди. Парпи уни кўриши билан китоб ўқишга тушиб кетди. Кўзимни юмдим. Бир маҳал Шавкатнинг овозини эшитиб қолдим: — Нима ўқияпсан?

Парпи. «Самарқанд осмонида юлдузлар». Ўқиганмисан?

Шавкат. Ўқиганман.

Парпи. Яхши-а?

Шавкат. Нимасини айтасан? Сенга Темур обраzi ёқадими?

Парпи. Темур, нимаси?

Шавкат. Образи.

Парпи. Бу нима?

Шавкат. Китобдаги асосий қаҳрамонларни образ дейилади.

Парпи. Балосан-ку!

Шавкат. Агар истасанг, ғалати китобларим бор. Бераман. «Қуттулғ қон»ни ўқиганмисан?

Парпи. Яхшими?

Шавкат. Зўр. Йўлчи деган бир йигит ҳақида.

Парпи. Э, бўлди, киносини кўрганман. Битта бойни роса дўппослайди-да! Мазза!

Шавкат. Китоб ундан зўр. Ўқисанг, Йўлчи, Гулнорлар худди ёнингда тургандай бўлади. Севги деб шуларнинг севгисини айтса бўлади.

Парпи. Ҳозир бунақалар йўқ.

Шавкат. Йўқ, бор. Фақат биз билмаймиз-да. Бизнинг бир қўшнимиз бор, кўрга теккан.

Парпи. Қўй-э??

Шавкат. Рост. Боягидаقا гапларни эшитганингдан кейин, бунга ишонмайсан-да.

Парпи. Қўй, ўшани эслама. Фатхилла ўзи ёмон одам эмас.

Шавкат. Одамда ҳамма нарса яхши бўлиши керак.

Парпи. Бизга ўтмайсанми?

Шавкат. Ҳозир эмас. Жуда бўлмаса, сим қирқишини ўрганиб олай.

Мудроқ аралаш уларнинг кулгисини эшитдим.

Эртасига эрталаб гўё ҳеч нарса юз бермагандек, ҳамма ўз иши билан овора бўлиб кетди. Тушга яқин Восиқ олдимга келди. Унинг тўла юзлари кулиб турарди.

— Усмон ака,— деди бирпас ўйланиб тургач.— Парпи билан бир нарсани маслаҳат қилувдик. Айтсан, йўқ демайсизми?

— Йўқ. Нима эди?— сўрадим мен ҳам беихтиёр жилмайиб.

— Бугун ош қилсак?

— Ҳа, тинчликми ўзи?

— Тинчлигу лекин бригадамизга иккита янги одам келди. Ювсак бўларди. Ишдан кейин, албатта.

Нима дердим? Хўп дедим. Ҳатто йигитларнинг зийраклигидан курсанд ҳам бўлдим. Гап, албатта, ошда эмас, иккита янги одамга бўлган ҳурматда.

— Лекин,— дедим унга,— қиз бола чойхонага борармикин?

— Олиб бормаймиз,— деди ҳозиржавоблик билан Восиқ.— Ошни қилиб, палаткага олиб келамиз.

— Майли, бўлмаса айтиб қўй, кетиб қолмасин.

— Йўқ, ўзингиз айтинг. Мен нима дейман?— деди у қизарип.

Кулдим.

Кечқурун ҳаммамиз палаткага йиғилдик. Маҳфузা очиқ қиз экан. Бирпасда бизга қўшилиб кетди. Ювишиб-тараниб, икки-уч партия домино ўйнаб бўлишимиз билан, катта тогорани кўтариб Восиқ билан Парпи келиб қолишиди. Қаердандир икки шиша «Оқ мусаллас» ҳам топилди. Восиқ менга айёrona қараб қўйиб, шишаларни очди. Биринчи ҳадаҳни, одат бўйича, ёши каттароқ одам, яъни мен кўтардим. Кейин Восиқ алланима деган бўлди. Хуллас, жуда ширин ўтирдик, Бир маҳал Маҳфуза кетаманга тушиб қолди. Хавотир олишади уйда, деди. Йўқ демадим.

— Мен кузатиб қўяман,— деди Фатхилла ўрнидан туриб. Кўпроқ ичганидан қулоқларигача қип-қизариб кетган эди. Бошқа ҳеч ким индамади. Иттифоқо, кўзим Маҳфузага тушиб қолди. Унинг ҳозиргина кулиб турган кўзларида сўлғинлик пайдо бўлган эди. Нима бўлдийкин? Нега бирдан хафа бўлиб қолди? Фикримни Шавкат бўлиб юборди:

— Мен ҳам бораман,— деди у менга қараб.

— Нима қиласан?— Фатхилла илжайди.— Мен кичкина боламанми? Яхшиси, ухла, эртага узилиб қолмагин тағин.

Кимдир кулиб юборди. Шавкат бирон нарса деса хунук бўлади-да, деб турган эдим, ҳайтовур индамади. Faқат туфлисини кийиб бўлиб:

— Мен ҳам бораман,— деди қатъий қилиб.

— Бормайсан!— Фатхилла тутақди.

— Қўйинглар, ўзим кетаман,— деди Маҳфуз жилмайишга ҳаракат қилиб.— Қўрқмайман.

Восиқ гапга аралашди:

— Фатхи, сен чарчадинг, дам ол,— деди вазминлик билан.— Шавкат кузатиб келсин. Ё ҳаммамиз борайлик.

— Овора бўлманглар, ўзим кетаман,— деди яна Маҳфуз. Бу гал у расмана жилмайди. Назаримда, Восиқнинг гапидан кейин кўнгли жойига тушди шекилли.

— Йўқ, Шавкат боради,— деди Восиқ Фатхиллага тикилиб.

— Майли, раҳмат,— Маҳфуз шундай деб палаткадан чиқди.

Шавкат ҳам кетди. Палаткага жимлик чўкди. Ҳамма бирин-кетин ечиниб ёта бошлади. Faқат Фатхилла қимир этмай ўтиради.

— Мен ҳам сени юбормасдим,— дедим ётганимдан сўнг унга.— Кеча нималар дединг?!

— Ҳазил эди, наҳотки ишонмасангиз?— Фатхилланинг кўзлари олайиб кетди.— Сен-чи, Восиқ?

— Ҳазилнинг таги зил,— деди Восиқ.

— Шу тирранча, қўлидан бир тийинлик иш келмайдиган ойимқиз мендан афзал бўлдими?

— Бўлди, ёт,— дедим зарда билан.— Тилинг қишишяптими?

Шу воқеа сабаб бўлдими ё ўзлик-ўзи топишиб ке-

тишдими, Шавкат билан Маҳфузани кўпинча бирга кўрадиган бўлиб қолдик. Тушлик найтида бирга овқатланишади, кечқурунлари бўлса, Шавкат апил-тапил ювениб, гойиб бўлади. Ҳаммамиз бунга кўнишиб қолдик. Бу орада янги бинонинг бетон плиталарини ётқизиб бўлдик, биринчи қаватни кўтариб, иккинчисига уннай бошладик. Шу кунларнинг бирида мен, иттифоқо, ғалати сұхбатнинг гувоҳи бўлиб қолдим. Якшанба эди. Эрталаб ҳаммамиз ясаниб шаҳарга тушадиган бўлдик. Ҳар дам олиш куни одатда ўзи шундай қиласиз. Мен болаларнинг олдига тушаман. Восиқ ҳам, Фатхилла билан Парпи шаҳарни айланади. Ё уйларига посилка жўнатишади. Фатхилла асли қаршилик, ҳеч кими йўқ. Парпи пскентлик, ўқишига меҳри бўлмай, ишга берилиб кетган. Оиланинг каттаси шу. Тўртта укаси бор. Шавкат Тошкентнинг ўзидан. Отаси катта инженер-геолог. Онаси ҳам ўқимишли аёл. Биринки марта уйларида бўлганман. Яхши одамлар. Шавкат уйга бориб қолса, ўтказгани жой топишолмайди. Лекин ўшанда у негадир уйга бормади. Кейин бораман, деди. Мен ҳам зўрламадим. Уйга бориб, кечқурун қайтдим. Энди қоронги туша бошлаган эди. Палаткага яқинлашганимда аёл, кишининг овози эшитилди, Киришимни ҳам, кирмасимни ҳам билмай тўхтаб қолдим.

— Йўқ, йўқ, ундаи деманг! — гапиради қиз бўғиқ овозда. — Сиз мени билмайсиз. Нима қиласиз ўзингизни ҳам, мени ҳам қийи наб?! Ўша куни, ариқ лабида ўтирганимизда айтганларим рост... Ўтиниб сўрайман, қўйинг.

Бу — Маҳфузанинг овози эди.

— Наҳотки, менга ишонмасангиз? Ўша куниёқ, сизни ўша биринчи марта кўрганимдаёқ буни сезган эдим. Маҳфуза, менга қарасангиз-чи!

Бу овозни ҳам танидим: Шавкат.

Билмайман, ўшанда менга нима бўлди, нимадандир хавотирланар, чўчир ва шу пайтнинг ўзидаёқ нимадандир қувонар эдим. Шунинг учун бўлса керак, жойимдан жилмадим. Палаткага бир зум жимлик чўкди. Лекин кўп ўтмай яна Шавкатнинг овози эшитилди:

— Нега индамайсиз? Ё мени...

— Ундаи деманг. Йўқ, ундаи деманг, Шавкатжон,—

Маҳфузанинг овози қалтирарди.— Лекин мен сизга айтдим-ку, мени билмайсиз. Билганингизда бундай демас эдингиз. Айтсан... Мендан кулмайсизми?

Шавкат. Йўқ, нега куларканман?

Маҳфузса. Кулманг, хўлми? Рости, менга барипир. Чунки энди ҳеч кимни севолмайман... Ҳа, севолмайман.

Шавкат. Нима гап ўзи? Тинчликми?

Маҳфузса. Эшитинг... мен... мен... сиз ўйлаган, сиз орзу қилган қиз эмасман. Мен алданган, хўрланган, баҳтсиз бир одамман...

Шавкат. Қўйинг, Маҳфузса, ўзингизни қийнаманг. Менга бунинг кераги йўқ. Гапирманг.

Маҳфузса. Йўқ, энди айтмасам бўлмайди. Эшпинг, ҳаммасини эшитинг. Мен ўн уч ёшимда ўгай ота қўлида қолганман. Ойим оғир касалликдан вафот этган. Ўз отамни эса мутлақо билмайман. Урушда ҳалок бўлганлигини эшитганман, холос. Ойимнинг вафотидан кўп ўтмай ўгай отам уйланди. Уйланди-ю, бошим ғалвадан чиқмай қолди. Ҳар куни гоҳ пулдан, гоҳ овқатдан жанжал чиқарди. Чидай олмадим. Шаҳардаги холамниги қочиб кетдим. Орадан тўрт йил ўтди. Мактабни битирадиган пайт келди. Шунда бир йигит билан танишиб қолдим. Кинода танишдим. Чиройли йигит эди. Пули кўп эди. Холам бўлса, ўз боласидан ортириб, менга кинога ҳам зўрга пул топиб берарди. Шунинг учун бўлса керак, мен ўзимни йўқотиб қўйдим. Бунинг устига у, сизни севаман, сизсиз туролмайман, деб кунда онт ичарди. Мактабни битирган куним у, бугун бир жойга йигилсак, уйдан бир амаллаб чиқинг, деди. Рози бўлдим. Кечқурун холамга алланималарни баҳона қилиб, уйдан чиқдим. Белгиланган жойда учрашдик. Кейин... кейин... йўқ, айтолмайман, айтолмайман!..

Маҳфузса йиглаб юборди. Томоғига бир нарса келиб қадалди. Шавкатнинг ҳам овози титрарди.

— Қўйинг, йигламанг,— дерди у нуқул.— Йигламанг.

Кўп ўтмай палатка яна жимжит бўлиб қолди. Маҳфузса ўзини тутиб олди шекилли, йигиси эштилмай қолди.

— Фатхилла билади,— деди у бир оздан сўнг оғир хўрсиниб.— Бир маҳаллада турганимиз.

Бу гапни эшитдиму миямга бир нарса келиб урилди. Маҳфузга янги келган кундаги Фатхилланинг гаплари эсимга тушиб, ўзидан ўзи қўлларим мушт бўлиб тугилди. Мана, нима учун у мақтанган экан! Беихтиёр йўлга қарадим. Лекин ҳеч кимнинг қораси кўринмас эди.

— Кейин холам билан Ширинга кўчиб келдик,— гапида давом этди Маҳфузга.— Мана энди мени билдингиз. Фикрингиздан қайтгандирсиз?

Шавкат. Йўқ. Энди қарорим қатъий!

Маҳфуз. Ачиняпсизми?

Шавкат. Бу ачинишдан эмас. Сизни... севаман!

Маҳфуз. Шунча гапдан кейин-а?

Шавкат. Ҳа.

Маҳфуз. Сиздан катта бўлсанам ҳам-а?

Шавкат. Ҳа. Мени қийнаманг, Маҳфузга. Севсангиз бўлди. Нима десангиз шуни қиласман. Севасизми? Маҳфузга индамади.

Эртасига у ишга чиқмади. Кечқурун трестдан телефон қилиб, унинг бўшаб кетганини айтишди. Ҳамма ҳайрон эди. Ҳеч ким ўйлаб ўйининг тагига етолмасди.Faқат мен билардим. Лекин айтмадим. Нима кераги бор? Шу куни туни бўйи Шавкат мижжа қоқмай чиқди. Эрталаб ёнимга келиб, кетмоқчи эканини айтди. Рози бўлмадим. Шунда у, билмадим, нима учун шундай қиласди, юрагини бўшатгиси келдими, ё бўлмаса, мени ўзига яқин олдими:

— Мен Маҳфузани топишим керак,—деди.

Нима дея олардим? Ҳўп, дедим. Шу куниёқ у ҳам кетди.

— Ҳа...— деди хаёлга чўмиб банк инспектори.— Шунақа севги ҳам бўлар экан.

Ҳеч ким индамади. Қупеда жимлик ҳукм сурар, фақат поезд ғилдиракларининг бир оҳангдаги тақ-туқигина бу жимликни бузиб турарди.

— Чойдан борми, инспектор?— деди анчадан сўнг Усмон aka кулимсираб.

Бу кулимсираш ўтирганларга жон киргизди шекили, ҳамма жой-жойидан қимирлаб қўйди.

— Чой совиб қолибди-да,— деди инспектор термосни олиб.

— Майли, бизга бўлаверади.

— Марҳамат.

— Улар ҳозир қаерда экан? — деди ўзича кекса архивчи янги папирос тутатар экан, ўйчан ҳолда.

— Шу ерда, Тошкентда.

Усмон аканинг бу гапидан ҳаммамиз бир чўчиб тушдик.

— Кечаки бирга эдик.

— Шавкат, Маҳфузалар билан-а? — ишонқирамай сўради инспектор.

— Ҳа. Иккови ҳам Қаршидан қурувчилар съездига делегат бўлиб келишибди. Кичкина қизалоқлари ҳам бор. Жудди отасининг ўзи.

Усмон ака фахр билан ҳаммамизга бир-бир қараб чиқди.

— Сиз съезддан келяпсизми? — сўради кекса архивчи.

— Ҳа.

— Баракалла, баракалла.

Унинг бу гапи кимга қаратилганини билиб бўлмади.

— Ҳа, айтгандай, съездда Восиқ ва Фатхилла ҳам бор эди. — деди Усмон ака. — Кечаки кечқурун ҳаммамиз бизникида йиғилдик. Фақат Фатхилла келмади. Маҳфузаларнинг бўлишини билиб уялган чоги.

— Баракалла, баракалла, — деди ганини чўзиб архивчи.

Банк инспектори унга бир қараб қўйди-да, кўзларини юмди. У хаёлга чўмган эди.

Мен купедан чиқиб, рўпарадаги деразанинг пардавини очдим. Ҳаво очиқ эди. Кўкда чараплаб турган сон-саноқсиз ўлдузлар ва кулчадек ой биз билан барабар сузиб борарди.

## НОМУС

Зумрад тунги сменадан қайтганига қарамай, эрта турди ва беижтиёр ёнига қаради. Муниранинг ўрни бўш эди. Ҳозиргина турган бўлса керак, ёстиқ, чойшаби гижим.

У халатни кийиб, узун, елкалари билан битта бўлиб турган қўнғир соchlарини ўрганича, ҳовлига тушди. Сўри тагида юзига кўрпа тортиб онаси Рисолат хола ухларди.

У тахта зинани лопиллатиб ариқ лабига тушди. Ички кўйлагини липасига қистириб олган Мунира оппоқ, келишган оёқларини юварди.

— Ҳа, мунча эрта? — Мунира юзига тушиб турган нам соchlари орасидан ўртоғига қаради. — Кеча сени роса кутдим!

— Ҳа? — Зумрад ариқ лабидаги харсанг устига энгашди.

— Кеча анави... Карим яна келди. Гулистонга олиб кетаман, дейди. Уч хонали квартира беришибди.

— Нима, бизникига сифмай қолдингми?

Мунира «ух» тортди.

— Тушунмайсан-да, тушунмайсан. Гап уйда эмас.

— Нимада бўлмаса? Яхши кўрмайман, деятувдинг-ку?

— Қайдам... Кечада кўзимга яна бошқача кўриниб кетди. — Мунира ювинаётган ўртоғининг ёнига ўтди.

— Биласанми, сиздан бошқа ҳеч кимим йўқ, сиздан бошқа ҳеч кимга уйланмайман, дейди. Кейин айландик...

- Ўшигдан ҳамдирсан?
- Мунира кулди.
- Озгина... Бечора нуқул титрайди.
- Анави, Зокир нима бўлади?
- Инженерми? Вой, унга нима бўларди? Бир-икки марта кинога бордик, холос. Кетаверайми? Нима дейсан?
- Қаёққа?
- Қаёққа бўларди, Гулистанга-да?!
- Эҳтиёт бўл, қиз! — деди Зумрад.— Тагин куйиб қолма!
- Сен фақат шуни биласан. Эҳтиёт бўл, эҳтиёт бўл!— Мунира бурнини қийшайтириб, ўрнидан турди.— Қари қиз бўлиб ўтиб қетайми! Қари қиз, қари қиз, йигитлардан нари қиз!..

Кўп ўтмай тепадан, ҳовли томондан унинг шўх кулгиси ва Рисолат холанинг бўғилиб жеркигани эшитилди.

Зумрад Мунирани ўз уйига олиб келганига йил бўлиб қолди. Иккалови битта паркда ишларди, иккалови ҳам ҳайдовчи эди, лекин бир-бирини яхши билишмасди. Янги йилни бир жойда кутишди-ю, ораларидан қил ўтмайдиган бўлиб қолди.

Муниранинг ҳеч кими йўқ, отаси ёшлигига ўлиб кетган, онаси ҳам уч-тўрт йил бурун қазо қилган эди. Қувноқ, дилидаги тилида турадиган, сап-сариқ, юз-кўзини қалин сепкил босган қиз Рисолат холага ҳам ёқиб қолди.

— Қиз бола нарса кап-катта ҳовлида ёлгиз турасанми? Бизнида яшайвер,— деди бир гал қизи билан келганида.

Мунира кўнди.

Зумрад кўп жиҳатдан унга ҳавас қиласди. Қелишган, оппоқ, иирик кўзлари худди тиниқ осмонга ўхшайди. Очик кўнгил. Жаҳли бурнининг учидаги турса ҳам, кек сақламайди. Кейин у билан сира зерикмасди. Ичи тўла гап. Қанчадан-қанча кечаларни у билан мижжа қоқмай ўтказган. Кеча ҳам эртароқ келганида, азонгача ухлатмасмиди, ўша Каримини гапириб чиқармиди?

Зумрад ювениб бўлувди ҳамки, тепадан ўртоги қичқирди:

— Бугун Караклаичга борамиз. Бўптими?

- Билет борми?
- Карим учта билет билан пойлаб туради.
- Яна Карим! — жаҳл билан деди зинадан кўтариларкан Зумрад.— Бечоранинг бошини айлантириб нима қиласан?
- Мунира ўшшайди.
- Айб ўзида. Келмасин бўлмаса!
- Зумрад ўртоғини жеркиб бермоқчи эди, гапи оғзида қолди. Йўлакда ўрта бўйли бир киши турарди.
- Қара!
- Зумрад ўртоғига шундай деди-ю, шошиб уйга кириб кетди ва дарров юз-қўлини артиб, сочини тарай бошлади. Мунира кирди.
- Сени сўрайапти.
- Ким экан?
- Билмадим. Сенда зарур иши бор эмиш, танийсанми?
- Биринчи кўришим,— деди Зумрад.
- Шундай де?— Мунира айёrona жилмайди.— Танимаган одамнинг зарур иши бўлармиди? Ўзи ёмон эмас, қарироқ демасанг...
- Овозингни ўчир!— уришди Зумрад. Уришди-ю, негадир кўнгли гаш бўлиб кетди.— Ойим қани?
- Нонга чиқиб кетдилар. Юр, кутиб қолди.
- Улар ҳовлига тушишди. Бегона одам сўри тагидаги курсида ўтиарди. Қизларни кўриб, ўрнидан турди.
- Салом, келинг,— деди Зумрад унга яқинлашиб.
- Сизда ишим бор эди...
- Марҳамат,— Зумрад курсига ишора қилди.
- Кечирасиз,— бегона киши ийманиб гапирди,— агар мумкин бўлса, ёлғиз гаплашсак...
- Менинг ҳеч қандай сирим йўқ,— Зумрад ўртоғига қаради.— Бемалол...
- Тушунаман, лекин илтимос.
- Уйга кира қолинглар бўлмаса,— таклиф қилди Мунира.
- Хоҳишингиз,— елкаларини қисди Зумрад ва меҳмонни уйга бошлади.
- Яна, кечиришингизни сўрайман,— деди бегона киши улар меҳмонхонага кириб ўтиришгач,— менинг айтадиган гапим фақат сизга тегишли.
- Қулогим сизда,— деди Зумрад ҳамон ҳеч нар-

сага тушунмай, лекин негадир юрагини ваҳм босиб.—  
Тинчликми ўзи?

— Тинчлик,— деди бегона киши.— Мен адвокат ман.— У фамилиясини айтди ва эпчиллик билан чүн-тагидан ҳужжатини олиб кўрсатди.— Комил Мирзаев деган одамни танисангиз керак? Аспирант, физик.

— Ҳа, танийман... танир эдим,— деди тутилиб Зумрад ва қизарип кетди.

— Биламан, ҳозир у билан ҳеч қандай алоқангиз йўқ,— гапида давом этди адвокат.— Лекин бир вақтлар яхши дўст эдинглар. Шундай эмасми?

— Ҳа, бир вақтлар шундай эди,— деди Зумрад, ҳамон юрагини ҳовучлаб.— Нима гап ўзи?

— Гап шундаки, синглим,— адвокат фикрини ифодалаш учун сўз қидиргандек, бир оз ўйланниб қолди, кейин деди:— Гап шундаки, Комил қамоқда ётиди.

— Қамоқда?— ҳайрон бўлди Зумрад.

— Ҳа, қамоқда. Бугун роппа-роса бир ой бўлади.

— Нега? Нима қилди?— хавотирланиб сўради Зумрад.

— Уни безориликда айблашяпти.

— Безориликда?— ҳайратга тушди Зумрад.

— Ҳа, безориликда,— деди адвокат ва қора портфелидан қандайдир қоғозларни олиб столга қўйди.— Уч киши бўлиб бир мўйсафидни уришибди. Мўйсафид оғир аҳволда ётиди.

— Бундай бўлиши мумкин эмас,— деди Зумрад қатъий оҳангда.— Комил бунақа одам эмас. У жуда ёввош, кейин...

— Биламан, Комил бунақа одам эмас,— тасдиқлади адвокат.— Лекин бир кампир шу йигит ҳам бор эди, деб гувоҳлик беряпти.

— Ишонмайман!— Зумрад ўрнидан туриб кетди.— Комил безори? Йўқ, бу англашилмовчилик.

— Тўгри,— деди адвокат.— Мен ҳам шу фикрдаман. Аммо буни исботлаш керак. Исбот учун эса қўлимиизда асос йўқ.

— Мендан нима истайсиз?— сўради Зумрад.

— Сизданми?..— адвокат унга тикилди.— Сиздан ёрдам. Уни фақат сиз қутқара олишингиз мумкин.

— Мен?!— қошларини чимирди Зумрад.— Қандай қилиб?

Адвокат хонага шошиб кўз югуртириди, эшикка қаради. Ҳеч ким йўқлигига ишонч ҳосил қилгач, Зумрадга ўгирилди:

— Ўша куни, шу жунук воқеа юз берган куни, у... яъни Комил сиз билан бўлган...

Зумраднинг ичида бир нарса узилгандек бўлди.

— Қайси куни? — бўғилиб сўради у.

— Шу йил 18-май куни. Комил шундай деди. Мана ўз қўли билан ёзган қофоз.

Зумрад беихтиёр адвокат узатган қофозни олди, лекин ўқимади, бўشاшиб стул суюнчигига ўзини ташлади. Унинг пешанаси, лабининг устини тер қоплаган, кўз олди қоронғилашган эди.

— Сизга нима бўлди? — шошиб сўради адвокат.

— Ҳеч нима,— деди секин Зумрад ва кўзларини юмди.

...Мана, бир кунлик қувонч, бир кунлик баҳтнинг оқибати... у, негадир, шундай бўлишини, жунук бир воқеа юз беришини сезган эди, лекин бу воқеа шунчалик тез ва шундай жунук намоён бўлишини кутмаган эди.

У Комилни яхши қўрарди, бир кўришдаёқ яхши қўриб қолган эди. Қиши эди ўшанда. Қор гупиллаб ёгар, автомат чўтка троллейбус ойнасини тозалаб улгуролмас эди. Пешинда бошланган қор кечгача тинмади, қайтанга зўрайди. Олдинда ҳеч нарсани чироқ ёқиб ҳам қўриб бўлмай қолди. Бешёғочдан ўтганда, дуга чиқиб кетди. Зумрад дугани солиб, троллейбусга чиққанида антиқа кубанка кийган бир йигитдан бошка ҳеч ким йўқ эди.

Йигит унга қараб жилмайди.

— Сиздан қўрқишиди,— деди у.

— Сиз-чи? — киноя билан сўради Зумрад.— Қўрқмайсизми?

— Сизни ёлғиз ташлаб кетишдан қўрқаман.

Зумраднинг энсаси қотди. Бундай суюқ гапларни у кун бўйи жуда кўп эшитарди. Лекин ҳозир ёқди, йигитнинг гапида бачканалик сезмадими, елкасини қоқиб, кабинага ўтди. Тормозни бўшата туриб, бўёғи кўчган ойна девордан орқасига қаради. Йигит унга кўзини қисиб қўйди. Зумрад педални босди. Олдинда Бўзсувнинг қия кўприги кўринди. «Қизиқ,— хаёлидан ўтказди Зумрад.— Қаёққа кетаётган экан? Уйигами

ё кпзи билан учрашганими? Қизи бўлса керак. Ҳа, бунақа келишган йигитларнинг қизи бўлмай иложи йўқ».

Зумрад беихтиёр ён ойнага қаради. Думалоқ юзи телпак остида баттар думалоқ бўлиб кетган, жуда се-миз, қип-қизил ширмой нонга ўхшарди. «Албатта унинг қизи шуба кийса керак,— ўйлади яна Зумрад. Иннайкейин этик кийса керак, анавинақа, ялтироқ этиклардан, пийма эмас. Қани етти соат шу совуқла пиймасиз ўтириб кўр-чи!— у хўрсинди-да, яна орқаси-га кўз қирини ташлади. Йигит жойида ўтиради.— Қаерда тушар экан? Ҳойнаҳой, Тўқимачилар комбина-тида. Кинотеатр олдида учрашишади. Янги кино кет-япти. Французыча. «Эркак ва аёл». Яхши дейишяпти. Кўриш керак».

Зумрад Шота Руставели кўчасига бурилиб, нон дў-кони олдида тўхтади.

— Соцгородок. Кейинги остановка «Тўқимачилар комбинати,— у микрофонга шундай деб, қўшиб қўй-ди:— «Ўзбекистон 25 йиллиги» кинотеатри.

— Раҳмат!— салондан йигитнинг шўх овози эши-тилди.

Зумрад жилмайди ва алам билан ўзича деди:— «Тўғри топибман. Кинога келибди. Қизи, албатта, ку-таётгандир?»

Қор бирдан тинди. Нам асфальт совуқдан қотиб, гадир-будир бўлиб қолди. Зумрад соатига қаради. Сме-на тугабди. Эски Жўвага етиб олса, бўлди. Самад ака ўтиради рулга. Ҳар ҳолда эркак, яхмалакдан қўрқ-майди.

У шу хаёл билан бўлиб йигитни унутди. Тўқимачи-лар комбинати олдида уч минутча туриб, яна йўлга тушганда, беихтиёр орқасига қаради. Қай кўз билан кўрсинки, йигит ҳамон ўша жойда, ўртадаги дераза ёнида ўтиради. Йўловчилар оз, беш-олтитагина одам чиққанди, холос. Зумрад севиниб кетди.

— Ўртоқ пассажирлар! Троллейбус Эски Жўвага боради. Билет олишни унутманг! Яхши йигит!— деди у жўрттага овозини баланд қилиб микрофонга. Са-лоннинг охирида ўтирган ёш бир йигит аланглаб ўр-нидан турди.— Йўқ-йўқ, сиз эмас,— Зумрад уни тин-читди.— Учинчи қаторда, дераза ёнида ўтирган йўлов-чи!— йигит қўлини кўкрагига бигиз қилиб қадади.—

**Ҳа, сиз! Бояги билетингиз эскиди. Янги билет олинг.  
Майдангиз бўлмаса, абонемент олишингиз мумкин.**

Йигит ўрнидан туриб чўнтақларини ковлади, кейин унинг олдига келиб, кабинага бошини суҳди.

— Эътиборингиз учун раҳмат,— деди у оппоқ тишларини кўрсатиб.— Унутиб юбордингиз деб ўйловдим.

— Учрашмадингизми?— сўради Зумрад.

— Ким билан?

Зумрад «қизингиз билан» демоқчи эди, ўзини тийди.

— Учрашадиган одамингиз билан.

— Учрашадиган одамим сиз.

Зумрад унга ялт этиб қаради. Йигит жилмайганича эшикка суяниб тураверди.

— Ҳазилингизни қўйинг. Мен ишдаман.

— Йигирма минутдан кейин ишингиз тугайди. Унгача кутаман.— Йигит шундай деб, уч сўмлик пул узатди.

— Ҳаммасигами?— сўради Зумрад пулни олар экан.

— Ихтиёргиз,— деди йигит.— Фақат унутманг, ҳали студентман.

Зумрад битта абонементни йиртиб, қолганини пул билан ҳайтарди.

— Келишдик-а?— сўради йигит.— Кутаман.

— Халақит беряпсиз!— жеркиб берди Зумрад.

Йигит жойига бориб ўтиреди.

Зумраднинг бутун вужудини қувонч, гулгула қоплади. Шу қувонч, гулгула билан Эски Жўвага этиб келганини ҳам пайқамади.

— Совқотдингми, қизим?— сўради Самад ака кабинага кўтарилиб.

— Унчалик эмас,— деди Зумрад шопиб унга калитни бераркан.

— Ҳа, энди совуқ тушди. Яхмалак отадиганга ўхшаймиз.

— Хайр, эҳтиёт бўлинг!

Зумрад троллейбусдан сакраб тушди. Шу заҳоти олдида ўша йигит боягидек жилмайиб, пайде бўлди.

Ўша куни йигит уни уйигача кузатиб қўйди. Исми Комил экан. Университетнинг бешинчи курсида ўқир

экан. Айчадан бери Зумрад билан танишмоқчи экан. Ниҳоят, бугун аҳд қилибди.

Улар эртасига учрашишди. Комил уни «Ўзбекистон 25 йиллиги» кинотсатрига, «Эркак ва аёл» фильмига олиб тушди. Зумрад цигейка шубасини, қизил этигини кийди. Фильмнинг ўргасида, қаҳрамонлар севгиси әнг олий нуқтага чиққанда, Комил қизнинг тиззасига қўлини оҳиста қўйди. Қўли ёнарди. Қоронги бўлса ҳам, Зумрад, қизариб кетди. Фильмдан сўнг, гарч-гурч қор босиб, пиёда уйга кетишиди.

Комил индинига ҳам келди, ундан кейин ҳам. Улар ҳар куни бирон ёққа борншар ёки пиёда тинч, одам сийрак кўчаларни айланишарди.

Зумрад бахтли эди. Қизидаги ўзгаришни кўриб Рисолат хола ҳам ўзида йўқ шод эди. Ҳар куни Зумрад ишга кетиши билан, сандиқларини очиб йиққан бисотини кўздан кечиравар, худди тўй эртага бўладигандай, қўни-қўшнилари билан кўрпа-ёстиқ, асбоб-анжомлар ҳақида маслаҳатлашарди. У ўзича, тўйни гилос пишиғига мўлжаллади. Зумрад кулди, лекин индамади.

Ҳовлининг бурчагидаги терак бўйи кўтарилиб чиққан эртанги гилос қизарганда, Рисолат хола: «Гаплаш энди»— деди. Зумрад одатдагидай қизариб кетди, лекин кечгача тўйнинг хаёли билан юрди. Қулоғи остида Муҳаббатнинг «Ёр-ёри янгради. Маъмуржон аканнинг «Тўйлар муборак»и... Табриклар, қадаҳларнинг жарангиги. Кейин, иккалови ёлғиз қолишганини тасаввур қилди. Эгнида оппоқ кўйлак, бошида оппоқ шоҳи рўмол, олдида эса Комил. Мана, у яқинлашди, секин рўмолини кўтарди...

Зумрад яна қизариб кетди. Шундай хаёллар билан сменаси қандай тугаганини билмади. Эски Жўвада троллейбусдан тушиб, диспетчер хонасига кетаётганда тўсатдан Комил пайдо бўлиб қолди. Бугун улар учрашмоқчи эмас эди, Зумрад машиначиникига бориши керак эди. Аввал севинди, кейин ҳайрон бўлди.

— Тинчликми?

— Сизни кутаётган эдим,— деди Комил уни четга тортиб.— Гап бор.

Улар бозор олдидаги жиёбонга ўтиб бўш скамейкалардан бирига ўтиришди.

— Биласизми,— деди зўрга Комил тили гапга келмай.— Мени... мени уйлантиришмоқчи. Келаётган шанбага тўй...

Зумрад бўшашиб кетди. Астагина:

— Табриклайман,— деди.

Шундан кейин нима бўлди, қандай уйига келди, билмайди. Кўзини очса, тепасида онаси ўтирибди.

— Қўй, болам, ўзингни қийнама. Сенинг тирнотингга ҳам арзимайди у ярамас. Студент эмиш тағин. Манавини ҳўпла.

Рисолат хола унга қатиқ тутди. Зумрад пиёлага лабини теккизди-ю, ичмади.

Шу куни у ишга бормади. Кечгача шифтга термилаб ётди. На ухлади, на гапирди. Кечга бориб кўзи жилинди, туш кўрди. Кенг лолазор эмиш. Ўртасида у бир тўда қизлар билан лола териб юрганмис. Тўсатдан рўпарасида бир йигит пайдо бўлибди. Қучоги тўла лола. Комилга ўхшар эмишу, лекин Комил эмас эмиш. У Зумрадга яқинлашиб:

— Манави сизга! Сиз учун тердим!— дебди ва қуҷогидаги лолаларни унга узатибди. Кейин, уни бағрига босибди. Бағри кенг, иссиқ эмиш...

Зумрад чўчиб уйғониб кетди.

— Ҳеч нима қилмайди, болам,— деди ёнида ётган Рисолат хола.— Озгина алаҳсирадинг. Дунёнинг беш куни қоронги бўлса, беш кунн ёруғ — ҳеч нима қилмайди. Қайтанга пишиқ бўласан.

Зумрад овунди. Ишга чиқди. Лекин Комилнинг тўйи куни яна кечаси билан йиглаб чиқди.

Орадан йил ўтди. Бир куни Зумрад ишдан келаётуб, кўча оғзида антиқа шляпа кийган бир одамни кўрди-ю, юраги шув этиб кетди. Бу Комил эди. Олистан Зумрадни кўриб, қархисига юрди. Кейин, айбодларча, қўл узатди.

— Келинг,— деди Зумрад юраги дукиллаб.

— Шундай,— деди Комил ва илгаригидек текис тишларини кўрсатиб, илжайди.— Ўтиб кетаётган эдим, сизни кўрай дедим.

— Қани, уйга киринг,— деди Зумрад ҳаяжон ичидага бошқа гап тополмай.

— Зумрад, табриклайман,— Комил унга меҳр билан тикилди.— Бугун туғилган кунингиз, аслида шунга келувдим...

У бошини қўйи солди.

Зумрад унинг озгин, ажин туша бошлаган қораматир юзига, битта-иккита оқ оралаган қоп-қора духобадек сочига қараб хўрлиги келиб кетди. Комил унинг учун аввалгидек яқин ва азиз эканини ҳамда уни яхши қўришини, шу топда аниқ ҳис қилди.

— Раҳмат,— деди ўпкаси тўлиб.— Қани, уйга юринг.

— Мумкинми?

— Маржамат.

— Мен, ҳозир!

Комил орқасига югуриб кетди.

— Қаёққа?

— Ҳозир! Ҳозир келаман!..

Зумрад уйга кирди. Нима қилиб қўйди? Нега уйга таклиф қилди? Наҳотки шуни истаса.. Қанча ўйламасин, қандай хаёлларга бормасин, энди кеч эди. У шошиб ошхонага ўтди, чой қўйди. Ойнага қараб, апил-тапил ўзига оро берган бўлди. Сўри тагидаги стол устида дастурхон ўроғлиқ турарди. Очди. Тахсимчаларда қулупнай, Зумрад яхши кўрадиган ёнгоқли торт, тортнинг ёнида конверт турарди. Очиб ўқиди: «Умрбод баҳт тилаймиз!— Ойинг, дугонанг Мунира. Естиқ тагини ҳам қараб қўй»— деб ёзилган эди унда.

Зумрад севинч билан хатни ўпди. Албатта бу Муниранинг иши. Онаси бундай ёзмайди. Кейин у, санаторийда. Уч кун бўлди кеттанига. Қизининг туғилган куни унинг хаёлида ҳам бўлмаса керак. Зумрад хатни яна бир ўқиб чиқди. Шу пайт эшикда шампанское кўтарган Комил пайдо бўлди, Зумрад нима бўлса ҳам ўтмишни эсламасликка, ҳозиргина юрагини қамраб олган шодликни йўқотмасликка қарор қилиб, Комилга юзланди.

Унинг хаёлидан ўша кун сира кўтарилемайди. Анча ўтиришди. Зумрад озгина вино ҳам ичди. Қулди ҳам, аммо Комилинг нега келганини суриштирмади. Комилнинг ўзи ҳам айтмади. Фақат кетаётганида унинг юзидан ўпар экан: «Мен баҳтсизман, кечиринг», деди. Комилнинг келиши билан унинг юрагида қандайдир умид учқунлаган ва кеча давомида у нимагадир ишонган, ниманидир кутган эди. Бу гапдан сўнг умиди сўнди. Қўча оғзида хайрлашиш учун Комил қўл узатганда:

— Бошқа келманг,— деди.— Уят бўлади.

Комил кўздан ғойиб бўлгунча ортидан хомуш қараб турди. Кейин отилиб уйга кирди-да, ўзидан, тақдиридан ўқиниб, ўксис-ўксисиб йиглади...

— Сизни хафа қилиб қўйдим шекилли?

Адвокатнинг бу гапи унинг хаёлини бўлди. Кўзларини очди.

— Кечирасиз,— хўрсинди Зумрад.— Хўш, мен нима қилишим керак?

— Эртага суд,— деди адвокат,— бориб Комилнинг ўтган ойда худди шу куни сиз билан бўлганини тасдиқлассангиз, бас. Албатта, ҳеч ким сизни мажбур қилолмайди. Кейин... тушунаман, бу оғир сизга. Лекин бошқа иложимиз йўқ.

— Комил... Комил нима деди?— сўради зўрга Зумрад.

— Менинг бу ерга келганимни у билмайди. Умуман, Комил сизни ҳурмат қиласди. Ўша куни сиз билан бўлганини кечагача айтмаган эди. Фақат кеча... Аҳволининг жиддийлигини тушуниб, айтди. Биласиз-ку, ҳозир безориларга қарши қаттиқ кураш кетялти. Беш-олти йиллик умри хазон бўлиб кетиши мумкин.

Адвокат яна нималарнидир гапирди. Зумрад эшитмади. «Ҳурмат қиласди...»— ўйларди у.—«Ҳурматнинг нималигини, ҳозир бу ҳурмат қанчалик қиммат тушаётганини у билармикан?»

— Менга ҳеч нарса демайсизми?— сўради адвокат анча вақт жим ўтиришгач.

Зумрад бошини қуёйи солди. Адвокат ўрнидан турди.

— Суд эртага, соат ўнда.

Зумрад унга қарамади ҳам. Бошини эгганча, ўйга толди. Мунира кирди.

Шу куни кечгача у чурқ этмади. На онаси билан, на Мунира билан гаплашди. Шифтга термилганча ётди. Концертга Муниранинг ўзи кетди. У келганда, ўзини ухлаганга солди. Эрталаб ҳовлига тушди.

— Ҳаммасини эшитдим,— деди Мунира.— Бормайсан судга. Менга қолса, отиб юборишмайдими?

Қайси юз билан борасан, ўзинг айт? Одамлар нима дейди?

Зумрад, түғри, дегандек бош иргади...

Анқор томондан муздек шабада юзига урилди, у сесканиб кетди. Сўри тагида Рисолат хола хуррак отиб ухларди.

Зумрад пастга тушди. Бўзсув шовқин солиб, ҳайқириб оқарди. «Уйимиз яхши жойда,— негадир кўнглидан ўтказди Зумрад.— Шундай марказда. Бир ёғи сув, бир ёғи бог... Бузилса, қаерда турарканмиз?»

У кечагидек харсанг устида энгашиб панжаларини сувга солди. Баданига ёқимли муздек ҳарорат тарқади. Анчагача шундай қўлларини сувга солиб ўтириди. «Наҳотки, бошқа далили бўлмаса?— жаёлдан ўтди унинг.— Қанчалик уятлигини ўйламадимикин?»

У зинани гирчиллатмаслик учун битта-битта оёқ учида юриб ҳовлига кўтарилди.

— Зумрад?— уйқу аралаш чақирди Рисолат хола.

— Мен, ойи, уйготиб юбордимми?

— Эрта турдингда, болам,— Рисолат хола ёнига агдарилди.— Ҳали кун чиқмабди, озгина мизғиб ол.

— Ҳозир ётаман.

Зумрад хонасига кирди, Мунира лабларини чўччайтириб ухларди. Зумрад ҳавас билан унга бир оз тикилиб турди-да, кийина бошлади. Тошойна ёнига ўтиб, тароқни олмоқчи бўлган эди, қўли атири шишага тегиб кетди. Шиша «дўп» этиб ерга тушди.

Мунира чўчиб уйғонди.

— Уф! Қўрқиб кетдим,— деди кўзларини ишқалаб.— Энди учрашиб турувдик-а!.. Қўпол!

— Ишим бор.

— Биламан қаёқча кетаёттанингни!— Мунира қаравоти устида чордана қурди.— Эсинг жойидами, девона?! Бормайсан!

— Ухла,— деди қатъий оҳангда Зумрад.— Ҳали эрта.

— Борма. Номусга қолдирма ўзингни!

— Ухла деяпман сенга! Эшитдингми, ухла!

Зумрад ҳовлига тушди. Мунира нималардир деб вайсади. Аммо у эшитмади. Естиқча бошини омо-

натгина қўйиб ётган онасига бир қаради-да, кўчага чиқди.

Тонг ёришган эди. Кечаси сув сепилган асфальт йўлка қуриган, фақат у ер-бу ерда усти қотган тупроқ қорайиб туарди.

Зумрад пиёда йўлга тушди. Шаҳар судига етиб келганда баланд бинонинг кул ранг устунларига қараб, бўшашиб кетди. Муниранинг йигламоқдан бери бўлиб ёлворгандаги башараси кўз олдига келди. Орқасига қайтди. Муюлишдан ўтиб, Революция хиёбонига олиб борадиган боғ кўчага бурилди. Олдинда серсоя чинор ва бўш скамейка кўринди. Шу ёққа юрди. Анчагача шу скамейкада ҳеч нарсани ўйламай бепарво ўтирди.

Соат бонг урди. Зумрад бир сесканиб тушди. Кейин санади. Ўн. «Бориш керак,— деди кўнглида.— Энди бориш керак».

У йўлга тушди. Ўзини қанча зўрламасин, оёқлари судралар, юраги дукиллаб уради. Бир амаллаб етиб келди. Ҳамма ёқ одам, ғуж-ғуж одам... У қўрқиб кетди. Бир зум ҳамма қўлини бигиз қилиб уни кўрсатаётгандек, масхара қилаётгандек туюлиб кетди. Лекин ҳеч ким унга қарамасди, ҳамма ўзи билан ўзи овора эди.

Залга кирганда, суд бошланган эди. Одам бу ерда ҳам кўп. Зумрад дераза тагидаги бўш стулга бориб ўтирди ва беихтиёр суд томонга қаради. Кейин кўзи Комилга тушди. У иккита милиционер ўртасида ўтиради. Боши әгик, сочи олинган. Ранги — доканинг ўзи. Зумраднинг раҳми келиб кетди.

— Ишонувдим, синглим, ишонувдим!— Зумрад ёнида адвокатни кўрди ва негадир қизариб кетди.— Бутун умидимиз сиздан.

Зумрад беихтиёр Комилга қаради, кўзлари тўқ-нашди. Комил миннатдор оҳангда лабининг бир учи билан жилмайди. Зумрад негадир жирканниб кетди. Ҳатто сўрашмай, кўзини четга олди. Суд раиси чақирмагунча у томонга қарамади, қарай олмади.

Ниҳоят, уни чақиришди. Тиззалири қалтираб ўрнидан тураркан, ҳамма тикилиб турганини кўрди. Кўрди-ю, келганига пушаймон бўлди. Узи сезмаган ҳолда Комил томонга қаради. Комил ҳам унга тикилиб ту-

парди. Фақат унинг қарашида қизиқиш, ҳайронлик эмас, илтижо, чексиз илтижо бор эди.

Зумрад унинг гапларини тасдиқлади. Ҳа, ўша куни айбланувчи уникида эди. Ярим кечагача у билан бўлди. Яна нимани тасдиқлаши керак?

Зал тўлқинланиб кетди.

— Мана, шунақалар оилани бузади-да,— деди кимдир.

Яна кимдир қичқирди:

— Уятсиз! Беномус!

Суд раиси одамларни тартибга чақириб, қўнгироқ чалди. Зумрад юзини беркитганича, ташқарига отилди.

Остонада кимдир тирсагидан ушлади. Бу ҳансираған адвокат эди.

— Раҳмат, синглим! Комил бу яхшилигингизни унутмайди. Хотинига бир амаллаб тушунтирамиз. Ке-чирап... Раҳмат сизга!

— Мени тинч қўйинг,— деди лаблари титраб Зумрад.— Эшитяпсизми, мени тинч қўйинг!

У худди бирор қувлаётгандай катта, сершовқин кўча бўйлаб чопиб кетди.

Қаёқларга борди, қайси кўчаларга кириб-чиқди, билмайди. Кимдир уни юпатди, кимдир сув ичирди. Хиёбонга ҳам қандай қилиб келиб қолгани номаълум...

У аргувон тагида ўтиради. Қачон келди бу ерга, бу ерни нега танлади — билмасди. Шундай олдида тинч ва текис оқаётган сарғиши Бўзсувга тикилганича қимир этмай ўтиради. Бўзсув уйининг олдидан ҳайқириб оқади, бу ерда тинч, текис, оқаётгани билинмайди. Қаердадир чўмилишяпти шекилли, баъзан сув шалоплаб қолади, кейин яна тинчийди, фақат кўзни оладиган даражада жимиirlайди. Лекин у сезмасди, тиккага келган қуёш нурлари сербарг шохлар орасида синиб, боши, елкаларида ўйнаётганини ҳам енгил шабада сув салқинини юзига уриб, пешонасига тушиб турган бир тутам сочини тортқилаётганини ҳам сезмасди. Скамейка зиҳига кафтларини тираганича ўтиради.

— Опа! Сов... совқотиб кетдим!— деган ингичка овоз эшитилди бир маҳал.

Зумрад аланглаб атрофига қаради. Қиргоқдаги

чимга ёпишиб сув ичиди бир бола турарди. Унинг ранги кўкариб кетган, тишлари такилларди.

— Чиқмайсанми? — сўради Зумрад.

— Қа... қанақа қилиб чиқаман? — деди бола зарда билан.— Иштоним орқайизда-ку?!

Зумраднинг кулгиси қистади. Скамейка суячиги-даги иштонни болага узатди-ю, ўрнидан турди.

Бирдан қуёш бетини аллақаёқдан пайдо бўлган туюркачидек булут қоплади. Дов-дараҳт қорайди. Зумрад жунжикаб осмонга қаради, ҳаво чанг босгандек сапсариқ эди. Булут чўзилиб, шаклини йўқотди. «Ҳозир тарқайди», — деб ўйлади Зумрад. Унинг ташвишлари, шу кунгача чеккан азоби ҳам тарқармикан?..

## МАРУСЯ ХОЛАНИНГ МИЛТИФИ

Сулаймон ота қамалиб қолди. Үмрида қамоқнинг кўчасидан ўтмаган одам, қариганида уч йилга кеси-либ, ўгри, кисавурларнинг орасида юрибди. Албатта, ошна-офайни, қариндош-уруг уни ёлгизлатиб қўйганни йўқ. Икки марта колхоз раисининг ўзи келиб кетди. Кампирি катагига киролмаган товуқдек, ҳар куни лагерь атрофига. «Передача»ларни айтмайсизми? Бўхчабўхча нон, тогора-тогора ош. Лекин қамоқ—қамоқ, татирмиди. Бечора чол ким келмасин, қайси тугунни ечмасин, ўлкаси тўлиб, кўзинга милт-милт ёш келаверади. У йиглаб чарчайди, атрофдагилар овутади...

Ҳамма бало Мирвосиқнинг меҳрибончилигидан бошланди. Суяги меҳнатда қотган Сулаймон ота пенсияга чиқиб зерикиб қолди, баъзи-баъзида бели қирсиллаб қолишини назарга олмагандан, қўл-оёги бақувват, кўзи ҳам жойида — кўзойнаксиз гуручни курмакдан ажратса оларди. Шундай экан, зерикмай бўладими? Томорқада у-буға қараган бўлади, кейин чойхонага чиқади. Колхоз унга ўхшаган қарияларни ўйлаб қишлоқнинг четидаги толзорга чойхона қуриб берган. Стalingрадда бир оёғини қолдириб келган Ғулом aka чойхона мудири. Мудир деганинг ходими бўлади. Унинг ҳеч кими йўқ. Лекин мактабдан кейин неваралари галма-галдан қарабиб туришгани учунми, шифтга осилган самовар карнагининг ёнидаги «Спиртли ичимликлар истеъмол қилиш ман этилади» деган плакат остига ўз қўли билан «Чойхона мудири Ғулом Қорабоев» деб ёзиб қўйган. Сулаймон ота илгари бу ёзуvgа парво

қилмасди. Пенсияга чиққандан бери туриб-туриб зардаси қайнайдиган бўлиб қолди. «Ё товба, дунёнинг ишлари кўп қизиқ-да,— дейди, Гулом аканинг самовар атрофида ғимирлашини кузатиб,— оғзидан гапи тушиб кетадиган одам чойхона мудири. Оёғи бутун бўлса ҳам майли эди». Шундай ўйлайди-ю, зарда билан қичқиради:

— Ҳой, чўлоқ! Илгари чойдан урадинг, энди ни ма бало, шамадан ҳам уряпсанми?

Унинг зардасини Гулом ака тушунади. Шунинг учун, жўрттага ярасига туз сепади:

— Қари одамга аччиқ чой зиён, ошина. Юрагинг ҳам пенсага чиқай деб туриби. Товонингга қолайми?

— Ҳа, чўлоқ, ўлгудай тилинг заҳар-а!

Гулом ака кулади ва ёғоч оёғини дўқиллатиб, ўртогига янги чой олиб келади.

Чойхонада кўпинча иккаловидан бошқа ҳеч ким бўлмайди. Ким ҳам бўлсин? Ҳамма ишда. Қариялар ҳам. Борлари ҳам уйдан чиқолмайди. Кўрпа-ёстиқ қилиб олишган. Фақат Холпаранг билан Ҳакимбек ака келиб туришади. Улар келган куни Сулаймон отанинг дили ёришади. «Ҳар ҳолда ёлғизмасман-ку!» ўйлайди у. Уч сўм-уч сўмдан йигиб Гулом чўлоқнинг неварасини дўконга юборишади. Холпарянг ота ошга уста. Илникдек қилиб юборади. Ош пишгунча гап, гап, гап. Улар эсламаган воқеа, улар эсламаган одам қолмайди. Жуда бўлмаса, Акбарқорининг ашуласини хиргойи қилишади:

Бог аро қўйсам қадам,  
Гул гунча қилмай хандадур...

Намозгарда ошни ейишади. Кейин битта-битта юриб, ҳар муюлишда тўхтаб уйга қайтишади. Сулаймон ота ярим кечагача мижжа қоқмайди. Чарчамаган одамга уйқу келармиди? Уч-тўрт бор ҳовлига тушиб, олис-олисларда итларнинг хуришига, чигирткаларнинг одамни элитадиган чириллашига қулоқ солади, яна уйга кўтарилиб, ўрнига чўзилади. Пенсияга чиқибдики, ҳар куни шу аҳвол. Томорқа, чойхона, уй...

Бир куни тўрт оғайни одатдагидек чойхонада ўтиришган эди, омбор мудири Мирвосиқ келиб қолди.

— Отахонлар, бир илтимос бор эди,— деди у уя-

линқираб,— чўча Маруся ётиб қолди. Балнийсага ташлаб келдим! Шу... ўрнига вақтингча биттангиз туриб турмайсизми?

— Мен тураман-да!— деди шошиб Холпаранг ота.

— Бекор айтибсан!— деди чимирилиб Ҳакимбек ака.— Олдингдаги чойни зўрга кўрасану, қоровуллик қила олармидинг? Мен тураман!

— Ия! Ҳе!— тутақиб кетди Холпаранг ота.— Ҳали кўр бўлиб қолдикми? Заҳарингизга биз қилган ошни ейсиз-ку?! Сулаймон! Чўлоқ! Эшиттиларинг-а? Мен кўрмишман. Ўзинг кўр!

— Мен кўр?— баттар чимирилди Ҳакимбек ака.

— Ҳа, кўрсан! Сарсонбойнинг жанозасида ўқариққа шалоплаб тушиб кетганингни ўзим кўрганман!

— Бўлди, бўлди!— уларни тўхтатди Сулаймон ота.— Иккаловинг ҳам турмайсанлар!

Ҳакимбек ака ҳам, Холпаранг ота ҳам гаплари оғзида қолиб, ўртоқларига қараашди.

— Иккаловинг ҳам турмайсан,— қайтарди Сулаймон ота.— Пенсияга ким олдин чиққан бўлса, шу турди. Мен олдин чиққанман, мен тураман.

У, гап тамом, дегандек ўрнидан турди.

— Юринг, ўғлим!

Ҳеч нарсага тушунмай анграйиб турган Мирвосиқ беихтиёр унинг кетидан йўлга тушди. Холпаранг ота билан Ҳакимбек ака бўзрайганларича уларга тикилиб қолишиди.

Сулаймон ота ўша куниёқ ишга тушди. Кампир уйдан эски намат, қумғон, қанд-қурс олиб келди. Кета туриб:

— Мени шарманда қилдингиз,— деди.— Қариганда қоровул бўлмай кетинг. Ҳамма чоллар бинойидек уйида кечаси.

— Жаврама!— жеркиб берди Сулаймон ота, кейин ўзича ҳазил қилди:— Нима, ё ёлғиз ёттани қўрқасанми?

— Вой, суюлмай кетинг сиз! Тўкилиб кетай деб турибсиз-ку, бошимга ураманми?

— Бўлди, бўлди, жўна!— деди Сулаймон ота гап тополмай.

Кечаси Холпаранг билан Ҳакимбек ака келишиди. Катта пахталик тўнни елкасига ташлаб милтиқ кўта-

риб олган ўртогига Холпаранг отанинг роса ҳаваси келди.

— Аммо лекин бизни ёмон туширдинг,— деди у алам билан.

— Куппа-кундузи шилдинг,— қўшилди Ҳакимбек ака.

Сулаймон ота ичида уларга ачинса ҳам, сир бой бермади.

— Ҳа, энди юрганники эмас, буюрганники.

— Омадинг бор экан,— деди Ҳакимбек ака.— Эртага чиқасанми?

— Қаёққа?— тушунмагандек сўради Сулаймон ота.

— Қаёққа бўларди, чойхонага-да. Неварам Абду-саттор Андижондан девзира олиб келибди.

— Энди билмадим, бек,— деди Сулаймон ота салмоқланиб,— хизматчилик. Бўш вақт топсам, бораман. Бўлмаса, узр.

Омбор ҳовлисида нимадир лип этди.

— Ҳой! Ким бор?

Сулаймон ота шундай деб қоронғилик ичида гойиб бўлди.

— Ҳа...— деди ўйланиб Холпаранг ота.— Ростакам қоровулнинг ўзи.

— Нимасини айтасан.

Икки ўртоқ ҳафсаласизлик билан ўринларидан туришди.

Сулаймон ота эртасига чойхонага чиқмади. Индинига ҳам. Қандай чиқади? Кундузи уйда, ҳали у, ҳали бу. Кечқурун омборга йўл олади. Зерикиш қаёқда? Шундай, ўзидан, ишидан кўнгли тўлиб туппа-тузук юриб турвиди, қўлида милтиқ, елкасида қоровулларнинг узун пахталик чопони, бирдан фалокат — лаънати қайси ковакда яшириниб ётган экан — маҳкам ёпишди-қолди.

Ўша куни у жуда курсанд эди: Маруся хола касалхонадан чиқиб, шаҳарга, ўғлиникига кетибди. Баҳоргача қайтмас экан. Чол шу хабарни эшилди-ю, гайратига гайрат қўшилиб, боққа ўтди. Пиёз ўтади, гармдорининг тагини чопди. Кейин памилдорини таёқчаларга боғлай бошлади. Тушлик пайти невараси югуриб келиб қолди:

— Катта дада! Сизни Холпаранг амаким чақирвоттилар! Фермага борамишсиз!

— Нега?— ҳайрон бўлди Сулаймон ота.— Бекорчи одам фермада нима қиларкан?

— Билмадим. Дарров келсин, дедилар.

У фермага борганды, Холпараптот пойга учун бокилиб қўйилган отларнинг оғили ёнида эски яшикда чордана қуриб ўтиради.

— Ҳа, узилиб қолдингми? — сўради Сулаймон ота унинг оғзи қулоғига етган башарасига тикилиб.

— Кўрмаяпсанми? Ҳайдаралининг ўзи тайинлади, — Ҳайдарали колхоз раиси эди. Сулаймон ота кулди.

— Ҳа, энди сув йўғида таяммум, — Сулаймон ота шундай деди-ю, ичидаги ўртоғига ҳаваси келди. Ҳар ҳолда бу иш, кечаси билан қаққайиб ўтириш эмас. Шундай бўлса ҳам, сир бой бермай, кулиб қўйди: — Қашлағич ҳам бердими?

Холпараптот гижинди, лекин жанжаллашгиси келмади.

— Ҳаммасини берди, ошна. Супурги ҳам бор. Белкурак ҳам. Томорқаннга энди гўнг керак бўлса ҳар битта аравакашга ялиниб юрмайсан. Бир аравами, икки аравами, ўзим олиб бориб бераман. Яхшисидан, тилласидан.

Холпараптот шундай деди-ю, охири чидолмади, узуб олди:

— Ҳафа бўлма, ошна, бу сенга Марусянинг қоросулхонаси эмас, расмана эркакларнинг иши.

— Шундоқ дегин?

— Кўриб турибсан, ошна, кўрмассан-ку!..

— Ҳа, ишинг яхши, — маъқуллади Сулаймон ота. — Фақат эҳтиёт бўл.

— Нима демоқчисан?

— Боқувда турган отлар, билиб бўлмайди, қайси алвости экан бу деб, иккинчи кўзингни ҳам ишдан чиқаришмасин.

Холпараптот отанинг чап кўзига ўтган йили оқ тушган эди. Шунинг учун ўртоғининг бу гапидан ижирғанди-ю, ўзини эшитмаганга солди.

— Сани чақирганим, ҳозир келиним ош олиб келади. Девзирадан. Биз энди ишлик одам, вақт йўқ чойхонада юришга. Юр, сейлон чой дамлаганман.

Сулаймон ота ўртоғининг олдидан қоронги тушганда қайтди. Уйда овқат емади. Милтиғини елкасига осиб, омборхонага жўнади. Соат ўнларда Мирвосиқ омбор дарвозасини қулфлаб уйга кетди. Сулаймон ота омбор

жовлисини бир айланиб чиқиб, қумғон тагига тараша қалади, кейин чой дамлаб ичди. Күп ўтмай бутун қишлоқни жимжитлик қоплади. Шу жимжитлиқ әлитдими, ё чой аччиқлик қылдими, күзларини уйқи босди. Сулаймон ота ниманидир «дўп» этганини эшилди. Кўзини очиб атрофига қаради. Ҳеч ким йўқ. «Мушук бўлса керак», ўйлади чол ва яна кўзини юмди. Орадан кўп вақт ўтгани йўқ, кимдир бўғилиб йўталди. Сулаймон ота шошиб ўрнидан турди-да, қулоқ солди. «Бўла қол!» деди кимдир. Овоз омборнинг орқасидан эшилтилди. Сулаймон ота: «Хой!» деганича ўша томонга югурди. Бориб, қай кўз билан кўрсинки, иккита барзангি йигит омборнинг бўғотини бузиб, бурчакдаги машинанинг резинка гилдирагини битта-битта десвордан оширяпти.

Сулаймон ота «Тўхта!» деганини билади, биттаси кўзи аралаш мушт туширди. Чол гандираклаб йиқилди. Ётган жойида бенжтиёр милтиқни елкасидан олиб, қичқириди:

— Отаман! Тўхта!

Ўғриларнинг биттаси десвордан сакради, иккичиси ҳам сакрай деганда Сулаймон ота кўзини очди ва ўша томонга милтигини тўғрилади. «Варанг!» этган товуш янгради. Ўғри қорнини ушлаганича десор тагига энгашди.

Омбор жовлиси бирпасда қлий-чув бўлиб кетди. Қаёқ-дантир Мирвосиқ пайдо бўлиб қолди.

— Яшанг, ота! — деди у. — Анчадан бери қўлга туширомлай юрувдик.

— Ўқ тегди шекилли? — сўради Сулаймон ота ҳамон боши лўқиллаб.

— Баттар бўлсин!

Ярим соат ўтар-ўтмас райондан «тез ёрдам» машинаси келиб, ўрини олиб кетди. Шаҳодат хола эса уйқусираган неварасини тўсиб, ҳўл пахтани эрининг кўкариб кетган кўзига босди.

Эртасига бутун қишлоқ Сулаймон отанинг уйига ёпирилди. Ҳамма уни мақтади. Ўртоқлари — Холпаранг ота билан Ҳакимбек aka ҳам чин юракдан табриклишди.

— Чумчуқдек юрагинг бўлса керак, деб юардим, маладес! — деди Ҳакимбек aka.

— Ўғри от эмас, дўстим, — деди Холпаранг ота фермадаги гапга шама қилиб, — дуч келган жойинингга

тепмайди, пойлайди. Күзни эхтиёт қил. Ичимиизда бутунимиз сенсан!

Сулаймон ота тишини-тишига қўйди-ю, индамади.

Раис келди. Барча колхозчиларнинг номидан тўн кийгизди.

— Сиз ҳазилакам ўғриларни тутганингиз йўқ,— деди.— Улар — колхозга икки минг сўмдан ортиқ зиён келтиришган, уч марта омборни шипиришган эди. Раҳмат.

Сулаймон ота кўзи боғлиқ бўлса ҳам, кечгача янги куёвдек юрди, кампир, ўртоқлари ҳам уни ўтқазгани жої толишолмади. Кечқурун эса невараси, ўғри касалхонада ўлиб қолибди, деган хабар топиб келди. Ҳеч ким, айнпұса, Сулаймон ота, бўни кутмаган эди. Тун бўйи мижжа қоқмади. Камлирининг:

— Бўлди энди, куйганингиз билан тирилиб келарми? Ўз бошини ўзи едп,— деганига ҳам қулоқ солмади.

Икки кундан кейин суд бўлди. Сулаймон ота аввал беш йилга, кейин, кексалиги назарга олинниб, уч йилга кесилди. Бундай бўлишини билганда Сулаймон ота, ўғрилар омборни ўшириб кетишса ҳам, лом-мим демасди. Лекин начора? Фалокат оёқ остида туради деб шуни айтадилар-да.

— Ота, бир оз сабр қилинг,— деди Ҳайдарали ҳукмдан кейин.— Мен бунни бу аҳволда қўймайман. Милтиқ бериб қўйгандан кейин бир кунмас-бир кун у отилади-да.

Сулаймон ота караҳт эди, эшитмади. Эшитса ҳам нима дерди? Сабрдан бошқа иложи бормиди. У суддаги ҳамма гапга тушунди, фақат биттасига тушунмади. Суд раиси: «Тўрт хил қоровул бор. Шунинг учтаси отиш ҳуқуқига эга. Тўртинчиси эга эмас. У фақат милтиқ билан қўрқитиши мумкин. Сулаймон ота шу тоифага кпради»,— деди. У шу гапга тушунмади. Бу гапни қамоқхона ўз уйидек бўлиб қолган Саша, Тўлаган олифта каби азаматлар ҳам тушунтириб беришолмади. Бўлмаса улар жиноят кодексини сув қилиб юборишган. Тушунтиришмаса ҳам чолнинг кўнглини олишиб:

— Ўзингизни әзманг, ота,— деди Тўлаган олифта.— Баг-буглашиб юрасиз биз билан. Иннайкейин, унинг ўзида айб. Соғ қолганда, балки бўйнишга оларди.

Секин келиб қўлингиздан миљтиқни олиб қўймайдими,  
иши битгандан кейин девордан улоқтирмайдими? Уста  
кўрмаган экан-да.

— Қайдам, болам,— деди ўпкаси тўлиб Сулаймон  
ота.

— Қайдам эмас, ота, рост,— деди чирт этиб туплаб  
Сашка.— Уста кўрмаган. Бизнинг қўлга тушганди, бир  
йилда одам қиласардик! Сиз ҳам тинч эдингиз ўшанда, у  
ҳам айшини суриб юрарди. Ўзидан кўрсин. Сиз эзил-  
манг, ота. Ҳукмни бекор қилишади. Мени айтди дер-  
сиз. Фақат нобоп судга тушиб қолибсиз-да. Бир оз чи-  
дайсиз энди.

Сулаймон ота чидади. Аммо эрталаб ҳам, кечқурун  
ҳам беихтиёр кўзига ёш келаверади. Шу аҳволда уч ой  
ўтди. Бутун қишлоқ келиб-кетди деса бўлади шу вақт  
ичида. Холпаранг ота билан Ҳакимбек aka ҳам аввал  
тез-тез келиб туришди. Учинчи ойга ўтганда бирдан  
келмай қолишди. Сулаймон ота хафа бўлди, кейин ка-  
сал-пасал бўлиб қолишдими, деб хавотир олди.

— Улар тинчми?— сўради бир кун кампири кел-  
ганди.

— Отдек юришибди,— деди кампир зарда билан.—  
Иш топишибдими, кунда шаҳарга қатнашади. Энди,  
шуларни ҳам ўйлайсизми?

— Сўрадим-қўйдим-да,— деди Сулаймон ота ран-  
жиб.

— Ҳайдарали салом деб юборди. Яна ариза билан  
юқорига чиқармиш. Мирвосиқ ҳам суд қайнисига уч-  
раб келибди.

— Гапирма ўшани!— жеркиб берди Сулаймон  
ота.— Ҳамма ишни ўша қилди, ҳажиқиз!

Учинчи ой ҳам тугади. Ҳеч қандай янгилик бўл-  
мади. Сулаймон ота ҳаммадан эрта туриб чой қайната-  
ди. Лагернинг қабулхонасини супуради. Одамлар иш-  
га кетгач, яна бакка сув солиб олов қўяди. Бир куни  
тушлиқка чой қўйиб, энди нима қилсан экан, деб тур-  
ган эди, лагерь бошлиғи чақириб қолди:

— Ота, сизга қозоқ келди,— деди у,— энди озодсиз.  
Сулаймон ота анграйиб қолди.

— Рост, ота. Озодсиз.

— Кет... кетавурайми?..— сўради тутилиб Сулай-  
мон ота.

— Марҳамат.

Сулаймон ота баракка югурди. Лекин ҳеч нарсаси-  
ни олмади. Фақат чононини елкага ташлади.

Күчага чиққанида, толнинг соясида икки киши ту-  
парди. Сулаймон ота таниди. Булар — Ҳакимбек ака  
 билан Холпарапт ота эди. Юраги қинидан чиқиб ке-  
тай деди.

— Ҳаким?! Холпарапт?! — деди кўзи ёшга тўлиб.

— Нима, ўлди девдингми? — деди Холпарапт ота.  
Уч оғайнини қучоқлашиб кўришишди.

— Нега келмай кетдиларинг? — чимирилиб сўради  
Сулаймон ота.

Ҳакимбек ота катта идораларда юришганини оғзи  
тўлиб айтмоқчи эди, Холпарапт ота туртиб қўйди:

— Ҳа, энди, қариллик-да, ошна,— деди вазминлик  
 билан.— Шунга ҳам хафа бўласанми? Айтгандай, су-  
юнчи бер!..

— Хўш? — сўради Сулаймон ота.

— Маруся бутунлай келмасмиш. Ўғли олиб қолиб-  
ди.— Учалови кулиб юборишди, кейин чопонларини ел-  
кага ташлаб йўлга тушишди. Катта кўчага чиқишган-  
да, Ҳакимбек ҳам Акбарқорининг ашуласини бошлаб  
юборди:

Боғ аро қўйсам қадам,

Сулаймон ота илиб кетди:

Гул гунча қилмай ҳандадур...

— Бизнинг бобой-ку! — деди девор орқасида ғишт  
ташиётган Сашка.

— Худди ўзи!

Тўлаган олифта ҳавас ва ҳандайдир юракни чимчи-  
ловчи алам билан ашула олислагунча қулоқ солиб  
турди.

## В Е Л А

Велинград — Родопи этагидаги яссиликка жойлашган кичкина шаҳар. Ўтган иили Болгарияга борганимда шу шаҳарда ҳам бўлдим. Уни, албатта, қанчадан-қанча тарихий воқеаларнинг гувоҳи бўлган Улуғ Тирново ёки Плевенъ билан солиштириб бўлмайди. Унда на ярим белигача ерга кўмилиб ётган христиан черковлари бор, на олтин қўймаларни эслатувчи, ҳамон сайёҳлар эътиборини тортувчи тор ғишин ўйллару, на турк бекларининг жимжимадор пёштоқлари кўчанинг ярмигача туртиб чиққан сербўёқ ёғоч қасрлари бор. Ҳамма бинолар оддий, содда ва деярли бир хил, фақат шаҳарнинг қоқ ўртасига тушган тўрт қаватли меҳмонхонагина ажralиб туради. Олди чорси майдон, атрофи гулзор, майдон ўртасидаги каттагина ҳовуздан мис қурбақа гулзорга сув пуркаб турибди. Бино деворлари бошқа иморатларнидек силлиқ эмас, қандайдир ҳайвонлар, уларни қуввлаб кетаётган тош давр овчилари расмлари билан безатилган. Мени шу меҳмонхонага жойлаштиришди. Ювиниб, кийимларимни ўзгартириб, пастга тушдим. Кун пешиндан оққан эди. Ёз келганига қарамай, ҳаво салқин. Шамол ғувиллаб турибди. Бирнас майдонни айланиб меҳмонхонага қайтдим.

— Шаҳримизни кечқурун томоша қилинг,— деди администратор хонамга кўтарилаётганимда.— Ҳали у янги. Фақат одамлар, чироқлар билан чиройли. Ҳозир ресторангга киринг. Бизда яхши қаҳва тайёрлашади. Бутун Болгарида бундай қаҳва ичолмайсиз.

Мен у айтгандай қплдим. Ресторанда икки-уч кек-садан бошқа ҳеч ким йўқ эди. Администратор айтганича бор экан. Чиндан ҳам қаҳва яхши эди. Бети юпқа қаймоқ тортган тўқ шоколад тусидаги бу ичимликни ичар эканман, чарчоқларимни унутдим, кўнглимнинг бир четини хижил қилиб турган олис сафар ғашлиги йўқола бошлади. Ўзимча, шундай жойларни ҳам кўриш керак, гўзаллик ва тарих фақат қадимий, машҳур шаҳарларда әмас, деб ўйладим, деразага тикилдим. Икки томонида олхўри қизариб турган йўл тоққа тулашиб кетган. Унда ҳеч ким кўринмайди: на одам, на биронта машина. Олиса фақат қор босган кумуш қоялар ялтирайди. Улар ҳисобсиз, бири кетидан иккинчиси туртиб чиқсан, худди мармар зинаюяларга ўхшайди. Кун оқсан сари бу зиналар бирин-кетин қорайиб, гўё кимдир гилам тўшаётгандек туюлади. Гиламнинг эса чегараси йўқ, борган сари у сизга яқинлашиб, оёгингиз остига пояндоз бўладигандай... чўзилади, чўзилади, аммо етиб келмайди. Мен шу манзарага қараб, тоғли шаҳарнинг ҳам ўзгача ҳусни борлигини, қайтарилмайдиган, ҳеч қандай бошқа жойга ўжшамайдиган ҳусни борлигини кўрдим ва шу кичкина шаҳарга келганимга энди ачинмай қўйдим.

— Қалай, қаҳва дурустми?

Ўгирилдим. Тепамда администратор турарди.

— Зўр.

— Мен сизга айтдим-ку, бутун Болгарияда бундай қаҳва топилмайди. Яна ичасизми?

— Раҳмат. Назаримда...

Администратор гапимни кутмасдан официантга ишора қилди.

— Ўтиринг ўзингиз ҳам,— дедим ёнимдан жой кўрсатиб.

У, йўқ, демади. Танишдик...

— Нега бошқа жойда бундай тайёрлаша олмайди?

— Бу одамга боғлиқ, ҳар кимнинг қўлидан кела-вермайди. Пейчонинг ўзи тайёрлайди бизда қаҳвани. Эҳ-ҳа, унинг таърифи сизларга, Москвага ҳам кетган. Бай Васильнинг шогирди-да, у ахир!

Мен Пейчо ким, Бай Василь қандай одам, мутлақо хабарсиз эдим. Суриштиргани эса — у шундай ишонч са Эйнштейн ҳақида гапиргандай қатъият билан гапирди — уялдим, кулиб қўя қолдим. Қаҳва келди.

Эътирозимга қарамай, Эмиль — янги танишимнинг исми шундай эди — иккита конъяк буюрди.

— На зраве,— деди у.

Уриштиридик. Эмиль ўзи ҳақида гапирди. Шу ерда туғилган экан. Софияда савдо техникумини битириб, яна шу ерга келибди. Яқинда уйланибди. Янги уй олибди. Таклиф қилди. Мен ҳам ўзим ҳақимда гапирб бердим. Бир-икки ойдан бери Болгарияни айланиб юрганимни айтдим. Эмиль жуда қувноқ йигит экан. Бир қанча латифалар айтиб, кулдирди, Москвада бўлганини, метрога тушиб, кун бўйи чиқолмай юрганини кула-кула ҳикоя қилиб берди. Яна ичдик. Хаёлим Бай Василда эди, аммо Эмиль у ҳақда чурқ этмасди. Ниҳоят, чидай олмадим:

— Ну, бояги айтган қаҳвачингиз, Бай Василь ким?

Эмиль бирдан жиддийлашди, қалин қошлари чимирилиб, бир оз ўйланиб қолди.

— Веланинг отаси, менинг тогам — Бай Василь,— деди кейин маъюс оҳангда.— Улиб кетди. Қирқ тўртинчи йили уни ўлдиришди. Велани ҳам ўлдиришди. Шаҳримиз унинг номига қўйилган...

Эмиль жимиб қолди. Назаримда, у ўша мудҳиш ийилларни эслаб кетди. Ирик қўллари мушт бўлиб туғилди, кўзлари газабга тўлиб, ёна бошлади. Кейин ўзини босиб сигарет тутатди.

— Вақтингизни олмаялманми?

— Мутлақо! — дедим мен.

— Беш ёшларда эдим ўшанда,— Эмиль ҳикоясини бошлади.— Ҳаммамиз ёнма-ён турардик. Бир ҳовлида тоғамгилар, бир ҳовлида биз. Унда бу жойлар кичкина бир қишлоқ эди. Мана шу меҳмонхонанинг ўрнида черков бор эди. Ярми тошдан, ярми ёғочдан қурилган кўримсиз бир черков. Қирқ тўртинчи йили фашистлар ўт қўйиб юборишли унга. Ичida партизанлар бор эди. Ўнтача одам. Ҳайтовур омон қолишиди. Қизил аскарлар келиб қолишиди. Ҳай, гап бунда эмас. Немислар сизларга ҳужум қилганидан кейин, бутун Родопини партизанлар босиб кетди. Шундай бўлиши табиий эди. Биринчидан, халқ әзилган, иккинчидан — қайси бир болгар русларга қарши уришарди, дейсиз? Бундай бўлган эмас, икки дунёда бўлмайди ҳам. Ўшанда, қишлоғимиизда қурол ушлашга ярайдиган битта ҳам эркак

қолмади. Ҳаммаси тоққа чиқиб кетди. Менинг отам билан Бай Василь ҳам кетди. Ҳафтада, ойда бир кўрадиган бўлиб қолдик уларни. Лекин партизанлар ҳақида кўп эшитамиз. Ҳали қурол-яроғ ортилган эшелон издан чиқиб кетибди, деган хабар келиб қолади, ҳали қамоқхона портлаб кетибди, қамоқдагилар қочибди, дейишади. Ким қилган бу ишларни, ҳеч ким билмайди, билса ҳам ўзини билмаганикка солади. Қишлоқнинг теласидан ҳарбий йўл ўтган. Шу йўлда иккита ўқ-дори ортилган машина портлаб кетгандан кейин, қишлоқни полицайлар босиб кетди. Кечқурун коронги тушпши билан ҳеч ким кўчага чиқолмайдиган бўлиб қолди. Ким чиқса отилади, деган буйруқ. Биз ўзимиздан эмас, тоғдагилардан хавогир ола бошладик. Келиб қолиша нима бўлади? Қўлга тушишлари аниқ. Лаънати полицайлар нима қилишган денг? Ҳаммаси хонадонларга бўлинган. Кеч бўлди, уйнинг тўрига кириб ётиб олади. Ҳеч кимни ташқарига чиқармайди. Чиқарса ҳам, бирга чиқади. Шунинг учун эрталабгача қишлоқда нима бўляпти, ҳатто қўшнимизникида нима бўляпти, билиб бўлмайди.

Бир куни эрталаб Вела бизникига чиқди. У мендан анча катта эди. Ўн олтиларда эди. Ойим билан гаплашиб ўтириб, Спас амаким тинч, деб қолди. Бу гапни мендан яшириб айтди, албатта, лекин эшитиб қолдим. Югуриб бориб уни қучоқлаб олдим.

— Қачон келадилар? — сўрадим суюниб.

Ойим нима дейишини билмай, лабини тишлади.

— Ҳеч кимга айтмайсанми? — сўради Вела хавотирланиб.

— Нон урсин, айтмайман!

— Яқинда, — деди Вела. — Лекин, билиб қўй, мен гапирмадим, сен эшитмадинг.

Хўп, дедим. Лекин шу куни кечқурун мудҳиш воқеа юз берди. Ойим билан мен ётувдик. Полицай ошхонада тимирскиланиб юрувди, отишма овози эшитилиб қолди. Кейин аёл кишининг қичқириғи эшитилди. Дарров танидим. Бу Вела эди. Сакраб ўрнимдан турдим. Ойим ҳам турдилар. Эшикка энди қадам қўювдиларки, полицай қичқирди:

— Қаёқقا?! Тўхта! Орқага қайт.

— Қўшнимизникида бир нарса бўлганга ўжшайди, — дедилар ойим. — Хабар олайлик.

— Мумкин эмас! — ўшқирди полицай.

— Жияним ахир. Инсофинг борми?

— Мумкин эмас, деяпман. Бор жойингга.

Биз ноилож ётдик. Аммо тоңгача мижжа қоқанымиз йўқ. Эрталаб ҳаммамизни черков ёнига тўплашди. Шунда, кечаси Бай Василь қишилоққа келиб қўлга тушиб қолганини эшитдик. Уни ўлдиришибди. Бизни черковга олиб келишганда, унинг ерда тупроққа беланиб ётганини кўрдим. Ҳамма йигилгач, қўллари боғлиқ Вела билан унинг онасини олиб келишди.

— Кўринглар,— деди немис офицери.— Булар партизан. Агар ким бизга қарши бўлса шу ҳолга тушади. Ҳозир уларни сизнинг олдингизда сўроқ қиласиз. Партизанларнинг қаердалигини айтиб беришса, озод қиласиз. Айтишмаса, шу ерда осилади.

У шундай деб, Марина холага яқинлашди.

— Хўш, айт, эринг қаердан келди? Отряд қаерда?

— Билмайман,— деди Марина хола. Унинг иккала кўзи эрининг мурдасида эди.

— Ёлғон!— қичқирди офицер.— Бласан. Айт. Айтмасанг, эрингнинг ҳолига тушасан.

— Билмайман.

Офицер уни ура бошлади. Бечора Марина хола бошини қаёққа беркитишни билмасди. Офицер уриб чарчади. Шунда кўмирнинг олдига чўғ солинган чеълак келтиришди.

— Кўряпсанми?— деди офицер.— Айтмасанг, қиздирилган темирни оёғингга санчамиз.

— Билмайман,— деди яна Марина хола.

— Шундайми! Аблаҳ!

Офицер милтиқ наизасини чўққа тиқди.

— Тўхтанглар!— қичқириб юборди шу пайт Вела.— Ойимга тегманлар. Ойим билмайди ҳеч нарсани!

— Сен биласанми?— сўради офицер.

— Ҳа,— деди бошини эгиб Вела.

Ҳамма ҳайрон бўлиб қолди.

— Вела!— кучини тўплаб қичқирди Марина хола.— Эсингни едингми? Агар айтсанг, сендан юз ўгирман.

Вела жавоб бермади. Офицер унга яқинлашди.

— Айтасанми?

— Ҳа, дедим-ку!— деди Вела ҳамон бошини кўтар-

май.— Үзим бошлаб бораман. Фақат... фақат онамга тегманглар.

Офицер уни ечишни буюрди. Шу пайт:

— Сотқин!— қичқирди кимдир оломон ичидан.

Кимдир тош отди. Тош шуидай Веланинг пешанасига тегди. Тирқираб қон оқа бошлади.

— Тарқал!— офицер шундай деб, полицайларга буйруқ берди.

Ҳаммамизни қўй ҳайдагандек ҳайдай бошлаши. Ҳамма хуноб эди, ҳамма Веладан нафратланарди. Онам ҳам газабдан ёниб, уни қарғарди. Үзингиз ўйлаб кўринг, битта Веланинг сотқинлиги қишлоғимиздан кетган йигирмадан ортиқ кишининг ёстигини қуритиши мумкин эди. Бироннинг акаси, бироннинг отаси, эри... Бунинг устига, отрядда қанча одам бор? Онам Велани қарғар, айни вақтда бизнинг уруғдан сотқин чикқанидан куярди.

Орадан бир соат ўтар-ўтмас немис офицери бошлиқ полиция отряди Велани ўртага олиб, тоғ томон йўлга тушди.

Ўша куни қандай кеч кирганини билмаймиз. Қишлоқ сув қуйгандек жимжит. Үнда полицай қолмаган эди. Фақат черковда Марина холани қўриқлаб қолган бир соқчи бор эди, холос. Тонг отди, кун пешин ҳам бўлди, қишлоқ ҳамон жимжит. Ҳамма тиқ этган овозга қулоқ солади. Кечки пайт от туёқлари дупурлари эшитилди. Ҳаммамиз кўчага отилдик. Бахтни қаранг, қишлоққа партизанлар кириб келишди. Улар орасида отам ҳам бор эди. Дарҳол Марина холани озод қилишди. Бечора' нуқул йигларди ва йиги аралаш қизини қарғарди. Партизанлар ҳеч қандай полиция отрядини кўришмабди. Бўлмаса, Вела йўлни жуда яхши билар экан. Кўп бориб турар экан. Ҳамма яна ҳайрон эди. Вела фашистларни қаёққа олиб кетди экан? Буни ҳеч ким билмасди. Охири отрядни қидиришга қарор қилишди. Ўн-ўн беш кишини қишлоқда пистирмада қолдириб, йўлга тушишди. Икки кун деганда отряд тошилди. Аммо улар ичida Вела йўқ эди.

Вела отрядни адаштирибди. Алданганини билган офицер уни отиб ташлабди. Буни асир тушган полицайлар айтиб беришди.

Эртасига Веланинг ўлиги олиб келинди. Уни отасининг ёнига қўмдик. Бутун қишлоқ мотам тутди ўша

куни. Үшанды гилос энди пишган эди. Вела гилосни яхши күрарди. Қиз бола бўлишига қарамай, дараҳтнинг учига чиқиб терарди. Ҳар гилос пишиғи унинг қабрига бораман, гилос олиб бораман...

Эмиль жимиб қолди. Нималарнидир ўйлаб кетди. Кейин янгитдан сигарет тутатди.

— Болгария озод бўлгач, қишлоғимизни унинг номига қўйдик. Мана энди кичкина қишлоқ шаҳарга айланниб кетди. Қаранг, кеч кирапти, шаҳримиз очиляпти!..

Мен деразага қарадим. Ҳа, у чиндан ҳам очилиб бормоқда эди. Ҳамма ёқ чироқ, минг хил тусдаги чироқлар... Кўча тўла одам. Шўх, қувноқ одамлар! «Яхшиям келдим бу шаҳарга,— дедим ўзимча улардан кўз узмай.— Яхшиям келдим!»

## Т У Н

Ү энди шошнлмасди. Отишмалар анча орқада қолиб кетган ўрмонга эса у орзиқиб кутган қоронгилик чўккан эди. Шундай бўлса ҳам узоқ югуришдан ва ҳалигача бутун вужудини исканжага олган қўрқувдан юраги дукиллаб урас, чарчаган тиззалари ҳар қадам босганида букилиб кетай, букилиб кетай дер эди.

Атроф жимжит. Онда-сонда орқадан ўқ товуши эшитилиб қолади. У шундай яққол эшитилардики, гёё ёнингда отишаёттандек бўлиб юракни баттар гулғула-га соларди. Ҳар ўқ отилганда, у орқасига ўғирилар, аммо оёқлари юришдан тўхтамасди, кучи борича, судралиб бўлса ҳам, олдинга интиларди. Шу алфозда у анча юрди, отишма бутунлай тинди ё унга шундай ту-юлди, дарахтлар орасидан саргайиб бир-иккита юлдуз кўринди. Юрак ўриши бир оз секинлашди. Кичкина бир тепаликка чиққанда, тўхтади, бирпас дам олгиси келди. Аммо ҳамон тарқалмаган қўрқув билан орқа-сига қаради. Орқада ҳеч нима кўринмасди. Ҳамма ёқ қоронгилик ва жимлик ичига гарқ бўлган эди. У буни сабрсиздик билан кутган бўлса ҳам, энди юрагига гулғула туша бошлади. Одатда шундай жимликдан сўнг ҳамма ёқни итларнинг товушлари тутиб кетарди. Немисларнинг ўзларидан кўра итлари уни кўпроқ қўрқитарди. Лагердаги итларни у яхши биларди, қан-ча одам уларга қурбон бўлмади, қочганларнинг деярли ҳаммасини шу итлар топди. Унинг ўзини ҳам биринчи марта қочганда итлар қўлга туширган эди. Бу гал қандай бўлар экан? Наҳотки, яна тутиб олишса? У шуни

ўйлаб ҳозиргина босиб ўтган йўлига тикилди. Қоронги иарда ва соқчилардек қаққайиб турган дараҳтлар танасидан бошқа ҳеч нарса кўринмади, ҳеч қандай товуш ҳам эшитилмади. Шу тоида агар юз чақирим нарида бирон нарса тикилласа у эшитар, бирон нарса ғимирласса, бехато кўрарди. Лагерь ҳаёти унинг бутун вужудини кўз билан қулоққа айлантириб қўйган эди. Шунинг учун ҳам атрофига яна бир қараб чиқиб, бир оз таскин тоиди, аммо ўтирмади. Олдинда, пастликда нишадир ингичка кумуш тасмадек ялтиради. Наҳотки йўл бўлса? У бенхтиёр чўчиб тушди. Ҳозир йўл унинг душманни эди. Шу душман уни яқиндагина шерикларидан ажратди, яна асирикка гирифтор қилди. Қандай бўлмасин, ундан тез ўтиб олиш керак. Дам олиш хаёлидан кўтарилиб, у пастга отилди. Тепаликдан тушганида кумуш тасма йўқолди. Йўқолди-ю, у енгил тортди. Кумуш тасма йўл эмас, жилга эди. Сувнинг оҳиста жилдираб оқаётганини у аниқ эшитиди ва юрагини бениҳоя севинч қоплади. Бир неча ойдан бери у жилганинг овозини биринчи марта эшитиши, бир неча ойдан бери тайёргарлик кўриб келган қочишнинг биринчи марта муваффақиятли амалга ошганига ишониши эди. Шундагина у ниҳоятда чанқаганини, лаблари қуриб, ёрилиб кетганини сезди. У ютинди, аммо ҳеч нарса томоғидан ўтмади. Оғзи қақраб кетган эди. Жилгага етиб келди-ю, энгашди ва шошиб иккала қўлини сувга тиқди. Аммо ҳовучида сув ололмади. Иккала қўли банд, иккала қўлига у таглари ейилиб, эгилиб қолган лагернинг ёғоч кавушларини ушлаб олган эди. Уларни кўрди-ю, тишлари аламдан ғижирлаб кетди: бирпас тикилиб турди-да, бор кучи билан улоқтириди. Кавушнинг иккала пойи қандайдир дараҳтнинг шоҳларига илинди, кейин бирин-кетин дўп этиб, ерга тушди. Шундагина у расмана чўккалаб, қўлларини яна сувга солди, муздек сув тирсакларигача кўмди, ҳовучини оғзига олиб бормасданоқ, вужудини оромбажш соқинлик қоплай бошлади. Юз-кўзи, қуриган лабларида қотган тер шўри аралаш у неча ҳовуч сув ичди, билмайди. Лекин ҳеч маҳал эсини таниганидан бери бунчалик ширин сув ичмаган эди. Жилга унга янгитдан қувват берди, чарчоқлари унутилгандек бўлди. Энди у ҳамма нарсага, ҳатто ўлимга ҳам тайёр эди. Бироқ энди у тириклигича қўлга тушмаслигини биларди.

Шунга ажд қилған әди. Немисларнинг ўзи ҳам энди уни тутиб олишса, омон қўйишишмасди.

Немислар хаёлига келиши билан у яна хавотирланаб атрофга қулоқ солди. Жилғанинг сокин, бутун дунё ташвишларига бефарқ жилдирашидан бошқа ҳеч нарса эшитилмади. Наҳотки қутулган бўлса, у шунга ишонги-си келарди, аммо лагерда орттирилган тажриба, биринчи марта қочгандаги таҳлика умр бўйи олис ўрмон эта-гида қолиб кетган шерикларининг жасадлари ҳали суюниш эрталигидан, ҳали неча марта ўлим унга юзма-юз келишидан дарак бериб турарди. Немислар ҳали тинчишмайди. Ҳозир улар, албатта, бутун лагерни оёққа турғазишади, тирикларни ҳам, ўликларни ҳам тонг отиши билан яна санаб чиқишади, уни топишмагач, ўрмонни тит-пит қилишади, ҳамма постларга, отрядларга хабар беришади, хабар беришгандир ҳам. Бугун эса бўлди, бугун ўрмонга бошқа киришмайди, киришга қўрқишади. Тун қочоқларники. Унга ўхшаганларники. Эртага бошқа гап. Эртага у мабодо қўлга тушадиган бўлса, фақат ўлиги тушади. Эртагача эса ҳали вақт кўп. Бутун тун унинг ихтиёрида.

У шундай хаёллар билан осмонга қаради. Янги ойнинг тақадек ним ранг гардиши гарбда кўринди. Юлдузлар кўпайди. Аммо ҳамон ўрмон ёришмаган, юз метр нарида нима бор, нима йўқ билиб бўлмасди. У ойга қараб тонггача тахминан қанча вақт борлигини ҳисоблаб чиқди ва ўзи кутмаган хотиржамлик билан оёқларини сувга солди. Солди-ю, оғриққа чидолмай инграб юборди. Товонлари ва панжаларига кимдир пичоқ солиб юборгандек бўлди. Дарров тортиб олди. Нега бундай бўлганини у энди билди. Иккала оёғи ҳам олис йўлда тилиниб, тарам-тарам бўлиб кетган әди. Иккинчи марта оҳиста сувга туширганда оғриқ унча билинмади ва беихтиёр, шундай оёқларини тиззала-ригча сувга солиб жилға лабига чўзилди. Туриш кераклигини, бу ердан тезроқ кетиш кераклигини билса ҳам, ҳозир ҳеч қандай куч уни тургаза олмас, уч йиллик уруш, асрлар каби чўзилган даҳшатли асирилик давомида эришган шу биргина дақиқалик оромини бузолмас әди. У роҳат билан кўзларини юмди, аммо ухлаб қолишдан қўрқиб, дарҳол очди, шунинг ўзи, шундай ётишнинг ўзи бир олам баҳт әди. Қанча чўзилар экан бу баҳт? Йилларми, ойларми, кунларми? Е шу

туннинг ўзими? Буни у билмасди, билишни ҳам истамасди. Икки томоқга ёйилган қуш қанотидек қўлларни тагидаги майин, нам майсалар, юмшоқ тупроқ, оёқларидаги ҳар бир мўйни силаб оқаётган бегубор жилга, тепада, сокин осмонда милтиллаб турган юлдузлар, бугундан бошлаб, унинг сирдоши, халоскори, дўсти бўлиб қолган қоронги ўрмон уни олис хаёлларга гарқ қилган эди. Кўз олдига онасининг сурати келди. Нега ўзи эмас? Нега унинг юриш-туриши, ўқишдан келишипи пойлаб, эшик тагида ўтириши, кечалари бир неча марта туриб, устидан сирғалиб тушган кўрпасини тузатиши эмасу, оддийгина, бозордаги беш минутлик омонат суратхонада олдирилган хира сурати келди? Балки бу суратдан онаси унга қандайдир дард билан, сураткашнинг талаби билан кулишга ҳаракат қиласа ҳам, кўзларида ташвиш, чексиз ғам билан қараб турганидандир? Ким билади, балки шундайдир. Ҳар ҳолда бу сурат ҳеч қачон кўз олдидан кетмайди. Ҳозир ҳам шундай бўлди, уни қўлига олиб гаплашаётгандек бўлди. Бир учи эзилган, оддийгина сурат. Бошида оқ дока рўмол, сочи кўринмайди, балки оқариб, докага қўшилиб кетгандир? Кулмоқчи бўлганидан юзидаги ажинлар баттар тортилиб кетган, олд тишлари тушиб, щундай милклари кўриниб турибди. Суратни биринчи марта кўрганинда унинг кўзларидан ёш чиқиб кетди. Ҳам севинди, ҳам раҳми келди. Кейин кўнциқиб кетди. Бўш қолди, уни гимнастёркасининг чўнтағидан олиб тикилади, гаплашади, кейин яна эҳтиётлик билан газетага ўраб, чўнтағига солиб қўяди. Асир тушган куни ундан ажради. Йил бўлди шунга. Шундан бери хаёлидан шу сурат кетмайди. Ҳозир ҳам шу сурат кўз олдига келди-ю, аммо энди у онасига эмас, онаси унга ачиниб тикилаётгандек бўлди. Нега ачинади? Шу аҳволга тушганигами ё ёлғиз ўзи қутулиб кетаётганигами? Бунга у айбдор эмас. Аҳвол шундай бўлиб қолди. Унинг омади келди, бошқаларники келмади. Тагин ким билади, соғ қолганлар ҳам бордир? Балки эртага учрашиб қолишшар?

Унинг хаёли бўлинди. Юрагини яна ғашлик қоплай бошлади.

— Фронт олис, Зиямат. Партизанларга қўшилиш керак.

Лейтенантнинг охирги гапи шу бўлди. Зиямат бош-

ка уни күрмади, овозини эшитмади ҳам. Отишма бошлиниши билан биринчи у йиқилди. Үк шундай орқа миясига тегди.

— Сайдмурсал! Дўстим! — деганича, Зияматнинг гапи оғзида қолди.

Лейтенант кўз юмди. Зиямат уни кўтариб ўрмонга-ча олиб бормоқчи бўлди, лекин:

— Қоч! Эсингни едингми?! — деган овоз уни тўхатди, кимдир елкасига туртди.

У лейтенантнинг буришган ва бирпасда қорайиб кетган юзига қаради-ю, ўрнидан турди, негадир ёғоч кавушларини ечиб, қўлига олди-да, ўрмон томонга югоруди. Олдинда кимдир йиқилди, кимдир овози борича додлади. Зиямат шу овоз келган томонга югорди, аммо кеч қолган эди. Шериги аллақачон жон таслим килган эди. Бошқа ҳеч ким кўринмади. Орқадан «Халът! Халът!» деган овозлар, ўқ товушларн борган сари яқинлашиб келарди. Зиямат аланглаб атрофга қаради. Олдинда чакалакзор кўринди, унинг кетида ўрмон. У бор кучини тўплаб шу томонга югорди. Юз-кўзлари, қўллари тилийниб-тимдаланиб ўрмонга етиб келганди ён-верида ҳеч ким қолмаганини пайқади, қувлаб келаётган немисларнинг чинқироқ овозлари, автомат товушлари эса ҳамон бирдек эштиларди. Зиямат ўпкасини ростламоқчи бўлиб тўхтади ва орқасига ўғирилди, шу заҳоти автомат ўқлари визиллаб шундай боши устидан ўтиб кетди. У шошиб эгилди, ўқлар энди бели устидан визиллаб ўта бошлади. «Тамом! — ўйлади у қўрқув ва қандайдир ўзи англамаган совуқлонлик билан. Шундай бўлса ҳам, у ётди, пешанаси нимагадир дўй этиб тегди, аммо у парво қилмади. Овозлар энди орқадан эмас, чап томондан эштила бошлади, ўқлар тингандек бўлди. Зиямат ўрнидан даст турди-ю, ўнгга қараб югуриб кетди. Кўп ўтмай яна отишма бошланди, итларнинг ҳурши эшитпиди, Зияматнинг юраги орқасига тортиб кетди. У ўқдан кўра итлардан кўпроқ қўрқарди. Унинг назарида ҳозир ўққа чап бериш мумкин эди, итларга эса чап бериб бўлмасди. Улар ис билса бўлди, ўлжасини тоимасдан қўймасди, айниқса, лагердаги итлар шундай эди. У буни кўрган, ҳатто болдирининг бир парчасидан ажралиб, ўз бошидан ўтказган эди. Лагерга келтирилганининг иккинчи куни эди ўшанда.

Улар кун бўйи тош ташишди. Минглаб одам тогни йўнар, гулдираб пастга, жарликка тушаётган тошларни минглаб одам, худди занжирдек тизилиб, илон изи йўлдан тепага олиб чиқарди ва яна шу жарликка, фақат йўлга яқин томонга ташларди. Ярим оч, ярим ялангоч, қилтиллаб ўзидан оғир тошларни кўтартган асиirlар орасида кимлар йўқ эди?! Зиямат уларни кўрди-ю, ваҳми учиб кетди. Унинг назарида бутун дунёning эркаклари шу ерга келтирилиб кишанлангандек эди. Ёнмаён ўтиб қолишганда, киртайган кўзлари демасангиз, ҳамма гўё бир қолипдан чиққан, одам зотидан анча йироқ қандайдир даҳшатли махлуқларни эслатарди. Ҳамманинг соч-соқоли ўсган, ҳаммада олатароқ, ҳам олди, ҳам орқасига рақамлар осилган яғир кийим. Оёқларида тошдан баттар тарақлайдиган ёғоч кавуш... Кечагина улар одам эди, кечагина уларнинг тили бор эди. Бугун эса уларда на тил, на исм бор. Фақат рақам. Зияматда ҳам шундай рақам. У эндиг Зиямат эмас, икки минг етти юз ўн олтили рақам эди. Бундан буёқ у шундай, ўлгунга қадар икки минг етти юз ўн олтили рақам бўлиб қолади. Улим эса узоқ эмас, елкасида турибди. Қочиш керак. Зиямат баракка кириши билан қўланса ҳид димогига урилди-ю, шу фикр миясига қўйилди. Лекин қандай қилиб? Биронта одам юзлаб соқчилар, электр токи юборилган тикан симлар билан ўралган бу дўзахдан қочиб қутулганмикан? Баракда ҳеч ким унинг бу саволларига жавоб бермади. Барак тинч, фақат орқа томонда кимдир инграб йиғларди.

Кун пешиндан оққандан у бутунлай дармони қуриганини пайқади. Ўқ теккан чаккаси қулоги аралаш лўқиллаб оғрий бошлади. Бирпас ўтиргиси келди. Бироқ бунинг иложи йўқ эди. Ит етаклаган автоматли соқчилар маҳбусларнинг ҳар бир ҳаракатини кузатиб турарди. Ииқилганларнинг деярли ҳаммаси ўша заҳтиёқ отиларди.

Зиямат енгилроқ бир тошни кўтариб, елкасига бир амаллаб қўйди-да, тепага юра бошлади, аммо оёқлари қалтираб, юриши секинлашди. «Наҳотки шундай ўлиб кетсам?— ўйлади у хавотирланиб.— Йўқ, чидаш керак, чидаш. Кейин қочаман. Ҳеч ким қочмаган бўлса, мен биринчи бўламан. Унда ўлсам, майли».

Лекин юриш борган сари қийинлашди, елкасидаги

тош оғирлашди. Тепага күтарилганда күз олди қорон-филашди, гандираклаб, тошни ташлашга улгуролмай орқасига гурс этиб йиқилди. Шу заҳоти ит ҳуриди ва оёғига нимадир санчилди. Зиямат ҳовлиқиб ўрнидан туришга интилар, ит эса оёғига маҳкам ёпишганича ирилларди. «Шнель! Шнель!» — қичқирди қоя устидағи соқчи. Кимдир қўлтиғига кирди. Зиямат бир амаллаб ўрнидан турди, ит қайтиб кетди. Қўлтиғига кирган киши тошни елкасига қўйиб қўйди. «Рахмат», — деб юборди Зиямат шунда ўз тилида. Шериги индамади, фақат ўз тошини кўтарганича, «юринг», дегандай олдинга ишора қилди.

Улар тошларни жарликка улоқтириб пастга тушиш-шайтганда, шериги секингина сўради:

- Қаерданси?
- Тошкентдан, Шайхантавурдан,— шундай секингина жавоб берди Зиямат.
- Мен Туркистондан. Воронежда қўлга тушдим. Сиз-чи?

- Курскда. Исмингиз нима?
- Сайдмурсал.
- Менини Зиямат. Бу ер қаер?
- Югославия.
- Атроф ўрмон экан,— Зиямат шундай деб, шеригининг қочиш ҳақидаги фикрини билмоқчи бўлди.

— Партизанлар ҳам бор.

Зиямат уни тушунди.

- Уринмадингизми?
- Ҳозирча чора йўқ. Баракда гаплашамиз.— Сайдмурсал «гап тамом» дегандек, олдинга ўта бошлади.— Чидаш керак. Оёгингиз қон.

Зиямат шундагина ит болдиридан бир парчасини узуб олганини сезди. Бироқ начора? Чидаш керак. У шу фикр билан ўзини босди, зирқираган оғриққа эътибор қилмасликка уринди.

Кеч кириб, жарликни туман қоплай бошлаганда, тепада занг урилди. Маҳбуслар яна занжирдек тизилиб, юқорига кўтарила бошлади. Жарликни айланиб ўтиб, тош йўлга чиқишганда, Зиямат ўнг томони пастлик, қуюқ чакалакзор эканлигини кўрди. «Қочиш керак!» Яшин тезлигига миясидан шу фикр ўтди-ю, беихтиёр ёнига қаради. Соқчи ундан беш метрча нарида әди. Ур-

тада қатор маҳбуслар, Сайдмурсал кўринмади. «Ўзим уриниб кўраман», — хаёлдан ўтказди ва орқасига қараб қўйди. Орқадаги соқчи ҳам беш метрча масофада эди. Қочса бўлади. Фақат биронта муюлиш келганда, шунда олдиндаги ҳам, орқадагиси ҳам кўрмай колиши мумкин эди. Шу хаёл билан у юз метрча юрди. Ниҳоят, у кутган муюлиш келди. Олдиндаги маҳбус айланниши билан, Зиямат бир силтаниб, ўзини чакалакка отди. Гурс этиб тушди-ю, настга думалаб кетди. Автомат тариллади. Итлар даҳшат билан ҳурий бошлади. Зиямат ўрнидан туриб, қаёққа чопишини мўлжаллагунча битта ит этиб келиб, ҳиқилдоғига ёпишди. Кўп ўтмай немисларнинг овозлари чакалакзорни тутиб кетди. «Тамом», — ўйлади Зиямат итнинг бўғзига кучининг борича ёпишар экан.

Лекин у бу гал ҳам тирик қолди. Ҳушига келганида қоронги бир музхонада ётганини кўрди. Қандай азобларни бошидан кечирмади у ўшанда. Бир ҳафта оч қўйишди, калтаклашди. Ҳамма ёғи моматалоқ бўлиб кетди. Жони қаттиқ экан, ўлмади. Бир ҳафтадан сўнг яна тош ташибга ҳайдаб кетишиди.

— Бахтли экансиз, — деди Сайдмурсал уни кўриб. — Омон қолдингиз. Энди менинг буйруғимни күтинг!

Буйруқ бир ойдан кейин келди. Зиямат билмаган экан, лагерда бутун бир ташкилот мавжуд экан. Сайдмурсал унинг раҳбарларидан бири экан. Буни у карцердан чиққан куни кечқурун билди. Баракда йигилип бўлди. Қочиш ва партизанларга қўшилиш, кейинчалик бутун лагерни озод қилиш лейтенант Сайдмурсал Худойберганов бошлиқ коммунистларга тоширилди. Қочишиш картошка ковлагани олиб чиқиладиган кунга белгиланди. Картошка ўрмон этагига экилган эди. Ниҳоят шу кун этиб келди. Немислар эллик кишини машиналарга босиб олиб кетишиди. Зиямат ҳам шулар орасига тушди. Кун ботгунча ҳамма жон-жаҳди билан ишлади. Лекин ҳамманинг кўзи Сайдмурсалда эди. Немислар уларнинг берилиб ишлаётганинни кўриб, тушдан кейин анча бенарво бўлиб қолишиди. Кун ботганда Сайдмурсал сигнал берди, ҳамма ўзини чакалакзорга ўрди. Зиямат ёнида турган соқчини юз-кўзи аралаш тушириб, йиқитди-ю, шериклари кетидаи юурди...

Зиямат ўрнидан турди. Оёқларининг оғриғи қолган,

бош оғриғи ҳам анча тинган әди. У чүкүр нафас олдиді, осмонга қаради. Ой тиккага келибди. Демак, тун әнди ярим бўлибди. Ҳали вақт кўп, тонггача у анча йўл босиши мумкин. Лекин қаёққа юради? Партизанлар қайси томонда? Буни у билмасди. Ҳамма ёқ қоронғи. Бегона ўрмон, бегона ер. Бироқ у әнди анча тинч әди. Ҳар ҳолда әнди у эркин. Эркинликда ўлим ҳам хавфли эмас.

У жилгани тиззасигача сувга ботиб кечиб ини ва биринчи марта енгил нафас олиб йўлга тушди.

## МЕН РУСМАН

Тонгга ҳали эрта әди. Ўрмон ҳамон тун қўйнида, чурқ этган товуш эшитилмасди. У тўнгакларга, шожшаббаларга қоқилиб-қоқилиб борар экан, тонгда қаердан чиқиб қолишини ўйларди. Ўрмон тугаб, биронта қишлоқ чиқиб қолармикин, ё тоққа туташиб кетармискан? У кўпроқ, иккинчисини, жуда бўлмаганда, ўрмоннинг тугамаслигини истарди. Қишлоқда немисларнинг бўлиши турган гап. Балки унинг атрофида соқчилар ҳам бордир. Ҳа, албатта, немислар соқчи қўймаса тинчмайди. Ишқилиб, қишлоқдан чиқиб қолмасин, унда ҳамма уринишлари барбод бўлади. Партизанларнинг эса қишлоқ ёки унинг атрофида бўлиши мумкин эмас. Улар ё тогда, ё ўрмонда. Ким билади, балки тонггача уларга дуч келиб қолиши ҳам мумкин. Кошики әди шундай бўлса!

Аллақаерда паровоз жон ҳолатда қичқирди. Зиямат диққат билан қулоқ солди. Гудок, афтидан, орқа томондан эшитилди. Наҳотки, лагерь шунчалик яқин бўлса? Анча йўл босди-ку! Унинг юраги орқасига тортиб кетди. Назарида, адашиб кетиб, бир жойда айланашётгандек туюлди. Лагердан қочишга қочиб, тамом қутулай деганда, наҳотки яна қўлга тушса?! У шундай ўйлаб, атрофга ҳадиксираб қаради. Йўқ, ҳеч нарса билиб бўлмайди. Ҳамма ёқ дараҳт, арча, қора қайнин, яна қандайдир дараҳтлар... Лагерь ёнида ҳам шундай әди, бу ерда ҳам шундай. Йўқ, у адашмаган, юлдузларга қараб юрди-ку! У танлаган юлдузлар ҳамон олдинда. Йўқ, адашмаган. Иннайкейин, адашган бўлса, ит-

ларнинг овозиётини эшиштарди. Улар тұн бүйін тинмай ақиллайды. Бу фикр унга анча далда бўлди, қадами ни тезлатди. Бир чақирикимча юргандан сўнг, ўрмон сийраклашди, ой бир оз оқариб, дараҳтларнинг учларида кўкимтири турун кўринди. Тонгга яқин қолибди, ўйлади Зиямат.— Олдинда нима экан — йўлми ё қишлоқ? Нима бўлса ҳам сироқ билган маъқул. Шу хаёл билан у чопиб кетти. Лекин ярим чақирикимча ҳам юргани йўқ эдики, кенг асфальт йўл устидан чиқиб қолди. Шу заҳоти орқага қайтди, юраги дукиллаб ура бошлади, пешонасини совуқ тер қоплади. Яхшиямки, биронта постга тўғри келмади. Энди нима қилиш керак? У ўйга толди.

Чиндан ҳам унинг олдида жиҳдий муаммо туарди. Йўл бўйлаб бориш керакми ё уни кесиб ўтиб, тўғрига — ўрмон ичидан жетиши керакми? Йўл тўппа-тўғри уни немислар қўлига олиб бориб топшириши аниқ эди. Аммо тўғрида нима бор? Йўл айланиб, шу ёққа ўтган бўлса-чи? Тоғли жойда тўғри йўл камдан-кам бўлади. Шундай бўлса ҳам у тўғри йўлни кесиб ўтишга қарор тилди. Оҳиста ўрмондан чиқпб, йўлга қаради. Йўл жимжит, қора асфальт ой ёруғида эриган сақичдек ялтиради.

Шу пайт олисда нимадир сарғайиб кўринди. Зиямат шошиб ўзини орқага олди. Баланд тұнка ёнига ётиб, йўлга тикилди. Сарғайиб кўринган нарса чироқ эди. Кўп ўтмай у иккита бўлди. Зиямат машина келаётганини англади. Моторнинг гувиллаган овози ҳам ыщитила бошлади. Минутлар соатдек чўзилиб, ниҳоят, машина яқинлашди. Унинг ёруғида Зиямат йўлнинг нариги бети ҳам каттагина ўрмонлигини кўриб олди. Оғир юқ ортилган бесўнақай машина унинг рўпарасига етиб келганда, Зияматнинг кўзлари қамашиб кетди. Қўли билан юзини беркитди. Машина узоқлаша бошлади. Шундагина кўзларини очди ва яна эҳтиётлик билан йўлга тикилди. Аммо бошқа машина кўринмади. Зиямат тўғри қарорга келганига ичидан суюниб, йўлни кесиб ўтди ва яна ўрмон ичига кирди.

У анча йўл босди. Лекин ўрмоннинг кети кўринмасди. Тонг ота бошлади. Қуёшнинг илиқ нурлари дараҳтлар орасидан ўтиб, ерга найзадек санчилди. Зиямат тўхтади. Энди юриш хавфли эди. У яна кеч киришини ё биронта бахтли тасодиф юз беришини кутишга қарор

қилиб, атрофига қаради. Ўзидан сал нарида, чай томонда, воронка сифат ўра кўринди. У шу ёқقا юрди. Ўра каттагина эди. Эски бир дарахтнинг илдизини ковлаб олишган бўлса керак, ичи ҳам чуқургина, одам ўтиrsa кўринмас эди. У шу ўрага тушди ва ҳузур билан оёқларини чўзиб ўтирди. Энди у қутулганига, немислар қидириб келмаслигига тўла ишонган эди. Шунинг учунми, ўтириши билан бадани бўшашибди, кўзлари ўзўзидан юмилди.

Қирқ учинчи йилнинг ёзи, немисларнинг ҳужуми олдидан, у худди мана шундай ўз окопида ўтирган эди. Унда эгни бут — оёғида этик, қўлида автомат бор эди, ҳозиргидек яланг оёқ ва юпун әмас эди. Немислар ўшакда тунлари ҳам ҳужумни тўхтатишмасди. Траншеяларнинг ҳаммаси илма-тешик бўлиб кетган, бир взводдан иккинчи взводга ўтиш амри маҳол эди. Янгитдан ковлашга эса узлуксиз портлаб турган снарядлар, ёмғирдек ёғилган ўқлар халақит берарди, бош кўтаришнинг иложи йўқ эди.

Зияматнинг взводи тепаликка жойлашган бўлиб, душманнинг асосий эътибори шу томонда эди. Комбатнинг асл нияти ҳам шу эди. Шунинг учун ҳам у взводга битта ортиқча пулемёт берган эди.

— Ҳусанов, сенга оғир бўлади,— деди у душман тонгда яна ҳужумга ўтганда.— Маҳкам тур. Немислар бу ерда катта куч бор, деб ўйлашсин. Тушундингми?

— Тушундим, ўртоқ комбат! Буйруғингиз бажарилади.

— Вазият ўзгарса, капитаннинг ўзи келади.

— Хўп бўлади, ўртоқ комбат!

Комбат кетди. У кеча кечқурундан бери рота командири капитан Кравцовнинг ўрнида эди. Кравцов қўлидан ўқ еб, санбатга олиб кетилган эди.

Зиямат Кравцовни ҳам, комбат Синиченкони ҳам яхши биларди. Госпиталдан қайтиши билан уни шу батальонга взвод командири қилиб юборишган эди. Икки йиллик жанг давомида у ўз командирларини яхши кўриб қолган ва ҳар доим уларнинг жангдаги совуққонлиги ва ботирлигини кўриб қойил қоларди. Комбат анчагина камгап бўлиб, Кравцовнинг акси эди. У доим аниқ ва қисқа кўрсатма берар, капитан эса жуда узоқдан келарди. Асосий мақсадга кўчгунча одам қон бўлиб кетарди. «Хўш, аҳволлар қалай, ази-

зим!» У шундай деб гап бошладими, тамом, брон оғир топшириқ бермоқчилигини ҳамма билиб оларди. Сўка-диган бўлса, аввал қўшни роталардан гап очарди, қўшни ротанинг кечагина келган, ҳали душман билан ҳатто юзма-юз ҳам келмаган солдатини кўкларга кўтариб мақтарди, кейин, сен-чи, деб, гуноқкор жангчини сўкиб кетарди, бечоранинг гап эшитмаган биронта уругаймоги қолмасди. Шунга қарамай уни солдатлар яхши кўришарди. Бундай ҳурматга у жангда бевосита иштирок этиши билан, солдатни аяши, унинг аҳволидан доимо хабардор бўлиб туриши билан эришган эди.

Қўшни рота икки кун аввалги оғир жангдан сўнг, мудофаанинг иккинчи линиясига ўтганда, шу тепаликни эгаллашни Кравцов Зияматга топширди.

Тунги тинчликдан фойдаланиб, Зиямат ўз взводини қийинчиликсиз тепаликка олиб чиқди. Лекин шу пайт қаттиқ отишма бошланди. Артиллерия қўшилган дагина немислар анчагина жимиди. Шуида капитан яраланди. Эътирозига қарамай, шахсан комбатнинг буйруғи билан санбатга олиб кетишиди.

— Ҳусанов, жойингдан силжима,— деди у кета туриб.

Зиямат унинг буйругини бажарди. Кун бўйи немислар етти марта ҳужум қилишиб. Лекин бир марта ҳам тепаликка яқинлашиб кела олишмади.

...Тўп овозлари тинди. Бир зум ҳамма ёқни жимлик қоплади. Қишлоқ томондан аллақандай қушнинг чивчиви эштилди-ю, яна тинди. «Булбулга ўхшайди»,— хаёлидан ўтказди Зиямат ва кўз олдига Қорасувдаги ҳовлиси келди. Ҳозир узумлар етилиб ётибди у ерда. Ҳусайн ҳам, шивилғони ҳам. Чугурчиқ кўпроқ шивилғонига келади. Зангар, қайси узумни ейишни билади. Бирпас қарамадингми, талаб кетади. Онаси ишкомга тўрттами-бешта эски чеълак осиб, тизгинларини айвоннинг устунига боғлаб қўярди. Биронта қуш кўрдими, шу тизгинни тортарди, бутун боғкўчани чеълакларнинг тарақ-туруғи, чугурчиқларнинг чағ-чағи бошиб кетарди. Ҳозир ким қараётган экан боқقا?

— Мана шуниси одамни хуноб қиласди,— деди кимдир.

Зиямат хаёли бўлиниб, ёнига қаради. ПТР ушлаган жангчи жаҳл билан тамаки тутатар экан, пастдаги ялангликдан кўзини узмасди.

- Нимаси, Володя? — сўради Зиямат.
- Артподготовкадан кейинги жимлик-да, қон бўлиб кетади киши. Олифтагарчилик қилмасдан кела қолишиса, ўладими лаънатилар!
- Ҳовлиқма, ҳозир келишади.
- Зиямат шундай деб улгурмаган эди, олдинда танк кўринди.
- Айтмадимми!
- Худди шундай, ўртоқ командир! — жангчи болаларга хос қувонч билан танкни мўлжалга ола бошлиди.— Кела қол, азизим, кела қол.
- Шошилма.
- Танк ўн метрча ҳам юрмаган эдики, ёнида иккинчиси пайдо бўлди. Кўп ўтмай, тўртта бўлди. Кейин яна иккита қўшилди. Улар ҳар галгидек, ёйилиб эмас — икки қатор бўлиб келарди.
- «Тигр»ларга ўхшайди,— деди Володя.
- Зиямат индамади. Немисларнинг бу машҳур танкларини у биринчи марта кўраётгани йўқ эди. Агар ён томонидан отилса, автомат билан ҳам уларни ишдан чиқариш мумкин эди.
- Пулемётларни ҳозирланг! — буйруқ берди у.— Менинг командам билан отилсин!
- Масофа борган сари қисқарди. Юз метрга етганда, танклар ўт очди. Траншеяни аччиқ тутун, чанг қоплади.
- Иигитлар! Бошладик! — қичқирди Зиямат ва ўзи биринчи бўлиб ўт очди.
- Олтмиш метрга келиб қолган биринчи танк тўхтади. Люк очилиб, немис танкчисининг калласи кўринди. Автомат тириллади, у икки қўйини ёзиб, танк устига ағдарилди. Шу пайт иккинчи қаторда келаётган танк ёниб кетди.
- Мен! Мен ёндиридим! — қичқирди Володя.
- Аммо Зиямат уни эшитмади. Шундай ёнида снаряд портлади. Кўзларига нимадир ёпишди. Енги билан артар экан, яна снаряд гумбурлаганини эшитди.
- Володя! Галиулин!
- Ҳеч ким жавоб бермади. У кўзини очганда, битта танк тепаликка кўтарилаётганини кўрди. Танкнинг узун стволи худди уни нишонга олаётгандек эди. Зиямат шошиб ўзини чапга олди. Шунда у Володянинг траншеяни ичидаги тупроқка беланиб ётганини кўрди.

— Володя!

Аммо Володя жим эди. Зиямат ПТРга етгунча, ёнидаги гранатани олиб пастга, танкнинг фиддиракларини пойлаб улоқтириди. Танк тўхтади, бир силтаниб орқасига қайрилмоқчи бўлганида, ёниб кетди. Лекин шу заҳоти ундан сал нарида бошқаси кўринди. У тепаликка кўтарилимади. Тўхтаб, тепаликни ўқса тута бошлади. Бошқа танклар ҳам шундай қилган бўлса керак, Зияматнинг гир атрофида снарядлар ёрила бошлади. У энди взводдагилардан ким бор, ким йўқ, билолмай қолди. Бир амаллаб ПТРни топиб, траншеядан бошини кўтарди. Пастда яна бир танк ва унинг атрофида немислар кўринди. У танкнинг туйнугини пойлаб, ПТР ни бўшатди. Танк портлади. Шу пайт кимдир уни туртди ва нималардир деб қичқирди. Зиямат эшитмади. Битта танк шундай устидан ўтиб кетди. Зиямат чақонлик билан орқасига ўгирилиб, уни нишонга олди. Аммо ПТР отилмади. Ўқ тугаган эди. Шу пайт чўнтағидаги граната эсига келди. Олди-ю, тезлик билан улоқтириди. Граната шундай люк устига тушди. Орқадан автомат товушлари эштилди. Немислар траншеяга жуда ҳам яқинлашиб қолишган эди. Зиямат уларни аниқ кўрди. Дарҳол автоматини елкасидан олиб, ота бошлади. Уч-тўрт немис шу заҳоти йиқилди. Бошқалари ётиб олди. Ҳужум яна тингандек бўлди.

— Степанов! — қичқирди Зиямат юзидағи терни сидирар экан.

Ҳеч ким жавоб бермади.

— «Наҳотки, улар...» — Зиямат шундай деб ўйлади-ю, ўз хаёлидан ўзи чўчиб кетди ва шошиб атрофига қаради.

Траншеянинг у турган жойдан бўлак ҳамма ери бузилиб, уюм-уюм тупроқ бўлиб ётарди.

Олдинда яна танклар пайдо бўлди. Энди улар ёлғиз өмас, ҳар бирининг орқасида автоматчилар бор эди.

Зиямат уларни кўриб, автоматига янги диск қўйди. Чўнтағидан сўнгги гранатани олиб, камарига қистирди.

— Ўртоқ командир! — қичқирди шу пайт кимдир.

Зиямат таниди.

— Галиулин! — севиниб чақирди у.

— Менман, ўртоқ командир!

— Енингда ким бор?

- Степанов бор эди. Снаряд қорнига тегди. Башкаларни күрмаяпман.
- Чакыриб күр.
- Галиулин қичқирди.
- Ҳеч ким жавоб бермаяпти.
- Дадил бўл, ошна. Келишяпти, кўряпсанми?
- Кўряпман. Иккита гранатам қолди, ўртоқ командир.
- Танкни пойла.
- Тушундим, ўртоқ командир! Ўзингизда-чи?
- Битта!

У бошқа ҳеч нарса айтиб улгурмади. Кучли портлаш уни силтаб ташлади. Оғир бир нарса бошига тушди. Ўзига келиб, ўрнидан турганида, траншея устидан танк ўтиб кетаётганини кўрди, гранатани олиб улгурмади, бир немис устига ташланди. Зиямат бор кучини тўплаб, уни улоқтириди-да, атрофини ўраб келаётган немисларни нишонга ола бошлади. Немислар ётиб олишди. «Тирик олишмоқчи шекилли? — ўйлади Зиямат. — «Олиб бўпсанлар, аплаҳлар!» Галиулин! Бардам бўл!» — у шундай деб қичқирди-да, қўлидаги гранатани немислар ғуж бўлиб ётган томонга улоқтириди. Шу пайт чаккасига нимадир урилди, у кўзлари тиниб йўқилди ва ҳушидан кетди.

Кўзини очганида, ўрмонда ётганини кўрди. «Худога шукур, тирик эканман», — хаёлидан ўтказди у. Аммо бу тириклик жуда қимматга тушди унга. У ҳали асири тушганини, ўзига ўжшаган юзлаб асиirlар ичидаги ётганини билмасди. Билганда эса, бутун вужуди бўшашиб кетди.

Бир ҳафтадан сўнг асиirlарнинг ҳаммасини юк вагонларга босишди. Эшелон қўзғалганда олисда даҳшатли тўп овозлари эшитилди.

— Бизникилар! — деди кимдир завқ ва шу пайтнинг ўзида чексиз ўкинч билан. — Танидим! Бизнинг тўплар!..

Ҳеч ким унга жавоб бермади. Эшелон гарбга йўл олди.

Зиямат кўзини очганда, кун тиккага келган эди. Ўрмон жимжит. Ҳеч нима кўринмайди. Нима қилиш керак? Наҳотки, қоронги тушганга қадар кутишга тўғри келса?.. У ҳеч қандай қарорга келмай, ўрнидан турди. Шу пайт олисда ола эчки етаклаган бир одамнинг

қораси күринди. Зиямат шошиб ўзини дарахтнинг панасига олди. Ким экан у? Қаердан пайдо бўлиб қолди? Қишлоқ наҳотки шунчалик яқин бўлса? Эчки бир йўқолиб, яна кўринди. Унинг эгасини Зиямат энди яққол кўрди. У чол эди. Бу Зияматни тинчиди. Чол унга яқинлашди. Бекинишнинг мутлақо иложи қолмади. Кўз-кўзга тушди. Чол худди Зияматдек, жойида қотиб қолди. Анча вақт улар бир-бирига тикилиб туриши. Ниҳоят, Зиямат чидамади. Имлади. Аммо чол жойидан қимирламади. Эчки унинг қўлидан тушиб кетган чилвирии судраб, қочиб кетди. Чол парво қилмади. У, сеҳрланган одамдек, Зияматга тикилиб қолган эди.

— Я плен, понимаешь? Плен...— деди секин Зиямат кўкрагига қўлини бигиз қилиб.

Чол уни тушунмади.

— Я плен! Я рус!.. Понимаешь?— деди яна Зиямат.— Рус, рус... Москва!..

Чолнинг кўзларида табассум пайдо бўлди.

— Аз българин,— деди кейин ва Зияматга яқинлашди.

— Партизан... менга партизанлар керак,— деди Зиямат, чол унинг олдига келгач.

— Партизан?— сўради чол унга тикилиб.

— Ҳа, партизанлар керак,— деди яна Зиямат.

Чол «тушундим» дегандек, бошини қимирлатди.

Зиямат кўнглида бир олам севинч билан уни қулоқлади ва ўпкаси тўлиб, йиглаб юборди.

## СҮНГГИ САФАР

Отставкадаги майор Низомиддин ака Назаров хотини қабрини зиёрат қилиб қайтаётган эди, бирдан юрагига санчиқ турди, нафас олиши оғирлашди, узун гүштдор қулоқларига тиравиб турган антиқа телнаги остидан муздек тер худди мингөёқдек иккала чаккасидан ўрмалаб туша бошлади. Юрак санчиғидан кўра Низомиддин акани ана шу тер чўчитди. Дастрўмол олишга ҳам сабри чидамай, кафтлари билан терни сидириб ташлади. Юрак санчиғи тўрт-беш йилдан бери бор эди. Совуқ тер нимадан бўлдийкин? Низомиддин ака беихтиёр чаккаларини силади. Кафтлари яна ҳўл бўлди. Нима қиласа экан? У шундай ўйлади-ю, қабристонга келганига ачинди. Қабристон соғ одамни ҳам касал қиласди, юракни ўйнатиб, хаёлга минг хил нохуш фикрлар келтиради, деб ўйларди у. Шунинг учун ҳам хотинининг йилини ўтказганидан бери ўтган беш йил ичиди — бугунгисини ҳисобламаганда — икки ёки уч марта келган эди. Бугун ҳам келишни ўйламаган эди. Тонгга яқин туш кўрди. Йшдан қайтса, хотини ҳовли супураётган эмиш. «Касал одам нега турдинг?» — деб қўлидан супургини олмоқчи бўлган эди, хотини бермади: «Қўйинг, уришиб қоламиз», деди.

Низомиддин ака бу калта, юлуқ тушдан кўнгли жира тортиб уйғонди-ю, қизи Вазира ишга кетиши билан қабристонга йўл олди. Уларнинг хилхонаси қабристон этагидаги қўргонча ёнида эди. Бир ҳафта бурун тун бўйи ёқсан қор, кун тафти анча босилганига қарамай, ҳали эrimаган, қабристон гўё оқ кўрпа остида эди. Фа-

қат офтобрўя жойлардаги баъзи қабрларнинг устигина гуваладек қорайиб турарди.

Низомиддин ака қўргончага келиб, кимнинг қабри қаердалигини тахминангина эслади. Онасининг қабри қўргончанинг шундай олдида эди. Ундан кейин кетмакет отаси, иккита амакисининг қабри. Хотини онаси нинг чап томонида эди. Низомиддин ака буни тахминсиз ҳам биларди. Хотини қабрига йил ўтиши билан қабристон ёнидаги устахонада катта мармар тош буютириб, ўзи қўйдириб кетган эди. Тош салобатли сарғиш эди. Фақат Низомиддин акага ёқмаган жойи — бу, фамилиянинг остига ўйиб солинган гул эди. Бу ҳам майли. Рассом йигит унинг «чиройли бўлсин» деган гапини ўзича тушуниб, гулнинг бир шохига кичкина қушнинг расмини ҳам ўйиб қўйган эди. Шу бачканга қуш, хотинини эслаганда, ё қабристонга келганда доим таъбини хира қиласарди. Бир буздириб ташлаб, янги тош қўймоқчи ҳам бўлди, лекин Вазира кўнмади. Негадир унга худди шу гул билан қуш ёқиб қолган, ҳазил аралаш менинг қабримга ҳам шундай расмли тош қўйдирасиз, деган эди.

Қор ёпишиб ун сепилгандек ёзувларни ҳам, расмларни ҳам бекитган тош олдида аллавақт туриб, Низомиддин ака кўчага йўл олди. Жимжит қабристон, оппоқ қор, меҳрибон кишилар, айниқса, хотинининг қабри, илк баҳор нафасини олиб келиб димоққа урган илиқ шамол эрталабдан бери дилини қамраб олган гашликни кўтариб юборди, ўзини қандайдир мусаффо сайргоҳда юргандек ҳис қилди, нимжон, касалманд, аммо шикоятни билмайдиган, шу туфайли дардини ичига солиб ўлиб кетган хотини ҳам, бутун маҳаллада половон деб ном чиқарган басавлат отаси, жиккаккина, умри тиним билмай ўтган онаси ҳам, ҳазилкаш, жаҳллари бурниларининг учida турадиган амакилари ҳам ҳозир тирикдек туюлиб кетди, хотини ўлимидан сўнг бирдан-бир азоби билан юрагига ўрнашиб олган қариллик кайфияти кўтарилди. «Жуда яхши қилдим келиб,— хаёлидан ўтказди у.— Тез-тез келиб турман энди».

Шу хаёл, шу кўтаринки кайфият қабристоннинг панжарали, баланд темир дарвозасига етганда ҳам уни тарқ этмади. Дарвозадан чиқди-ю, негадир юраги санчиб кетди. Агар совуқ тер чиқмагандаги бунга унча эъти-

бор бермасди. Мингоёқдек баданини жунжитиб чакка-  
ларидан ўрмалаган тер уни хавотирга солди. «Дам  
олиш керак бир жойда ўтириб», — деди хаёлан у.

Қабристон дарвозасидан юз қадамча нарида ариқ  
бүйида чойхона бор эди. Хотини қабрига тош қўйидир-  
гани келганда кирган эди. Қабристон ёнида бўлгани  
учунми, чойхонанинг қандайдир тушуниб бўлмайдиган  
осойишталиги, текис, сокин сув, узун тахта сўри ёни-  
даги танаси қучоққа сифмайдиган, ярми қуриб, каллақ-  
ланган, қолган ярми серофтоб кунлари бутун чойхона-  
га соя бериб, салқин қилиб турадиган кекса мажнунтол  
уни ўшанда оғир хаёллардан халос қилган, кўнглига  
таскин берган эди. Низомиддин aka шу чойхонага  
боришга, фақат секин, юракни алдаб битта-битта  
қадам босиб боришга қарор қилди ва енгил тортгандек  
бўлди.

Чойхонада ҳеч ким йўқ эди. Пастак ёғоч панжара-  
ли девор ёнига юпқа кул босган қор уюб қўйилган, ҳов-  
ли бўм-бўш. Сувга қараган пешойналик чорси айвонда  
ҳам пахталик чопон устидан калта оқ халат кийиб ол-  
ган чойхоначи чолдан бошқа ҳеч ким кўринмасди.

Низомиддин aka айвоинга кириб дераза тагидаги  
кўрпача устига ўтириди. Телпагини ечиб, пешанаси, қу-  
лоқларининг орқасини артди. Оппоқ батист рўмолча  
жиққа ҳўл бўлди. «Нимадан бўлди экан бу?» — яна  
ўйлади у ва шу ўй билан бўлиб, чойхоначи ёстиқ, туну-  
ка лаганчада қанд, конфет ва чой олиб келиб қўйга-  
нини сезмади. Ҳўл рўмолчани чаккасига тутар экан,  
юз-қўли музлаб кетаётгандек бўлди. Наҳотки, бу ўлим  
бўлса? Беихтиёр хаёлидан ўтказди у. Илгари шундай  
фикр хаёлига келса, дарҳол бирон нарсага уннаб, ўзи-  
ни чалғитишига ҳаракат қиласди. Ҳозир эса бундай  
қилмади, аксинча шу, тўсатдан келган хаёлга ихтиёр  
бериб, кўзларини юмган эди, чойхоначининг йўғон  
овозини эшилди:

— Мазангиз йўқми?

Низомиддин aka бошини кўтарди.

— Йўқ, бир оз тер босди...

— Чарчагансиз,— ишонч билан деди чойхоначи.—

Иссиқ чой ичинг қанд билан. Ўтиб кетади. Кексай-  
гандан кейин одам шунақа бўлади! Гоҳ ўти оғрийди,  
гоҳ бўти. Парво қиласманг. Кечаканамам ўлиб қоламанми  
девдим, юрагим санчиб. Мана, отдайман. Парво қил-

манг.— Чойхоначи кулди.— Ҳисоб-китоб ҳам қилиб ўтирибман.

— Ҳисоб-китоб?— тушунмади Низомиддин ака.

— Ҳа. Кимда нимам бор, кимга нима беришим керак. Улимни ўйлаган одам тинч бўлиши керак-да. Ҳайтовор ҳамма ишларим саранжом экан...

Низомиддин ака «менинг ҳам юрагим санчиб турибди», демоқчи эди, чойхоначининг сўнгти гапи хаёлинин олиб қочди. «Дарвоқе, менинг ишларим қалай? Саранжомми?»— деди хаёлан у ва юрак санчиғи ҳам, совуқ тер ҳам бу савол олдида ҳеч гап эмаслигини англади, фақат нима учун шу кунгача бу ҳақда ўйламаганига, умуман, нима учун одам бу ҳақда кексайиб, ўлим эшик қоқиб келгандагина бош қотиришига афсусланди. Масалан, унинг ўзи илгарироқ, кучга-гайратга тўлиқ, қўли узун найтида бу ҳақда ўйлаганида ҳаётি бошқачароқ бўлармиди? Тағин ким билади, балки ҳаёт қонуни шундайдир? Одам умрининг охирида шу саволга жавоб қидиришида, босиб ўтган йўлига назар солишида қандайдир мантиқ бордир?

Низомиддин ака шуларни ўйлар экан, юрак санчигини унуди, мингоёқдек ўрмалаб ғашини келтирган совуқ тер хаёлидан кўтарилиди, турмуши, олтмиш беш йил ичидан бошидан кечирганлари сув тўлқинларидек бешик-бешик бўлиб кўз олдидан ўта бошлади.

У кўичилик қатори яшади. Бирорни ноҳақ уришмади, ўзи ҳам бирордан ноҳақ уриш эшитмади. Ёшлиги шаҳарда ўтган бўлса ҳам, эсини таниб институтга киргунича сигир-бузоқ ичиди ўси, ота касби — от-араға ҳайдади. Албатта, эрта саҳарда ширин уйқуни бузиб, ем-хашак келтиргани қишлоққа жўнаш, айникиса болалигига оғир ботарди, ўнкаси тўлиб, отасига билдирамай йиғлаб ҳам оларди. Лекин на илож, уйнинг тўнгичи, бормаса бўлмасди. Шунинг учунми, катта бўлганида сут-катиқни ёмон кўриб қолди, ичмайдиган бўлиб кетди. Институтга кирди-ю, от-араға, сигир-бузоқдан қутулди. Шаҳарда мол боқишининг ўзи ҳам кийинлашиб кетди. Бир куни ўқишдан қайтса, отаси билан онаси ичкари хонада деразаларнинг пардаларини тушириб олиб, нул санаб ўтиришибди. Нима бўлганини у дарҳол тушунди. Югуриб оғилхонага кирди. Овқатга тўймай, доим унинг ғашига тегадиган филдек тарғил сигир ҳам, оғилхонани бошига кўтариб, ҳеч

кимга тиним бермайдиган түрт ойлик ола бузоқ ҳам йүқ эди. Улардан қутулишни болалигидан истаб келгән бўлса ҳам, Низомиддин аканинг ўшандаги кўнгли алланечук бўлиб кетди. Ўйга кириб, бекор қилибсизлар, деди. Назир карвон индамади. Фақат кечки овқат пайти, ҳамманинг хомуш ўтирганини кўриб:

— Мол боқиш қийин энди,— деди бўғилиб.

Уруш йиллари куйган буғдойзор, жўхоризорлар ичида, ё ўрмон этагидаги ўтзорларда битта-яримта эгасиз қолган сигир ёки бузоқни кўтар экан, Низомиддин aka ўша ҳувиллаган оғилхонасини эслаб кетарди, кўзларидан нимқоронги хонада пул санаб ўтирган отонаси ўтарди ва дилини қандайдир плиқ ўксиниши қопларди, эрта саҳарда туриб, кўзларida отаси сезмаган ёш билан уйдан арава ҳайдаб чиқиши, ҳали деярли ўйқуда бўлган шаҳарнинг осойишта салқини, ҳар бир ўтўлани таниш бўлган мол бокадиган жойлар, қулуунай, бодринг, ллпиз ҳидини анқитувчи қишлоқ, шудринг босган иолизлардаги хаёл қочган пайтлари, юракни ёргудек тарс-турс овозлар — энди уни ҳаяжонга солар, болалиги, умуман, яхши ўтганлигини, кўзларida ёш мўлтираган дамларни энди дарё ёш билан ҳам қайтариб бўлмаслигини ачиниб эсларди.

Институтни битирадиган йили Тўқимачилик комбинатига ишга кирди ва шу йили ўйланди. Тўй унга қувонч келтирмади. Тўй куни отаси қазо қилди. Ҳовлида базм, ўйин-кулги, идиш-товоқнинг тақир-туқури, ичкарида эса аза... Буни тўй тарқаб, келин билан гўшангага кирганда билди. Катта амакиси айтди. Тўй бузилмасин, деб илгарироқ айтмаган экан. Назир карвон озгина нафасим қисилиб турибди, деб каравотга чўзилибди. Суюқ овқат тарқатишашётганда, хабар олишса ўлиб ётган эмиш. Шу сабаб бўлдими, Низомиддин aka хотинини хуш кўрмай қолди. Хафа қилгани йўқ, қаттиқ гапирамади, лекин эр бўлиб бир марта эркаламади ҳам. Мастура опа аёллик лаззатини билмай бегонадек келиб, бегонадек кетди. Низомиддин aka ўзи кўмди. Хотинининг ёш (эллик бирда) ўлганига ачинса ҳам, йигламади, ёш келмади кўзига. Улар учта фарзанд кўришди. Тўнгич ўғиллари — Баҳриддин Бекободда инженер, кейингиси — Бадриддин Олмалиқда завод директори. Иккалови ҳам онла кўриб, ўзларидан тинчип кетишиган. Қизлари — Вазира фақат уларнинг ичида

омадсиз чиқди. ТошМИда ўқиб юриб, турмуш қурди. Ўқишини битирмай эрининг кетидан чет әлга кетди. Иил ўтмай ёлғиз қайтиб келди. Шу-шу отаси билан бирга. Низомиддин ака нима учун қизи әридан ажраганини билмасди. Вазира ҳам ёрилиб айтмасди. Ўзи яхши күриб теккан әди, шунинг учун алами ичиде әди. Эридан гап очилиб қолса, күзларни газабдан чақнаб кетар әди. Низомиддин ака қизидан ташвишда әмас әди. Ҳали ёш, бахтини топиб кетади, деб ўзига таскин берарди. Вазира уйга қайтиб келган йили, Низомиддин ака онасидан ажради. Эридан сўнг ўттиз йил яшаб, турмуш қурмай ўтган онаси унинг учун меҳр-садоқат булоғи әди. Ҳеч кимнинг ўлими Низомиддин акани бунчалик қақшатиб кетмаган әди. Узоқ вақт у ўзига келолмай юрди, уйдаги ҳар хонадан онасининг майин, меҳрибон овози эшитилиб турди. Қизининг борлиги, ўзининг анча ёшга борганлигигина уни тинчидти.

Яқин одамларнинг ўлими, ёлғизликни назарга олмаганда, Низомиддин аканинг оиласвий ишлари, чойхоначи айтганидек, саранжом әди. Уни баъзан қийнайдиган нарса — хотинига муносабати әди. Отасининг бевақт ўлимига хотини мутлақо даҳлдор әмаслигини у биларди. Хотинининг айби шуки, у қайната ўлган куни келин бўлиб тушди ва Низомиддин ака ўзи сезмаган ҳолда буни умр бўйи кечирмади. Агар муҳаббат қўйиб уйлангана, ким билади, турмушлари бошқача бўлармиди? Бир куни ишдан қайтганда кўрпа қавиб ўтирган онасининг ёнида бир қизни кўрди. Қиз оёқларини бир томонга йигиштириб, тиззаларини беркитиб турган атлас кўйлагини торта-торта бошини ердан кўтармай ниманидир гапиради. Низомиддин ака салом бериб, ўз хонасига ўтиб кетди. Ечиниб чиққанида, қиз йўқ әди. У қизнинг кимлиги билан қизиқмади ҳам. Онасининг ўзи сўради.

— Мастура қалай? Ёқдими?

— Қайси Мастура? — тушунмади Низомиддин ака.

— Бояги қиз-да, Обид тоғангнинг кенжаси. Анчадан бери кўрмаган эдим, очилиб кетибди лоладай бўлиб.

Низомиддин ака елкаларини қисди. Ана шу ҳаракати масалани ҳал қилди. Уша йили ўй бўлди. Тўйгача у бепарво юрди. Тўйнинг эртаси, отасини кўмиб

келишганда, ҳовлини бошларига күтариб йиглаётган онаси, синглиси, қариндош-уругларига аралашолмай, күйләги сингари қора пешанабогининг бир учини тишлаб нима қилишни билмай бир чеккада жонсарак бўлиб турган хотинини кўрди-ю, унга уйланганига пушаймон еди. Йиллар ўтди, лекин бу пушаймон тарқалмади, канадек ёпишди-қолди. Фақат бир марта Низомиддин ака хотинига нисбатан меҳри товланганини билади. Уруш тугаб, уйга қайтган эди ўшандада у. Ойдин кечада эди. Улар ҳовлида, баланд тахта сўрида ётишарди. Низомиддин ака нимадандир чўчиб уйғониб кетди. Тун жимжит эди. Тиккага келган тўлин ой бутун ҳовлини ёритиб турарди. Мастура опа осмонга қараб тинчгина ухларди. Унинг ҳатто нафас олиши ҳам эшитилмасди. Ёстиқ билан битта бўлиб ётган қора соchlари ой шуъласида зулукдек товланарди. Бўйнигача тортилган юлқа чойшаб остида нозик, хушбичим бадани аниқ сезилиб турарди. Низомиддин ака бенхтиёр тикилиб қолди, бағрига босгиси, узун, қуюқ қошлари, кичкина қулоқлари аралаш юз-кўзларидан ўпгиси келиб, ёнбошига ағдарилганда, хотини кўзларини очди.

- Нима қиляпсиз? — сўради хавотирланиб.
- Сенга қарайман.
- Емонманми?

Низомиддин ака бошини қимиirlатди.

— Яхисан... чиройлисан...

Хотини касал одамдек оҳиста жилмайди, кўзларида ёш йилтираб кетди.

Бу воқеа уларни яқинлаштирган бўлди, лекин баридан Низомиддин аканинг дилидан совуқлик кўтарилмади. Ёлғиз қолибгина, унга ачина бошлади. Аввало, уйланмаслиги керак эди. Уйландими, унга яхши қарашиб керак эди.

Буни у энди, қариганида тушунди. Ундаги хотинига бўлган совуқлик, тўғрироги, бефарқлик бошқа аёлларга ҳам тарқалди. Шунинг учун у хотинига хиёнат қилгани йўқ. Фақат бир марта бир аёлга нисбатан кўнглида илиқлик пайдо бўлган эди. Бунн ҳам у энди, қариганида, ҳайтини бир-бир кўз олдига келтира бошлаганида англади.

Бу воқеа Белоруссияда бўлган эди. Пуховичи деган жойда унинг ротаси душманни қувиб бораётиб, Горинъ дарёси олдида тўхтаб қолди. Немислар кўприкни

бузиб кетишган эди. Низомиддин ака шу күпrikни, унинг ёнидаги қогоз ёпиптирилган деразалари дарёга қараган болохонали ёғоч уйни бутун тафсилоти билан эслади. Уй сув ювиб қиялашган силлиқ қиргоқдан бешолти қадамгина нарида бўлиб, ундаги илон изидек ёлгиз оёқ йўл дарёга чўзилиб тушган эди.

Моғор босган пайраҳа том, унинг тепасида чириған, дон чўқилаётгандек эгилиб, тумшуги томга тегиб турган тунука хўроз, уйнинг кўча томонида қирқиб ташланганиданми ё кўпrik портлаганида узилганиданми, ерга тегай-тегай деб осилиб турган электр сим, зинапояли остона ёнида нам тортиб ётган ғрава шотиси ҳозиргина кўргандек кўз олдидан ўтди.

Янги кўпrik солиш ҳақида энди буйруқ бермоқчи бўлиб турганида уй томондан аёл кишининг овози келди. Низомиддин ака ёнига ўгирилди. Остона олдида бола кўтарган бир ёш аёл турарди. Қиргоққа яқинлашиб унинг гапларини эшилди. Дарё чуқур эмас, агар уйнинг тўғрисидан тушилса ўтиб кетиш мумкин, деди аёл.

Низомиддин ака у кўрсатган жойдан дарёга тушиб, нариги соҳилга ўтди. Сув белидан келди. Танклар ўтиши мумкин эди. Лекин бу жойнинг бир қалтис томони бор эди. Дарёдан кўтарплаётгандан танклар уйга тегиб, бузиб кетишлари мумкин эди. Ёғоч уйнинг бир жойи бузилди — бутун уй бузилди, деган гап. Низомиддин аканинг боши қотди. Худди унинг хаёlinи сезгандек:

— Уйламанг, уй бузилса бузилар,— деди аёл.— Мен... — унинг юпқа лаблари титраб кетди,— розижан...

Низомиддин ака унга миннатдорлик билан қарадида, дарё томон югурниб кетди. Ўтиш ҳақида буйруқ бериб, яна аёл ёнига қайтиб келди.

Аёлдаги нимадир, узун, тўпигига тушуб турган рангсиз кўйлагими, онасиники сингари кўм-кўк кўзларини шовқин-сурон билан дарёдан ўтаётган танклар, солдатларга катталардек вазмин тикиб, ўрта бармоғини сўриб турган ориқ болами, унга ёқиб қолган, бир дақиқа бўлса ҳам тинчлик ҳузурини бағишилаган эди...

У кутгандек, биринчи танк оқ уйнинг бурчагини сидириб кетди. Аёл беижтиёр қичқириб юборди. Аммо уй мустаҳкам экан, бир қимирлади-ю, жойидан қўзгалма-

ди. Бошқа машиналар эҳтиётлик билан шу ердан ўта бошлади.

— Эрим қурган,— деди ўзини босиб олиб аёл.

— Каерда у?— беихтиёр сўради Низомиддин ака.

— Ҳалок бўлган... ўтган йили...— деди аёл ва боласини маҳкамроқ бағрига тортди.

Низомиддин ака ўзини ноқулай сезиб, боланинг бозига қўлини қўйди.

— Как тебя зовут, малыш?

Бола бошини олиб қочиб, онасининг елкасига ёпишиди.

— Ваня... Иван...— деди аёл маъюс кулимсираб.

— Менинг ҳам ўғлим бор...

— Каттами?— сўради аёл.

Низомиддин ака ҳисоблай бошлади:

— Тўрт ёш бўлиб қолди. Лекин кўрганим йўқ. Танимаса керак мени....

— Танийди... Омон бўлсангиз бўлди...

Иккалови жим қолишиди.

Бутун рота ўтиб бўлгач, Низомиддин ака аёлга қўлини узатди.

— Раҳмат. Катта ёрдам бердингиз...

Низомиддин ака унинг озгин қўлини қўллари орасига олар экан, юрагини нимадир тимдалаб кетди. Вужудини раҳм, миннатдорлиқдан ҳам юксак бир ҳис, илиқ бир ҳаяжон қоплаб олди ва нима дейишини билмай илжайди. Ноқулай вазият анча давом этди шекилли:

— Кутуб қолишиди,— деди аёл қўлини тортиб.

Унинг майин, меҳр тўла овози Низомиддин акани ўзига келтирди.

— Исмингиз нима?

— Таня...— деди аёл ва ер остидан унга қараб қўйди.

— Таня, уйингизни тузатиб берамиз.— Низомиддин ака боланинг пешанасидан ўпди.— Албатта тузатиб берамиз!

Аёл оҳиста бошини қимиirlатди.

Пинск шаҳри озод қилингач, Низомиддин акалар полки резервга ўтди. Имкониятдан фойдаланиб, Низомиддин ака иккита солдатига Пуховичига бориб келиш учун рухсат олди. Улар бир ҳафта ичida уйни тузатиб қайтишлари керак эди. Ротада элликларга борган чим-

кентлик Шекен Омонқулов деган солдат бор эди. Низомиддин аканинг, бу, ҳарбий ишга уқуви йўқ, одамга раҳми келиб юрарди. «Оқсоқол»,— дер эди ҳам ҳурмат, ҳам ҳазил аралаш уни доим. Оқсоқолнинг бешта фарзанди бўлиб, ҳаммаси қиз эди.

— Ширақ,— дерди оқсоқол ҳам ўзини яқин тутиб Низомиддин акага.— Мени немис аз жерге солсангши. Ўлиб-нетиб кетсам, бешов қиз не қиласди?

Низомиддин ака Пуховичига шу оқсоқол билан сибирлик бир полвон йигитни жўнатди. Аёлга ярим қоп озиқ-овқат ҳам бериб юборди. Аммо уларни кейин кўриш насиб қилмади. Брест яқинида Низомиддин ака сонидан ярадор бўлиб, Минскка жўнатилди. У ердан уйига қайтди. Лекин ҳарбий хизматдан уни бўшатишмади. Область ҳарбий комисариатида ишлади. Шу ердан отставкага чиқди.

Низомиддин ака дарё лабидаги воқеани эслар экан, кўз олдидан Пуховичига жўнатилган солдатлар ўтди. Уйни тузатиб беришдимикан улар? У шундай ўлади-ю, хаётидаги энг носаранжом иши шу эканини тушунди. Оқсоқол ҳам, сибирлик йигит ҳам ишончли одамлар эди. Бунинг устига улар солдат эди. Буйруқни бажармасдан иложлари йўқ. Аммо урушда нималар бўлмайди? Шу фикр бутун вужудини бўшаштириб юборди. Кейин аёл хаёлидан ўтди. Таня... Татьяна... Тирикмикин у? Тирик бўлса, қандай экан ҳозир? Низомиддин ака қанча ҳаракат қилмасин, ўшанда ҳали ўттизларга бормаган, олтин соч, зангори кўз аёлни бошқача тасаввур қила олмади. Бунинг зарурати ҳам йўқ эди. Унинг учун ҳозир энг муҳими кечикиб ёдига тушган карзидан қутулиш, уйи бузилган бевани ва унинг ўғлини баҳтли кўриш эди.

У шундай қарорга келди-ю, тунука лаганчага чунтагидаги бор тангаларини ташлаб, чойхонадан чиқди. Эртасига эрталаб эса аэропортга йўл олди. Оқшом пайти у Минскка қўнди. Қанча ошиқмасин, Пуховичига қоронгида кириб боришга оёғи тортмади. Қўнгли негадир нотинч бўлиб кетди. Шу нотинчлик билан меҳмонхонада ётолмай кўчага чиқди.

Уруш вайроналаридан Минскда асар ҳам қолмаган эди. Телевизорда урушдан кейин қад кўтарган янги Минскни кўп кўрган бўлса ҳам, кўз олдидан пайдо бўлган баланд бинолар, кенг, кафтдек текис кўчалар, тур-

на қатор ўтиб турган машиналар уни ҳайратта солди. Янги Минск бунчалик деб, у кутмаган эди...

Эрта тонгда такси ёллаб Пуховичига жүнади. Тушга яқин шоффёр келдик, деди. Аммо у тушган жой эски Пуховичи эмас, бутунлай ўзгарган, катта шаҳар эди. Бу жой Пуховичи эканлигини йўл ёқасидаги ўрмондан ва шаҳарни қоқ белидан кесиб ўтган дарёдан билди. Горинъ эди дарёning номи.

Низомиддин ака шаҳарга кирмай, машинани катта йўлда қолдириб, ўрмон томон йўл олди. Кўприк шу ўрмоннинг әтагида эди. Ўрмон ўзгармабди. Фақат даражатлар катта бўлиб кетибди. Буни у қайнинлардан билди. Ўшанда улар ёш эди, ҳимоясиз эди... Ўрмондан чиққанда битта арава сифадиган тор ёғоч кўприк кўринди. Улар душманни қувиб келган асосий йўл шу ердан ўтарди. Энди эса арава йўли бўлиб қолибди. Низомиддин ака кўприкка келди-ю, юраги бирдан шувиллаб кетди. Дарёning нариги соҳилида ҳеч қандай уй йўқ эди. Унинг ўрнига ёш қайнинлар ўтқазилган эди. У ўз кўзларига ишонмай, кўприкдан ўтди. Уй йўқ эди. Минг хил фикр хаёлига келди. Аввал солдатларни келишмаган, деб ўйлади. Аммо бунга ишонмади. Кейин Таняни ўрмоннинг нариги томонида қад кўтарган янги уйлардан бирига кўчиб чиққан, деб фараз қилди. Кошки эди шундай бўлса? У шундай ўйлади-ю, шунча йил ичидаги хат ёзмаганига ачинди. Лекин Таняниг исмидан бошқа ҳеч нарса билмаганини эслаб, ўзини койиди.

Нега ўшанда фамилияси, адресини ёзиб олмади? Нега оқсоқолга хат ёзмади? Ахир унинг фамилиясини биларди-ку?!

Шу хаёллар билан кўприк устида анча туриб қолди. Олисда отлиқ арава кўринди. Низомиддин ака упичуди. Арава кўприкка яқинлашгандаги, устида ўзи генги мўйсафид оёқларини осилтириб ўтирганини кўрди.

— Кечирасиз, шу ерликмисиз?

Мўйсафид отнинг жиловини тортди.

— Нима эди?

— Манави ерда ёғоч уй бор эди...

Мўйсафид уни гапиргани қўймади.

— Биламан, Гиловичлар туришарди. Ўтган йили бузиб ташлашди. Ким керак эди?

— Таня,— секин, қўрқув аралаш сўради Низомиддин ака.

— Э, Татьянами? Ўлди у. Икки йил бўлди.

Низомиддин ака бўшашиб кетди. Томогига келиб тиқилган йигини зўрга тутиб, кўпrik панжарасига суянди.

— Тириклигида шуича плтимос қилишди, янги уйга кўчиб ўт, деб. Утмади,— гапида давом этди мўйсафид.— Яхши аёл эди марҳума. Шу ерда ўламан, деб туриб олди. Шу ерда ўлди.

— Ўғли-чи? Ўғли бор эди-ку?— сўради Низомиддин ака.

— Бор ҳали ҳам. Иван Федорович,— деди мўйсафид.— Ҳарбий учувчи. Уйланган. Қизи бор, Таня. Онасининг ҳурмати учун шундай исм қўйган. Ҳар йили кузда келиб кетади.

— Қабрини билмайсизми?

— Нега билмас эканман? Биламан. Ҳов анави, қайнзорнинг этагида қабри.— Мўйсафид дарёнинг ўнг соҳилидаги кичик ўрмонни кўрсатди.— Ғалати аёл эди. марҳума. Қабристон бу ёқда қолиб, иккита солдат кўмилган жойга кўмасизлар, деб васият қилган экан. Уша жойга кўмдик.

— Иккита солдат?— ҳайрон бўлиб сўради Низомиддин ака.

— Ҳа, уйни тузатиб берган иккита солдат.

— Улар ўлганми?

— Ҳалок бўлишган. Уйни тузатиб кетишаётганда минага дуч келишган. Иккалови ҳам ўша заҳоти ўлган. Татьяна ўзи кўмган уларни. Ҳов ана. Қабрлари шу ердан ҳам кўриниб турибди. Мана энди ўзи ҳам ётибди уларнинг ёнида. Сиз ким бўласиз?

— Мен... мен ҳам шу ерда жанг қилганман,— деди бўғилиб Низомиддин ака ва бўшашганича мўйсафид кўрсатган ўрмон томон оҳиста юриб кетди.

Яқинда қад кўтарган кичкина қайнозор этагида учта қабр ёнма-ён турарди. Четда оқсоқол — Шекен Омонқулов қабри, ўртада — сибирлик полвон Иван Стадоруб, унинг ёнида Таня... Татьяна Гилович... Учаловининг қабри устида қизил рангга бўялган темир юлдуз. Низомиддин ака кўзларидан ёш қуяилиб лабларига тушганини сезмади. Узоқ турди қабрлар ёнида. Ҳазилкаш оқсоқолни кўз олдига келтирди, сибирлик полвон

йигитни... Ачинди уларга, айни вақтда күнгли ғуур билин түлди. Ваъдаларининг устидан чиқишибди, уни ёлгончи қилиб қўйишмабди. Кейин Таняни кўз олдига келтирди. У уий ёнида боласини кўтарганича меҳр ва умид билан ҳамон унга тикилиб тургандек эди...

Белоруссияда у беш-олти кун қолиб кетди. Брестда бўлди, Минскда. Жанг билан босиб ўтган йўлларини бир бошдан эслади. Урушнинг барча кулфатлари, совет кишисининг матонати акс этган Хатинда бўлди. Қаерга бормасин, ҳамма ерда Танянинг мовий кўзлари хаёлидан кўтарилемади. Бу кўзларни у энди мутлақо унумасди.

Ҳаётининг сўнгги дамларигача энди бу кўзлар солдатлик ва одамийлик бурчига содиқ қолган жанговар ўртоқлари — оқсоқолни, сибирлик полвон йигитни эслатиб турарди.

«ИЛ—18» самолёти хирмонга ёйилган пахтадек булутлар устидан Тошкент томони учиб борар экан, Низомиддин аканинг вужуди алам ва айни вақтда чексиз ғуур билан тўла эди. Шу алам ва ғуур билан у олис сафар олдидан дилини хира қилган санчиқни ҳам, сийрак соchlари орасида мингёёқдек ўрмалаган совуқ терни ҳам унутиб юборди.

## МУҲАББАТ ҚҰШИГІ

1

Кимнинг овози бу? Ким куйлаяпти? Булбулмикан сайраётган? Саъвамикан? Булбул эмас сайраётган, саъва эмас, Бай Василнинг гүзал қизи — Атина бу!

2

Бай Василни ўлдиришди. Қоратоғ этагида, маккор ёвнинг ўнтасига бас келди у бир ўзи. Үн бириңчи ёв ташланиб, қилич санчы бағрига... Етти ёшли ўғли Илчо, гүзал қизи Атина ёлгиз уйда ёлғиз қолди, етим колди иккиси.

3

— Ўглим,— деди ўлаётиб Бай Василь Илчосиға.— Сен етимсан, опанг етим, сўзларимни унутма: ўч олгин сен душманлардан, ҳам асрагин опангни!

4

Бай Василни кўмдилар, Марица қирғоғига. Илчо билан Атина-чи, етим қолди иккови!

5

Кунлар ўтди, ойлар ўтди, Атина — енгилтак қиз, оғир жангда ҳалок бўлган отасини унудди... Қачон кўрманг, деразанинг ёнида, у кўчада. Тогу тошда акси садо қўнғироқ овозидан. Кўнгил қўйди Атинага йигит-

ларнинг қанчаси. Дейишарди ғуур билин: «Ким куй-  
лаяпти экан? Булбулмикан сайраётган, саъвамикан?  
Булбул бундай куйлолмайди, саъвалар ҳам! Бай Ва-  
силнинг гўзал қизи Атина — бу!»

6

Шўрлик Илчо совчилардан гангид кетди, ахир де-  
ди йигитларга, отасидек салмоқлаб:

— Атинанинг ўзида гап, ихтиёри ўзида!

Атина-чи? У ҳеч кимни ёқтирасди, суймасди. Қаҳ-  
каҳ уриб йигитларни мазах қилиб куларди. «Кимга  
кўнгил қўяркин у, кимга салом бераркин?» Қишлоқ-  
даги бирон одам буни сира билмасди...

7

Кунлар ўтди, ойлар ўтди, йил ўтди. Лаънати ёв яна  
келди бостириб.

8

Кўчалар қон. Доду фарёд тутиб кетди оламни.

9

«Э, парвардигори олам! Ўзинг мадад бер, босқинчи-  
ни еримиздан ҳайдайлик».

10

Ешу қари жангга кирди... Тангри мадад бермади.  
Беглар беги қилич солди шафқат қилмай ҳеч кимга! Гў-  
дакларнинг устида у тулпорини ўйнатди, кексаларнинг  
кўз ёшига парво қилмади мутлақ, мевалари ҳил-ҳил  
пишган bogларни пайҳон этди, ўт чақнади кўзларида,  
огзи олов пуркади, ятағони чақмоқ чақди йигитларнинг  
бошида, аёлларнинг кўкрагидан қон аралаш сут оқди...

11

Ҳаммасини кўриб турди деразадан Атина, киприк-  
лари маржон тақди аламзада ёшидан. Шу топ нима  
бўлди ўзи?! Биби Маръям, кўмак бер! Беглар беги ду-  
булғаси учиб тушди бошидан. Кўриб қолди уни ногоҳ  
бизнинг гўзал Атина...

— Йигит бўлса шундай бўлса! — деди яшиндек чақ-  
наб. Ҳали бундай латофатни кўрмаганди умрида. Қошли-  
лар худди шоҳи чойшаб гулидаги ёй каби, бургут кўя-  
лар санчилади ўқдай қизнинг қалбига. Чўчиб тушди  
қиз бечора ва севинчдан бўшашиди... Гойиб бўлди жанг-

га кирган йигитларнинг барчаси, қони дарё бўлган  
Шётр, Стефан ҳам йўқолди, қўнгир сочли Минчо, Генчо,  
Аспарухлар йўқолди... Қулогига кирмай қолди аёллар-  
нинг йигиси. Нима бўлди ўзи шу топ? Биби Марьям, кў-  
мак бер!

12

Севиб қолди Бай Василнинг гўзал қизи Атина, севиб  
қолди отасининг ашаддий душманини, она юрти унга  
берган нонни ҳаром қилди у, отасини унуди у ва зо-  
тини унуди.

13

Гайдукларим, азаматлар, нафратингиз ўринли!  
Аммо қўшиқ тугамади, қулоқ беринг тугатай.

14

Оғир жангда беглар беги ғолиб чиқди. Асиrlар зан-  
жирбанд бўлди. Ўлжалар хачирларга ортилди.

15

Тўхтанг, тўхтанг! Ким келмоқда? Келаётган ким  
ўзи? Кампирми у, ё бевами ёлғиз қолган бу юртда?  
Йўқ! Атина, Бай Василнинг гўзал қизи — Атина!

16

Келинчакдай ясанган у. Лабларида табассум,  
Юришлари товус каби хиромон ва мулойим. Тўғри  
келди майдонга у, салом берди ғолибга — бекка назар  
ташлади у оймомодек эгилиб. Кейин деди:

— Бегим, сенга ошиқ бўлдим, қулингман! — шун-  
дай дея тиз чўқди қиз тулпор билан ёнма-ён.

17

Ҳамма ҳайрон. Ҳатто, бек ҳам ҳайрон бўлди авва-  
ли. Кейин қизни даст кўтарди ва ўтқазди олдига, мо-  
миқдай оқ кўкрагидан бўса олди лаънати!

18

Оҳ, Атина, ноқобил қиз, сени нима жин урди?!  
Қаердасан, Илчо, отанг ҳурмати — кўр опангни!

19

Беглар беги отига қамчи босди, йўлга тушди асиrlар.  
Қаердасан, Илчо, отанг ҳурмати — кўр опангни!

Е ўч олгин хўрланган зот, тупроқ учун улардан, ё бўл-  
маса бош олиб кет аламдийда қишлоқдан.

20

Илчо хомуш. Кўзи йўлда, карвон кетган томонда.

— Ота, ўзинг қўлла,— дерди ичидаги дам-бадам.—  
Қувватинг бер қўлларимга, ўч олайин душмандан...—  
Шундай деди, билаклари кучга тўлди гойибдан, уйга  
кирди, отасининг камарини боғлади, елкасига милтиқ  
осди, қилич тақди белига.— Ота, ўзинг қўлла мени,  
қувватинг бер қўлимга!

21

Беглар беги куйламоқда Атинага жўровоз, асир-  
ларнинг қўллари мушт, лаблари тугун, бошлар хам.

— Бадбахт дунё! Бай Василда нима қасдинг бор  
эди?! Бечора қиз юрагини заҳарладинг не учун?!

22

Олисадан отлик кўринди. Қўллар бўлди соябон.  
Бу — мусулмон ўғли эмас, бу — хўрланган Ер ўғли!  
Келаётган бу паҳлавон азамат йигит — Илчо!

23

Девдек наъра тортди Илчо, беглар беги тўхтади.  
Атинани титроқ босди, хўжасига ёпишди.

24

— Эй, лаънати беглар беги! Юрак бўлса отдан туш,  
куч синайлик якка-якка, ё бўлмаса ўликсан!

25

Беглар беги ёйдек эгри қиличини сугурди, ботир,  
Илчо шердек бўлиб қаршисига югурди.

26

Олишдилар роппа-роса уч кечаю уч кундуз, қилич  
синиб, навбат келди, навбат келди ханжарга...

27

Укасининг ботирлиги Атинани шод қилди. Кўпик  
сочди беглар беги дош беролмай ҳужумга. Боши узра  
ўйнаб кетди ботир Илчо ханжари. Шу топ... Нима бўл-

ди ўзи?! Биби Марьям, күмак бер! Лаънати қиз қал-қон қилди бекка ўз кўкрагини! Юрагини кесиб ўтди укасининг ханжари... Беглар беги қочди отга қамчи уриб кетма-кет. Йиқилди қиз.

— Бегим, тўхта! — бекка томон чўэди қўл. Беглар беги тўхтамади, чанг ичиди йўқолди...

28

Оҳ, Марица, Марица, ғамгин ва сокин дарё, қирғо-гингдаги қабрлар кимларнинг қабрлари? Гўр бошида дев каддини букиб йиглаётган ким?!

— Бай Илчо бу. Бай Басилнинг содиқ, асл фарзанди. Қабрларда Бай Басиль ҳам Атина ухламоқда... Йи-гирма йил бўлди Илчо ҳар кун келар бу ерга, қабрларга янги гуллар қўяди-да, йиглайди.

— Ота, мени кечиргил, сен, гуноҳимдан ўтгил сен, севикли Атинангни асраб қола олмадим!

## ГАЙДУК ҚИЗИ

1

Купрившица воқеаси қўшиқ бўлса арзийди, рухсат этинг, куйлаб берай, қойил қолинг эшитиб...

2

Беш бор қўлдан-қўлга ўтди узоқ йили бу қишлоқ, юзлаб болгар ҳалок бўлди, қанча-қанча уй ёнди, дала-ларда кишинар эди эгасиз қолган отлар, буруқсаган ўтида етимлар йиглар эди.

3

Олтинчи бор ҳужум қилди душман яна куч тўплаб, тог ичига яширинди — чорасиз исёнкорлар. Сўнгги марта назар солди қишлоқ томон Бай Крум, беихтиёр кўз ёшланди, лаблар недир сўзлади. Ким билади не деди у? Режа тузди неларга?! Балки қасам ичгандир у, яна қайтиб келишга, қонхўр душман калласини найзасига илишга! Балки ўйлар уйда қолган икки арзандасини. Уйда қолган Лилиана, Христони эзилиб!

— Атаман,— дер аллаким.— Бўлди, энди кетайлик.

— Бўлди,— деди кўкрак кериб бизнинг жасур Бай Крум.— Кетсак кетдик, аммо билки, қайтишимиз муқаррар!

4

Йўлга тушди Бай Крумнинг газабнок йигитлари,

йўлга тушди ҳасам ичиб яна қайтиб келишга, қонхўр ёвлар калласини найзаларга илишга!

5

Уйда ёлғиз атаманинг икки бахтсиз фарзанди — етим қолган Лилиана, етим қолган Христо. Кўзлари тўрт икковининг ота кетган томонга, икковининг кўзларида ялтиради ўшлари. Лилиана ўша ёзи тўлган эди ўн тўртга, Христо-чи, эндиғина ўнга қадам қўйганди.

6

Гайдукларим, кўряпсиз, улар ҳали ёш эди, улар ҳали ҳаёт нима, ўлим нима — билмасди, улар ҳали бола эди, зулм нима билмасди, улар ҳали бола эди, қуллик нима — билмасди!

7

Кечга яқин Лилиана танбалади эшикни, занжир солди ичкаридан дарчаларнинг барига. Яхши тушлар орзусида ўрин тўшаб эртароқ, укасини қучоқлади, мажбур қилиб ухлашга... Шу топ бирдан гумбурлади недир эшик ёнида, деразалар чил-чил бўлди, гала-ғовур бошланди.

8

Нима бўлди, не фалокат яна келди бу уйга?

9

Лилиана чўчиб тушди ва югурди эшикка, қай кўз билан кўрсин шўрлик — эшик тўла ёв эди. Эшик тўла қон деб келган, мол деб келган одамлар!

10

— Тўхта, опа, оча кўрма! — деди шунда Христо. — Тўхта, опа, сени аввал яширайин бир ерга...

Хаёлига нелар келиб, рози бўлди шўрлик қиз, яширинди тахмонга у, укасига мўлтираб.

11

Ўн нафардан ортиқ эди бостириб кирган душман, ҳар биттаси Христотга тўртта келарди лофсиз.

12

— Қани сўйла, кофир ўғли, отанг кетди қаёққа?— деди бири Христонинг елкасига мушт уриб.— Христодан садо чиқмас, кўзида ўт чақнарди.— Сўйла, дейман, кофирвачча, отанг кетди қаёққа?— Христо жим, тиши тишда, қўллар муштга тугилган...

13

— Сўйла,— деди яна бири.— Айтсанг омон қоласан, қишлоқнинг энг гўзалини хотин қилиб оласан...

Душман бари қаҳ-қаҳ урди. Христодан садо йўқ. Шунда кимдир қулочкашлаб урди юзи аралаш, гандираклаб йиқилди у, аммо овоз бермади. Шундан кейин нима бўлди, билолмади Христо.

14

Моматалоқ бўлди бадан, бирон соғ жой қолмади, суяклари зирқирарди тепкиларнинг зарбидан, охир чидаш беролмади, ҳушдан кетди Христо.

15

Кўз очганда шўрлик бола, Лилиана бошида — ўлтиарарди юм-юм йиглаб, ўлтиарарди қон ютиб.

16

Ташқарида эса, душман ўт қаларди гулканга.

17

— Опа, кўрдинг,— дер Христо, сотқинлик қилганим йўқ, жасур отам маконини айтганим йўқ душманга, лекин, опа... чидолмайман яна шундай қилишса,— шундай деди шўрлик бола, дарё бўлди ёшлари.

18

— Қўй, йиглама, ўзингни бос,— юпатди Лилиана.— Отанг каби мардлигинги ўзим кўриб турибман. Қўй, йиглама, ўзингни бос, сен ҳақиқий гайдуксан!

19

Душман яна уйга кирди Христони эзиш-чун. Уйга кирди ва лол бўлди Лилианани кўриб.

20

— Сен қаердан пайдо бўлдинг? — душман сўради ундан. Қиз қаддини ростлаб деди:

— Мен шу ерлик бўламан, Бай Крумнинг қизиман мен, атаман Бай Крумнинг...

21

— Сўйла йўқса, эй, гўзал қиз, отанг кетди қаёққа?

22

Лилиана бошин әгди, неларнидир ўйлади, ҳушсиз ётган укасига термилди меҳр билан. Қейин деди:

— Майли, айтай, фақат битта шартим бор: сотқин-лигим билинмасин, укам буни билмасин!

23

Шу заҳоти қилич узди Христонинг бошини, бу даҳшатни кўриб турди Лилиана дарчадан. Юрак-бағри зардоб бўлди, ёш қоплади юзини, аммо, нима қилсин шўрлик, ўзи шуни истади.

24

Душман деди:

— Энди гапир, гўзалларнинг гўзали, хизматларнинг әвазига олтинга гарқ бўлурсан.

25

Лилиана индамади, бирдан кўзи чақнади, бирдан ёвни ҳайрон қилиб, қаҳ-қаҳ урди ва деди:

— Мен укамдан чўчигандим, ҳали гўдак дегандим, нима қилсанг қилгин энди, сотқин йўқдир бу уйда!

## ЧҮПОН ВАСИЛЬ ВА УНИНГ ФАРЗАНДЛАРИ

1

Мен ҳам битта қўшиқ айтай, қулоқ солинг, гайдуклар! Аммо кўз ёш тўкманг сира, кўз ёш сизга ярашмас. Оёқ ости бўлган юртим шер гербини таққанда — майли, йигланг, кўз ёшингиз Искрдай дарё бўлсин.

2

Червенбрегда чўпон Василь яшар эди бир замон. Кулбаси бор эди унинг, фариштадек хотини, тангри ато қилган эди уларга етти ўғил, каттасининг эндигина мўйлови ниш урганди.

3

Ҳар ўн кунда бир келарди чўпон Василь уйига, болаларин бир-бир ўлиб шўртанг пешанасидан — гап сўпарди хотинидан подшо Шишман сингари:

— Хўш, онаси, қани сўйла, ким кирмади сўзингга? Тўполонда қайси бири ўзиб кетди йўғимда? Кенжатоининг Аспарухми, Николайми, Иванми? Е Ефтиими — эзмачурук, Йорданми ё Генчо?

Болаларга бир-бир қараб, дерди шунда онаси:

— Йўгингида ҳеч қайсиси тўполон қилгани йўқ.

Кенжатойим Асиарух ҳам, Николай ҳам, Иван ҳам,  
Ефтим ва Йордану жингалак соч — Генчо ҳам, йўғин-  
гизни билдирамди, ўтин ёрди, ер чопди...

Чўпон Василь курсанд бўлиб, мўйловини буради ва  
тонггача болаларга эртак сўйлаб берарди.

4

Бир кун тонгда қишлоқ бўйлаб нохуш хабар тарқал-  
ди: Имом Ҳасан лашкарлари бостириб келмоқдамиш!  
Консираган ёв галаси шамолдек елмоқдамиш!

5

Бутун қишлоқ темир қўргон бўлди қош қорайгунча,  
деразалар ёпилди-ю, танбаланди эшиклар. Бай Василь  
ҳам шундай қилди, фақат кўча томонга икки тешик  
очиб қўйди — отиш учун душманни.

6

— Келавер, ёв, кел Муҳаммад уммати! Червенбрег-  
да қўрқоқлар туғилганмас! Келавер, ёв, кел, Муҳаммад  
уммати, қаргаларга ем бўласан бу кеча!

7

Тонгга қадар давом этди тенгсиз жанг. Черков ёнди,  
кулбаларнинг кўпчилиги кул бўлди. Бандасига раҳм-  
дилкан мусулмонлар худоси, қаргаларга ем бўлмади  
маккор душман деярли. Ҳалок бўлди Червенбрегнинг  
азамат ўғлонлари! Ўғлонларки, ҳар биттаси тоғни тал-  
қон қилгудек, ўғлонларки, ҳар биттаси Усмон поиш-  
дан улуг!

8

Бай Василнинг боши қотди, нима қилсин бечора?!  
Душман зоти бас келолмас унинг мерганлигига, лекин  
ўқлар адо бўлди, ўнта қолди атиги! Бай Василнинг бо-  
ши қотди, нима қилсин бечора?! Ут қўйсинми кулбаси-  
га, қочсинми йироқларга! Ут қўйсинми уйига у, ёнди-  
рини ўзини, ўт қўйсинми уйига у — ҳалок бўлсин хо-

тини, ҳалок бўлсин тангри ато қилган етти фарзанди.  
Ҳалок бўлсин — Аспарухи, Николай ва Ивани, ҳалок  
бўлсин Ефтиим, Йордан, шалпангқулоқ Генчоси! Бай Ва-  
силинг боши қотди, нима қилсин бечора!

9

Битта ўқ ҳам кетди шу топ, битта ёвни йиқитди.

10

Тўққиз ўқинг қолди, Василь, душман эса тўққиз  
минг, тўққиз ўқинг қолди, Василь, нима қилмоқчисан,  
айт!

11

Бай Василинг боши қотди, юраги тўлди қонга,  
яшин каби чақнаб кетди бирдан ҳорғин кўзлари. Етти  
марта ўқ узди у, етти ўғил йиқилди. Кенжатойи Ас-  
парухи, Николайи, Ивани, жингалак соч — Ефтиим, Ген-  
чо барра мўйловли Йордан...

12

— Хотин, кечир,— деди Василь,— хотин, гуноҳим-  
дан ўт — ёв қўлида болаларим ўлмасин деб ўйладим.  
Ёв қўлида мен ўзим ҳам ўлишни истамайман! Мана  
сенга милтиқ, олгин, икки дона қолди ўқ, сени севган  
кўзларимни юмиб турай, от мени, юрагимни мўлжал-  
лаб от, мен отгандай Генчони, кенжатойинг Аспаруху  
Николай ва Ивани, жингалак соч Ефтиим билан тўн-  
гичинг Йорданни...

13

Қарсиллайди ногаҳон ўқ; уйни тутун қоплади, яна  
битта ўқ узилди... Ва сукунат босди уйни, қабристон су-  
кунати...

Ином Ҳасаи лашкарлари бостириб кирган  
замон — тўққиз ўлик ётар эди бир-бирини қучоқлаб.  
Бай Василинг лабларида ўйнар эди табассум, гўё  
дерди:

— Сўйла, хотин, ким кирмади сўзингга! Кенжатойинг Аспарухми, Николайми, Иванми? Ё Ефтиими—эзмачурук, Йорданми ё Генчо?

14

Гайдукларим, бош иргаманг, бу қўшиқ — афсонамас, мен кўрганман Бай Василни, шаробидан ичганман!

## ҚИРҚҚИЗ

1

Бу қўшиқни Добружада эшитганман, гайдуклар!

2

Баҳор экан, адир кўм-кўк, дов-дарахт кўм-кўк, мўй-сағиднинг соқолидек қоялар ҳам кўм-кўк. Боғлардаги гуллар атри тутиб кетган оламни, сигирларнинг сағрилари ялт-ялт қилар офтобдан...

3

Бава-вида ҳукмдори Султон Маҳмуд зерикиб, одам қўйди ҳар тарафга — ўн беш кун муҳлат билан.

— Келтиринглар болгарларнинг қизларидан бир тўда, гўзалиқда Боязиднинг ҳарамига мос бўлсин! Ором олай бу дунёнинг ташвишини унутиб, наврўз кирсин саройимга парилар либосида!

4

Жонҳолатда от қўйдилар навкарлар ўша куни. Маҳмудбейнинг истаги ўқ — бажармасанг ўликсан.

5

Гайдукларим, сиз баҳорнинг нималигин биласиз! Адир кўм-кўк, дарахтларнинг нозиккина барглари — бошларини қуий соглан зумрад исирғалардан. Добружа қизларининг қаҳқаҳаси сингари — юракларни қитиқлайди — дарёларнинг шовқини. Ҳамма ёқда баҳор иси — гўдакда, тогу тошда...

6

Баҳор билан гўзал эди ота-бобомиз ери, баҳор билан куртак ёзган эди ёшлар севгиси, қизлар юзи табассумдан барқ уради қуёшдек. Йигитларнинг қўшиқлари янгратарди дарани.

7

Бирдан осмон қора чойшаб ёпди кўм-кўк юзига, қонғулик босди душман пайдо бўлган қишлоқни. Кампирларнинг ноласидан юраклар бўлди зардоб ва йигитлар ғазабидан замин келди ларзага...

8

Гам бор бўлган уйда доим кулфат меҳмон, дейдилар, кампирларнинг ноласи ҳам йигитларнинг ғазаби—сира ёрдам беролмади — қизлар бўлди асира... Баҳор экан, ўша дамда, ажиг, гўзал навбаҳор. Мўйсафиднинг соқолидек қоялар ҳам кўм-кўк. Добружа қизларининг каҳқаҳаси сингари юракларни қитиқларкан дарёларнинг шовқини... Йўлда эса, шўрпешана асиралар астаста қадам ташлағ бош яланг, оёқ яланг.

9

Қадам ташлар қирқ нозанин, қирқта ҳарам бандаси, қирқталови ой билан тенг, париваш, бири Донка — кўзларини дengiz дейсиз, бири Люба — фариштанинг ўзгинаси, Лилиана — қирмизи юз, қоши камон, яна бири — онасиннинг арзандаси... Юрагимнинг ярасига туз сепмайин, ҳаммаси ҳам гўзалларнинг гўзали...

10

Султон Маҳмуд курсанд, боши кўкка етди. Ҳаммасини бир-бир кўрди — мол кўргандай... Кейин деди:

— Ҳарамимга жойлаштиринг, эртагача ювинтиринг, пардоз беринг. Эрта эса, базм қуурмиз шоҳлар каби, наврўз кирар саройимга парилар либосида.

11

Ҳарам тўлди бандиларнинг йигисига. Бунда қирқ қиз, қирқталови ой билан тенг. Бири Ляна — кўзларини дengiz дейсиз, бири Светка — фариштанинг ўзги-

наси, Каталина — қирмизи юз, қоши камон, яна бири — отасининг арзандаси... Ярим тунга қадар йиги ҳеч тинмади, шунда Донка кўзи чақнаб:

— Тўхтанг,— деди.— Дугоналар, йиги фойда берармиди?! Йиги ёвдан бизни озод қиласмиди?! Менинг битта таклифим бор, қулоқ беринг, ёв қўлида қул бўлгандан ўлмогимиз яхшироқ!

12

Тонг пайтида ланг очилди ҳарамнинг эшиклари, кириб келди Маҳмудбейнинг навкарлари бирма-бир. Аммо ҳарам бўм-бўш эди, кўринмасди бирон зот, ҳар биттаси ой билан тенг қизлар қани? Қани Донка — олтин соч қиз, қани Ляна? Қирмизи юз, қоши камон Каталина? Қани Люба — онасининг арзандаси??!

13

Маҳмудбейнинг кўзи ёнди газаб билан, ҳар тарафга одам қўйди — фойдаси йўқ. Хомуш бўлиб у юзланди девор томон. Шунда бирдан чўчиб тушди, тисарилди... Бава-вида зар панжара деворида қирқ жуфт кавуш турар эди қатор бўлиб, қирқ жуфт кавуш — қирқта қизнинг ор-номуси, қирқ жуфт кавуш — қирқта мардлик нишочаси! Пастда эса, қуёш бўлиб, чўғдай ёниб астасекин оқар эди сокин Дунай.

14

Маҳмудбейнинг кўзи газаб билан ёнди. Навкарларин тўплаб туриб шундай деди:

— Кофир қизлар агар тирик бўлса эди, биттасига алмашмасдим мингтангизни!

15

Баҳор экан ўша дамда, ажиб баҳор, боғлардаги гуллар атри тутиб кетган оламни. Ҳамма ёқда баҳор иси — қушларда-ю ўтларда, ҳамма ёқда баҳор иси — тогу тошда, одамда.

## САРКАРДА ПЕТРО

1

Паҳлавон Бай Петрони кўрган борми? Алам тўла суҳбатида бўлган борми?!

2

Паҳлавон Бай Петрони мен кўрганман. Алам тўла суҳбатида бўлганман! Шуҳратпаст укаси сотди уни. Бу қайгули воқеадир, оғайнилар.

3

Етти кун давом этди Силистра учун жанг, етти кун ер титради отларнинг дупуридан. Момагулдурак каби ботирларнинг овози янграб турди гоҳи у, гоҳ бу ерда етти кун. Дунай сувми ёки қон — билиб бўлмади мутлоқ.

4

Ботирларнинг ичида энг ботири Бай Петро! Ҳар қилич солганда у тутдек тўкиларди ёв! Найзасини отганда душман отдан қуларди. Бай Петро эса, кулиб, мўйловини бурарди.

— Саркарданинг кайфи чоғ! Демак, ғалаба бизда! — дейишарди гайдуклар уни кўрганда ҳар чоқ. Димитр эса хафа, ичини ит тирнарди...

5

Етти кун давом этди Силистра учун жанг, етти кун ер титради гайдуклар наърасидан. Ботирларнинг ичидаги ботири Бай Петро! Ҳар қилич солганда у тутдек түкиларди ёв! Димитр эса хафа, ичини ит тирнарди:

— Нега мен саркардамас, нега акам саркарда?!

6

Етти марта ёв чекинди — дош беролмай зарбага ва ниҳоят ҳийла қилди — ёллади Димитрни.

— Силистра сеникидир, саркарда ҳам сен ўзинг! Фақат бизга аканг керак, уни келтир сен тутиб! — шундай деди Алипошшо, қуллуқ қилди Димитр.

7

Нозу неъмат тўлиб кетди Димитр чодирида.

— Ака,— дер у.— Тонгга қадар ёв чўчийди ҳужумдан. Тонгга қадар дам олайлик, меҳмон бўл чодиримга! Ором олсин гайдуклар ҳам, отларга ем беришсин.

8

Йўқ, демади содда ака, йўқ демади Бай Петро. Ярим тунда қуллади у ука берган заҳардан ва наматга ўралди у ҳушидан кетиб мутлоқ.

9

Алипошшо ўтирибди ҳушсиз Петро олдида, ҳасад билан, ғазаб билан тикилар паҳлавонга. Бай Петронинг ҳушсизлиги — ҳушли жангчидан афзали.

— Занжирбанд қилинг уни ва элтинг Истамбулга, бу гайдукнинг ўлигидан тириги фойдалироқ!

10

Йўл юрди ёв карвони, йўл юрса ҳам мўл юрди. Найзали мезаналар кўринди бир ойдан сўнг. Қўнғироқлар жаранглаб, карнай-сурнай чалиниб, кутиб олди карвонни султон ҳиэмакорлари.

## 11

Фақат саройдагина күзини очди Петро. Үткір экан лаънати ука берган заҳари. Күзини очди Петро ва ҳеч нарса тушуммай аланглади атрофга. Бирдан ёнди күзлари, бирдан муштга айланди паҳлавоннинг қўллари. Мудҳиш тақдирни кўриб, йўлбарс каби ўкирди.

— Қайғурма кўп, Бай Петро,— деди султон илжайиб.— Қул бўлиш ёки ўлиш — жангчининг бошида бор! Бизга ўтгин, хизмат қил менга садоқат билан, шунда озод бўлурсан, олтинга гарқ бўлурсан!

## 12

Рози бўлмади Петро, бизнинг асир паҳлавон! Нафрат билан тупурди султон баҳарасига.

— Сенга хизмат қилишдан ўлганим яхшироқдир, сенга хизмат қилишдан қул бўлиш яхшироқдир!

Султон даргазаб бўлиб, жанжар отди Петрога, қоронғи бўлди дунё, кўzsиз қолди бечора. Кўzsиз қолди саркарда Бай Петро ўша куни.

— Ҳайданг,— деди султон,— бугуноқ саройимдан. Кўzsиз жангчи — ўқсиз камон деганинг ўзгинаси. Ҳайданг уни, бўлсин энди овора ва дарбадар, кўzsиз одам — тирик мурда деганинг ўзгинаси.

## 13

Йўлга тушди саркардамиз Бай Петро, йўлга тушди қўлда ҳасса, кўзда ёш...

## 14

— Паҳлавон Бай Петрони ким кўрган? Алам тўла сұҳбатида ким бўлган?!

— Бай Петрони мен кўрганман, кўп кўрганман, алам тўла сұҳбатида кўп бўлганман.

**15**

Шұхратпарат Димитр-чи?! У әнди йүқ. Ниятига  
етмади у, ўлдирилди...

**16**

Омон бўлсин, Бай Петромиз, омон бўлсин, қўшиқла-  
ри Болгария бўйлаб юрсин! Жарангласин Родопи-  
да, Қоратоғда, гайдукларга илҳом берсин, қувват бер-  
син!

## ОТА

1

Ефтим деган чол яшарди. Қоратоғ этагида, дәж-қончилик эди касби, әрта-ю кеч далада. Кулбаси бор эди хароб, ўлимтиқ бир җүкизи, иккى таноб ерда борғи — яшаш учун кифоя.

2

Бай Ефтимининг бор қувончи эди икки фарзанди, иккى ўғил, ҳар иккиси отасидай заҳматкаш. Бири тоғда ўтин терса, бири омоч ҳайдарди, шундай ўтар эди кунлар қайғусиз ва кулфатсиз.

3

Шундай ўтар эди кунлар Қоратоғ этагида, шундай ўтар эди кунлар бутун болгар элида...

4

Бир кун боғда эди Ефтиим, ўғиллар ҳам ёнида, от дупури эшитилди, кейин қий-чув бошланди. Бош күттарди ердан Ефтиим, йўлга тикди кўзини ва кўп ўтмай кўрди қишлоқ ёнганини буруқсаб. Бай Ефтиимни титроқ босди, қалтиради лаблари. Ким билади, балки шу топ ёлворгандир худога?

5

Қишлоқ эса, ёнар эди алангаси тоғ қучиб. Кимдир уввос солиб йиглар, кимдир сўкинар эди... Икки ўғил

икки ёқдан ёпишди отасига, газаб лов-лов ёнар эди икковининг кўзида...

6

Шу топ йўлни чанг қоплади, пайдо бўлди отлиқлар, пайдо бўлди тиш-тириғи билан қуролланган ёв. Пайҳон қилди экинларни от қўйиб ҳар тарафга. Кишан солди кейин душман икки ёшнинг қўлига. Бай Ефтимининг газабдан кўзлари чақнаб кетди. Бор кучини тўплаб туриб чанглал солди душманга. Лекин чол-ку? Чол бечора не қиласди қуролсиз? Не қиласди ўнта душман қуршаб турса атрофдан? Аламини ичга ютиб ялинди бекка шунда:

— Бегим, ўзинг раҳм қилгин, олиб кетма уларни. Ҳали улар ёш жуда ҳам, ҳали ҳаёт кўрганмас. Керак бўлсам мен амрингда, қулинг бўлай умрбод.

Қаҳ-қаҳ урди душман бари, қаҳ-қаҳ урди абллаҳлар!

— Эсинг борми? — ўшқирди бек. — Сен кимсану булар ким? Булар энди кучга тўлган жийрон отнинг ўзи-дир. Сен ким бўлдинг? Қари бир чол, бир оёғинг гўрда-ку? Сени бизга фойданг ҳам йўқ, зиёning ҳам тегмайди.

7

Шундай дея қамчи босди отига бек, лек шу топ, у тўхтади ва илжайди чолга қараб мулойим.

— Майли, эй чол, раҳм қилай ёшинг ҳурмати сенга. Болалардан биттасини, майли, ўзинг танлаб ол.

Бай Ефтимини титроқ босди, қалтиради лаблари, ким билади? Балки шу топ ёлворгандир худога — ёлворгандир бағри ёниб бу даҳшатли ҳукмдан, ёлворгандир лаънат ўқиб бебаҳт оталик учун.

— Нега жимсан? — сўз қотди бек. — Танла севган ўглингни! Танла, йўқса иккалови сотилади қул бўлиб.

8

Бай Ефтимининг боши қотди, нима қилсин бечора? Қай бирини танласин у? Илчо ёки Ивайло? Иккалови ўз фарзанди, иккалови ўз пуштидан — икковининг томирида оқади унинг қони! Бай Ефтимининг боши қотди, нима қилсин бечора?

— Ота, — деди шунда Илчо. — Ивайлони олиб қол. Мендан у ёш, кейин мендек... ўйинқароқ боламас.

— Йўқ, йўқ, ота, — деди шунда Ивайло уни бў-

либ.— Илчо қолсин ҳузурингда, Илчо мендан кучлироқ.

9

Бай Ефтиимнинг боши қотди, нима қилсин бечора? Қай бирини танласин у? Ивайло ё Илчони? Иккалови ўз фарзанди, иккови ўз пуштидан — икковининг томирида оқарди унинг қони.

— Бўл, чол, тезроқ! — дўқ урди бек.— Танла севган ўғлингни! Танла, йўқса иккалови сотилади қул бўлиб.

10

Бай Ефтиимнинг боши қотди, хаёл сурди узоқ вақт. Титроқ босди вужудини, қалтиради лаблари. Ким билади, балки шу топ ёлвордими худога? Ёлвордими бағри ёниб қутқаргин, деб бу даҳшатли тақдирдан? Иўқ, Бай Ефтиим йигламади, ёлвормади худога! Кўзи бирдан чўғдек ёниб, тикилди у душманга! Ба нафрат-ла деди:

— Лаънат! Лаънат! Лаънат, сен ит ўғлига!

11

Шу заҳоти у қулади душман ятагонидан. Йўлга тушди икки ўғил зардоб бўлиб юраги, йўлга тушди неларнидир сўзлаб қонсиз лаблари, иккови ҳам йигламади, ёлвормади худога!

306

## ГУЛ ВОДИЙСИ

1

Мен туғилдим гүзал воҳа — Гул водийси қўйнида, қулоқ солинг, сўзлаб берай бу водий қиссасини. Сўзлаб берай, нега бу юрт Гул водийси аталмиш.

2

Ботир Демир йўлга тушди тенгқурлари қатори. Йўлга тушди жанг қилиш-чун Родоли тоғларида. Уйда қолди ўн тўрт кунлик ойдек гүзал қайлиғи, уйда қолди чимилдиқдан кечакан Людмила.

3

Кунлар ўтди, ўн кун ўтди, ой ҳам ўтди пилдираб, Людмиланинг кўзи йўлда, эри кетган томонда. Ҳаёлида минг хил фикр, минг хил режа, орзулар... Лекин, дўстлар, кучли экан айрилиқнинг алами — ўзи сезмай Людмиланинг ранги бўлди заъфарон, кулиб турган кўзларини ғам пардаси қоплади. Яна қанча кунлар ўтди, йил ҳам ўтди пилдираб, ботир Демир отрядидан хабар бўлмади сира. Ғамга тўлди бутун қишлоқ, ғамга тўлди Людмила. Эрта тонгдан кўзи йўлда, эри кетган томонда, ўзи сезмай, гоҳи-гоҳи кўзига ёш келади. Ҳаёлига энди кирмас минг хил режа, орзулар... Ҳаёлида битта фикр, омонми ёстиқдоши? Омонми паҳлавони, севигига интизори?

4

Жавоб қайда бу саволга? Ҳамма жим, бошлар әгик.  
Ҳамма маъюс, лекин кўзлар газаб билан ёнади, қони  
қочган лаблар тун-кун лаънат ўкийди ёвга!

5

Тонг маҳали йўлга тушди Людмиламиз бир куни,  
йўлга тушди, аммо қайга борсин бечора ёлғиз? Қайда  
унинг ботир эри, қайда унинг тулпори, шу йўл билан  
юрса агар етарми висолига?

Оқшом тушди далаларга, дарё боши қизарди, чи-  
гирткалар чириллаши солди юракка ташвиш. Олислар-  
да ит ҳуриди, от кишинади депсиниб, пага-пага булат  
ичра ним ранг ой сочди шуъла. Людмилани ваҳм бос-  
ди, қайтсинми орқасиға? Людмилани ваҳм босди, ни-  
ма қилсин бечора? Хаёл суреб туриб қолди кенг дала-  
да паршон, шу топ отлар дупуридан чўчиб тушди у  
бирдан...

6

Душман келди Людмиланинг эри кетган томондан,  
у бир эмас, ўн ҳам эмас, балки минг нафар бордир?  
Беглар беги уни кўрди ва тўхтатди отини.

— Ким бўлди бу ҳурилиқо? — сўради у навкари-  
дан.

— Голибона йўлингизга пояндоз бўлган гўзалі—  
жавоб берди содиқ навкар бошин эгиб ергача.

— Олиб кетинг, йўқса уни, бирга ором олурмиз.—  
Шундай деди беглар беги, қамчи босди отига.

7

Людмиланинг ранги сўлғин, лек томирда қон ўй-  
нар, Людмиланинг ранги сўлғин, ертўлада у ёлғиз.  
Хаёл сурар ғамга ботиб, кўзларида ёш маржон. Қайғу  
тўла юрагига энди кирмас орзулар. Миясида битта  
фикр, нима қилсин энди у? Бўйсунсинми голиб бекнинг  
буйруғига шу топда? Ё қочсинми бу даргоҳдан рози бў-  
либ ўлимга?

8

— Бегим,— деди беглар беги ётоғига кирганда.—  
Менинг битта орзум бордир, рози бўлсанг, қулингман.

Рози бўлсанг, бир умрга чўринг бўлиб қоламан. Истагинг не, ҳаммасини бажараман бегумон. Орзум шуки, ёrim ётур сен келган йўл устида, бир зиёрат этиб келай, курсанд бўлсин арвоҳи, истагинг не, барчасига рози бўлурман шунда.

Беглар беги мафтун эди ёш жувоннинг ҳуснига, рози бўлди ва:

— Тонгача, майли бориб кел,— деди.

9

Йўлга тушди Людмиламиз, зардоб бўлиб юраги, йўлга тушди қанча ташвиш, хаёл билан бечора. Ва бир маҳал етиб келди Марица қирғоғига. Шунда яшин каби кўнглин тилиб ўтди бир фикр, бўйсунсинми қонхўр бекка, ё ўлсинми шу ерда? «Естиқдошим, мени кечир, роҳатим кўролмадинг, паҳлавоним, мени кечир, содиқлигим кўрмадинг!»— шундай дея, ханжар урди кўкрагига Людмила ва йиқилди беҳол-беҳуш Марица қирғоғига. Қони дарё бўлиб оқди, қони сувга қўшилди... Шундан бери Марицанинг суви қизил ранг олмиш, шундан бери бу водийда қизил гуллар ўсармиш, шундан бери бу водийни Гул водийси демишлар...

10

Шу водийни ким сайр қилса, шу гуллардан ким уза, вафо унга ёр бўлармиш, баҳт кулярмиш умрбод. Ҳар гунчада Людмиланинг соғ қони сақланармиш, ҳар бир гулда барқарормиш Людмиланинг севгиси!..

## ХАДИЧА

У ётарди гор ичида бир неча кундан бері, қайғу билан тұла әди аламзада юраги. Нима бўлди? Нега келмас ёнига севгилиси? Нима бўлди? Унутдими? Ё топдими ўзига эр?! Шу хаёллар гирдобида ётар әди Сайфиддин — Қоратогда донғи кетған паҳлавон ва қароқчи. Ётар әди ва ўйларди хотини Хадичани, ўйлар әди, тиши-тишга тегиб шўрлик ғазабдан: нима бўлди? Нега келмас ёнига севгилиси? Унутдими, ё биронта айлантирди бошини? Айлантирса арзигулик Хадичанинг ҳусни бор: икки юзи Гул водийсими безаган лолалардек, қошлар худди паҳлавонлар қўлидаги ёй каби, лаблар худди атиргулнинг ғунчасидай хушбичим, момиқдек оқ кўкраклари Червенбрег олмаси... О, Хадича!.. Нима бўлди? Нега сендан дарак йўқ? Ноқобил эр, қароқчини унутдингми, вафосиз! Шу топ нима қилмоқдасан? Үзга эркак қўйнида ётибсанми ёки?.. Йўқ, йўқ! Үзинг кўмак бер, олло! Бу даҳшатли хаёллардан қутқар гарип бандангни!..

2

Шиддат билан сакраб турди ўша туни Сайфиддин, фордан чиқди, аланглади атрофга бир дақиқа! Сунгра юрди қишлоқ томон хавф-хатарни ўйламай. Елкасида қўшотари, қўллари мушт ғазабдан...

Кириб келди қишлоққа у қоплон сингари пусиб, ҳаяжондан титраб секин тақиллатди эшикни.

— Ким у? — деди ичкаридан қўнғироқдек бир овоз. Эшитди-ю, қон қуюлди қароқчининг бошига!

— Ким бўларди! — зарда қилди. — Худо қўшган әрингман. — Занжир бирдан шарақлади, эшик очилди шу зум, рўпарада пайдо бўлди қароқчининг хотини — Хадича!

— О, секинроқ!.. — деди жувон сесканиб. — Қишлоғимиз аскарларга тўлиб кетган, секинроқ!..

Ичкарига кирди Сайфи, қўл узатди ёрига, соғинган лаб шивирлади неларнидир шу маҳал, бошлар бошга суюнишди, кўкрак тегди кўкракка. Ба тонггача ором олди ёр қўйнида қароқчи... Тонгда эса, йўлга тушди яна горига томон, йўлга тушди яна пусиб, аскарларга кўринмай.

— Қани сўйла, эринг қайдা? — деди тонгда юзбоши: Хадичани ваҳм босди, ким сотди экан уни? Ким кўрибди ярим тунда эри келиб кетганин? Е юзбоши алдадими, синамоқчими уни?

— Қайдан билай? — деди жувон. — Эрим қочган сизлардан, йилдан ошди кетганига. Қаерда, мен билмайман.

— Ёлгон гапнинг! Туни бўйи бирга әдинг у билан. Е бошлаб бор, ё бўлмаса ўласан шу қўллардан! — ва юзбоши имо билан қўрсатди аскарларни, Хадичани ваҳм босди: ҳовли тўла аскарлар, ҳар биттаси арслондек, тикиларди шўрликка. — Бошлаб борсанг, соғ қолади, — деди юзбоши шунда, — соғ қолади ва қайтади уйингга.

Хадича жим. Минг хил фикр чулғаб олган бечоранинг бошини. Нима қилсин? Нима десин? Душман кутар бетоқат.

— Қапи бўл! Иўлни бошла! — деди яна юзбоши. Но-чор йўлга тушди жувон, ёши кўзда шашқатор, йўлга тушди, орқасида эрининг жаллодлари.

Она қишлоқ ортда қолди, ортда қолди далалар. Ортда қолди биринчи бор Сайфиддин қучган сой ҳам. Таниш сўқмоқ йўл бошланди, висол йўли — ёр йўли, қай-

тұға эш, серюлдүз тун шодликка зор-зор йўли... Төгжам келди. Хадича жим, қадам босар зўр-базўр, яқин қолди, яқин қолди таниш горга! Е, худо! Асра ўзинг павохингда шўрпешана бандангни!..

6

Гор олдида ўлтиради Сайфи пастга тикилиб, сўқмок йўлда бирдан недир ялтиради ва сўнди. Нима бўлди? Ким бўлдийкин? Форга кирди у шошиб, ханжарини белга тақди, милтигини ўқлади. Шу топ овоз келди пастдан:

— Сайфиддин чиқ! Бу менман! Агар тушсанг тегиши майди, вაъда берди юзбоши!

Олов бўлиб ёнди шу топ, титраб кетди Сайфиддин:

— Нима қилдинг, сотқин хотин! — алам билан қичқирди. Төг гумбурлаб кетди шунда: ўқ узганди Сайфиддин, ўқ узганди мўлжал қилиб Хадича кўкрагини...

\* \* \*

— Кейин нима бўлди, дерсиз? Эсимда йўқ, гайдуклар, пастга тушиб, балки ўзи асир бўлгандир ёвга? Лекин бунга ишонмайман. Сайфи пахлавон эди, ё қочган, ё олишиб, мардларча ҳалок бўлган.

## МУНДАРИЖА

|                               |     |
|-------------------------------|-----|
| Юлдузлар . . . . .            | 5   |
| Хусн . . . . .                | 14  |
| Ҳаёт қўшиги . . . . .         | 22  |
| Кўк дафтарнинг сири . . . . . | 30  |
| Абдулла қовуичи . . . . .     | 41  |
| Баҳор . . . . .               | 49  |
| Ширинсой оқшомлари . . . . .  | 57  |
| Олгин япроқлар . . . . .      | 66  |
| Баҳор нафаси . . . . .        | 69  |
| Меҳр . . . . .                | 74  |
| Ҳайкал . . . . .              | 78  |
| Чарос . . . . .               | 78  |
| Қиёмат қарз . . . . .         | 82  |
| Соат . . . . .                | 90  |
| Дутор . . . . .               | 92  |
| Бобоёнгоҳ . . . . .           | 94  |
| Кўприк . . . . .              | 105 |
| Гул сотувчи қиз . . . . .     | 113 |
| Куз ҳавоси . . . . .          | 124 |
| Совга . . . . .               | 134 |
| Йўлда . . . . .               | 142 |
| Номус* . . . . .              | 164 |
| Маруся холанинг милтиги*      | 179 |
| Вела* . . . . .               | 188 |
| Тун* . . . . .                | 195 |
| Мен русман* . . . . .         | 203 |
| Сўнгги сафар* . . . . .       | 211 |
| Мұҳаббат қўшиги . . . . .     | 224 |

|                                   |     |
|-----------------------------------|-----|
| Гайдук қызы                       | 229 |
| Чупон Василь ва унинг фарзандлари | 233 |
| Қирқүйз                           | 237 |
| Саркарда Петро                    | 240 |
| Ота                               | 244 |
| Гул водийси                       | 247 |
| Хадича                            | 250 |

*На узбекском языке*

**УЛЬМАС УМАРБЕКОВ**

**НЕОПЛАТНЫЙ ДОЛГ**

**РАССКАЗЫ**

Редактор *М. Мирзоидов*

Рассом *Г. Жирнов*

Расмлар редактори *А. Киса*

Техн. редактор *Э. Сайдов*

Корректор *Ш. Соатова*

османхонага берилди 12/ХI-1975 й. Босимга рухсат этилди 7/I-76 й. Форма-  
ти 84×108 $\frac{1}{4}$  Босма л. 8,0. Шартли босма л. 13,44. Нашр л. 12,07. Тиражи  
0000 Р. 10108. Гафур Гулом комидаги Адабиёт ва санъат нашриёти, Тош-  
кент, Навоий кӯчаси, 80. Шартнома № 88—75

убекистон ССР Министрлар Советининг Нашриётлар, полиграфия ва китоб  
видоси ишлари бўйича давлат комитетининг Тошкент полиграфкомбинатида  
корориги босилди. Тошкент, Навоий кӯчаси, 30. 1976 йил, заказ № 801.  
видоси 48 т.

Умарбеков У.  
Қиёмат қарз. Ҳикоялар. Т., Адабиёт ва санъат наш-  
риёти, 1976.

256 б.

Бу ҳикоялар турли йиллар маңсулы. Лекин уларнинг ҳаммасини авторнинг деярли бутун пижодига қос бўлган бир тема — одамийлик, инсон деган улуг, муқаддасномга лойиҳа бўлиш гояси бирлаштирган.

Автор давримизда кишилари ҳакида ёсадими в олис ўтмиш лавзалари ни кўз олдимида жонлантирадими — ҳаммасида биз ҳаёт ташвишларига, кувонч ва орауларга тўла одамларни кўрамиз, уларнинг бахти ва муҳаббатига, қайту ва аламларига шерик бўламиз, қайгурамиз ва қўғоламиз.

Умарбеков У. Неоплатный долг.  
Рассказы.

